












ET FLUVIUS EGREDIE-  
BATVR DE LOCO VOLUP-  
TATIS AD IRRIGANDVM  
PARADISVM, QVI INDE  
DIVIDITVR IN QVATVOR  
CAPITA

Gen: Cap: II:









COLLIS PARADISI  
A M O E N I T A S,

S E U

SACRI CONVENTUS  
ASSISIENSIS HISTORIÆ

L I B R I I I.

O P U S P O S T H U M U M


PATRIS MAGISTRI FRANCISCI MARIÆ ANGELI  
à Rivotorto Ord. Min. S. Francisci Conventualium.

*IN LUCEM EDITUM*

Opera, & Studio Fratris FRANCISCI ANTONII FELICIS CAROSI  
de MONTE LEONE Provinciæ Sancti FRANCISCI  
ejusdem Ordinis Sacerdotis.

SANCTISSIMO D. N.

CLEMENTI XI.  
PONT. OPT. MAX.



MONTEFALISCO, MDCCIV.

---

Ex Typographia Seminarii. *Superiorum permissu.*





Digitized by the Internet Archive  
in 2017 with funding from  
Getty Research Institute

<https://archive.org/details/collisparadisiam00ange>



SANCTISSIMO D. N.

CLEMENTI XI.

PON. OPT. MAX.



Istoriae Sacrosancti Affiliatis Cœno-  
bii coronide jam imposita, me tanti Operis fiducia  
alacrius properantem, patere ad tuos pedes pro-  
volvi, Pater Sanctissime. Enimvero unius ejusdem  
A 2 debi-



debiti ratio , qua membrum capiti , filius patri ,  
matriquè obstringitur , ad Libri editionem æquè ,  
ac ad oblationem me compulit . Collis Paradisi ,  
hoc est , Patris Francisci Domus , Domus omnium  
cæterarum Mater , & caput , hîc materia , & sco-  
pus . Ni ergo , & imprimendum volumen , & San-  
ctissimo S. Matris Ecclesiæ Capiti , & Patri sisten-  
dum ducerem , uti inofficiosum Membrum , ita Fi-  
lius , vel injurius crederer . Confert , ut hæc pagi-  
nas sub auspicatissimis Titulis prodeuntes , Sancti-  
tati Vestræ datas maluerim , peramplus , quo spar-  
sim illæ condecorantur , Christi Vicariorum catalo-  
gus , quorum in Assisientem Basilicam , ejusquè  
Sanctissimum Tutelarem certatim semper enituit  
effusissima charitas . Confert beatitudinis Vestræ in  
Franciscanos Conventuales , in Collem Paradisi , in  
Seraphicum Patriarcham , qui *Joannes primùm ,*  
*dehinc Franciscus* est dictus , avitum studium , re-  
center in Romanæ S S . XII. Apostolorum Basili-  
cæ instauratione , Pontificia munificentia , primi la-  
pidis jactu , Apostolicæ benedictionis thesauro si-  
gnificatum : nec inane C L E M E N T I S No-  
men , cujus vocabuli Quartus , Minorum cœtus  
non vulgaris opitulatur , Sancti Patris , & Delu-  
brum excoluit , & cadaver invisit , sexquè Bullis in  
hac Synopsi relatis , Sacri Conventus , & privilegia  
firmavit , & prærogativas adauxit . Jure igitur me-  
rito Franciscus ad Ecclesiæ fulcimentum selectus ,  
qui in suæ conversionis primordio Templum Divo  
Petro constituit , qui totus Apostolicus in Officio ,  
Romanus in Epitaphio , Vicechristus ubique inscri-  
bitur , qui , sequè , & suos peculiari Sanctæ Sedis  
pro-



protectioni commisit , hoc in codice expressus ,  
summi Hierarchæ thronum suaptè convenit , suæ-  
què Domus Historiam , quæ nulli , nisi Romani  
Pontificis jurisdictioni immediatè subjicitur , nul-  
li , nisi Romano Pontifici , dictat nuncupandam .  
Accedit aliud , haud inferioris profectò , quin gra-  
tioris fortasse notæ donarium , *Amoris Icon* , cujus  
Auctor , totius idem Operæ moderator , humilli-  
mè , & is provolutus , siquid inibi elegantiae resper-  
gitur , ex uberrimis Tuæ Sanctitatis Operum fon-  
tibus , unde Leones , Gregorios exprimis redivi-  
vos , ut ut est , derivatum fatetur . Hæc in causa  
sunt , quòd pusillorum munuscula humanitate , qua  
polles , quoque exhibentur , animo admittas ; ut pie-  
tatis vena , qua in Patriarcham duceris , in Alu-  
mnos exuberet . Interim D. O. M. cujus familiæ  
præes , cujus in propagandi Nominis gloria totus  
es , Christianæ Reipublicæ bono beatitudinem Ve-  
stram utrâque incolumitate sospitem quàm diutissi-  
mè servet . Romæ Kal. Aprilis MDCCIV.

SANCTITATIS VESTRÆ .

*Pedibus prostratus*

Fr. Franciscus Antonius Felix Carosi Min. Con.



# TITULORUM.

*Qui in hoc Opere continentur*

## I N D E X.



<i>Epulchrum sibi eligit moriturus Sanctus P. Franciscus . Lib. I. Tit. I. pag. 1</i>	<i>tur Basilicam , nulla ejus pars alibi relicta . Tit. XIV. 15</i>
<i>Corpus deponitur, examinantur miracula , Canonizatio decernitur . Tit. II. 2</i>	<i>Corpus mirabiliter surgit , stansque servatur . Tit. XV. 17</i>
<i>Ecclesiam ædificari ejus nomini , corporique servando Pontifex jubet . Tit. III. pag. 3</i>	<i>Gregorius IX. observat S. P. Francisci Corpus mirabiliter stans . Tit. XVI. pag. 18</i>
<i>Ædificium designatur , ædícula sepulchralis paratur . Tit. IV. 4</i>	<i>Helias iterum in Generalem eligitur , curam fabricæ resumat, eique insistit . Tit. XVII. 19</i>
<i>Sanctorum fastis B. Franciscus adscribitur . Tit. V. 5</i>	<i>Helias iterum à ministerio deponitur . Describitur exterior Collis Paradisi prospectus . Tit. XVIII. 21</i>
<i>Collis benedicitur , &amp; primus Ecclesiæ lapis collocatur . Tit. VI. 6</i>	<i>Sequitur Ecclesiarum descriptio . Tit. XIX. 24</i>
<i>Subterranea completur Ecclesia , &amp; aliæ duæ superexercitantur . Tit. VII. pag. 8</i>	<i>Conventus per suas partes describitur . Tit. XX. 26</i>
<i>Collis Paradisi Basilica Pontificiis privilegiis ditatur , Caput , &amp; Mater totius Ordinis Minorum constituitur . Tit. VIII. 9</i>	<i>Ecclesiæ , &amp; Conventus solemniter consecrantur . Tit. XXI. 28</i>
<i>Fidelium pietas nitet , &amp; mira celeritate operi insistitur . Tit. IX. 10</i>	<i>Innocentius IV. Sacræ Assisiensis domui Privilegia confirmat , &amp; auget . Tit. XXII. 29</i>
<i>Indicuntur Ordinis Comitia , &amp; Sancti Corporis Translatio . Tit. X. 11</i>	<i>In Assiensi Basilicæ B. Stanislaus Martyr Cracoviensis Episcopus Sanctorum albo describitur . Tit. XXIII. pag. 30</i>
<i>Ad Collis Paradisi Templum S. Corpus transfertur . Tit. XI. 12</i>	<i>Picturis utraque decoratur Ecclesia . Tit. XXIV. 31</i>
<i>Pontificis indignatio in Assienses , qui humiliati in gratiam redeunt . Tit. XII. 13</i>	<i>Sacella Ecclesiæ expendantur , quæ successivè picturis condecorantur . Tit. XXV. 35</i>
<i>Fratrum indignatio in Heliam , qui à Ministerio exauctoratur , &amp; fabricæ perficiendæ curam deponit . Tit. XIII. pag. 14</i>	<i>Vitræ fenestrarum valvæ picturis itidem exornantur . Tit. XXVI. 37</i>
<i>Integrum S. P. Corpus ad novam defer-</i>	<i>Sacri Conventus picturæ . Tit. XXVII. pag. 38</i>
	<i>Alexander IV. Sacræ Basilicæ fautor , &amp; opitulator ostenditur . Tit. XXVIII. 39</i>



<i>Urbanus , &amp; Clemens Quarti Sacra Basilica privilegia confirmant , &amp; augment . Tit. XXIX.</i>	41	<i>Seraphica Civitatis Antislites ex Minoritis selecti . Tit. XLI.</i>	64
<i>Privilegium immediatae subjectionis Apostolicae Sedi . Tit. XXX.</i>	42	<i>Qui Corpus S. P. viderint in Paradisi Colle reconditum . Tit. XLII.</i>	66
<i>S. Basilica totius Ordinis Caput , &amp; Mater peculiari dignitate appellatur . Tit. XXXI.</i>	43	<i>Relationes verae ab Apocryphis secernuntur . Tit. XLIII.</i>	68
<i>S. Basilica perpetuo à Fratribus Minoribus excolenda . Tit. XXXII.</i>	48	<i>Sedes Apostolica prohibet accessum . Tit. XLIV.</i>	71
<i>Reliqua diplomatis privilegia expenduntur . Tit. XXXIII.</i>	49	<i>Insignium Personarum corpora in Colle Paradisi quiescentia . Tit. XLV.</i>	pag. 73
<i>Eadem privilegia à Sede Apostolica confirmantur . Tit. XXXIV.</i>	48	<i>Sacrorum Stigmatum veritas ab Apostolica Sede comprobatur . Tit. XLVI.</i>	pag. 74
<i>Fabricae conservationi à S. Sede providetur . Tit. XXXV.</i>	49	<i>Epitheta Corpori S. P. Francisci à Sede Apostolica tributa, &amp; praerogativae Colli Paradisi concessae . Tit. XLVII.</i>	pag. 85
<i>Collis Paradisi sacris decoratur Reliquiis . Tit. XXXVI.</i>	50	<i>Rivortortum Sanctuarium . Tit. XLVIII.</i>	pag. 88
<i>De Sacrosancto Velo praecelsae Dei Genitricis . Tit. XXXVII.</i>	93	<i>Portiuncula Sanctuarium . Tit. XLIX.</i>	pag. 94
<i>S. Basilica Indulgentiarum thesauro locupletatur . Tit. XXXVIII.</i>	36	<i>Sacra Carcerum Eremitus . Tit. L.</i>	98
<i>In S. Basilica iustorum corpora resurrectionem expectant . Tit. XXXIX.</i>	pag. 59	<i>Sancti Damiani Conventus . Tit. LI.</i>	pag. 100
<i>Collis Paradisi virtute , ac gloria celebres incolae . Tit. XL.</i>	62	<i>Divae Clarae Templum , ac Monasterium . Tit. LII.</i>	103





FR. VINCENTIUS CORONELLI VENETUS  
Sac. Theol. Magister , ac totius Ordinis Min. Conventualium  
post S. Patriarcham FRANCISCUM Minister  
Generalis LXXVIII.

**C**um opus posthumum , cujus titulus est : *Collis Paradisi Amœnitas, sive Sacri Conventus Assisiensis Historiæ libri duo* à P. Magistro Francisco Maria Angeli à Rivortorto compositum , nec non adjunctum opusculum , cui titulus est : *Icon amoris CHRISTI, & FRANCISCI duabus Epigrammatum Centurijs expressa. Auctore P. M. Balthasare Paglia à Calatajerone Eminentissimi D. Cardinalis Barbadici Theologo* , duo ex Ordine nostro Theologi , quibus id commissum , recognoverint , & in lucem publicam edi posse probaverint , facultatem facimus , ut typis mandetur , si iis , ad quos pertinet , ita videbitur . In quorum fidem &c. Dat. Romæ 15. Septembris 1703.

*F. Vincentius Coronelli Minister Generalis .*

F. Dominicus Andreas Burgheius Sec. , & Assist. Ordinis :



*Imprimatur .*

Hieronimus de Giglis Vicarius Generalis .



*Imprimatus .*

Alexander Mazzinellius Ecclesiæ Cathedralis Montis-  
falisci Sacrista , Seminarii Rector , & Reverendissimi  
Patris S. A. P. Magistri Vicarius .





SACRI CONVENTUS  
ASSISIENSIS  
HISTORIÆ  
LIBER PRIMUS.



*Sepulchrum sibi eligit moriturus S. P. Franciscus.*

TITULUS I.



ERAPHICUS ille Vir, Minorum Patriarcha, Assisias Franciscus, Crucifixi Redemptoris imitator insignis, & imago admirabilis, in hujus vitæ limine constitutus, adstantes filios ad Dei amorem, & Regulæ observantiam adhortatus, eisque, ut moriens Jacob, benedictionum plenitudinem elargitus, antequam anima ejus Sanctissima corporeis vinculis soluta, beatam adiret Patriam, rogatus à sui Ordinis Generali Ministro F. Helia, ut sibi eligeret locum, quo corpus suum humari cuperet, qua pollebat, humilitate, respondit, omnium peccatorum nequissimo, hominumque vilissimo, abjectior planè debetur tumulus; ideòquè enixè te precor, ut corpus meum, cum jam erit exanime, in colle Inferni, ubi facinorosi plectuntur, sub ipso met patibulo sepeliri jures: si charitati, qua te, dilectissime, semper sum prosequutus, gratum aliquid rependere velis, unum, quod peto, quæso non deneges, imò promittas te quàm citiùs exequutioni daturum. Admirabantur circumstantes filii Patris humilitatem, nec siccis oculis talia fantem audiebant, simulque horrore afficiebantur, cogitantes, corpus illud Christi Jesu Stygmatibus insignitum, in sepulchro tam sordido tumulandum fore. Cum prudens, ac fidelis Præsul, quo præstabat, mentis acumine, mysterium penetrans, libenter, ait, amantissime Pater, quod jubes, exequar; nostris summum annuat votis Numen; firmiter hoc polliceor. Tunc hilaris Franciscus



## 2 *Sacri Conventus Assisiensis Historiæ*

divinis laudibus vacare cepit, nec unquam silvit, donec carne jam liber Spiritus Seraphicos inter Choros, æternum, dulcioremque concentum reddidit.

Erat locus ille extrà Civitatis Assisiensis mœnia, ad quem ex ea non nisi per Orientalem plagam accessus, vel descensus dabatur; planitiem referebat, quæ à Meridie, Occasu, & Septentrione alto undiquè præcipitio prominebat, scopulis, præruptisque faxis vallato, & in ora Occidentali prò fontibus patibulum erectum cernere erat. Ibi humillimus Patriarcha tumulari præcepit; ut qui in hac vita Domini Salvatoris imaginem præferebat, eundem quoque inter sceleratos reputatum, in morte, & post mortem imitaretur.

### *Corpus deponitur, examinantur miracula, Canonizatio decernitur.*

## TITULUS II.

**E**Mortalibus vix ad immortalem vitam Francisci translato Spiritu, & Seraphicos inter Concives locato, corpus ejus divinis consignatum characteribus, Assisi in Ecclesia S. Georgii, quo in loco puer literas didicerat, candida indutum tunica, serico tapete, aureis intexto floribus, à Domina Jacoba Romana cælitus admonita allatis, obvolutum, capsaque occlusum cupressina, depositum fuit. Servantur indumenta hæc adhuc integra in Assisiensi Sacratio; A transitu statim cœpit innumeris Dei servus coruscare miraculis.

Tunc temporis Petri sedem, & claves Gregorius Nonus tenebat, qui licet sibi satis probatam haberet Francisci sanctitatem, cum primus extiterit Ordinis Minorum Cardinalis Protector, illiquè propterea arcta necessitudine iungebatur, cui etiam Franciscus vivens, dum simul Bononia ad sacram Camaldulensium Tusciæ eremum pergerent, summum prædixerat Ecclesiæ solium. Attamen ut canonicè, ac ritè in re tam gravi procederet, totius Umbriæ Episcopis exactam inquisitionem, & juridicum omnium examen miraculorum commisit, quæ per eorum Civitates, Diæceses, ac ditiones evulgabantur ab eis, qui accepta palam fatebantur beneficia.

Expleto à B. Patris morte jam anno, Antistites præfati processus ad summum Pontificem transnitere, qui eos exactiori discussione examinandos sacro Cardinalium consensui remisit. Obstabant ex Purpuratis aliquot tanti negotii accelerationi; favebant alii, qui viventem Dei servum agnoverant, ejus sanctitatem probaverant, & quidam etiam vulnera ejus corpori divinitus impressa mirati erant. Omnes tandem vehementi capti desiderio corpus tam admirabile, quàm primùm videndi, in hanc sententiam convenere, dignum esse venerari in Ecclesia sanctitatem, quam nostræ Redemptionis signis signaverat summus ipse Pontifex Christus; cujus propterea Vicario retulerunt, abundè satis constare de virtutibus, meritis, donis, ac miraculis Dei famuli, adeoque ritè Sanctorum albo describi posse, & interim Beatum ab omnibus haberi, ac adorandum esse.

His peractis secum decrevit Gregorius Assisium adire, ibique cum tota Curia Canonizationis solemnia Pontificali pompa celebrare. Sub finem propterea Mensis Aprilis Roma discedens ad Civitatem Reatinam se contulit, ut ibidem gravia Ecclesiæ, quæ tunc instabant, negotia componeret, cœptum exinde iter prosequuturus.



*Ecclesiam ædificari ejus nomini , corporiquè servando  
Pontifex jubet.*

T I T U L U S III.

**A**dmonitus F. Helias jam in Sacro Purpuratorum Collegio decretam fuisset almi Patris Canonizationem , adjit Reate Summum Pontificem , suppliciter , & instanter rogaturus , ut quamprimùm dignaretur eam solemnitatem celebrare . benignè promisit Papa . Insuper & de construendo Templo , in quo sancti viri corpus conderetur , sermonem addidit . Occasionem nactus Helias , narravit Pontifici quæ sub morte imposuerat humillimus Patriarcha , in colle scilicet Inferni sub reorum patibulo se , tanquàm omnium peccatorum nequissimum , humari velle . Admiratus Gregorius tantam in ser-vo Dei humilitatem , estnè , inquit , ad rem situs collis hujuscè ? & si respondit Generalis , non sinè immodico sumptu , ac labore Ecclesia inibi , & Con-ventus excitari possint , attamen dùm Sanctitas vestra dignetur mihi hoc opus committere , & autoritate , ac pietate Religionis paupertati succurrere , meum erit ad Dei gloriam curare , ut ibi nobile , & insigne construatur ædificium . Imò , subdidit Pontifex , id tibi Apostolico injungimus mandato , & sanctæ obedientiæ meritum adjicimus . Vade : nostro nomine cum eis age , ad quos prædicti Collis immediata spectat possessio ; Nos fundum ememus , quem ex nunc Religioni concedimus ; quàm citò operi manum adhibe , ut cum nos Canonizationis solemniam absolverimus , fundamenta benedicere , primumque lapidem propriis manibus in eis collocare possimus . Opes , Deo dante , non deerunt ; dabimus nos , dabit fidelium pietas , quos Apostolicis literis hor- tabimur , & indulgentiarum beneficio ad eleemosinas erogandas alliciemus . Interim ex nostro , quamvis tenui , Ærario necessariam tanto operi pecuniam suppeditabimus .

Acceptis mandatis , ac Diplomate incipient. *Recolentes , &c. sub Dat. Reate 3. Kal. Maij , Pontif. Anno II. Incarn. 1228.* Assisium venit Helias , cum Civitatis Proceribus egit de construendo Templo in ipso Inferni Colle : Ob- stabant unanimiter Cives , ea fulti ratione , quòd in loco tam vili sepeliendus non esset tam pretiosus thesaurus , sed expedire potiùs nobiliorem , tutioremq; Civitatis partem ad id deligere ; rati omnes plateas , domos , & quidquid proprium , vel commune ad rem esset , se quàm libentissimè donaturos . At Sancti Concivis ultima intentione , & summi Pontificis voluntate perceptis , acquieverunt singuli , totumque Collis fundum Apostolicæ sedi obtulere , illius nomine præsentè , & acceptante Generali præfato .






*Ædificium designatur , ædicula sepulchralis  
paratur .*

## T I T U L U S I V.

**I**mpossibile, nedum difficile cunctis videbatur in tam arduo situ tot intervortices, voragines, & scopulos, peramænum aliquod, magnificum, & durable excitandum fore ædificium. Quisque ( ut in similibus evenire solet ) suam proferebat sententiam, objectionem, prædictionem: At impavidum Helix ingenium, totum S. Patris datum amori, incumbens gloriæ, nil trepidabat. Accito propterea ex Germania omnium Architectonices peritorum illius ævi peritissimo Jacobo Alemanno, ut refert Georgius Vasarius in vitis pictorum, & Architectorum tom. pr. in vita Arnolfi pag. mihi 9. convocatisquæ aliis in eadem arte versatis, quos inter adhuc juvenis, devotione ductus adfuit Philippus de Campello, qui postea Ordinem ingressus est, & post Jacobum prædictum totius operis Præfectus est constitutus. Considerato, emensoque situ, variis propositis exemplaribus, perpensisquæ schematibus, omnes judicio Jacobi steterunt; & quintadecimæ Mensis Maii die, 1228. fundamentis fodiendis multiplex imposita fuit manus. Collem undiquæ artifices occuparunt, quidam scindendis scopulis, alii eruendis petris, alii cæteris præparandis materialibus addicti.

Id præcipuum cordi erat Helix, ut monumentum, in quo dilectissimi Patris corpus ponendum erat, sicut illi promiserat, directè sub patibulo extrueretur. Ablatis obinde supplicii lignis, effossa humo, amplum, & ingens saxum repertum est, quod Collis latitudinem à Meridie, & Occasu inæqualiter complectebatur, & in præcipitia, & voragines undiquæ ruebat: à loco verò patibuli Orientem versus duodecim circiter pedibus extendebatur; & exinde terra spatium implens, planitiem æquabat. Tunc memor Helias, quod Salvatoris nostri sepulchrum novum, in quo nondum quisquam positus fuerat, excisum erat in petra; piè auguratus est, divina providentia factum esse, ut tot privilegiis Domino similis servus, simile quoquæ sortiretur monumentum. Jussit proinde, ut anteriori effossa terra, lapidem ab Oriente excavarent in modum testudineæ Cappellæ, usquæ dum directè sub loco, ubi furca fuerat, pervenirent. Terram igitur extrahentes, ac descendentes artifices in aliud ingens, & amplissimum saxum inciderunt, super quod inferioris Ecclesiæ fundamenta aptè statuenda decrevere. Tandem multarum hebdomadarum labore concavum in petra sacellum completum est; & foveæ, in quibus fundamenta firmarentur, paratæ. Collis autem Inferni schema hic videndum proposui.













*Sanctorum fastis B. Franciscus adscribitur.*

## TITULUS V.

**C**ompositis jam in Civitate Reatina negotiis, Spoletum venit Gregorius, mox Assisium sub initio Mensis Junii magno exceptus apparatu ; recto tramite ad B. Francisci corpus venerandum se contulit . Auditis ibi supplicibus omnium Civium instantiis ; observatisquè construendæ fabricæ præparationibus , diem sollemnis Canonizationis decrevit , ac publicari mandavit , sextam decimam scilicet proximi mensis Julii . Indè Perusium abiit , ut opportunius Friderici Imperatoris contumaciam vel flecteret , vel confringeret . Die 15. Julii Assisium rediit, comitantibus eum S. R. E. Cardinalibus, Curia Prælati, & Palatinis, quamplurimis etiã ex Principibus, & Magnatibus, qui omnes ad solemnitatem convenerant . Inter Cardinales adfuerunt Gaufridus de Castilione, Sinibaldus Fliscus, ac Rainaldus de Comitibus Signiæ, qui successivè postea summi Pontifices extiterunt, Cælestinus IV. Alexander IV. & Innocentius IV. Hi purpura donati fuere in una, eademquè promotione, habita Anagninæ Mense Decembris præcedentis Anni 1227. ab eodem Gregorio Nono, cui in Petri sede succedere meruerunt.

Paratis interim rebus omnibus in tanto exponendis theatro in ipsa Divi Georgii Ecclesia, quæ, ut vestigia ostendunt, ampla satis, ac magnifica erat, assistentibus Purpuratis, Prælati, Episcopo, Clero, Helia Generali, & Fratribus, præcipuè S. Patris discipulis, & sociis, ac etiam nobilioribus Civibus, coram innumerabili multitudine ipse summus Pastor, Pontificalibus indutus ex eminenti folio gravissimum habuit sermonem, themate proposito ex Ecclesiast. c. 50. *Quasi stella matutina in medio nebulae, & quasi Luna plena in diebus suis, & quasi Sol refulgens, sic ille effulsit in templo Dei* : virtutes Dei famuli excelsas, præclara merita, & mirabilia, quæ ipsemet ex diuturna cum eo familiaritate didicerat, ac expertus fuerat, laudibus extulit ; Sermone expleto Octavianus SS. Sergii, & Bacchi Diaconus Cardinalis ex alto loco vitam, & miracula fidei examine, rite, ac juridicè probata recitavit : deindè Rainerius Cappocius S. Mariæ in Cosmedin Diaconus Cardinalis ejus temporis Orator excellentissimus e sacro Rostro valdè eruditam protulit Panegyrim. Adstantes interim præ gaudio, devotione, & amore dulces fletuum imbres eliciebant .

Tandem e folio surgens Pontifex, complicatis manibus, sublati in cælum oculis, secreta, & fervida præmissa supplicatione, & implorata Spiritus Sancti assistentia, hac verborum formula Sanctum proclamavit . *Ad laudem & gloriam Omnipotentis Dei Patris, & Filii, & Spiritus Sancti, & gloriose Virginis Mariæ, & Beatorum Apostolorum Petri, & Pauli, ad honorem Ecclesiæ Romanæ, Beatissimum Patrem Franciscum, quem Dominus glorificavit in cælis, venerantes in terris, de consilio Fratrum nostrorum, aliorumque Prælatorum in Sanctorum catalogo decrevimus adnotandum, festumquè in die ejus obitus celebrare* . Statim Cardinales *Te Deum* laudamus intonant, Clerus hymnum totum prosequitur, & populi vocibus lætis laudes depromunt . Descendit de folio Christi Vicarius, & Sanctuarium accedit, in quo Sanctum  
funus



funus inſtructum erat. Ibi proſtratus coram Arca, quæ pretioſum cuſtodiebat depositum, eam oſculatus vota obtulit, & donaria; Deindè Cardinales Arcam ipſam ſublevant, & reſeratam in medio conſtituunt, admirantibus cunctis in integro, & incorrupto Corpore pulcherrima illa adhuc ſanguiflua Salvatoris inſignia. Sequuntur Miſſarum Solemnia, ipſo ſummo celebrante Sacerdote; poſt Communionem ad priſtinum loculum occluſa referitur; dataquè benedictione celebritas terminatur. In tantæ feſtivitatis memoriam quotannis die 16. Julii in Sacra Aſiſienſi Baſilica ſolemnis dicitur Miſſa, cùm Introitu *Gaudeamus omnes, &c. de cujus Canonizatione, &c.*

Præfatam Canonizationis formam, & ordinem diffuſè adnotarunt plurimi ejusdem ævi Scriptores, Thomas de Celano, Abbas Albertus Stadenſis, Marianus, & Krantius. Sed & Jo: de Florentia in m.ſ. præcipuam, & maximam fuiſſe addit, multiplici ratione. Primò ex inſolitis ceremoniis, nam ante id tempus, recitatis, & approbatis in ſecreto Cardinalium Concilio canonizandi geſtis, & miraculis, abſque alio apparatu, Apoſtolico diplomate adſcribebatur numero Sanctorum. Secundò ex tanta Papæ dignatione, ut perſonaliter cum tota Curia Aſiſium venerit, atque ipſe ad populum vitam, & laudes ſancti viri, magna animi teneritudine expreſſerit; plurima recensens, quæ viventem adhuc feciſſe viderat, & ex arcta cum eo neceſſitudine noverat. Tertiò ex præſentia corporis S. Patris, quod paucis, & fortasſe nullis Canonizatorum eveniſſe legitur. Tandem ex plurima atteſtatione, & acclamatione hominum, ipſorumquè Cardinalium, qui ante biennium viventem viderant, alloquuti fuerant, & Stygmata conſpexerant.

S. Bonaventura de ea celebritate ſcriptis dedit hæc. *Veniens Papa perſonaliter ad Civitatem Aſſiſi Anno Dominicæ Incarnationis 1228. in Kalendis Auguſti, die Dominico, cum maximis, quæ longum foret enarrare, ſolemnibus, B. Patrem Catalogo Sanctorum adſcripſit.*

Literæ Apoſtolicæ hujus Canonizationis incipientes, *Mira circa nos, &c.* datæ fuerunt poſtea Peruſii 14. Kal. Auguſti ejusdem anni, lectu digniſſimæ, quas inter alias ſuo loco legere quis poterit. Corrigendus autem in hac re eſt Ciacconius, qui 4. Nonas Octobris ſcripſit S. Franciſcum Sanctorum albo adſcriptum fuiſſe.

*Collis benedicitur, & primus Eccleſiæ lapis collocatur.*

## TITULUS VI.

**S**equenti die Pontifex ad Collem Inferni ſe contulit, ſingulis ex Curia comitantibus, ac Pontificalibus indutus totum benedixit locum, quem præclara antitheſi Collem Paradifi nominavit, ac deinceps nominari juſſit. Indè ad antrum descendens, in quo ſacrum pignus erat condendum, primum lapidem a ſe benedictum propriis manibus collocavit, ut poſtea in ſuis literis, incipientibus, *Speravimus hætenus, datis Later. 16. Kal. Julii anno ſui Pontificatus 4.* teſtatum fecit. Interim verò Cardinales, Prælati, Principes, magna devotione, pietate eximia lapides in fundamenta projiciebant, & turbæ lætis plaudebant vocibus,

Inſuper & Epitaphium in Porphyrite marmore, aureis inſculptum literis, quod



quod ipse Gregorius eleganter concinnaverat , ibidem apponi fecit , vel potius apposuit , videlicet

*V. S. C. A.*

*Francisci Romani celsa humilitate conspicui ,  
Christiani Orbis fulcimenti , Ecclesiae reparatoris ,  
Corpori nec viventi, nec mortuo ,  
Christi Crucifixi plagarum, clavorūq; insignibus admirando,  
Papa novae foeturae collachrymans, latificans, & exultans,  
Jussu , Manu , munificentia posuit*

*Anno D. M. CCXXVIII. XVI. Kal. Augusti .*

Literarum quatuor capitalium sensus est . Viri Seraphici , Catholici , Apostolici . Dicitur verò Franciscus Romanus , quia Assisium Romanorum olim fuit insigne municipium , cujus Cives Municipes Romani ex Sen: Cons: sunt nuncupandi . Hinc & Sex: Propertius Aurelius , insignis Poeta Assisias , Callimachi Graeci elegias imitatus , se Romanum Callimachum dixit. l. 4. el. p.

*Vt nostris tumefacta superbiat Umbria libris ,  
Umbria Romani patria Callimachi .*

Vel , ut aliis placet , ideò Gregorius Franciscum Romanum inscripsit , quia humillimam subiectionem , & obedientiam semper S. R. Ecclesiae , & Apostolicae sedi professus fuerat : ad quam etiam totam suae Regulae summam redegit , dum ait, *Semper subditi , & subiecti pedibus S. R. Ecclesiae , stabiles in fide Catholica , &c.*

Expletis Sacris benedictionis ritibus , attentius Pontifex novum aedificium intuens , consideravit ad tam ingentem molem , ingentem quoque pecuniae summam requiri . Multa idcirco denuo liberaliter donavit , & quam plurimum vacantium Ecclesiarum redditus annuos assignavit : Heliam hortatus , ut aequo esset animo , totoq; conatu operi , ad Dei , & Sancti Patris gloriam , insisteret : eique commisit , ut de pecuniis pro fabrica oblatis disponderet , absque ulla Regulae transgressione .





*Subterranea completur Ecclesia , & aliæ duæ  
superexcitantur .*

## T I T U L U S VII.

**P**ontificiis interim jussis obtemperaturus Helias , excitando Templo , quod cunctis admirationi foret , omnibus se studiis , ac viribus dedit . Literarum Apostolicarum , quas Reate acceperat , ad excitandos Indulgentiarum beneficio Christi fideles , ut pias eleemosinas ad id erogarent , plurima auctographa condi curavit , eaque singulis Provincialibus transmisit in quibuslibet Provinciis , ac Civitatibus publicanda ; Pontificis nomine illis iniungens , ut collectas pecunias , & oblationes per Procuratores , & Nuntios integrè , & fideliter destinarent Assisium , ubi etiam lapideam capsam prò excipiendis fidelium piis eleemosinis , ad Indulgentiam lucrandam advenientium , palam exposuit .

Indignati sunt id peragrè ferentes , exactissimæ paupertatis aliqui zelatores nec sinè querelis exaggerabant ea nimis paupertati repugnare Evangelicæ . Non desunt Historici , ob id Heliam carpentes graviter , & animosè scriptitantes , quòd regulari disciplinæ præjudicia admiserit ; absquè fundamento , insuper addentes , quòd taxas , collectasque pecuniarias singulis Ordinis Provincis imposuerit , & indixerit . Omnium pace sentio , in hoc celebrandum potius , quàm repræhendendum virum fuisse . Quippe qui non eam sibi congregabat pecuniam , sed summi Dei , qui se tam admirabilem in Sancto suo ostenderat , gloriæ studebat . Nec falsas , ad extorquendas eleemosinas , sed veras , patentibus Pontificiis literis , concessas Indulgentias promulgabat . Nequè propria voluntate opus tam nobile , insigne , ac sumptuosum construebat ; sed Summi Christi Vicarii , qui nobiliori animo Dei honorem intendebat , mandatis paruit . Nequè paupertatem lædebat , qui Apostolicæ fedi obedientiam , quæ totius Religionis est fundamentum , & sinè qua nulla vera est Religionis virtus , implebat . Nec collectas pauperibus , & mendicis fratribus , qui nil possidebant , imposuit , sed veras Indulgentias , ad animarum salutem , per eos publicari curavit ; & oblationes juxtà Summi Pontificis voluntatem in opere dignissimo impendere satagebat .

Sed nec ob id zelum sociorum , & discipulorum Sancti Patriarchæ , qui Præceptoris æmulabantur humilitatem , ac paupertatem carpere intendo : Siquidem & ipsi bona ducebantur intentione , cupientes , quòd in Ecclesiola , Franciscanæ mendicitati conformi sacrum humaretur corpus . Sæpius enim evenit , ut diversæ sint hominum sententiæ , & quamvis oppositæ videantur ; cum tamen secundum uniuscujusquè intentionem diversis viis ad Dei gloriam ordinentur , singulæ rectè judicari debent . Helias igitur ea pollens sapientia , ob quam à Seraphico Institutore , Dei jussu , inter omnes ejus discipulos , & sectatores dignus est habitus , & selectus ad Ordinem supremè gubernandum , considerans hinc S. Patris humillimum desiderium , quo sibi abjectissimum delegerat Sepulchrum , cui conformabatur condiscipulorum sententia , & inde Christi Domini in terris vicesregentis voluntatem , cui Seraphicus vir totum sese , Regulam , & arbitrium subjecerat , elegit potius summi Pontificis totis conatibus implere mandata , quàm subditorum simplicitati adherere .






Scala di n° 20 piedi Romani per misurar l'alzata

Infima Ecclesiae in qua stat S. P. Franciscus corpus interior prospectus

Plancta eiusdem  
Francisci Prouidonius deli et sculp



Scala di n° 20 piedi Romani per misurar la pianta







Opus itaque prosequens Generalis subterraneæ molem Ecclesiæ perficiendam curavit . Sacellum marmore excisum ; undequaq; minutis tesseriis , auro vermiculatis , pretiosisq; lapillis insitis , opere musivo loricari , ac exornari præcepit . Insuper eidem Cappellæ Orientem versus , in spatio ab amota humo relicto duas addidit concameratas tribunas , arcubus conterminatas , interiore parum elatiores , ac profundiores , ita ut per gradum ex eis ad illas detur ascensus , hasque stellis , & floribus variis figuratis lapillis superindui fecit . In latere verò porta constructa cernitur ferreis postibus , solidisque claudenda vectibus .

Interim Ecclesiæ mediæ , ac supremæ ampliora fundamenta replebantur , & muri latissimi ex quadratis , sectis , albis , rubeisque lapidibus miro ordine dispositis , inter scopulos , & voragines admirabili celeritate consurgere videbantur . Miraculum prorsus censendum est , undè tot lapides eruti , & allati fuerint , montes eviscerati , tam citò , & affabrè expoliti . Artifices innumera- biles voto , vel pretio ducti in opus insudabant . Helicæ providentia in cunctis admirabilis enitebat , & eximius , ac singularissimus amor erga dilectissimum Patrem nulli secundus emicabat . Infimæ verò Ecclesiæ schema hic cernendum proposui .

*Collis Paradisi Basilica Pontificiis privilegiis  
ditatur , Caput , & Mater totius Ordinis  
Minorum constituitur .*

## TITULUS VIII.

**S**UB Mense Octobris ejusdem anni 1228 , cum Reate moraretur Pontifex ipse Gregorius , eiquè relatus fuisset novi Collis Paradisi Aedificii progressus , eam Ecclesiam gratiarum donis , ac singularibus prærogativis communire decrevit . Quare sub die ejusdem Mensis 21. literas Apostolicas dedit Ministro Generali , Fratribusque Minoribus , incipien: *Recolentes qualiter, &c.* quibus fundum ab Assisiarum pietate Sedi Apostolicæ oblatum , in quo Ecclesia S. Francisco dicata construebatur , in jus , & proprietatem ejusdem S. Sedis suscepit , Templum ipsum privilegio libertatis donavit , & sub speciali tutela Pontificia constituit: imponens Fratribus in ea commoraturis annum perpetuum censum unius libræ ceræ , ipsi Pontifici , & successoribus persolvendum .

Aliud quoque dedit Apostolicum Diploma Concistoriale in amplissima forma . *Is , qui Ecclesiam suam, &c.* ab ipso Papa , & Cardinalibus , qui aderant , singulis propriis signis , & characteribus signatum , & subscriptum , quo omnia superiora privilegia confirmavit , & addidit ampliora , puta , quòd Ecclesia ipsa totius Ordinis à Sancto instituti , Caput habeatur , & Mater : quòd in ea per eosdem Fratres perpetuò inserviat ; Quòd nullus audeat in ea sententiam excommunicationis , vel interdicti promulgare ; quòd nemo libertatem , & prærogativas ejus perturbare præsumat , sub poenis privationis omnium dignitatum , & alienationis à participatione Sanctissimi Corporis , & Sanguinis D. N. J. C. eidem verò sua jura servantibus pacis bonum , benedictionis fructum , & æternam gloriam auguratur . Dat. Romæ 22. Aprilis 1230. De his privile-



giis diffusius alibi tractabimus, cum ea etiam à Successoribus ejusdem Gregorii pluries confirmata referemus. Hoc diploma Originale, ab aliis etiam historicis, sed sine subscriptionibus allatum, inter præcipua hujus sacræ Domus pretiosa servatur. Census autem unius libræ ceræ in eo impositus quotannis in Festo Sanctorum Petri, & Pauli Apostolicæ Sedi ritè persolvitur.

*Fidelium pietas nitet, & mira celeritate operi  
insistitur.*

## TITULUS IX.

**S**ummi Pastoris liberalitas in ea malorum temporum angustia, cum scilicet scelestissimus Fridericus secundus Sedi Apostolicæ tyrannicè adversabatur, & Ecclesiæ redditus, undiquè usurpans, diripiebat, exemplo erat magnis Universi Principibus, Prælati, ac fidelibus populis Christianæ pietatis exercendæ. Hinc è cunctis Catholicarum Provinciarum copiosissimæ confluebant oblationes, præcipuè ex Alemannis, in quibus innumerabilia penè miracula, viri sancti nomine, ac meritis operabatur Omnipotens. Assisiensis quoque Civitatis erga Franciscum enituit supra omnes Religio, nam Collem totum S. R. Sedi dono ob id resignaverat: Marmorum fodinas, e quibus tota ferè materia desumebatur, gratis obtulit: divites opes, reliqui opus impendebant: unusquisque pro suo conatu res conferebat, & vires.

Indè animum sumens, fiduciaque plenus Helias, innumeros adhibuit operarios, ut opus quamcitiùs compleretur. Exercitum Artificum vidisses in varias dispositum acies, Montium rupes excindere, Boves curribus præcisas petras advehere, quadrare scalpris marmora, commensurare, expolire, distinguere, aptare, connectere; mira solertia, & inexplicabili sollicitudine quemquam suas partes implere. Quo factum est, ut duorum annorum spatio tota infima Ecclesia, & mediæ amplior structura, cum fornicibus, arcubus, & altaribus completa, & divinis celebrandis capax, aptaque reddita fuerit. Ecclesia itidem suprema admodum elata, quamvis non adhuc testudinibus testâ apparuerit. Conventus verò magna pars jam constructa: Voragines ingentium arcuum vi ad planitiem elevatæ: Dormitorium inferius, ac Refectorium majus cum intermedio expleta: binæ plateæ utramque ante Ecclesiam complanatæ; inferior altis arcubus, superior muro eminenti sustentabatur: exactiorem verò tam Ecclesiarum, quàm Conventus narrationem ulterius dabo, cum jam omnia completa describam. Id nunc ad prosecutionem historiæ satis est, quod sub initio Mensis Maii 1230. ad eum statum opus redactum fuit, ut pro Festo proximo Pentecostes in nova Basilica, & Conventu celebrari faciliè potuerit Generale Capitulum, & Sancti Corporis ad eam fieri translatio.





Indicuntur Ordinis Comitia , & Sancti Corporis  
translatio.

## TITULUS X.

**I**ndixerat opportunè Generalis Minister Helias omnibus , singulisque Provinciarum Ministris universalem Synodum , Assisi habendam , cum delatione sacri Parentis corporis ad novam Ecclesiam. Sub initio Mensis Aprilis ipse Romam accessit , Summo Pontifici , quæ eousque facta erant , retulit , eumque supplex rogavit , ut qui devotum affectum erga Seraphicum virum ostenderat in celebranda ejus Canonizatione , dignaretur insuper , vel ipse personaliter translationi interesse , vel Sacris Ecclesiæ Purpuratis , ac Prælati auctoritatem , & præsentiam delegare ; convenientibus quoque undique Fratribus , ac fidelibus Indulgentiarum beneficia largiri. Convocato Cardinalium Senatu , Pontifex cum eis egit de privilegiis novo Collis Paradisi Templo concedendis : communi omnium calculo , Caput , & Mater totius Ordinis Minorum constituta est , à Fratribus ejusdem Ordinis perpetuò colenda ; & nulli , nisi Romano Pontifici subjecta : quare & literæ Apostolicæ Commissoriales tunc datæ sunt , de quibus superius . Promisit quoque Papa , ni graviora obstarent negotia , personaliter se interfuturum . Quare Assisium rediens Helias , omnibus parandis , quæ ad Capitulum , & Solemnitatem pertinebant , animum applicuit . Sed et Civitatis Proceres de adventu Summi Pontificis admoniti , ad illum dignè excipiendum sese parabant .

Convenerunt idcirco ad generalem congressum super duo millia Fratrum , & populorum uniuscunque conditionis tam innumera multitudo , ut ( referente Mariano ) nobilioribus , ac ditioribus advenis jam repleta Civitate , cæteri in suburbanis ruribus , in agris , sub tentoriis , & turmatim in campis , illis diebus victitare cogerentur .

Expectabatur Summus Christi gregis Pastor Gregorius , sed impii Friderici facinora , & urgentissima Ecclesiæ negotia , illum Roma discedere nullatenus permisere . Cum superveniunt Apostolici Nuntii , qui Summi Pontificis nomine Heliam Generalem Ministrum , necnon tres alios primarios Minoritas Apostolicos Vicarios , & Commissarios declararunt , ut translationis solemnibus , commissa eis suprema auctoritate , præsiderent , ipsique Nuntii assisterent : per quos etiam Gregorius pretiosa munera ad Ecclesiæ , & Altarium ornatum dono misit : inter quæ præcipua fuerunt , aurea Crux , pretiosis gemmis ornata , in qua particula salutiferi Redemptoris ligni servatur . Vasa itidem argentea , & omnis generis ministerialia inaurata , quæ Sacrificiis deservirent . Majoris quoque Altaris Antependium , auro , lapidibusque pretiosis redimitum . Pulchra valdè cujusque Sacri Ordinis indumenta ; insuper & non modica pecuniæ summa pro fabricæ continuatione . Apostolicum quoque detulerunt Diploma , Ministro Generali , & Capitulo directum , Incipiens , *Mirificans Misericordias* , &c. Quo Virum Sanctum adeò ex affectu Papa commendat , ut eum Patrem suum dicat , & veriùs suum , quàm Minorum Fratrum ; quibus etiam testatur , quòd nuper in Teutonia mortuum ad vitam revocavit , & ad ejus sectanda vestigia omnes peramanter hortatur . Ulteriùs & Indulgentias concessit cunctis Christi fidelibus novam Ecclesiam visitantibus in ipso translationis die , &



quotidiè usque ad Festum B. Mariæ Virginis, transfretantibus mare tres annos, transeuntibus Alpes duos, reliquis unum; similiter Anniversario translationis, & per Octavam ejus in perpetuum unum annum; quas Ingulgentias visitantibus Apostolorum limina concedere consuevisse ea tempestate Sedem Apostolicam idem Pontifex testatus est suis literis, *Speravimus hætenus.*

*Ad Collis Paradisi Templum S. Corpus transfertur.*

TITULUS XI.

**D**ie 25. Maii 1230. in qua Sanctum Pentecostes incidit Festum, à Seraphici Patriarchæ transitu anno tertio, mense septimo, dieque vigesima expletis, & ab ejusdem Canonizatione anno uno, Mensibus decem, diebus octo decursis, sacrum illius corpus, quod licet exanime, vividas tamen Salvatoris, & cruore madidas cicatrices referebat, in Sancti Georgii Templo, ad novum, in Colle Paradisi, eius nomini erectum translatum est. Ordinata est solemnis processio, ac generalis, ab ipsa D. Georgii Ecclesia incohanda, in qua omnes accessuri convenerunt prædicta hora. Præcedebant singulæ sub propriis vexillis Urbis Confraternitates, sequebantur Fratres, Clerus, Capitulum; omnes albos cereos manu gestantes, & sacros hymnos dulciter concinentes. Inde Helias, adstantibus cæteris Vicariis, & Nuntiis Apostolicis, capsam, in qua thesaurus condebatur, aperuit; omnes adstantes corpus integrum, incorruptum, suavissimo redolens odore, rubentibus, & sanguifluis vulneribus sauciatum inspexerunt, osculatique sunt. Iterumque occlusam capsam præfati Vicarii, & Nuntii propriis sublatam humeris, usque ad Templi januam detulerunt, & undique personante tubarum clangore, classicorum boatu, & musicali melodia, eminenti plaustro inaurato, & mirabili varietate ornato, imposuerunt; ac super eam sericum flavi coloris opertorium, gryphibus aureis intextum, extenderunt. Machinam trahebant albi Boves, purpureis lodicibus, aureis rotis, variisque avibus ornatis, contexti. Hinc inde Vicarii, & Nuntii Apostolici incedebant. Sequebantur Magistratus, & exteri Magnates quamplures; Cives verò armis præcincti, adhibita valida militum copia, inundantem turbam propellabant, summoperè caventes, ne quis pretiosissimo pignori appropinquaret. Pallia illa, seu velamenta flava, & purpurea, quibus currus, & boves cooperti inceserunt, miserat præcedenti anno (ut ex vetusto m. s. monitum habeo) Imperator Græcorum. Flavum adhuc integrum asservatur, decisa tantum aliqua auri parte: ex rubeis duo confecta sunt pluvialia, quæ antiquiora inter paramenta reponi Fratribus visum est.

Unus, idemque Fratribus omnibus erat animus, dilectissimi Patris cernere corpus, vulnera exosculari: singuli præterea ex populo, qui ad id conveniant, pari desiderio æstuabant. Hinc in Basilicæ medio eminens, solida ex ligno moles parata erat, unde sacrum depositum circumspici quidem posset, non autem tangi. Jam Fratres certatim capsam elevabant è curru, corpus inde extractum super ipsam collocaturi; cum Assienses suspicati innumerabilem inter turbam, Fratresque ipsos, qui ex omnibus convenerant nationibus, posse latere insidias ne arte, aut dolo furriperetur, vel minueretur thesaurus, Rectorum Civitatis jussu armata manu irrumpentes, ablatam à deferentibus capsam ad Sacristiam detulere, nec ullatenus aperiri minusve corpus extrahi permiserunt,



runt, palamque exponi; quantumvis rogarent Fratres, clamarent supplices turbæ, hortaretur Generalis, obtestarentur Nuntii, id non absque indignatione à Summo Pontifice sentiendum. Constantes in sententia diù perstiterunt Cives, nec flecti unquam potuere; sed jam inito cum Nuntiis, & Vicariis pacto, ne ullo modo sacrum corpus exponeretur, clausis undique Sacrarii foribus, addita insuper Militum custodia, capsam cum corpore reddiderunt, quam Generalis Helias, aliique prædicti secretò ad infimam, & subterraneam Ecclesiam deportantes, in antrum in petra excisum, quod directè Aræ majori secundæ Ecclesiæ subest, ubi patibulum erectum fuerat, sub duplici capsa, externa marmorea, interna plumbea, ipsam ligneam cypressinam concludentes, jam securi abjecerunt: ad hæc curavit Helias solidis muris locum obstrui, adiuturumque mutari, ne cui descensus ille innotesceret. Nec tamen ab initio fuit locus ignotus omnibus, ut quidam perperam autumant. Multorum manus tanto operi fuerant necessariæ. Sciebant operis Præfecti, Artifices, ex Assisiatibus plures, & quotquot (uti solet in novis mirabilibus edificiis) sæpius ad conspiciendam operam accesserant; licet paucis Sanctuarium illud aperiretur, cujus claves erant apud Heliam.

*Pontificis indignatio in Assisiatas, qui humiliati  
in gratiam redeunt.*

## TITULUS XII.

**A**Gro tulerunt animo Vicarii, Nuntiique Apostolici, quòd Assisientes eis restitissent, cum Solemnitatem turbaverint, ac ipsorum suasionibus, monitis, mandatis non acquieverint. Idcirco Christi Vicario omnia, prout acciderant, retulere, gravius fortasse, quàm par erat, rem figurantes, ut læsi, & irati solent. Vehementer commotus Pontifex Apostolicas literas expediri præcepit Episcopis Perusino, & Spoletano, quibus offensam Christo, Vice-Chrismo Francisco, sibi que Christi vices gerenti illatam exaggerabat, eisque in mandatis dabat, ut Potestati, & Consilio Assisienti præciperent, quatenus infra terminum quindecim tantum dierum, Viros idoneos Universitatis nomine ad ipsiusmet Papæ pedes mitterent, paratos satisfactionem plenariam exhibere, ejusque stare mandatis: quòd si præcepta hujusmodi neglexissent, in Potestatem, & Consilium Excommunicationis, & in Terram Interdicti sententiam, appellatione postposita, promulgarent. Literæ tanti Pontificis zelum erga divina ostendunt, & quàm graviter Deum Laici offendant, qui ultrò se divinis mysteriis, sacrisque functionibus ingerunt, eruditè declarant. Habentur inter alias suo loco, incipientes, *Speravimus hætenus, &c. Dat. Romæ Later. 16. Kalend. Julii ejusdem Anni 1230.*

Antistites ergo, receptis literis, Assisium die inter eos condicito venire, advocatisque Potestate, & Consilio, Epistolas, & jussiones Pontificias insinuarunt, eos insuper admonentes, ut Summi Patris clementiæ se committerent; neve contumacia facinus aggravantes, censuris Ecclesiasticis se subjicerent. Acquieverunt omnes, id protestati, nil pravæ intentionis ductu ab eis contra S. Sedem, vel illi debitam reverentiam perpetratum; sed zelo, vehementique suspitione motos, thesauri custodiæ dumtaxat intentos, inconsideratè sese sacris immiscuisse: irreverentiam, & injuriam, quam sacro corpori, sanctæque Sedi



Sedi inferebant, non advertentes; Paratos ob id in omnibus esse, de ejusmodi transgressione humiliter à beneficentissimo Pontifice veniam implorare, satisfactionem ei exhibere, poenitentiam libentissimè suscepturos. Eodem die quatuor ex gravioribus, & insignioribus Cives sunt deputati, qui Romam adirent, pedibus Christi Vicarii se sisterent, Communitatisque nomine summum ei obsequium, promptam obedientiam, plenam satisfactionem præstarent. Datis itaque, receptisque juridicis cautionibus, Episcopi discessere. His peractis Assienses comminatas poenas faciliter evaserunt, quas inordinatus illis promeruerat furor. Romam continuò petiere, & debita humilitas eos in Pontificis gratiam restituit, quos elatio privaverat.

*Fratrum indignatio in Heliam, qui à Ministerio  
exauctoratur, & fabricæ perficiendæ  
curam deponit.*

### T I T U L U S XIII.

**A**Ntea acti tumultus causam Fratres, non in Civium turbas, sed in Heliam referebant, & pio desiderio fraudati, ira in illum fervebant. Hinc ex scriptoribus quidam sunt suspicati, non alium, quàm Heliam tantæ confusionis auctorem, cui sanè plurima ultra veritatem imponunt; quod sæpè accidit his, qui præsent, præcipuè cum plures contra unum clamare contigerit, quidquid mali evenit, in eos refunditur: omnia, quæ agunt, exceptionibus, ac detractionibus patent. At verò non satis mihi probatur, virum alioquin elati animi, nedum Generalatus honore, sed & Apostolico charactere insignitum, studio sibi irreverentiam, & consultò publicam resistantiam à sæcularibus procurasse. Imò si clam cum eis convenisset, ut turbaretur translatio, sicut quidam putarunt, nec tutè potuisset coràm Pontifice, ut fecit, eos graviter accusare; At fuerit ille in culpa, vel non: subditi in ipsum sunt concitati, qui in tam magnum cecidit odium, ut causam mutantes, exprobrarent ei privilegiorum quorundam admissionem, quæ à Sancta Sede obtinuerat, ad moderandum regularis paupertatis rigorem. Undè superbiam viri adeò excitarunt, ut crudeliter in eos animadverterit. Quapropter Capitulum Assisio ad Civitatem Anagninæ a Summo Pontifice coram se advocatum fuit, & cum in ejus præsentia disceptarent S. Antonius Patavinus, & F. Helias, iste ira fervens, in injurias, & mala verba prorupit; planè ut Papa ob læsam Majestatem Heliam ab officio Generalatus absolverit, in cuius locum F. Jo: de Parentibus Florentinus, vir omnium virtutum numeris absolutus, universorum suffragiis ab ipso Pontifice exceptis, electus fuit. Helias tadio affectus, cum Ministeriatus honore omnem publicam deposuit curam, inque alium mutatus, humilitati, vitæque solitariae, & contemplativæ se dedit.

Novus interim Generalis majorem circa ædificii Assisiensis expensas cautelam adhibens, Pontificis nomine, & facultate Procuratorem instituit ad recipiendas, expendendasque pecunias, Piccardum Moriconem S. P. Francisci ex Patre (Angelo nuncupato) nepotem (sic mihi vetustum m. s. testatur) obligatione addita participandi cum F. Philippo Campello, & rationem reddendi



dendi D. Cardinali Ordinis Protectori . in eo enim culpatus fuerat Helias, quòd disponendæ pecuniæ manus ipse admovisset.

*Integrum S. P. Corpus ad novam defertur Basilicam,  
nulla ejus pars alibi relicta.*

T I T U L U S XIV.

**S**eraphicus Institutor , cum ageret inter vivos , devotissimi amoris estu , quo B. Dei Genitricem prosequabatur , sæpius dixerat , suum affectum , suumque cor illius nomini dicatæ Ecclesiæ Portiunculæ dono dedisse . Bartholomæus Pisanus in sua Conformitate ea verba literaliter explicans , omnium primus scriptis tradidit S. Patris corpus post animæ separationem exenteratum fuisse , ejusque cor unà cum intestinis avulsum in eo gurgustio , in quo obiit , prope eandem Ecclesiam asservatum . Quo auctore , alii post ipsum scriptores parem sententiam tenere , jique præcipuè , qui de Observantia nuncupantur , constanter tenent , ac docent ; apposta in eo loco tabella , cum Inscriptione : *Hic servantur Cor , & Interiora S. P. Francisci.*

Verùm si cor inibi remansisset , ut post centum , & septuaginta annos divinans hic scriptitavit Bartholomæus , aliquis certè ex vetustioribus , qui mortem , depositionem , translationem viderunt , vel ab eis qui viderant , audierant , rem adeò principalem , scituque dignam testatam posteris reliquissent . Tres S. P. Socii , Leo , Angelus , & Rufinus , qui de visu omnia ferè scriptis dederunt , ac morientem observarunt ; Thomas de Celano , Jo: de Caperano , S. Bonaventura , Bernardus à Bessa , cæterique alii primi sæculi scriptores vitam , mortem , & sepulturam almi Parentis adamussim scripserunt ; nec unus quidem ex eis de hac exenteratione , cordis avulsione , ac depositione mentionem , aut verbum fecit , cum alioquin res tanti ponderis fuerit , ut sine gravis ignaviæ nota omitti minimè debuisset . Rogo , quæ manus tam audax corpus illud divinis jaculis vulneratum , ferro aperivit , Christi plagis fauciatum adhuc plagavit , & quinque Redemptionis stygmatis sextum temerè vulnus addidit ? Neque dicant S. Patris præcepto id factum : legimus porrò humilem Franciscum jussisse corpus suum sub patibulo humari , non autem cor , Principum more , à corpore separatum servari . Sed nec cor carneum intelligebat Franciscus , cum dixit , cor suum ibi esse , sed spiritum , & affectum , quippè qui non plaris , quàm asellum totum suum materiale compositum faciebat , & nominabat .

F. Marcus Ulyssipon . Chronicorum Ordinis exarator , Observantinus , sub anno 1556. idest trecentesimo trigésimo post mortem S. Institutoris , attendens forsan Pisani simplicitatem , & asserti illius inverisimilitudinem , in prima parte cap. 73. lib. 2. scripsit , quòd S. Patriarchæ Corpus utique Assisii humatum fuit , sed exinde cor ejus miraculosè ab Angelis ad Portiunculæ Sacellum delatum extitit . Veritas , & unitas simul semper coherent . Varietas mendacia detegit . Si pectus fuerat exenteratum , & intestina à pectore , & ventre avulsa , ibique relicta , quæso , quomodo postea ab Angelis aliundè delata ? Si delata , jam ibi non erant ; si inibi ab initio servata , quomodo eò postmodum translata ? Hanc translationem quis ante Marcum unquam est somniatus ? Vel cui , quando , quomodo est revelata ? Hæ



circumstantiæ necessariò fuerant exprimendæ, ad suadendum inauditum antea miraculum. Suntu igitur devotorum scriptorum piæ meditationes, non veræ historiæ narrationes.

P. Lucas Vvadd. tom. 1. ad ann. 1226. n. 40. rem sub dubio astringit, & audisse subdit ab Assisiatibus ex seniorum relatione corpus integrum Assisi servari, occasionem verò aliquos desumpsisse, ex eo quòd S. P. dicere consueverat, cor suum illi Ecclesiolæ donasse.

At quis suadere sibi posset, Assisi Cives permisisse thesaurum illum procul à Civitate, in gurgustio rurali, prope publicam viam, eo tempore, quo nedum Umbriæ, sed Italiæ totius Civitates tumultibus Guelforum, & Gibellinorum fervebant, ac inter se pugnabant, relinqui? illud certè obijcere quilibet potuisset; *depradari desiderat qui thesaurum publicè portat in via.*

Hic animadvertendum censeo, quod à quibusdam veritatis amatoribus, fideque dignis accepi. Monitus nuper fui à Religiosis aliquibus, præcipuè eleemosinarum quæstoribus, clam apud simplices diuulgari attestatiunculas nonnullas nomine suorum Patrum exaratas. Referunt ergo, se nocte quadam in ampliori Portiunculæ Templo contemplationi vacantes, observasse ex Sacello Sancti Patris Francisci non modicum prodire splendorem; unde altare, ex quo exibat, scrutantes, viderunt apertam capsulam suavissimo refertam odore, ac in ea quasi vivum, & palpitans cor inter alia viscera S. P. & hoc adorasse. Divulgatores autem interrogati, variè respondentes, inter se non cohærent. Narrant sub secreti sigillo, ut post aliquod temporis spatium in lucem prodeat, & pro veritate cælitus probata habeatur. Mendaciorum semina multoties in terra simplicium cordium jacta, ibi invisâ nutriuntur, & in tempore germinant. Aliquando etiam falsa miracula divulgantur. Idiotæ credunt, & ampliant. Sed ab Ecclesia rite examinata, adinventâ fabulantium deteguntur. Præmonitos esse oportet, & experientiam esse rerum magistrâ.

Sed jam, quæso, in lucem erumpat veritas; expostulat amplissimi hujuscè novi Templi elegans, nobilisque structura, ut Sacellum illud tollatur. Inquirant, si adsunt, inveniant intestina, & in ipsa Sanctissimæ Virginis ædícula honorificentius recondantur. Neque enim in proprio gurgustio ab ea disjuncto, sed in ipsa Deiparæ domo dixerat Seraphicus vir semper esse cor suum.

Interim homines sensati tenuerunt, ac tenent verba S. Francisci non literaliter, Hæbreorum more, sed moraliter, ac spiritualiter esse intelligenda; non de carneo corde, aut de materialibus Jecore, Epate, Intestinis, verum de animæ affectu, mentis amore, spiritus devotione, quæ gloriosissimæ Virgini altiùs, nobiliùsque devoverat.





*Corpus mirabiliter surgit, stansque servatur.*

TITULUS XV.

**P**ostquam sanctum Pignus, ut diximus, translatum, ac locatum est, quotquot ad illud aspiciendum, devotionis, aut voti causa, accesserunt Pontifices, Cardinales, Antistites, Principes, Fratres, de quibus suo loco agemus, omnes testati sunt, jam non capsâ occlusum, aut jacens extensum quiescere, sed super marmoream laminam, veluti super quoddam modicum altare, in suos erectum pedes, nulli sustentaculo incumbens, aut fulcimento innixum, undequaque à parietibus distans, tamquam vivum mirabiliter stare. Oculos vivos sursum erectos, manus ad pectus compositas tunicæ manicis coopertas tenens; pedem dexterum nudum stygmatisatum, recentique perfusum sanguine ostendens; sinistrum verò indumenti ora obvelatum habens; cum tamen ibi jam triplici capsâ occlusum primitus fuerit: lamina illa exterioris capsæ operculum erat, quod ab ea usque ad medium amota, nunc stans corpus sustentat.

Ferunt circa admirabilem hanc corporis stationem, quòd post translationem ter sancti funeris, quidam Francisci focii alternatim nocturnas excubias in Ecclesia intermedia majorem ante Aram faciebant, sub qua sacræ exuviæ sunt reconditæ, vigilantes, orantes; sicuti cum depositæ fuerunt in S. Georgii, apud Ædes ejusdem Ecclesiæ consueverant.

Dum ergo nocte post illius Depositionem tertia unus ex Dei servis prædictis ardentius in oratione ferveret, magnum extemplo terræmotum percepit, quo tota videbatur machina everti; præcipuè Altare majus elevatum conspexit, ab eoque veluti lucem emitti: pavimenti quoque lapides sejungi ab invicem, & exinde varii luminis radii exoriri; ulterius suavissimi odoris fragrantiam undequaque prorumpere, quæ totum Templum repleverat, ejusque vehementiam ferre vix quisquam poterat. Primò exterritus, deinde admirans eventum justus ille ad excitandos Consodales se contulit, rem per partes narravit: quin & ipsi terræmotum sensisse affirmarunt. Jam ad Ecclesiam conveniunt, existimantes edificio aliquod detrimentum accessisse. Ad Infimam descendunt: marmoream laminam, qua capsâ claudebatur, aliquantisper amotam cernunt, superque eam Sancti Corpus erectum vident, e cujus vultu miri procedebant fulgores, qui loci, noctisque tenebras propellebant. Vident in corpore ad cælum erectos oculos, tamquam hominis vivi, manus ad sinum superpositas. Procumbentes in genua tunc Fratres, admiratione, gaudio repleti, dulces effundunt lachrymas, contemplantur in simulachro illo nedum Domini- cæ Passionis vestigia, sed & Crucifixi Jesu Resurrectionis præclara insignia. Observant opertorium marmoreum non adeo amotum, ut potuerit corpus ex illius remotione prodire; imò per modicum illud spatium introspectantes, interiorē capsam omnino clausam mirantur.

Jam noctis tenebræ rarefcebant; cum ergo Socii propinquum diem recolerent, sæpius pedem, pectus, manum, tunicam S. P. exosculati, abierunt. Hinc factum est, ut postmodum quicumque sacrum pignus admirabile conspexerunt, retulerint illud stare, eo planè situ, eo modo, quo dictum est. Ex hoc etiam Summi Pontifices Gregorius Nonus, Innocentius Quartus, & alii Corpus S. P. Francisci in eorum Diplomatis gloriosum, gloriosissimum appellarunt; gaudet quippe gloriosi corporis dotibus; à clauso surgit sepulchro, per se stat, pondere non cadit, corruptioni non subest, lucem diffundit.



*Gregorius IX. observat S. P. Francisci Corpus  
mirabiliter stans.*

T I T U L U S XVI.

**T**ot mirabilia, quæ in Sacrosancto Francisci Corpore operatus fuerat Omnipotens, ad aures Summi Pontificis Gregorii pervenere. Hinc Christi Vicarius pio desiderio angebatur, iterum sacrum Pignus videnti ea in Ecclesia, eo loco, quò, ipso jubente, locatum fuit; cum autem tunc temporis infidelium Christianorum, hominumque impiorum violentiæ, ac facinora Romanam Curiam perturbarent, non nisi post annos quatuor ejusmodi votum licuit adimplere. Anno igitur 1234. Roma ad Reatinam Civitatem se contulit, exinde Spoletum venit, tandem Assisium pervenit, sub initio mensis Octobris, illique festivitati adfuit, quam per totum Orthodoxum orbem celebrari præceperat Apostolicis literis, incipientibus, *Sicut phiala, &c.*

Nec mora: ad subterraneum delubrum descendit, præcedentibus, facesque gestantibus Fratribus, quibusdam comitantibus Cardinalibus, signanter de Flisco, ac de Comitibus, qui Gregorio in Pontificatu postea successerunt. Ut autem Pontifex admirabile Corpus in proprios erectum pedes aspexit, adhuc madidis fauciaturum vulneribus, genuflexus alta suspiria edidit, dulcesque ætus maxima devotionis teneritudine emisit. Dein peracta ferventi supplicatione, pedem est osculatus; surgensque manui, (elata tunicæ manica) pectori, faciei amantissima infixit oscula, Amicum, Patrem, Patronum, Advocatum compellans, ejus intercessionem se, S. Sedis, & Ecclesiæ Romanæ negotia committens. Posthæc his, qui secum venerant sacrum Depositum inspecturi, pedem exoculari permisit; & priusquam Assisio discederet, sub Epitaphio, quod sex ante annos ipse posuerat, aliud breve marmor adjungens, aureis exarata characteribus, hæc addidit verba:

*Ante obitum mortuus, post obitum vivus.*

Qui enim mortalem vitam ita transegerat, ut mortuus magis, quam vivus hic apparuerit, tum propter carnis mortificationem, cum propter spiritus humilitatem; post inter beatos vivens, vivum quoque corpus videbatur habere, recentem carnem, fluido perfusam sanguine, stans in proprios pedes, cælum suspiciens.

Ex Seniorum traditione compertum est, hoc anno S. P. festivitatem nocturnis Officiis, solemnique mediæ noctis Sacrificio, quod Gregorius persolvit, institutam fuisse; exinde quotannis, undique confluentibus populis, Purpuratis, Prælati, Principibus, celebratam; sæpius quippe Missarum solemnia peragit aliquis ex S. R. E. Cardinalibus; ita nostris temporibus devotissimos DD. Angelum Rapacciolum, & Cæsarem Facchenettum non semel Pontificaliter celebrantes inspeximus, assistentibus, Canonicorum vice, dignioribus Sacri Conventus, & Provinciæ Patribus; Musicis enim modulis nocturna ibidem cantari ab immemorabili consuevere, completoque Hymno, *Te Deum*, statim apparatu solemnī Missa juxta Romanum ritum persolvitur. Post celebrantis Communionem omnes Franciscani non Sacerdotes, Fratres, Sorores Tertiū Ordinis,

quot-



quotquot simul voluerint ex populo , sacrosancta se Synaxi reficiunt , ipsius Sacerdotis Ministerio ; quam functionem , integra hora absolvendam , eisdem DD. Cardinales piè , ac patienter peregrisse admirati sumus .

Vuadd. t. 1. ad ann. 1235. n. 17. scribit, sequenti Anno Pontificem Perugia Assisium convenisse ; quò expletas , testasque videns Ecclesias Dominica in Albis ritibus solemnibus consecravit . Qua in re certo certius decipitur , cum festiva hæc Dedicatio ab Innocentio Quarto Anno 1253. quinta post Pascha Dominica facta fuerit ; sic originales literæ in Archivio Assisiensi servatæ testatum faciunt . *Innocentius IV. &c. Si populus Israeliticus, &c. Dat. Assisi 3. Idus Junii Pontificatus Anno X. & aliæ incipientes, Consecrationes Altarium, &c. Dat. Anagnina 3. Idus Augusti Pontificatus ann. 12. erroris causam hanc puto .* Hoc enim anno Gregorius Nonus Cathedralem Ecclesiam S. Rufino martyri , primo Civitatis Patrono sacram , solemniter dedicavit , Assistentibus ei S. R. E. Cardinalibus , Prælatisque complurimis ; cujus Dedicationis Anniversarium quarta post Pascha Dominica celebratur ; propterea Ecclesia hæc primarias inter Basilicas computatur .

*Helias iterum in Generalem eligitur , curam Fabricæ resumit , eique insistit .*

## TITULUS XVII.

**N**ostri Scriptores Helix semper infesti , ut triennium Generalatus illi surripiant , dicunt F. Jo: Parentem post triennium in Numantino Capitulo in Hispania celebrato confirmatum fuisse , & usque ad aliud triennium in supremo Ministerio perdurasse , usque ad annum videlicet 1236. At ego infallibili securitate aliter sentio ; servatur in Assisiensi Archivio Gregorii Noni Diploma , F. Helix Ministro Generali nominatum directum , incip. *Per mare magnum, &c. Dat. Later. 2. Nonas Julii , Pont. Anno 4. qui fuit 1233. quo Pontifex Ecclesiam Dei procellis exagitata illius , suorumque subditorum orationibus commendabat .* Hoc ante oculos habeo cum appenso plumbo , & videre quivis poterit inter alia hic relatum , & singulari diligentia custoditum . Idem Breve à quodam Historico impressum vidi , qui tamen callidè Helix nomen reticuit , scribens , F. N. Min. Gen. Planè magis credendum Summo Pontifici tunc Regnanti , quàm Historicis non sine astu , atque livore scribentibus .

Helias ergo , ut narravimus , anno 1230. ab officio depositus , per triennium sibi soli vivens , ut bonus subditus , quasi in eremo delituit . Postmodum anno 1233. iterum in Generalem eligitur , cujus promotionem Papa quàm libentissimè confirmavit . Poenituerat enim eum , quòd Heliam exauctorasset , cum experimento probasset , sub optimo viro Jo: paupertatem utcunque refluuisse , at obedientiam , quæ totius Religiosi ædificii est fundamentum , subditorum vitio , corruisse . Cumque triennio illo in Fabricæ Assisiensis constructione remissius actum esset , eam reassumpto Ministro Pontifex commendavit , cujus prudentiam , vigilantiam , & erga Patrem Seraphicum super omnes alios ferventissimum amorem , & illius gloriæ promovendæ præ cæteris addictissimum expertus fuerat .



Præfecturam itaque Ordinis denuo adeptus Basilicæ fundator insignis, ad eam perficiendam omni studio se dedit. Supremum Templum fornicibus contegi in primis curavit, & per Giuntam Pisanum rudis illius sæculi Pictorem supra mediocrem interiùs exornari præcepit; ita apparet vetustissima ex Tabula, qua Crucifixi Salvatoris imago exprimitur, sub cujus pedibus in latiori base F. Helias genuflexi, & orantis extat effigies, cum Epigraphe.

*F. Helias fieri fecit.*

*Jesu Christe pie*

*Miserere precantis Helia.*

*Giunta Pisanus me pinxit.*

*Anno D. 1236. Indict. Nona.*

Campanariam insuper miræ altitudinis Turrim, utpotè tribus supereminentem Ecclesiis à fundamentis excitavit, & ad culmen evexit ex sectis, quadratisque lapidibus, tantæque latitudinis, ut ad eam non per scalæ gradus, sed per stratam viam, ad quatuor angulos ductam ascensus facilis pateat. Quatuor Campanas fundi, in eaque locari fecit, quarum adhuc integræ duæ servantur. In minori per circuitum hæc verba leguntur.

*Anno D. 1239. F. Helias fieri fecit.*

*Bartholomæus Pisanus me fecit cum Lotaringio*

*Filio ejus. Ora pro nobis B. Franciscæ.*

*Ave Maria gratia plena. Alleluja.*

In majori verò, quæ non modica argenti mixtura compacta est, quatuor lineis circumductis, est Epigraphe.

*Anno D. 1239. Papæ Gregorii tempore Noni, Cæsaris, ac potentissimi*

*Friderici. O Franciscæ pie, Fratris studio sed Helia. Christus*

*regnat, Christus vincit, Christus imperat. Mentem*

*Sanctam, Spontaneam, Honorem Deo, & Patriæ*

*liberationem.*

*Cum fit Campana, quæ dicitur Italiana, Bartholomæus Pisanus fecit, cum Lotaringio Filio ejus.*

*Ave Maria gratia plena, Dominus tecum, benedicta tu*

*In Mulieribus, & benedictus fructus ventris tui.*

Aliæ duę tempore, usuque contractæ, denuo fusæ sunt, quarum minor ad Horam Primæ, Major ad Completorium advocat. In Nola verba hæc inspiciuntur.

*Sabbatha pango, funera plango, fulgura frango.*

*Excito lentos, domo cruentos, dissipio ventos.*

Tres aliæ temporis cursu majores adjunctæ sunt ad Patris gloriam ab ejus filiis inibi successivè perpetuò Conventualibus.

Ad hæc Helias duodecim turres teretes ex rufo constructas lapide, totam ab imo ad summum complectentes Basilicam, necnon altissimos muros saxeos, quibus illæ, ut sustentaculis, innituntur, turres, inquam, ad mensuram dispositas, & circumquaque ordinatas addidit, tantæ latitudinis, ut in ea sint Coclides, per quas ad spatium, quod supremæ Ecclesiæ cornicibus superest, ad rectum usque habeatur ascensus.

Hic observandum, quòd cum Ecclesia à sui fundatione sub immediata Apostolicæ Sedis jurisdictione fuerit constituta, in monumentum hujusce præclaræ subjectionis in medio Chori altioris Templi, e regione majoris Altaris Pontificiam sedem ex Pario marmore collocari mandavit sedulus, ac prudens Minister. Ad eam per sex gradus patet ascensus: sub pedum scabello Leo, Draco, Aspis, & Basiliscus affabrè sunt incisi, cum Inscriptione Sedi tantum Pontificiæ



rificiæ tribuenda , *super Aspidem , & Basiliscum ambulabis , & conculcabis Leonem , & Draconem* ; Ad brachia sustinenda hinc inde duo Leones cernuntur , porphyreticum opus egregia manu celatum ; pectore caput vituli , vel tauri subactum premunt . Duas item Columnas ex integro , & unico rubro marmore ad sustollendam Sedis Testudinem erectas videre est . In Leone taurum subjiciente Pontificiæ vis dignitatis exprimitur , quæ spiritualibus censurarum armis Tyrannos comprimit , ac rebelles .

Interim etiam major Conventus pars ædificata , & penè completa apparuit . Helias etenim timens iterum ab officio deponi sibi adversantium arte , ut ad complendum opus , ei tempus sufficeret , omni celeritate illud promovit , confluentibus undique Principum , ac Fidelium oblationibus , præcipuè tunc regnantis Gregorii , cujus insignis devotio Seraphicum erga virum enituit , quem Patrem suum appellabat ; unde & Francisci Filius dici voluit , nam moriturus , se cum Franciscano habitu humari jussit . Quin & scelestissimus Fridericus erga Sanctum Patrem se piûm ostentavit , quippè qui plures Ecclesiasticos redditus , ac proventus rapuerat , eos tamen , quos à Pontifice ad hujus Fabricæ sumptus destinatos agnoverat , liberos deferebat .

*Helias iterum à Ministerio deponitur . Describitur exterior Collis Paradisi prospectus .*

## TITULUS XVIII.

**Q**UAM devotum erga Seraphicum Patriarcham , & in ejus gloria promovenda solertem , tam pigrum in illius regula ad literam observandam se gerebat Helias : quo factum est , ut lociorum Sancti Patris constantia , superbam Generalis impatientiam ferre amplius non valuerit , unde illum denuò à Ministerio deturbarunt ; qui ne ad privatam rediret vitam , & ne Fratrum insultationibus se exponeret , Diabolica ductus suggestionem , impium adiit Fridericum , S. Sedi rebellem , ejusque protectioni se dedit : sed quinque annis apud Imperatorem moratus , nec habitum unquam dimisit , nec contra Pontificem aliquid est molitus : sperabat enim in sequentibus Comitibus adhuc ad Ministerium promoveri . Unde Anno 1244. jam defuncto Gregorio IX. & sedente Innocentio IV. ad Capitulum Januæ celebratum , coram Pontifice Helias accessit ; non enim adhuc Apostatæ , & excommunicati declarationem subjerat ; jamque Fratribus quibusdam foventibus , qui antea illi adhærebant , tentavit iterum assumi ; sed cum frustra laborasset , denuò mali spiritus ductu , ad Fridericum se contulit : nunquam tamen à vera fide recessit : sed dumtaxat ab obedientia Summi Pontificis , quem dicebat ab hypocritis deceptum accepta Imperatoris familiaritate , sese subtraxit , unde pessimè egit . Tandem sub morte Cortonæ poenitens , ritè absolutus , & Ecclesiæ Sacramentis munitus , decessit , & in sui Ordinis Ecclesia , quam ipse fundaverat , est humatus ; cujus corpus integrum , cum habitu , & inscriptione in lamina , post Altare majus repertum fuit : Ejus contritionis , & Poenitentiae processus juridicè sumptus , extat originaliter in Paradisi Collis Archivio , ubi Summo eidem Pontifici est præsentatus ; ibi enim tunc temporis morabatur . Vidit ,



& gavissus est; adimpletum observans in Helia S. P. oraculum, qui Apostasiam, Excommunicationem, & etiam finalem poenitentiam, animæque salutem illi prædixerat.

Helia à Ministerio deposito, Anno 1239. successit Albertus de Pisis, vir disciplinæ Regularis Zelator, sed tanto pondere pressus, tribus tantum mensibus supervixit. Ei successus est F. Haymon Anglus, patria Cantianus, Sac. Theologiæ Magister, & Doctor Laureatus, qui jam sub anno 1233. fuerat Summi Pontificis Apocrifarius, & Apostolicus ad Ecclesiam Constantinopolitanam Orator. Hic summo, quo præpollebat, zelo Religioni moderandæ, & componendæ se dedit. Curam verò Assisiensi ædificio coronidem imponendi, forsan ad declinandas paupertatis fautorum oppositiones, quas Helia objecerant, in Custodem, Præfectum, ac Procuratorem translatam voluit. Quorum, & Successorum solertia post non multos annos, omnia ad complementum deducta apparuerunt.

Quoniam verò nimis prolixum opus esset, singula, quæ gesta sunt, per singulos annos referre, jam totius Fabricæ, ut nunc conspicitur, descriptionem damus. Cum autem de piis viris, & benefactoribus agemus, quæ priori operi addita fuerint, recenscimus.

Exterior hujus molis prospectus ex qualibet orbis plaga, & sublimem, & pulchram exhibet Majestatem, ex Orientali enim in imo Civitatis binæ se obijciunt plateæ: altior ante fores supremi Templi: inferior, veluti secundæ Ecclesiæ Theatrum. Hæc viginti excelsis arcubus, ab imo voraginis excitatis, complanata supereminet: illa solido, eminentique muro distincta super extollitur, ad quam ex inferiori binis de marmore scalis, sibi obviamventibus est ascensus.

A meridie quinquaginta tres arcus conspiciuntur, ampli, eminentes, ex lapidibus rufis, sectis, quadratis, commensuratis constructi; petræ verò tam solido cæmento, duraque calce junguntur, ut clavus inter eas minimè figi possit. Horum arcuum viginti priores inferiorem plateam sustinent. Sequentes tresdecim primæ Conventus parti, ternis nempe supereminentibus Dormitoriis succumbunt, super quos triplex eminentium propyleorum ordo fornicatus conspicitur. Reliqui viginti arcus aliis totidem subsunt, qui deambulatorium propyleatum ad honestam Fratrum recreationem conficiunt, ex quo per integrum Spoletana vallis, ceu Theatrum amplissimum, & Italiæ deliciarum hortus, oliviferis consepata Montibus, Civitatibus, Oppidis, Castris, Rivis, Fluminibus dives, sese aspectui offert. Sub lapideis hujusce Deambulatorii fornicibus, in prospectu totidem peramplæ inspiciuntur fenestræ, vitreis munitæ valvis, per quas in utrumque Refectionis locum, majorem videlicet æstivum, & minorem hyemalem, in eorumque officinas lumen diffunditur: Superiùs itidem alter fenestrarum prominet ordo.

Qui ab Occidente huc veniunt, jam non Conventum, sed amplum potiùs excelsum, & admirandum Castrum, seu propugnaculum aspiciunt, ex imo enim maximum fulcimentum, seu sustentaculum surgit, quod muralis fossæ interior, exteriorque lorica planè videtur, unde Italico idiomate, *Scarpa*, dicitur. Opus subrufis petris affabrè compactum, profundissimis fundamentis, hinc, & inde rastratum, totam complectens, substollens machinam, propter collis usque ad subjacentem torrentem ruinosam declivitatem. Quini super illud Fabricæ ordines elevantur. In primo inferiori apparent horrei fenestræ; in secundo, & tertio Camerarum principalis Dormitorii propylea, in quarto cellarum,



larum, quæ aulam majorem circumstant, fenestræ ; in supremo eiusdem supereminentis aulæ Gotici operis ad eam illuminandam fenestru-læ.

E regione Aquilonari utriusque Ecclesiæ patent latera . Murus superioris ex albo lapide, sex rubris teretibus turribus est distinctus ; inferioris verò ex albis, rufis, quadratis petris, vario, miroque ordine dispositis compactus apparet ; uterque peramplis, altis fenestris, Pariò marmore ornatis, Gotica arte distinctis, oculatisque insignitur. Ædium Papalium prospectus propè Ecclesiam eminet. Inde reliqua Conventus pars, arcubus, ingentibusque muris variæ dispositis superinnititur, quatuor ostentans ordines fenestrarum . Hos exteriores aspectus duplici expressos schemate ad legentium commodum, & Historiæ utilitatem quisquis poterit intueri.





*Sequitur Ecclesiarum Descriptio.*

## T I T U L U S    X I X .

**D**E priori subterranea Ecclesia, quæ sacris Francisci exuviis honoratur, satis dictum est, cum ejus constructionem retulimus Tit. 7. Secunda, seu media, in qua divina communiter peraguntur, miræ, insolitæque structuræ, nil de regulis Vetruvii participat; sed omnino, ut ut est, à Jacobi Alemanni ingenio inventa, singulariter prodiit, omnibus eam ingredientibus, sacro, ut ita dicam, horrore arcanam ingerit devotionem, inexplicabilem excitat pietatem. Figuram signi Tau, quæ talis est T, tres super montes erecti, quos Chorus, duoque lateralìa Sacella efformant, præsefert. Major janua, quam fornicata porticus claudit, duos offert ingressus, teretibus, ac subtilibus columnis distinctos; duodecim teretes columnæ, duæque octangulares extremæ, ex rubeo marmore, totam circumplectuntur, & ornant portam: illis Epistylia ejusdem materiæ superstant, subtilibus exornata figuris, & perpolitè connexa. Inter utrumque ingressum triangulus super inspicitur, musivo opere intextus, cum icone Seraphici Patriarchæ. Magnus item ex vitro oculus latè patens, lapideis cælaturis distinctus, & exornatus hic supereminet, cui hinc inde & duo substant ocelli, per quos in priori Templi parte lumen transfunditur. Valvæ nuceæ sunt, egregiis sculpturis venustæ; quarum majores quatuor SS. Francisci, Claræ, Antonii Patavini, Ludovici Episcopi statuas referunt; totidem sub eis historiæ micant. Prima B. Franciscum, qui lupum Eugubii, spectante populo, cicuravit, demonstrat; Altera B. Claram manu Eucharisticum vas gestantem, & milites propellentem, qui Monisterium obsederant; Tertia S. Ludovicum habitu Franciscano indutum, Episcopali pileo rectum, equitantem, & genus flexis hominibus circumstantibus benedicentem. Quarta S. Antonium, cui vir, mulier, aliique puerulum fasciis obvolutum ægrotum, aut defunctum offerentes, veluti rogant, ut ei vitam, aut sanitatem restituat, in superiori situ, ubi valvæ uniuntur, ad acuminis dexteram, Christus Dominus, spectantibus discipulis, in cælum ascendens, cernitur: ad sinistram S. P. Franciscus similiter ad astra tendens, Fratrum suorum turba suspiciente. Cæterum folia, flores, fructus, aliaque id generis parerga fores ipsas undique adornant.

In introitu statim se objicit Templi pars, qua Thau conficitur, tribus tecta magnis fornicibus, e quorum medio navis major protenditur, quinque, jisque ingentibus concamerata Tribunis, quarum quælibet transversis arcibus quatuor constat triangulis: inde dilatatur navis, cujus brachia obrotunda testudine conteguntur. Chorus verò inter ea suam habet Tribunam amplissimi semifurni forma compactam. Parietes, & fornices ab imo ad summum variis ornantur picturis, quas propriis Titulis exactius demonstrabo. Pavimentum diversis coloratis, excultis, vermiculatis lapidibus mirè stratum apparet.

Jam in medio Altare majus inspicitur, ferreis clathris, intortis ansulis circumquaque vallatum. Columnæ ex marmore duodecim super bases erectæ, maurata, foliisque circumdata Epistylia habentes, circumstant, quibus



bus clathrorum cardines hærent. Quatuor hinc prospectus, quatuor januæ, quæ valuis, clathris, pæssiculis, & feris clauduntur. Super columnarum capita quoquoersus incumbunt aurei, cœruleique coloris ex lapide laquearia, quæ clathris supersunt, & invicem in quatuor angulis uniuntur. super hæc ex Odei prospectu in medio pium Crucifixi Salvatoris simulachrum confurgit. Quatuor angulis totidem Angeli majores respondent, candelabra ad formam cornucopiæ gestantes: inter prospectus verò alii octo minores Dominicæ Passionis instrumenta elevantes; opus peritæ manus, & auro arte politiori contentum. Introrsus ex ferreis brachiolis transverso laqueari innixis duodecim ex argento lampades pendent, diu, noctuque circum arcam ardentes. Ad Altare per quatuor ex lapide gradus ascenditur, super quos in planitie, utraque ex parte, ligneum pavementum locatur. Mensa unicus est rufus, expolitus lapis, cujus longitudo undecim Romanis pedibus constat, latitudo sex, crassitudo ulnam minimè excedit. Viginti Columellæ cum basibus, & Epistyliis folia referentibus, totidem Gothici arculi super illas elevati, cum prospectu inter eos vermiculatis lapillis ornato, quod opus musivum est, mensæ extremitates sustinent; cujus medium corpus quatuor sustollitur sectis lapidibus, ad instar asserum erectis, quasi capsam aliquam conficientibus, quæ super intercolumnia conspicitur. In medio Columellarum, e regione Chori, alia majuscula, & concava columna, in qua Innocentius IV. propriis manibus unam S. Præcursoris Joannis costam, cum Aram consecraret, inclusit. Mensa duæ latitudinis æqualis altaria conficit, marmoreo variato gradu, super quem Candelabra, vasa cum floribus, & simulachra argentea collocantur, distincta. Eiusdem gradus in medio pro Sacrosanctæ Eucharistiæ custodia Tabernaculum surgit ex argento, & auro elegantissimè elaboratum, cujus super aram altitudo novem Romanos conficit pedes; extra mensam ad latera, ipsis in locis, ubi ligna erant patibuli, desuper marmoreos, quadratosque cylindros, ac bases duæ ex argento statuæ assurgunt SS. Francisci, & Claræ mutuo se aspicientium, altitudine quinque pedum. Ante Altare e regione Orientis, in medio faciei altioris gradus lapidei, sub lignea crepidine quædam est fenestrella, ferro munita, per quam in subjacentem specum tres ex argento lampades semper ardentes submitti solent, quò significatur directè sub Altari, cui specus subest, sacrum stare thesaurum.

Chorus sub profundiori testudine post Altare situs, ligneo vallo egregiè sculpto conclusus, binos habet sedilium ordines, affabrè ex nuce, & perpolitè cælatos. Superiori ordini, velut bicornis Lunæ semicirculus, supereminet columellatum opus, e cujus cornibus duo dilatantur Odea, quorum quodlibet suum organum tenet. operis totius materia ex ligno est, pulcherrimis sculpturis super cœruleum inauratis decorum. Ultra mediam navim, Templum ipsum binos habet à latere ordines sacellorum. Hic undequaq; clathra sunt ferrea, & per gradus ex navi media ascenditur. Singulis Cappellis propriæ insunt fenestræ, vitris pulchrè depictis occlusæ.

Adeo elegans est Ecclesiæ superioris constructio, ut nihil ornatius illo sæculo videri unquam potuerit, nec Architectura ejus ordinis (ut periti asserunt) in toto terrarum orbe inveniri. principale ostium Orientem in æquinoctio directè excipit Solem. Duplici gaudet ingressu, sicut inferius, cui in constructione est simillimum, porticu excepta, qua caret. Amplior oculus Januæ supereminet, sculptis lapidibus intermediis vario ordine dispositis decorus. Pavimentum cæmentaria illitum est mixtura, nec immediatè fornicibus Templi secundi, seu inferioris innititur, cum inter utrumque ostipedale



mediet spatium, sed abjēgnis tabulis, quernis trabibus, quæ post quinque circiter sæcula adhuc recentes, & incorruptæ apparent, incumbit. Ecclesia ipsa in Crucis modum constructa, lumine, & eminentia pollet, necnon testudinibus, tribunisque congrua dimensione venustis, ab imo ad summum picturis antiquitate famosis ornata. In medio Ara major sita conspicitur, super quatuor ex lapide gradus. Mensa unico constat marmore, sicut inferior. Coeterum duo tantum alia in transversa navi, contra Occidentem Solem, ad sunt altaria, quæ à vetusta ruditate, nunc aliquantulum purgata conspiciuntur.

Chorus in modum Theatri latissimè patet; sedilia ex solida materia, sculpturis, imaginibusque insignita visuntur, non colore, sed arte mirabiliore affabrè expressis. In sedilium medio coram majori ara directè consurgit Pontificium solium, de quo superius Tit. 17. Fenestræ, figura inferioribus similes, altiores sunt, sicut Templum ipsum eminentius. Organum peregrinum, ingens, peramplum. pro Musicis Odeum sacris exornatum imaginibus. Ecclesia Sanctissimæ Virgini Mariæ, & SS. Angelis, & Apostolis dedicata est, quorum propterea festivitates in ea solemnioribus celebrantur officiis, & quovis Sabbato post Primam de B. Virgine Sacrum canitur; ob id albo marmore structos parietes, & rubeo duodecim ejus referunt tutres; quod candor Virginalem, & Angelicam præferat puritatem, rubedo sanguinem Apostolicum. Hanc superiorem Ecclesiam insignis benefactor Paulus Cambiutius sibi olim heredem instituit, ejusque bonorum fructus tantum in illa servanda, ac restauranda, & in ornandis Altaribus ( detractis eleemosinis pro annuis suffragiis ad salutem illius animæ persolvendis ) impendi jussit.

### *Conventus per suas partes describitur.*

## TITULUS XX.

**A**Dmiranda planè, & magnifica hujusce sacre Domus structura tantæ est molis, & majestatis, ut inspectores in eam trahat considerationem, quanta arte, quibus sumptibus, quoto tempore opus fuerit ad tantæ machinæ in ruinoso Collis præcipitio extructionem: Patet janua principalis ad latum inferioris Ecclesiæ. In introitu ad dexteram fons conspicitur, e cujus orbiculari sinu columna assurgit, quæ pulchrum, & amplum sustinet scyphum, unico rubro excavatum marmore, e cujus centro per fistulam in altum aquæ profiliunt, quæ in ipsum recidentes scyphum, in lacum inde inferiorem labuntur; unde per secretos cuniculos ad hortos ducuntur, & officinas. Hinc campanilis turris ab imo ad summum selectis mirè compasta marmoribus per integrum cernitur. Ad sinistram verò tria assurgunt fornicata, concamerata, recentia Dormitoria, quorum inferius Novitiis, medium infirmis, supremum inservit advenis. Illic ingentes sunt arcus, qui voraginem usque ad planitiem replent, & machinam adeo excelsum sustentant. Camera fornicatæ, quæ ad meridiem versæ singulæ singula habent & fornicata propylea, ad vallis prospectum eminentia.

Sequitur magnum illud, & celebre Refectionis Conclave, cujus longitudo 250. implet Romanos pedes, latitudo 50. altitudo 80. peramplæ, & eminentes



nentes fenestæ laquearibus petris quadripartitæ, singulæ habent quaternas extrorsum vitreas, introrsum ligneas valvas, quibus à meridie per propylæatum deambulatorium excipitur lumen; ab alio autem latere necessariæ, commodæque sunt officinæ. Extra Refectorii Januam fons affabrè structus appareret, in quo per fistulas quinas lymphia prolabitur, quæ faciliè potest ad officinas inferiores, prout fuerit opus, diverti. Occurrit inde aliud hymale Refectionis Promptuarium, congruè concameratum, temporis, & familiæ satis aptum. Utrumque mensis nuceis pollet, & sedilibus ex saligneis, & populeis tabulis, quorum & ex nuce sunt ornamenta.

Tria per molis medium sunt impluvia, seu claustra; majus principale ad Occidentalem Ecclesiæ plagam post Chorum situm, duplici gaudet ordine egregiis picturis insigne. Testudines inferioris ordinis amplis, & excelsis nituntur pallistridis, superioris verò teretibus columnis. Campus medius erectis stratus lateribus cisternam refert in medio amplam, profundam, in qua pluviales aquæ receptæ, salubres æquè, ac frigidæ eyadunt. Aliud ante fores Refectorii majoris extat impluvium; inque ejus sinu cisterna antiquior. Tertium, quod est angustius, claustrum inter novæ fabricæ scalas conditum, & cisterna est refertum, per quam aqua novitiis, ægris, advenis ministratur.

E regione occidentali, ubi profundior olim erat vorago, inferius est stabulum, equile majus, habens latitudinis Romanos pedes 55. longitudinis 233. suosque lateritios fornices. Olim equis inserviebant Papalis Curia, cum Assisium venirent, & prope hanc eorum Basilicam moras trahebant Summi Pontifices. Illi ejusdem latitudinis, similiterque fornicatum superest horreum, cum patentibus undequaque fenestris, & ad legumina, aliaque minuta servanda variis cellulis. Super hoc surgit Dormitorium Patrum, duplici hinc, & inde constans cubiculorum ordine, sub unica magna, excelsaque testudine. Hinc major Aula superextollitur, quæ olim suo tegebatur amplissimo fornice: cum tamen ea ex parte amplissimi parietes lapsum minitarentur, pondera illa subtracta sunt, & modò solum laquearibus, & imbricibus tegitur. Circumstant hanc Aulam PP. Regentium, Lectorumque habitationes. Musicorum Fratrum Dormitorium fornicatum inde meridiem versus distenditur, quod super hyemale Refectorium locatum est; e contra ad septemtrionalem plagam Collegii Dormitorium laqueatum, longitudinis 339. pedum, cui aliud subest ejusdem longitudinis testudineum familiæ Dormitorium: sub hoc cella vinaria ingenti tecta ex saxo testudine, marmoreisque arcibus circumquaque corroborata.

Inter Collegii, ac musicorum Dormitoria, ac majora inter claustra, Bibliotheca antiquis m. s. membraneisque vetustis libris, qualibet in materia, & facultate locuples, & insignis est sita: in dies impressa opera adduntur. In ea major desiderabatur ornatus; quem ignorantia non curavit, peritia præbere non potuit. At nostra paupertas instauravit, & venustam aliquantulum reddidit. Sub Bibliotheca situm est Archivium, & Cancellaria, ubi potiora servantur Ordinis monumenta, ex quibus omnia ferè, quæ scribo, desumpsi. Apostolica verò diplomata ad Sacrum Cœnobium spectantia, ex originali transcripta in secunda hujus operis parte dabo.

In extremo Conventus situ, prope Ecclesiam, Ædes Papales eminent, pro paupertatis modulo sufficienter instructæ, quas ex Summis Pontificibus aliqui dignati sunt inhabitare, & S. R. E. Cardinales in dies, devotionis ergo venientes, hospitio recipiuntur; ex quibus potior Ecclesiæ pars explorari potest.



Admirabilior hujus ædificii constructio latet; infima scilicet, & subterranea; ingentibus enim arcubus, & amplissimis muris compacta est, super quos totius habitationis deducta planities sustentatur; id verò ubique admirabilissimum, quòd nullæ trabes, nulla ferrea loramenta, vel laquearia ad colligandos parietes adhibentur, sed partes singulæ propria renacissimè soliditate còhærent, amplissimi arcus, fornices, muri propriis connectuntur, indissolubili nexu, lapidibus.

Sed jam totius molis graphycè aspectus duplex proponitur. Primus Orientalis, & meridionalis; secundus Occidentalis, & Aquilonaris, in quibus etiam per elevationem, ingeniosè ab Artifice expressam, distingui possunt interioris ædificii partes.

*Ecclesiæ, & Conventus solemniter consecrantur.*

## TITULUS XXI.

**G**regorio IX. Collis Paradisi Basilicæ optimo fundatore jam vita functo successit in Petri Cathedra Gaufridus Cardinalis Castilionus Sabinensis Antistes, qui Canonizationi S. P. Francisci, & Ecclesiæ foundationi interfuerat. Coelestinus IV. nuncupari voluit; cum verò diebus tantum septemdecim in Pontificatu vixisset, conceptam in S. Patrem, & locum devotionem manifestare nequivit.

Ei post duos super viginti Interpontificii menses suffectus est Sinibaldus Fliscus Januensis Presbyter Cardinalis S. Laurentii in Lucina, Innocentius IV. appellatus, qui cum B. Franciscum viventem novisset, ejusque corpus jaculis divinis transverberatum bis observasset, summa Sanctum pietate prosequeretur; Non tamen statim potuit mundo eam palam facere, quippe qui impiissimi Friderici Imperatoris declinaturus insidias, Lugdunum petiit, ubi usque ad pessimam ejusdem mortem permansit. Exinde anno 1252. in Italiam rediens, ac Perusiam petens, visitantibus S. P. Francisci Assisiensem Ecclesiam in perpetuum Indulgentias est elargitus. Originales literæ hic asservantur, Incipientes, *Licet is. Dat. Perus. Id. Februar. Pontificat. ann. 9.*

Sequenti anno circa Aprilis initium Assisium venit Pontifex, utque pio voto, ac desiderio faceret satis, ibidem usque ad Octavam Festi S. P. moratus est, Ædes inhabitans Pontificias, e quibus non visus Ecclesiam visitabat, & sæpè sæpiùs divinis intererat.

Die 25. Maii Translatio Corporis S. P. sacra, quæ eo anno quinta post Pascha Dominica inciderat, Summus ipse Antistes Innocentius totam Basilicam, simul & Coenobium dedicavit, Assistentibus ei S. R. E. Cardinalibus Raynaldo de Comitibus Signiæ, Episcoporum Priore, Riccardo Hannibaldense Diaconorum Primicerio, Jo: Cajetano Ursino, aliisque, necnon Curiae Prælaeis, & Magnatibus, qui ad festum convenerant. Parietes Ecclesiarum, & Conventus interiùs, exteriùsque lustrali aspersit aqua; Cruces in variis Conventus partibus depictas, quæ adhuc visuntur, sacravit; Majorum Altarium mensas sacris lenivit oleis, in eisque Sanctorum Analecta locavit, præcipuè sub ara Secundi Templi S. Io: Baptistæ costam, quam ipse Pontifex ad hunc finem



Septentrio

28. 12

Collis Paradisi

Occidentales

Oriens



Prospectus Meridionalis








Collis Paradisi

Occidens

Prospectus Septentrionalis









finem à Januensibus acceperat, vase chrystallino inclusam posuit. In media regione brachium S. Geruntii Episcopi, & Martyris in sublimi pariete decenter clausum, ubi sub lapidis coronice sic legitur. *Hic intus jacet brachium S. Geruntii Episcopi, & Martyris.* in signum consecrationis hujus Conventus, rubæ quædam Cruces in majori Refectorio super fenestras, & priori Capitulo adhuc intextæ cernuntur, aliæ temporis cursu dilapsæ sunt.

Hinc factum, ut inter omnia Franciscanæ Familiæ Cœnobia Antonomasticè Sacer iste dicatur Conventus; quamquam enim aliqui (fortasse ad emulationem) paucis abhinc annis sacrum cœperint & suum nominare Conventum; non tamen ex verâ, realique Pontificum consecratione hujusmodi denominatio dari potest, sed duntaxat ex genericâ quadam, qua sacrarum personarum habitatio quævis etiâ sacra appellari potest.

Corrigendus hîc P. Vvadd. qui ab aliis deceptus, ad hunc annum 1253. num. 34. asserit ab Innocentio IV. Ecclesiam Portiunculæ consecratam, nullamque de prædicta vera consecratione mentionem facit. Ecclesiola autem Portiunculæ dedicata fuerat, vivente adhuc S. Patre, secunda Augusti die, 1223. à septem illis Episcopis, qui jussu Honorii Tertii Indulgentiam plenariam perpetuam, sed diurnam pridie promulgaverant. Dedicatio verò à nobis asserta in dubium revocari non potest, cum duo pro ea hoc in Archivio serventur Innocentii IV. diplomata originalia; *Si populus Israeliticus, &c. & Consecrationes Altarium, &c.* quo etiam visitantibus Ecclesiam in Anniversario Dedicationis usque ad consequentes Pentecosten Octavas Indulgentias elargitur. Concessit insuper, ut exinde in majori sacra mensa secundæ Ecclesiæ, gradibus, & ornamentis distincta duæ simul Missæ in utraque parte persolvi possint, ideoque utrobique sacras collocavit reliquias.

*Innocentius IV. Sacræ Assisiensi Domui privilegia confirmat, & auget.*

## TITULUS XX.

**M**Oram ulterius in Sacro Assisiensi Cœnobio ducens Pontifex, quò facilius fabrica, & expeditiùs ad coronidem duceretur, F. Philippo de Campello operis Præfecto concessit, ut elemosinas, & oblationes quasunque, etiam pecuniarias tam ipse, quàm alii pro tempore Præpositi licitè recipere, & ad id opus integrè, fideliterque possent impendere. Ad sunt originales literæ, incipientes, *Decet, & expedit honorificas illis edificare Basilicas, qui, &c. Dat. Assisi 6. Id. Julii, Pontific. an. 11.* quas suis referam locis.

Non equo ferebant animo fratres quidam extreme paupertatis utique Zelatores, sed ob simplicitatem obedientiæ Christi Vicario debite neglectores, quòd tam pecuniarum, quàm pretiosæ cujusvis sacræ supellectilis oblationes reciperentur, & asservarentur: hæc enim Minoricæ mendicitatis statui repugnantia affirmabant. At Pontifex Dei, sui que Sancti gloriæ nobiliori spiritu addictus, absoluti, & supremi Domini munus impleris, filiorum salutis prospiciens, omnem ab eorum mentibus scrupulum statuit amovere: Declaravit siquidem Ecclesiam ipsam specialiter ad Sedem Apostolicam pertinere, eique soli immed-



diatè subjectam , proinde non Ordinis statutis regendam , sed Pontificiis sanctionibus . Decrevit igitur Templum illud præ cæteris quibuscumque Ordinis Minorum Ecclesiis insigne , ac privilegiatum , recipere , ac habere posse sacra vasa argentea , & aurea , indumenta serica , & cujuscunque pretiosioris materiæ . Campanas etiam plures magnas , ac parvas , aliaque id generis omnia , etiam à Religione prohibita . Inhibuit ulterius Generalibus , Provincialibus , Custodibus , & quibuscunque Capitulis Generalibus , Provincialibus , & Localibus , ne unquam hujusmodi oblationum receptiones , ac detentiones impedire tentarent , nec oblata auferre , aut quomodocunque distrahere , absque ejusdem S. Sedis speciali mandato . Literę incipiunt , *Dignum existimamus , & congruum . Dat. Assisi Kal. Augusti , Pontif. An. 11.*

Interim non semel ad Virginem Claram in S. Damiani Aedibus egra valetudine detentam visitandam Pontifex ibat , nec ambigo illius supplicationibus inclinatum , tot gratiis , & privilegiis S. P. Ecclesiam cumulasse . Evolavit eodem anno 1253. Papa ipso Assisi commorante , ad instar innocentis Columbe , ad æthera anima illa , mille virtutum pennis candidata , & Virginales exequię Summi Pontificis assistentia à Sacro Cardinalium Collegio celebratę fuerunt ; e quibus Raynaldus de Comitibus , qui anno sequenti Alexander IV. Pontifex fuit , funebrem recitavit Orationem , & post biennium Sanctis adnumeravit Virginibus .

*In Assiensi Basilica B. Stanislaus Martyr,  
Cracoviensis Episcopus Sanctorum  
albo describitur.*

## T I T U L U S XXIII.

**C**UM Innocentius IV. anno præcedente Perusiæ moraretur , iteratas Boleslaidi Poloniæ Regis , & Prebendæ Cracovien. Episcopi instantias exceperat , ut Stanislaum ejusdem Ecclesiæ olim Episcopum , ab impio , & impudico Boleslao secundo inter Sacra interfectum , multis jam miraculis coruscantem , Ss. Pontificum , & Martyrum fastis adderet . Processum vitæ , mortis , prodigiorum ejus Papæ transmiserant Archiepiscopus Guznen. Episcopus Vuratislavien. & Abbas de Lubez , quibus ipse negotium commiserat . Sed ut in re tanti ponderis majorem diligentiam adhiberet , F. Jacobum Veliternum Minoritam cum eisdem actibus ad Polonos misit , ut per testium depositionem sciret , an omnia in eis asserta veritati cohærent . Commissum sibi munus adeo solertè peregit Jacobus , ut Perusio discedens 7. Kalen. Juni 1252. anno sequenti eodem die Assisium ad Innocentium redierit , omnia rite deferens , ac juridicè comprobata . Processuum discussionem Cardinalium consultationi Papa subjecit : qui sub die 8. Septembris in Pontificiis Aedibus coram eo consistorialiter convenientes , communi calculo solemnem Stanislai Canonizationem decrevere , die 17. ejusdem mensis , Impressione sacrorum Stygmatum S. P. Francisci memorabili , in ipsa Collis Paradisi Pontificia Basilica celebrandam .

Paratis omnibus pro Christi Vicarii majestate , & Sacræ Curiæ dignitate , præsentibus præfati Regis , & Ecclesiæ Cracoviensis Oratoribus , Innocentius Pontificalibus indutus , eminenti insedit folio , circumdantibus Cardinalibus ,



libus, circumstantibusque Prælati, ac Magnatibus. Publicæ instantiæ ab Oratoribus præmissæ fuerunt, & Pontificis jussu Jo: Cajetanus Urfinus, qui postea Nicolaus III. fuit, ex marmoreo Rostro vitam, gesta, martyrium, miracula rite probata recitavit. Dein Raynaldus de Comitibus Episcopus Ostiensis (post annum Innocentii successor) egregium ex Pulpito sermonem habuit. Implorata demum Sancti Spiritus assistentia, stans Pontifex, solita verborum formula Sanctum declaravit Christi martyrem, ejusque mortis festum diem ab universa Ecclesia celebrari præcepit. Inde Hymnus *Te Deum laudamus*, decantatus est, & Missa solemnis ab ipso Sacerdotum principe persoluta.

Accidit, quòd dum laudatus Raynaldus sermonem faceret, ex quadam columna marmoreum Epistylum super caput mulieris ceciderit, quæ sub illa sedens audiebat; cumque mulier, inclinato in sinum capite, immobilis mansisset, vicini mortuam arbitrati, ne dignissimum impedirent Oratorem, pallio cooperierunt. Expletis tamen omnibus, illæsa, & incolumis femina surrexit, imò confessa est, ex illius lapidis ictu, capitis dolore, quo diutius laboraverat, se liberatam sensit. Epistylum, in rei memoriam, catena suspensum, adhuc in Templi latere cernitur, juxta majorem Aram, cum brevi facti narratione.

Cromerus lib. 9. rerum Polonarum in principio ait, hanc S. Stanislai Canonizationem celebratam 6. Id. Septemb. Bzovius verò ad annum 1253. n. 1. eam ponit sub 15. Kal. Octobr. quo etiam die Apostolicum diploma datum fuit Assisii, incipiens, *Olim à Gentiliis oculis*, &c. sed puto variam horum Scriptorum sententiam inde ortam, quòd prior diem, in quo primum decretum concistoriale de canonizando ordinatum fuerat; alter diem ipsius sollemnis canonizationis posuerit.

Hic altare extat S. Stanislao dicatum, & in Sacrarum Reliquiarum loco Brachium ejusdem servatur, quod post annum Episcopus, & Canonici Cracovienses miserunt. constat ex literis Alexandri IV. incipien. *Ad veneranda merita*, &c. Dat. Later. 7. Kal. Febr. Pontif. an. 2. quibus se in minoribus constitutum præsentem dicit fuisse Assisii S. Stanislai Canonizationi, eisdemque literis visitantibus Templum S. Francisci in festo ejusdem S. Stanislai, annuatim, & per Octavam ejusdem festi centum Indulgentiæ dies concessit.

*Picturis utraque decoratur Ecclesia.*

## TITULUS XXIV.

**C**alamitatum alluvio, quæ tot sæculis miserrimam Italiam jam opprefferat, nedum virtutes, sed & bonas artes quasquæque extinxerat: cum summo bonorum largitori visum est, per sanctos viros Dominicum, Franciscum, aliosque ejusdem sæculi Ordinum fundatores, virtutes humano generi restituere, & per viros ingenii acumine pollentes artes jam diu perditas reddere. Perierant inter alias Architectonice, pictura, sculptura, ut vix earum umbræ quædam tantum remanserint. Liqueat ex operibus ab anno Domini quadricentesimo usque ad millesimum ducentissimum excitatis, in quibus, ut ait Georgius Vafarius, earum artium peritissimus in proæmio ad vitas pictorum, nulla dignoscitur proportio, mensura, vel methodus, unde ad extruen-



extruendum Collis Paradisi ædificium opus fuit ex Theutonia advocari. Jacobum prædictum picturam Græci quidam imperiti per Italiam exercebant, irridendi magis, quàm admirandi; cum tamen soli, paucique essent, tamquam Appelles, & Parhasii habebantur. Cum circa annum salutis 1210. Juncta Pisanus, ruditer à Græcis instructus, primus ex Italis artem apprehendit, rusticumque pingendi modum est imitatus. Hunc F. Helias ad novam exornandam Basilicam destinavit, anno 1236. Fecit Crucifixi imaginem, super Altare majus superioris Templi olim locatam, dein super primariam Januam, nunc temporis dente quasi corrosam depositam cernimus. Eius opera censentur imagines Crucifixi cum Angelis circumvolantibus, & circumstantibus turbis in prospectu duorum Altarium in latere eiusdem Ecclesiæ. Hæ, parietum crusta labente, ceciderunt; quarum vice sunt duæ ægregiæ Icones; hinc Spiritum Sanctum super B. Virginem, & Apostolos discendentem, illic S. Michaellem Arcangelum in Luciferum Præliantem demonstrant, At Juncta aliò vocatus opus deservit.

Sub anno 1250. Jo: Cimabos Florentinus celebrer habebatur, qui à natura melius, quàm à pictantibus Græcis illis edoctus, artem ab ea ruditate exposcere nitebatur: adhuc tamen juvenis eorum discipulum agebat. Hos Innocentius Pontifex Assisium vocavit, unde eius jussu, & ope secundæ, seu mediæ Ecclesiæ exornandæ studuerunt. Fornices navis mediæ caruleo probatissimo colore per integrum sunt depictæ: hinc stellæ aureæ intermixtæ, ut cœli facies expressa videretur; transversus arcus variis ornatur parergis; in lateralibus muris ad dexteram gesta Christi, ad sinistram Francisci opera demonstrantur. Aderat Cimabos, jam non discipulus, sed magister, cui propterea, dimissis Græcis, opus commissum est.

His ergo superiori Ecclesiæ, utpote magis lucidæ, coloribus decorandæ totum se dedit. Molem istam octo tegunt amplæ, distinctæque tribunæ, Jonicum opus, quarum sex ab ingressu usque ad Chorum tendunt: duæ aliæ Crucis brachia operiunt. Earum quæ jus quatuor constat triangularibus partibus, quas arcus transversus, contermini efficiunt. In prima ergo ab intioitu Ecclesiæ testudine quatuor expressit Ecclesiæ Doctores, Augustinum, Ambrosium, Gregorium, Hieronymum; qui magistralem super Cathedram sedentes singulos Religiosos viros edocent auditores in tertia pulchras posuit imagines Salvatoris, Deiparæ, Præcuroris Francisci. In quinta, quæ Crucis medio supereminet, quatuor delineavit Evangelistas. In secunda, quarta, & reliquis, caruleo, quem transmarinum vocant, colore cum aureis stellis cœli aspectum est imitatus. Exinde laterales Templi parietes in tres partitus est ordines, quorum duos super, alterum infra deambulatoriam coronicem constituit. In supremo ordine veteris historias Testamenti, in medio novi exaravit. In inferiori autem, post Junctæ mortem, Giottus eius discipulus S. P. Francisci vitam politissimè partitam depinxit. Super Chori sedilia utrinque in quatuor Iconibus B. V. Mariæ ultimam valetudinem, Transitum, Assumptionem, Coronationem Cimabos prædictus repræsentaverat; sic fama est: sicut Pontificiam super sedem veras apposuit effigies Gregorii IX. Innocentii IV. quorum primus fundavit, alter consecravit, uterque privilegiis Basilicam cumulavit. Superiùs testudinem versùs varias Sanctorum addidit imagines. In prospectibus brachiorum Crucis Templi, dextrorsum Christus in Cœlum ascendens, Apostolis admirantibus, Angelus pervolans & velut aliis quatuor inferioribus clamans, ut in Apocalypsi describitur, & universale Judicium exprimuntur: sinistrorsum verò S. Petrus inverso capite crucifixus: hinc idem Sanctus Apostoles, cujus



oratio Simonem magum ex aere dat præcipitem . exinde S. Jo: Evangelista in insula Patmos . Ut tamen ex ruditate conjicio , potius hæc senioris Junctæ , quàm Cimabovis sunt opera , cujus picturæ etsi temporis , aeris , pulverisque injuria plura passæ sint detrimenta ; multæ tamen , & peculiariter quæ Tribunis supersunt adhuc monstrant Artificis in emendanda vetustate excellentiam . Merito Georgius Vasarius in ejus vita ipsum Pictorum Patrem , Picturæ auctorem , institutorem , restauratorem appellat .

Cimabovi succedit Giottus , itidem Florentinus , ejus discipulus , cujus ars artem politiolem effecit ; cum nempe praxis , & experimentum ad plura addiscenda conducant , & facile semper sit inventis addere , nedum magistrum æquavit , sed superavit . Hinc Dantes in Purgatorio can. II. cecinit .

*Credette Cimabue ne la pittura*

*Tener lo campo; & hora hà Giotto il grido,*

*Si che la fama del Maestro oscura.*

Giottus itaque ad sui Præceptoris complenda opera Assisium petiit : quare postremam Ecclesiæ superiori coronidem imposuit ; Spiritus Sancti descensum super Apostolos , & Christi Ascensionem in anteriori super majorem portam prospectu egregiè depingens , & S. P. acta in inferiori ordine exprimens , ut supra tetigimus .

Inde ad mediæ ornamentum Ecclesiæ se convertit . ibi insigne opus , & ab Historicis commendatum apparet , quod quadripartitum in triangulis Tribunæ majoris Aræ adhuc integrum perseverat ; in primo enim prope Chorum Seraphicus Pater , Diaconi Dalmatica indutus aureis intexta floribus in gestatoria triumphali sella sedens aspicitur , vehementibus , & comitantibus Angelis , quorum alii tubis sonare , alii alternatim modulari videntur , velut illum in triumphum ducentes , cum inscriptione , *Gloriosus Franciscus* ; super quem purpureum vexillum , septem ornatum stellis , ceu è coelo dimissum suspenditur . In secundo ad dexteram porticus deambulatoria cum columnis inspicitur , in medio vir gravis , veste tectus subnigra , & monachali , quadrato sedet diadema redimitus , qui dextera cuidam Fratri genuflexo jugum imponit , & læva labello digitum apponit , quasi silentium indicens , cum literis , *Sancta Obedientia* . Ad dexteram sedentis stat Prudentia bifrons , mathematica gerens instrumenta : ad lævam Humilitas ardentem attollens facem : inscriptiones utramque indicant , sub Humilitatis icone Angelus quoddam expellens monstrum , *semivirumque canem , semicanemque virum* , ceu Superbiæ symbolum . Hinc , & inde homines , & Angeli sedentem adorant . super porticus signa , coelum versùs tendens S. P. extensis manibus Stygmata ostendit . hic duo itidem Angeli Scripturas quasdam explicatas demonstrant . in tertio triangulo contra Solis Occasum , sponsalia inter Franciscum , & Paupertatem , dexteras Christo jungente , ingeniosè rapræsentantur . Paupertas mulier extenuatæ faciei , vestis laceræ figuratur ; contra quam canis latrans , homo purpura amictus lapides jaciens , alter coeruleo tectus indumento virgam extendens , illamque spinis implicare contendens . Angelorum cohors utrinque stantium sacro assistit Hymenæo . Ad dexteram extremitatis Franciscus adhuc juvenis ab Angelo indutus , recentem exuit tunicam , eamque pauperi donat . Ad sinistram tres viri mollibus induti avaros figunt , quorum unus manu crumenam stringit , alter rapacem volucrum sustinet , alter dextera pectus tangit , ceu cor divitiarum cupidum ostentans . In supremo angulo Deus inter diaphanas nubes velatus transpicitur , cui duo offerunt Angeli , alter sublime Templum , alter habitum illum , quem adolescens Patriarcha inopi præbuit : in medio sic legi-



tur, *Sancta Paupertas*; in extremo triangulo sinistrorsum Arx videtur confurgere, vallo, propugnaculisque munita, e cujus medio Turris tollitur, & super hanc album vexillum, & in ipsa turri patens fenestra, ex qua, velut ad custodiam posita, pulcherrima apparet puella manibus ad pectus junctis, supplicans Deo, cum verbis, *Sancta Castitas*, cui duo volantes Angeli, tamquam è coelo dimissi offerunt, unus palmam, & alter Regnum. subtus extra arcem totidem Angeli virum in balneo stantem abluunt, super quem ex castri muris mulier, cui inscriptio, *Sancta munditia*, aquam infundit, & alia, cui Titulus, *Sancta Fortitudo*, pannum porrigit absterforium, totidem item Angeli binas deferunt vestes, velut ad induendum ablutum. Extra arcem, ceu custodiæ assisterent, seniores sunt milites sanctitatis diademate coronati, ex quibus unus imperialem, regalem alter defert coronam. Hos puto Henricum Imperatorem, & Boleslaum pudicum Poloniae Regem, qui virginitatem conjugio copulavere. In angulo ad dexteram, ceu à rupe ascendentes tres S. P. excipit viros, quos ad lavacrum, & arcem invitare videtur. In alio ad sinistram *Sancta Pœnitentia*, habitu Anachoritæ, dextera flagellis, læva signo Crucis armatur, & spectra quædam è rupe dat præcipitio, nigerrimum nempe Diabolum, tetrum mundum, pallidam mortem, cæcum Cupidinem. Pœnitentiam comitantur aliæ Personæ flagella, Cruces, virgas in hostes illos vibrantes. Arcus Tribunæ conterminos, varia inter parerga, Sanctorum, Angelorumque vultus decorant.

Opus hoc summam Giotto peperit famam, tum propter artem, tum propter mysticam inventionem, & tot Idæarum expressionem; non etenim ante illum mos erat pictoribus per symbola Triumphos, aut gesta exponere, sed nudas historias ruditer pictitabant. Hinc & ipse hujusce inventi Institutor est habitus; dignus, cui Angelus Politianus hoc texuerit Epitaphium.

*Ille ego sum, per quem pictura extincta revixit,  
Cui quàm recta manus, tam fuit & facilis.*

*Naturæ deerat quod nostræ defuit arti.*

*Plus licuit nulli pingere, nec melius.*

*Denique sum Jottus. quid opus fuit illa referre?*

*Hoc nomen longi carminis instar erit.*

Cum Giotto aderat Puccius Capanna, Florentinus, ejus discipulus. Huic tribuitur Pictura Passionis Christi in cupa dexteri brachii Crucis Templi, Sanctam quoque Portiunculæ Adiculam figuris ornavit, & in variis Civitatis Assisi partibus varia opera perfecit. Hinc Civium omnium ad se traxit amorem, inter quos cooptatus uxorem nobilem duxit, & Puccinorum familiæ nomen dedit.

Stephanus Florentinus, alter ex Giotti alumnis Paradisi gloriam in Chori Tribuna delineare cœpit, at non perfecit, quam temporis injuria ferè lapsam Cæsar Sermeus Assisias tandem politiori stylo eleganter, & ingeniosè restituit: additis in imo loco Purgatorii, & Inferni imaginibus.

Petrus Caballinus Romanus, qui & Giotti discipulus, in declivitate sub Historia Passionis à Puccio depicta Christum Cruci affixum, turbam hominum, & equitum delineavit; cum enim equos valdè eleganter pingeret, Caballinus est nuncupatus. Quod magis hic observandum, est Angelorum turba per aërem circumvolitans, quorum quivis vario motu summum dolorem explicat, & ad compatiendum videntes excitat.

Simon, & Lippus Memmi Senenses fratres, Giotti simul alumni varias tum Virginis, tum Sanctorum fecere imagines in inferiori prospectu alterius Ecclesiæ



fiæ brachii, propè ingressum; ad Sacella Septemtrionalia. His etiam tribuuntur figuræ super primam Refectorii majoris mensam servatæ.

Jo: Gaddus Taddei filius, concivis, & discipulus Giotti in cupa sinistri brachii B. Virginis, & Jesu pinxit historias, puta Visitationem, Nativitatem, Epiphaniam, Purificationem, Innocentium stragem, fugam in Ægyptum, iter ad Jerosolymam, disputationem inter Doctores. In ordine medio est Christus Crucifixus, mater, mulieres ad Crucis dexteram plorantes, ad lævam Franciscus cum sociis genuflexus, per aerem Angeli pacis amarè flentes, & sanguinem vulnerum scyphis suscipientes. in immediato super Virginis Altare prospectu, est Virgo ipsa cum Filio sedens duos inter Angelos stantes: subtus extra cornu Epistolæ propè majoris Tribunæ Arcum vera S. P. Francisci vero habitu induti effigies.

Thomas Stephani Florentinus, Giotti sectator insignis, ideoque Giottinus dictus in prospectu super Ambonem B. Virginem ad cœlum assumptam, inque arcu ipso quædam S. Nicolai gesta, & vitam in ejusdem Sancti Sacello eleganter depinxit.

Bonamicus Buffalmaccus, non S. Catharinæ Lararium, ut Vasarius autumat, quod illius tempore adhuc non erat, sed SS. Mariæ Magdalenzæ, & Martini Episcopi Cappellas utriusque gestis ornavit. Bonamicus enim anno 1346. decessit: ubi S. Catharinæ Sacellum Ægidius Cardinalis Albernotius, rubeo pileo donatus anno 1350. à fundamentis extrui fecit: potius dixerim hæc, & alia à Giottini discipulis, qui post ipsum eo sæculo floruerunt, depicta.

Singulos ex præfatis pictoribus fuisse ex illius ævi insignioribus testatus est Georgius Vasarius, qui omnium vitam, & opera digniora descripsit: ex eo habui quidquid in hoc Titulo de picturis Alme Basilicæ asservi, ac de pictoribus, qui artis venustate Collis Paradisi amenitatem auxerunt.

*Sacella Ecclesiæ expenduntur, quæ successive  
picturis condecorantur.*

## TITULUS XXV.

**I**N prima Basilicæ constructione juxta graphycam Jacobi Alemanni jam præscriptam inventionem, utrumque Templum sua constabat unica Navi in modum Crucis protracta; nec media latior erat suprema, sed utraque super eisdem fundamentis erecta. In sublimiori tria tantum erant Altaria, majus B. Virgini, ex minoribus unum Angelis, alterum SS. Apostolis sacrum: in inferiori, seu secunda itidem tria, primum S. P. Francisco; alterum Deiparæ Innocentissimæ, Tertium S. Jo: Evangelistæ dicatum. Anno verò 1236. F. Helias jam secundò Generalis Minister aliud erexit Altare in eodem Septemtrionali Crucis brachio, juxta illud B. Virginis, S. Elisabeth Turingiæ Landgraviæ, quam Gregorius IX. inter Sanctas retulerat, dedicatum: Sacellum hoc à Modernis, fortassè inconsultò, sublatum est.

Cum Innocentius IV. Sanctorum fastis Stanislaum Episcopum, & Martyrem adnumeravit, ut diximus, ad ejus honorem, in ipso Ambonis circuitu, in quo illius vita fuerat promulgata, sub eminenti Arcu, Altare jussit ædificari. Inde F. Philippus de Campello Fabricæ Præpositus, & in Architectonica lau-



dati Jacobi alumnus, proposuit, additione Lateralium Sacellorum alterius, & alterius ordinis mediam Ecclesiam dilatandam, cumque elegans dedisset exemplar, à Septemtrionali plaga opus inceptum fuit.

Prima ex Cappellis S. Marię Magdalenę sacra, in qua Buffalmaccus gesta illius insigniora delineavit, tempore Generalatus S. Bonaventurę completa est; quam cum ipse benedixerit, postea ejus insuper nomine fuit insignita. Deinde ejusdem Sancti Generalis mandato, Sacellum aliud S. Antonio Patavino sacrum erectum est, quod Giottinus primò picturis ornavit; sed cum temporis cursu jam periissent, anno 1610. Cæsar Sermæus Assisias illarum vice, ejusdem Divi opera, & miracula potiora depinxit, qui & superius in quadripartita testudine SS. Francisci, Bonaventurę, Ludovici, Clarę vitam eleganter expressit.

Sequitur ordinatim aliis uniforme Lararium SS. Ludovicis, Francorum scilicet Regi, & Episcopo Tolosę dicatum, jampridem à Buffalmacco depictum, in cujus quadrifca testudine Andreas Aloysius Assisias Petri Perusini alumnus, & Raphaelis Urbinate condiscipulus, à Georgio Vasario in vita Petri plurimum commendatus, quatuor Prophetas, & totidem efformavit Sybillas, circa annum 1490. Opus, peritorum judicio, inter cætera absolutissimum. In prospectibus hujusce insignis Cappellę, circa annum 1560. Adon Donus, item Assisias, Confraternitatis S. Stephani sumptibus, Protomartyris gesta eximię figuravit. Majora hæc inter Sacella, totidem minora constructa erant. At duobus sublatis, duo tantummodo remansere: unum S. Valentino, alterum S. Laurentio Martyribus sacrum. Itaque Aquilonaris Sacellorum ala perfecta est.

A Meridie ante Lararium SS. Ludovicis sacratum, paris structurę Cappella, jussu, & sumptibus Cardinalis Gentilis à Monte Florum Franciscani, circa annum 1310. extructa est, quam Buffalmaccus coloribus venustavit. Succedit Sacellum S. Andree Apostolo sacrum, alteri è regione respondens, situm est propè Campanariam turrim, unde aliis angustius apparet, Cappella S. Marię Magdalenę aliam ex adverso habere non potuit, cum situs ille à Sacristia jam fuerit occupatus. Extat igitur ibi Ambo cum Rostro, & sub Arcu Altare S. Stanislai, de quo egimus.

Crux Templi etiam in brachiis fuit ad proportionem deducta; nam circa idem tempus è plaga Septemtrionali Neapolio Cardinalis Ursinus Lararium Divo Nicolao Episcopo sacrum excitari fecit, quod illius Sancti vita Thomas Giottinus ornavit. Ad plagam Meridionalem in ejusdem conspectu D. F. Jo: Ursinus S. Jo: Jerosolym. Eques, dicti Purpurati Germanus aliud paris formę S. Jo: Baptistę dicatum extrui curavit, cujus picturę cum in dies una cum materia cadere cernerentur, dealbatum fuit; eo in loco dextrorsum Porta extat majoris Sacrarii, ad levam verò majus Ecclesię Organum.

Sed & navis, quę ab ingressu in Basilicam transversam Tau figurat, Cappellis adaucta est. Ex adverso Portę majoris, Aquilonem versus, circa annum 1355. Ægidius Camillus Cardinalis Albernotius, totius Italię Apostolicus Legatus magnificum S. Catharinę Virg. & M. Lararium addidit, ejusdem Sanctę gestis manu Bonamici, vel alterius inter illius ævi pictores eximii condecoratum. Cum autem postea in eodem Altari celeberrimum Crucifixi simulachrum locatum fuerit; pro spiritualibus exercitiis qualibet Feria sexta fieri consuetis; in majori ambitu extra, intraque Sacellum ab Hieronymo Martelli Assisiate Passionis Christi historia depicta hoc sæculo fuit, in cupa verò ejusdem ambitus, manu prædicti expressus est coeruleus cœli aspectus, astris ornatus, & inter nebulas æterni Patris imago.

Extra eundem ambitum Ortum versus ampla Ædicula erecta est S. Antonio Abbati



Abbati Sacra, opibus, ac pietate Spoletanorum Ducum, quæ à Francisco Vagnutio Assisite olim egregiè depicta fuit. Sed humiditate superioris plateæ, cui partim subest, picturæ unà cum parietum tunica cecidere.

Ad lavam in Ecclesiæ ingressu modicum quidem, sed elegans est Sacellum S. Sebastiani Martyris: in ejus fornice, ac prospectibus Jacobus Georgettus Assisias, eximius nostri sæculi pictor, martyrium ejusdem Athletæ delineavit. In ambitu ingressus Eques Cæsar Sermæus item Assisias hinc Annunciationem B. V. & Christi Nativitatem, illinc Angelum, qui Picam S. Francisci Matrem de Filii natali præmonuit, & hujus in stabulo ortum depinxit. Itaque vetustis, recentibusque picturis utrumque Templum eleganter ornatum est.

Ex Sacellis, quod S. Nicolao dedicatum erat, dein SS. Ursulæ, ac Sociis est adscriptum, ibique pro fidelium communione S. Eucharistiæ vas asservatur. Quod erat B. V. ejusdem Immaculatę inscribitur Conceptioni. In Larario S. Jo: Baptiste Tabula Sanctissimi Nominis Jesu à S. Bernardino donata conspicitur. In Altari S. Jo: Evangelistę ab Alexandro Cardinali Peretto, Sixti V. Nepote nobiliter exornato Sacre conduntur Reliquiæ, à quibus nunc nomen refert. Cappella S. Andree, à S. Petro de Alcantara, altera S. Marię Magdalenę, à S. Bonaventura erecta, ab eodem Divo, & alia S. Martini, à S. Lucia Virgine participatur.

*Vitræ fenestrarum valvæ picturis itidem  
exornantur.*

## TITULUS XXVI.

**E**tiā Georgius Vafarius in vita Gulielmi de Marcilla, inventionem eadem tribuat vitreas fenestrarum valvas pingendi, quem circa annum 1500. vixisse, ac floruisse testatur; attamen ex nostræ Basilicæ operibus artem hanc longè antea extitisse liquidò constat. Et figurarum antiquitas, & varia in eis expressa stemmata docent, in Sacellorum extruptione fenestras ipsas cum suis valvis, atque picturis factas fuisse. Singula Altaria solam habebant Crucem, & Candelabra, eisque pro tabulis, & imaginibus ipsæ fenestræ Sanctorum figuris depictæ inserviebant. In Capella S. Præcursoris Jo: Ursinus fundator, in S. Nicolai Cardinalis Neapolio illius frater, in S. Ludovici Cardinalis Gentilis effigies, & insignia referuntur. Hos autem ante annum 1300. dignitatibus ornatos fuisse neminem fugit.

Fenestræ superioris Ecclesiæ varias SS. Patriarcharum, Prophetarum, & Apostolorum imagines, & inter parerga gesta demonstrant: inferioris autem, ut diximus, Sanctorum, quibus Altaria ab initio dicata fuere, effigies, & miracula habent. Superiores marmoreis bipartitæ, inferiores quadripartitæ asseribus, cunctæ ocellis variis, & Cyclopibus venustatæ. Vitrum tam solidum, ut jam quatuor post sæcula adhuc integrum, nec minima quidem parte fractum appareat. Colores tam vividi, adeoque tenaciter adherentes, ut nisi imaginum vetustior admoneret figuratio, nuper depictas diceres. Forinsecus retia ex filis æreis compacta vitreis valvas communiunt, & quæ antiquitus locata fuere, illæsa adhuc conspiciuntur. Hinc dicendum consultò, priscos illos artifices æternitati labores, ac studia dedicasse, & tam fragili materiei perpetuitatis notam dedisse.



Pictorum ex antiquioribus, quos retulimus, opera ipsa vitrea apparent. Superiora quippe Cimabovis modum, atque industriam sapiunt, inferiora eorumdem, qui Sacellorum parietes exornarunt. Inter omnes ex valvis elegantiores videntur, quæ Divi Antonii Patavini miracula in ejus larario præsentant; nam Giotti manum, & usum indicant, coloresque quàm vivacissimi caruleus, viridis, flavus nuper impressi videntur.

### *Sacri Conventus Picturæ.*

## TITULUS XXVII.

**P**Ræcipuas Sacri Conventus partes variis olim, eximiisque picturis insignitas fuisse non est quem lateat. Quædam adhuc manent vestigia. In priori Capitulo sub ædibus Pontificiis sito extat usque nunc Crucifixi Icon, circumvolantes Angeli Sancti stantes, ac flentes, Franciscus, Clara hinc, & inde genuflexi quæ manu Giotti, aut Giottini exarata ex modo conjici potest.

In Occiduo majoris Refectorii prospectu vetustæ imagines B. V. Filium amplexantis, & quatuor aliorum ex Sanctis aspiciuntur; opera Simonis, & Pipi ex Memmis Senensibus, quos Vasarius Giotti alumnos describit. Super majorem ejusdem Refectorii Januam antiqua est pictura in pariete, quam partim collapsam manus quædam vulgaris reformare tentavit. Stat in medio Seraphicus Patriarcha, quem stantes Sancti Filii venerantur, utrinque & sub his eodem situ genuflexi seni, ac seni ex primis discipulis, radiolis coronati, cum singulorum inscripto nomine, quos inter tertius ad dexteram prostratus legitur F. Helias de Bevilio. Extra ordinem est Diabolus, qui F. Jo: de Capella laqueo interficit. Sanctorum stantium capita recens pictor refecit; at Socii genuflexi, ut ut erant, servantur. In Orientali Refectorii ejusdem prospectu Crucifixi imago depicta est, quem Ss. Franciscus, & Clara collachrymantes adorant, manu Adonis Doni Assisiatis, qui & montes ibidem, & flumina, & valles mirè disposuit, prominente in extremis collibus ad dexteram Jerosolyma, ad lævam Assisio. ejusdem peniculo in Refectorio minori ultima Christi cum discipulis coena perbellè expressa conspicitur.

Principale claustrum, quod ad elegantiorum formam jussu, & ope Sixti IV. redactum est, ut ejus ibi fixa testantur stemmata, idem Donus anno 1560. elemosinis F. Gregorii Pernæ Assisiatis, in utroque Deambulatorio superiori, & inferiori sex, & quinquaginta Iconibus, vitam, acta, miracula S. P. egregiè referentibus decoravit. Inter Icones sub fornicum juncturis effigies Sanctorum, ac Beatorum Seraphici Ordinis ad pectus usque formatas delineavit. Ad hoc impluvium, velut ad Picturæ Lycæum, sæpius adventare, & exemplaria ducere visi sunt, qui excellentes ea in arte evadere satagebant, nec spe frustrati; pictores quippe, quibus hæc Seraphica Civitas post Donum abundavit, ut inter eos Cæsar Sermæus non semel confessus est; Sacri Conventus Claustrum, ceu proprium Gymnasium habuere. Sacristia picturis itidem, iisque celebratis, non caret. Super armaria variè dispositæ sacre Historiæ inspiciuntur, Desponsationis B. V. Christi Nativitatis, Circumcisionis, Epiphaniæ, fugæ in Ægyptum. Inter eas Fides, Spes, Cari-



Charitas, Prudentia à Jacobo Georgetto Affisiatè depictæ sunt. Superiori ex parte columnatum patet theatrum; diversæ ibi Sanctorum Imagines: Empyreï referatus aspectus, S. Pater ab Angelis elevatus, cui æthereæ princeps militiæ Archangelus Michael obviam it, eumque divinæ Triadis ad solium adducit. Opus communi peritorum calculo absolutissimum, quo Cæsar Ser-mæus majorem ubique sibi famam paravit.

*Alexander IV. Sacræ Basilicæ fautor, & opitulator ostenditur.*

## TITULUS XXVIII.

**I**Nnocentio IV. Alexander numero, & virtutibus par successit in Petri cæ-thedra. Neapoli ipso Natalis Domini die 1254. creatus. Antea Ray-naldus de Comitibus, Gregorii IX. Nepos, Cardinalis, Episcopus Ostiensis, & Seraphico Ordini Protector concessus. In Pontificatu eandem retinuit, & exercuit protectionem, noluitque alium ad id sufficere Cardi-nalem; ut eximie devotionis effectum erga S. Franciscum, quem viventem agnoverat, ejusque corpus Stygmatisatum non semel viderat, demonstra-ret. Huic in primis Assisiensis Basilica omnium ordinis Ecclesiarum verè caput, & Mater, cordi, & animo fuit, cui innumeras contulit spirituales, ac temporales gratiarum prærogativas, ut ex ejus Diplomatis; inter quæ duo: unum incipiens, *Pro reverentia B. Francisci. Dat. Viterbii 2. Nonas Maii Pontif. an. 4.* quo Custodis, & Fratrum Assisiensium precibus an-nuens, eis auctoritatem largitus est absolvendi omnes ad eam Ecclesiam ac-cedentes ab omissis in exequutione votorum emissorum super ipsius visitatio-ne: aliud *Dat. ibidem 6. Kalend. Octobris ejusdem anni*, quo eidem Custodi facultatem concedit constituendi Confessarios tam Fratres sibi subditos, quàm aliundè advenientes ad ministrandum poenitentiae Sacramentum cun-ctis Christi fidelibus, ex remotis partibus ad solemnitatem venientibus, cum auctoritate eos absolvendi à peccatis omnibus, nisi fortè talia fuerint, ut propter ea Sedes Apostolica meritò esset consulenda. Similiter concessas à Prædecessoribus Indulgentias confirmavit, aliasque perpetuas est largitus Sa-cram Basilicam visitantibus in festo S. Stanislai Episcopi, & Martyris, ac per ejus octavas, ob illius Apotheosim ibi peractam, cui se in minoribus constitutum adfuisse testatur literis incipientibus, ad veneranda Sanctorum merita. *Dat. Lat. 7. Kalend. Febr. Pontif. an. 2.*

Summi hujus Pontificis patrociniū maximè enituit in coercendis his, qui Sacræ Ecclesiæ eleemosinas usurpare, & pia legata retardare, & impe-dire tentarunt. Vincenslaus namque Boemiæ Rex piissimus quamdam auri summam in fabricæ subsidium devoto miserat animo: sed nuncii eam defe-rentes, & in itinere apud quemdam Comitem declinantes, de viarum peri-culis admoniti, ejusdem Comitis fidei, & custodiæ pecuniam commiserunt. Is ut ad Fratres integra perveniret, se curaturum spopondit. Cum verò po-tiorem auri partem mississet, gravi, lethaliq̃ pressus ægritudine, uxori, filiis-



filiisque præcepit, ut quod reliquum erat fideliter transmitti satagerent. Post ejus mortem hæredes debitum negantes, vel jam integrè solutum asserentes, se nil ultra daturos dicebant, imò in postulantes Fratres convicia, & minas jactabant. de his admonitus Pontifex eidem Comitissæ, ac filiis graves scripsit Epistolas, incipientes, *Ad illa potissimè prompti esse debetis, &c. Dat. Neapoli 14. Kal. April. Pont. Anno primo.* Quibus detentionem illam infamiæ nota dignam exaggeravit, eisque in mandatis dedit, ut nunciis Custodis, ac Fratrum Assisiensium absque dilatione facerent satis.

Aliud quid simile accidit, eodem Pontifice, anno 1260. Multi de Marochio fideles non modicam pecuniæ quantitatem collegerant, nunciisque tradiderant, ut integram Custodi Sacri Conventus assignarent, in subsidium insignis ædificii Ecclesiæ, & Conventus ejusdem S. Patris. Iter aggressi nuncii, ob navigationis pericula, & Saracenorum incursum, quò securiùs remagerent, ad quamdam Hispaniæ Civitatem appulere: ubi quibusdam Januensibus Mercatoribus custodiendam pecuniam fiducialiter tradiderunt; quicam in urbe prædicta recipientes, in qua negotiis vacabant, totam inhibi reliquere, rati se eandem summam Januæ reddituros; quò cum pervenisissent fœdifragi homines dilationem quærere, tempus postulare cæperunt, priùs verba, postea & contumelias dantes. Tandem nil eis debere renunciant; quin minas addunt, ni à postulatis desistant. Custos ad hæc, & Fratres ad Alexandrum recurrunt, factum exponunt, patrocinium implorant. Summus Pontifex mercatoribus scripsit, monens, ac mandans debiti solutionem. viri obedientiam negarunt. Alexander Archiepiscopo Januensi commisit, ut debitores ad integram satisfactionem induceret infra terminum assignandum, quo elapso, si contumaces fuissent, excommunicationis pœnam contrà eos quovis festivo die, in cunctis Ecclesiis, pulsatis nolis, ac cereis accensis publicari juberet, & sic usque ad completam solutionem eos compelleret. Literas insuper addidit Potestati, & Capitaneo Januensibus, incipient. *In his, quæ sunt digna fieri, &c. Dat. Later. Idib. Decembr. Pontif. an. 6.* quibus totum enarrat factum, eosque monet, ac cogit, quatenus Archiepiscopo, ab eo requisiti, impenderent auxilium, ac etiam auctoritate propria in contumaces animadverterent, quod tandem factum est.

Ad colligendas, exigendas legatorum pecunias, & copiosas eleemosinas, quæ per omnes Umbriæ Civitates tam in bonis mobilibus, quàm stabilibus, à fidelibus piè, & liberaliter nostræ destinabantur Ecclesiæ, ac domui, Summus ipse Antistes Alexander Jacobum Samuelis, & Venturam Judicis, Cives Assienses, Procuratores, ac Syndicos instituerat: qui tamen ingentes in exactionibus difficultates patiebantur. Siquidem bonorum hæredes Religiosis satisfacturi opponebant, Minores Fratres paupertatis arctissimæ professores, ac ipsorum Ecclesias susceptionis, ac receptionis ejusmodi reddituum fore incapaces. Idem aliqui sustinebant: Unde Civitatum Potestates jus contrà Procuratores, & Syndicos protulere. Summus Christi Vicarius singulis Provinciæ Potestatibus nominatim literas misit, incip. *Cum dilectos filios Jacobum, &c. Dat. Anagninæ 13. Kalen. Octob. Pont. ann. 5.* declarans bona omnia mobilia, immobilia Ecclesiæ Assiensi S. Francisci assignata, ad S. Romanam Ecclesiam, & Sedem Apostolicam pertinere, cui soli illa subjicitur. Præcipit ergo, ut tam cives à se constitutos, quàm alios ab ipsis constituendos, ob sedis Apostolicæ reverentiam habeant commendatos, eis auxilium, ac favorem impendant, nec sinant à quibuscunque circa commissi officii exequutionem impediri, vel molestari. Alexander itaque tot beneficiis



beneficiis, privilegiis, indultis Sacræ Basilicæ Collis Paradisi se tutare, atque Patronum eximius Prædecessorum æmulator, ostendit.

*Urbanus, & Clemens Quarti Sacræ Basilicæ privilegia confirmant, & augment.*

## TITULUS XXIX.

**A**lexandro è vivis erepto Urbanus successit hujus nominis Quartus, qui ad Ecclesiarum Latinæ, & Græcæ unionem toto animo se convertit. Ad id Minoribus Fratribus Apostolicis Apocrisariis usus est. Privilegium aliquod Sacræ Basilicæ peculiariter ab Urbano concessum non invenimus; omnia privilegia, gratias, indulgentias à suis Prædecessoribus datas confirmavit Diplomate incipien. *Cum à nobis, &c. Dat. apud Urbem Veterem 4. Kal. Junii Pontif. ann. 1.* quòd si diutius vixisset, certè ampliores prerogativas esset largitus. Nam, ut in ipsius vita refert Ciacconius, cum anno Pontificatus tertio, hoc est 1264. dolor eum continuus invasisset, planè ut exiccatis interioribus ne vocem quidem formare posset, ab Urbe Veteri discedens, Tudertum abiit, mox Dirutam, & cum hinc Assisium pergeret, utique S. P. sepulchrum veneraturus, & forsitan inspecturus, vix duas itineris leucas emensus fuerat, cum pressis ob nimiam anxietatem visceribus, breviori via per Pontem Perusiam versùs lectica vectus fuit; cumque ad suburbium pervenisset, in Monasterio S. Petri Ecclesiæ Sacramentis munitus, in pace quievit: quique Franciscum adorare cupiebat in terris, videre citius meruit (ut piè de piissimo Pontifice credendum est) cum Deo regnantem in cœlis.

Urbano, post quatuor Interpontificii menses, Clemens IV. successit, Perusiæ Nonis Februarii 1265. electus; antea Guido Grossus, Episc. Sabin. Cardinalis, nobilis Gallonarbonensis, Legatus Gallix, absens. Hic de electione admonitus, foeliciter rebus illius Regni compositis, Minorum habitu indutus, ut impii Manfredi Ecclesiæ hostis insidias, quas sibi in itinere paratas noverat, evitaret, incognitus, sed incolumis Perusiam pervenit; inde Viterbium cum Cardinalibus abiit, ubi Pontificatus suscepit insignia.

Pontifex hic Franciscanam familiam in visceribus habuit, sed & illius Caput, & Matrem Ecclesiam prædilexit. Rogatus à Generalibus Magistro Sacri Ordinis Prædicatorum Jo: de Vercellis, & Ministro Minorum S. Bonaventura, Apostolicas eis dedit literas, incipient. *Obtentu Divini Nominis, &c. Dat. Perus. 2. Idus Febr. Pontif. ann. primo*, quibus, ut Religionem utramque à molestiis liberaret, quas aliqui ex Prælatiis, Clericis, Laicis ei attulerant, sub prætextu, quòd Fratres mundo mortui, proprium possidere nil possent, adeoque ab omni sint hæreditate excludendi, declaravit, ut in temporalibus bonis, in quibus succederent existentes in sæculo, licitè Fratres valeant & in Religione succedere. patet in eisdem literis.

Basilicæ verò Assisienti, ad quam Perusia initio sui Pontificatus venerat, & admirabile S. P. Corpus in proprios stans, pedes inspexerat, concessit, ut juxta illam, vel ejus limites loci ad trecentas cannas nulli Ecclesiam, Oratorium, Nosocomium, Monasterium ædificare, vel instituere liceret, absque speciali Apostolicæ sedis licentia. diploma Custodi, & Conventui Assisienti di-



rectum incipit, *Clara merita sanctitatis, &c. Dat. Perus. Non. Octobr. Pontif. Anno primo.*

Præterea visitantibus Ecclesiam, in qua pretiosum Francisci Corpus conditum est, in die ejus festo, ac per octavam, cunctis Christi fidelibus annuatim annum unum, & 40. dies Indulgentiæ condonavit. Breve incipit, *Cum ad promerenda, &c. Dat. Perus. 5. Id. Octob. Anno primo.* Item Ministro Provinciali, Custodi, & Conventui Assisien. indulgit, literis *Datis Perus. 2. Kalend. Martii Pontif. ann. 2. incipien. Desideriis vestris, &c.* ut in Sacra Basilica tempore universalis interdicti, in festivitatibus S. P. Francisci, in Anniversario Dedicationis, perque eorum octavas divina officia solemniter celebrare valerent.

Sed & privilegia omnia à Gregorio IV. Basilicæ, dum construeretur, antequam ad eam Sacrum S. P. Corpus translatum esset, concistoriali diplomate attributa, confirmavit, aliaque tenoris ejusdem concistoriali Brevi in amplissima forma stabilivit, ipso Papa, & Cardinalibus omnibus tunc Perusiæ existentibus subscripto, & signato. incip. *Is, qui Ecclesiam suam, &c. Dat. Perus. 17. Kal. Maii 1266.* quo Collis Paradisi Basilicam in fundo Sanctæ Sedi oblato constructam, prærogativa libertatis, & honoris donavit, sub B. Petri, ejusque successorum immediato patrocinio suscepit, eique soli subiectam statuit. Caput, & Matrem illius Ordinis, quem S. P. instituit, haberi, & ibi per Fr. Minores perpetuò inserviri mandavit. Privilegia similis notæ in eodem Diplomate continentur, quæ omnia in suo perseverant rigore; nam quotannis census pro eis impositus à Fratribus Assiensibus Sedi Apostolicæ solvitur, in festo SS. Apostolorum.

Cum autem non desint qui dictis, & scriptis hæc privilegia audacter imminuere, & indirectè negare præsumunt, libet proinde singula ad trutinam revocare.

### *Privilegium immediatæ subiectionis Apostolicæ Sedi.*

## T I T U L U S XXX.

**P**rivilegia hæcenus recensita quidam non magni facientes, affirmant omnes Ordinum Regularium Ecclesias de jure communi Sedi Apostolicæ esse immediatè subiectas, adeoque ab Episcoporum, & locorum ordinariorum jurisdictione immunes, quod privilegio libertatis est frui: At rem non satis perpendunt. singularitas enim diplomatis singularitatem arguit privilegii, juxta regulas juris. Sancitum est à Summis Pontificibus Regularium Ecclesias omnes ad summam eorum potestatem immediatè spectare, ut eas ab aliorum auctoritate eximerent, & ab ipsis Regularium Prælatibus visitari, ac dirigi possent, nec propterea singulæ Pontificiæ, & Patriarchales dicuntur Basilicæ, & Sanctæ Sedis speciales: quibus titulis passim hæc legitur à Pontificibus decorata, quæ nulli alteri, sed soli Romano Pontifici prorsus subiecta est. Hanc propterea Provincialis Minister visitare non potest, & Generalis Minister ipse non nisi tamquam specialis Delegatus Apostolicus visitat: unde in actis Visitationis Generalis hæc semper verba præscribuntur, & præmittuntur: *Habitis priùs verbo speciali, & assensu Summi Pontificis;* ex quibus plurimi motu proprio, præter communes regulas, leges huic Ecclesiæ condiderunt, quas Superioribus Ordinis quibuscunque, & Capitulis Generalibus mutare, vel irritare interdixerunt, quamvis Constitutionibus Ordinis adversarentur, ut legentibus liquet. Hinc evidenter convincitur, Christi Vicarios, nedum immediatam,



diatam, sed & omnimodam, privativè quoad alios, exercuisse, & exercere in eam jurisdictionem, & auctoritatem.

Ob hoc suprema in Ecclesia Pontificium solum perpetuò erectum cernitur, in Chori medio, ex adverso Majoris Altaris, ad quam ascendere aliis Prælati non licet. Extat & in templo intermedio Ambo marmoreus, qui (teste S. Carolo Borromæo in sua instructione fabricæ, & supellectilis Ecclesiasticæ) Basilicæ solum Patriarchali conceditur. Ibi Diaconus Evangelium solemniter populo decantare consueverat, cum summus celebraret Antistes.

Uterius propè ipsam Ecclesiam in altiori Cænobii regione, ut diximus, Papales Ædes ab initio constructæ fuere, quò & Deposita fuit armorum, librorum, pecuniæ, rerum aliarum ad Apostolicam Sedem spectantium; constat ex variis Summorum Pontificum literis, qui ad ea resumenda non semel Nuncios misere, quæ Custos, ac Fratres servabant. Imò anno Domini 1321. Jo: XXII. Summo Pontifice, Guelphos inter, & Gibillos Affisates civili bello sæviente, horumque vi prævalente, quorum Dux erat Mutius quidam Francisci, Affisias; Friderico Comiti Montis Feretri, Ecclesiæ, ac Papæ rebellis familiaritate conjunctus ostia Pontificii thesauri ab ejus turba confRACTA sunt, indeque pecuniæ, quæ pro Sede Apostolica servabantur, ereptæ: unde Civitas à Pontifice vinculo interdicti ligata fuit, eoque dein soluta, pulso à Guelphis Mutio, ac ei adhærentibus.

Ad ultimum annui census nunquam intermissa solutio easdem prærogativas unicæ subiectionis, exemptionis, libertatis, aliasque in Bullis expressas, non communes, sed singulares ostendunt.

*Sacra Basilica totius Ordinis Caput, & Mater  
peculiari dignitate appellatur.*

## TITULUS XXXI.

**P**Rærogativam Capitis, & Matris nostræ convenire Basilicæ, eique à tota Religione attribui, juxta sententias Pontificias omnia ex antiquioribus monumenta demonstrant. Quoties Regestum aliquod legitur Provinciarum, Custodiarum, Conventuum, Locorum totius Ordinis, in capite semper legimus Sacrum Affisiensem S. Francisci Conventum, tamquam supremum omnium caput. Ita Vvadd. t. 4. ad ann. 1399. n. 11. universalem refert Catalogum ex m. s. Vaticano, ex codice impresso, ex monumento Ara-cælitano; in quibus primò ponitur S. Francisci de Affisio; dein locus S. Mariæ de Angelis; tertio S. Claræ, deinceps ordinatè alii Custodiæ Affisiensis Conventus, & Loci, tamquam membra propinquiora sub capite. Sic loci dignitas postulat, ut ea Ecclesia sit mater, in cujus, velut sponsæ, sinu sacrum recumbit Francisci Corpus; e cujus vulneribus, ceu ex mammis, lac illud dulcissimum sacri cruoris ad cunctos alendos filios promanat. Hæc, inquam, à singulis Minoritis habenda Caput, & Mater, in qua sanctissimus Parens, & Patriarcha moratur, qui eam sibi domum elegit; recusaret namque esse in corpore, renueret in filiorum numero computari, qui à capite se diceret alienum, vel hanc Patris Sponsam agnoscere dedignaretur ut Matrem; Mater quippe, & caput illius Ordinis constituitur, quem S. P. instituit, ex duplici Apo-



stolicae Sedis Concistoriali sententia; quapropter qui eam respueret, non esset Ordinis à S. P. fundati.

Scriptores quidam ejusmodi praeogativas alteri Ecclesiae tribuentes, videntur, huic, cui legitimè, ac juridicè competunt, indirectè negare. Post Ordinis Franciscani divisionem omni studio, & arte id attentare conantur. Ecclesiam Portiunculæ caput, & Matrem vocant, propria opinione, nulla Pontificum auctoritate suffulti, imò ei aliquo modo adversantes. Sed almæ illi Ædiculæ, cui tot aliæ conveniunt, has præstantias addere, æquum non esse liquet, qua in re ad veritatem eruendam, ac tenendam, parum hic immorandum.

Duo capita corpori eidem tribuere monstruosum est, binam matrem eidem proli assignare ridiculum. Vel ergo totius Franciscani corporis caput, & universæ Minorum sobolis mater hæc, vel illa censenda est. Summi totius Ecclesiae Judices, Christi Vicarii, cum Sacro Cardinalium cætu, Catholicam dirigentes fidem, solemnissimis Decretis jusserunt, Collis Paradisi Basilicam, in qua pretiosus asservatur thesaurus, sanctum videlicet corpus gloriosissimi Institutoris, ac Patris, Caput, ac Matrem habendam. Parens ipse Seraphicus tam proprio, quàm filiorum suorum nomine obedientiam, ac reverentiam Domino Papæ Honorio, ejusque successoribus vovit; suosque Fratres pedibus S. R. E. semper subditos voluit. Fratres ergo Minores à S. P. instituti, & non ab alio, eam sui Corporis Caput, & Matrem agnoscere, ac confiteri tenentur, quam Ecclesia, & Sedes ipsa Apostolica præcipit agnoscendam; ne dum particulari Matri adversantur, universali etiam, ac supremæ contumaces reddantur.

Præterea Gregorius IX., qui primus cum toto Ecclesiae Senatorum Collegio præcepit Collis Paradisi Basilicam Caput habendam, ac Matrem, S. Francisco viventi tali, tantaque fuerat familiaritate, & amicitia coniunctus, ut S. P. omnia ei sui cordis arcana desideria communicaverit, sicut Papa ipse testatus est in sua, *Quo eleganti &c.* quam apud Vvad. videre placeat t. 1. ann. 1230. n. 14. fuit & Gregorius nostri Ordinis primus Cardinalis Protector. Si ergo S. P. Franciscus voluisset sui Ordinis esse Caput, & Matrem Ecclesiam Portiunculæ, negotium tanti ponderis Amico, & Protectori, quem sciebat Summum Pontificem mox futurum, communicasset, & Gregorius, qui in cunctis illi complacuit, oppositum, aut diversum expressè non præcepisset. aut si S. Franciscus hujusmodi desiderium illi non insinuasset, hoc ipsi Fratres egissent, qui Patris intentionem satis optimè noverant. Ubi autem Historiæ Bullis Summorum Pontificum adversantur, & præcipuè circa res ejusdem temporis, sunt prorsus rejiciendæ; nulla etenim major, quàm Christi Vicarii auctoritas.

Hinc dato, quod S. P. eam habuisset intentionem, de qua nullimodè constet, imò ejus humilitati incompetens esset, adhuc tamen cum Pontifex, quin tot Pontifices aliud jusserint, ipse, qui obedientiam Domino Papæ specialitèr voverat, etiam proprium retractasset optatum.

Nec adversantibus refragantur ea verba, quæ in Lectionibus propriis illorum Breviarii leguntur, videlicet. *Quam idcirco Ecclesiam Portiunculæ vocari voluit, quod esset futura Caput, & Mater pusilli gregis Fratrum Minorum.* clarè enim constat, ea verba centum circiter ab hinc annis addita, & intrusa fuisse, & nostrorum (fateor) injuria permixta. Antiquiora Franciscana Breviaria ante divisionem Ordinis m. s. quæ in Assisiensi Bibliotheca servantur, de festo Portiunculæ nullam omninò faciunt mentionem. Alia post divisionem impressa simplices continent Lectiones, nudam ex vetusta relatione historiam referentes,



ferentes, quæ in Archivio nostri Sacri Conventus extat originaliter. Quorsum verò hoc nomine, Portiuncula, Caput, & Mater valeat designari, mea tenuitas non capit; potius enim parvam corporis portionem, quàm caput, totum eminenter continens, si de corpore agatur, significat; si de generatione, potius filiolum, quæ parva portio est matris, quàm matrem ipsam videtur exprimere.

At memini me legisse in vita S. Benedicti à Patre quodam Cassinensi descripta; inter multa ex Sacris Larariis à prædicto Patriarcha in Territorio sublaci erectis, præcipuum id extitisse, quod propè Villam, quæ Portiuncula dicebatur, B. Virgini dedicavit, ad cuius similitudinem, inquit, Patres Benedictini; Subasii montis incolæ, aliam construi in Assis planitie curaverunt, quam & Portiunculam appellarunt, eamque postmodum S. Francisco assignavere. Hinc ergò Portiunculæ nomen, non à capite, & matre derivatum est.

Ipsa Portiunculæ Ecclesia tribus fermè sæculis ante Ordinis divisionem subdita semper fuit Domui Assisienti, tamquam capiti membrum; clara sunt m.s. referentia Assisensem Custodem quotannis eam visitasse: Fratres eo in Conventu degentes sub illius obedientia vixisse, Guardianum loci ab eodem Custode, ac Patribus S. Conventus electum, ac deputatum fuisse; eleemosinas omnes, tam in pecunia, quàm in cera, quàm in paramentis illi Ædiculæ oblatas, ad hanc supremam spectasse; eaque omnia per singulos annos, sufficientibus relictis, ad Custodis arbitrium Assisium delata. Imò etiam post Ordinis divisionem, quæ sub Leone X. accidit, usque ad Urbanum VIII. eleemosinæ illi oblatæ, non ab Observantinis (inibi ab anno 1415. degentibus ex concessione eis à Conventualibus facta) sed à Conventualibus ipsis, perpetuis Basilicæ Assisensis Custodibus sumebantur. Præfatus autem Urbanus, qui eas ad Observantinos transtulit, ne hanc Ecclesiam antiquo omnino jure privaret, illos ad solutionem nummorum aureorum bis mille obligavit, quorum fructibus prædictas voluit eleemosinas compensari, quæ omnia omnimodam indicant, antiquam, perpetuam illius Sacræ Ædiculæ huic Patriarchali Basilicæ subjectionem. Quomodo ergo caput, & mater? nunquid sub membri directione caput? sub filiorum obedientia mater?

Vvadd. hac in re magis accuratè, quamvis non omnimodè se veraciter gessit. tom. I. ad ann. 1330. n. 2. ubi eadem referens privilegia à Gregorio IX. primitus Collis Paradisi Ecclesiæ, quæ tunc construebatur, concessa, & bullam addens, absque tamen Papæ, & Cardinalium subscriptionibus, hæc scripsit. *Ecclesiam novam, quæ edificabatur in Sancti Institutoris honorem, denuò multiplici gratia, & favore affectit, exemptam faciens, quam antea anno secundo sui Pontificatus exemit à quacunque jurisdictione, sibi que immediatam, & totius Ordinis Caput, & Matrem constituit. verumtamen antiquitate caput est Conventus S. Mariæ Angelorum, & Mater ex instituta primitus ibi Religione: sed Cœnobium hoc Pontificio privilegio utrumque habet dignitate, & auctoritate, & ex recondito thesauro præcellit.* hæc Vvadd. sed quæ de antiquitate, & prima institutione asserit convenire Portiunculæ, clarum est apud omnes historicos, apud ipsum Vvadd. t. I. ad ann. 1209. & 1210. ad Rivitorti Ædiculam derivari, ut suo loco diffusius edisseram.

Id postremò in hac materia observandum, quòd in publicis processionibus pro hac Basilica duæ semper deferuntur, & delatæ semper fuerunt, Romanarum more Patriarchalium Cruces, sub quibus ante prædictam Ordinis divisionem cuncti nedum tertii Ordinis fratres, seu de Pœnitentia, sed & Patres nostri



Reformati, modò de Observantia nuncupati, incedebant: sub quibus adhuc crucibus Patres Capuccini ab ipsorum institutione usque ad diem præsentem conveniunt, & convenire volunt, dignitatem capitis, & matris, tamquam veri S. P. filii agnoscentes.

Aptissimè hujusmodi privilegia Sacræ Basilicæ congruunt; cum nempe totum Minoricum corpus semper subditum, & subiectum S. R. E. pedibus juxta fundatoris regulam esse debeat; Ecclesiam illam, quæ hujus corporis caput, & mater à filiis habenda est, sub immediata speciali subiectione, & protectione S. Petri, Sedisque Apostolicæ constitui dignum erat; ut Capite, ac Matre, mediantibus totum corpus subditum semper agnosceretur, ac protegeretur à visibili capite Ecclesiæ, Christi Vicario, & ab universali Matre, quæ est Romana Ecclesia, foveretur.

### *Sacra Basilica perpetuò à Fratribus Minoribus excolenda.*

## T I T U L U S X X X I I.

**I**psū Gregorius Nonus sanxerat in concistoriali Diplomate, anno 1230. cum adhuc Ecclesia construeretur. Exinde colligi liquet, in tanta Franciscani Ordinis partitione, qui sint primævi Fratres Minores, & Seraphici Patriarchæ primogeniti Filii. Neminem latet, post ejus obitum primo illo sæculo unicum extitisse sub unico Generali Ministro Minoricum institutum, cui sacrum Parentis corpus creditum est, & Ecclesia ab Apostolica Sede tantæ prolis agnita mater extitit assignata. Quintum ferè sæculum currit, ex quo iidem Minores Fratres Basilicam incolunt, & tumultum admirabilem possident; nec tamen legimus ab eis desertam, aut ab aliis aquisitam, aut alterius instituti fratres, prioribus expulsis, fuisse inductos. Bullæ, quibus hæc perpetua servitus Fratribus à S. P. institutis commissa fuit, revocatæ non sunt; imò singulis annis solutione census perspicuum est confirmari. qui ergo inibi perseverant, Conventuales, ad discrimen aliorum, vocati, primi sunt ex Minoribus Fratribus, paternæ, maternæque hæreditatis legitimi, ac perpetui possessores. A quibus etiam quæ nunc possident sacra loca Patres Reformati, seu Observantes habuere. Nam sub anno 1515. Conventuales ipsi sacram Portiunculæ Ædiculam eis concesserunt, quam ducentis annis tenuerant; sicut postmodum anno 1430. sacrum Alverniæ montem, aliaque ex diversis locis tamquam dilectis Filiis tribuerunt.

Ad hujus privilegii manutentionem sæpiùs laboraverunt PP. Conventuales, quin adversus deturbatores Assisiatū civium defensionem, & Summorum Pontificum justitiam sunt experti. Non semel sacram Domum invadere, illosque expellere vi, aut fraude quidam conati sunt. At S. P. cui complacuit pusillo suo primo gregi Regnum dare, nunquam ab eo separari permisit. Adversitates, persecutiones, jacturas non mediocres ad humilitatis, patientiæ, mortificationis exercitia eos pati voluit, qui aliquando vel propheticum illud dicere potuerunt, *Misericordiæ Domini, quia non sumus consumpti*. Piissimus tamen Parens nunquam prædilectos Filios à sua exclusit Domo; nunquam à se, nunquam à sua Sponsa, ab Ecclesia, inquam, eorum matre expulit; sed illorum obsequio delectatus, semper cum primis natis manere voluit.

Hinc anno 1520, sedente Leone X. die prima Augusti Religiosorum quorundam



rumdam maxima multitudo Conventum ingressa (Conventualibus interim Ecclesiæ cultui, & Sacramentorum administrationi intentis) Cenobium percurrere, Capitaneo, quod ad rumorem occurrerat, contumelias jacere, militibus verbera, vulnera lethalia infligere, tumultuosè clamare, hinc cursitantes, & inde: noster est locus: Conventuales discendant, temerariè ausi sunt. Hi periculum advertentes, implorato Seraphici Patriarchæ auxilio, aggressoribus resistantiam fecere, & à Civibus adjuti vim vi licita repulerunt. Res ad Summum Pontificem fuit delata, qui Cardinalibus B. Episcopo Sabinensi, & F. de Ursinis causæ examen commisit, peractoque processu, qui Romæ in Archivio Pontis Sixti apud Generalem Conventualium Procuratorem originaliter asservatur, Leo ipse, parùm alioquin Conventualibus favorabilis, pro justitia, ad compescendam obfessorum audaciam decrevit, Assisiensem S. Francisci Basilicam, speciali titulo Apostolicæ Sedi immediatè subiectam, ad Conventuales perpetuò pertinere, eosque semper in illa manutenendos. Alios referre possem eventus, quos modestia detentus omitto.

*Reliqua Diplomatis privilegia expenduntur.*

## T I T U L U S XXXIII.

**A**D libertatis, & honoris prærogativam, quam almæ nostræ Basilicæ concessit Apostolica Sedes, quæ subtexui privilegia pertinent, quorum licèt plura ab omnibus Regularium Ecclesiis fuerint postmodum per extensionem participata, huic tamen primitus inter Minoricas, & principaliter, velut capiti, singularissimo modo concessa apparent. Præcipua sunt; ne quis audeat in eam excommunicationis, vel interdicti pœnam promulgare: ut infra clausuras locorum, ad ipsam, ejusque Fratres pertinentium nemo præsumat rapinam, seu furtum patrare, ignem apponere, sanguinem fundere, hominem temerè capere, aut interficere, vel violentiam exercere: ut nemo audeat præfatam Ecclesiam quomodolibet perturbare, aut ejus bona auferre, aut ablata retinere, minuere, seu quibusvis vexationibus fatigare: sed ut omnia integrè conserventur, eorum, pro quorum gubernatione, & sustentatione sunt data, usibus omnimodis profutura. Alia suo loco legere quivis poterit.

Ad omnium privilegiorum, & jurium firmitatem, ac robur, prout in prædictis literis, Summi Pontifices, & Cardinales in contravenientes pœnas gravissimas addiderunt; privationis scilicet cujuscunque potestatis, dignitatis, honoris, alienationis à corpore, & sanguine Jesu Christi, & in extremo die divinam ultionem. Servantibus autem jura omnia sacrae Basilicæ facta, Salvatoris pacem in hac vita, & portionem in viventium terra augurati sunt.

Caveant ergo cujusvis conditionis personæ, ne dictis, scriptis, factis, directè, & indirectè præjudicium aliquod Sacrae huic Basilicæ, aut Domui inferant, aliter pœnas comminatas certò incurfuros se sciant. Caveant, inquam, omnes, sed peculiariter, qui Francisci se Filios dicunt, & hoc titulo gloriantur, Franciscanam Assisiensem Ecclesiam verè caput, verè Matrem agnoscant: eam fateantur tot prærogativis, privilegiis, honoribus à Sede Apostolica decoratam. Sic Summis Pontificibus obedientiam, ac reverentiam præstabunt, S. R. E. omnimodam subiectionem profitebuntur, & æternæ mercedis consequutione digni reperientur:

*Eadem*



*Eadem privilegia à Sede Apostolica confirmantur.*

## TITULUS XXXIV.

**P**rædecessorum exemplo, ac propriæ devotionis affectu certatim Summi Pontifices studuere, ut privilegia Almæ Collis Paradisi Pontificali eorum Basilicæ concessa nedum firmarent, sed & augerent.

Nicolaus IV. Apostolicis literis incipient. *Præclara gloriosissimi Confessoris, &c. Custodi, ac Fratribus Assisen. directis, hæc habet. Nos propter ipsius Sancti reverentiam, volentes prædictam Ecclesiam, quæ totius Ordinis vestri caput existit, & Mater, specialiter honorare, Ecclesiam ipsam, quæ nulli, nisi Romano Pontifici est subiecta, & totum locum ipsius, cum pertinentiis suis, nullus omninò valeat perturbare, &c. Dat. Reate. 2. Id. Maii, Pont. ann. 1.*

Sixtus IV. in Bulla incip. *Quamvis Altissimus, &c. Dat. Assisi 8. Kal. Septemb. 1476. sic scribit. Ecclesia ipsa, quæ inter alias Ecclesias domorum dicti Ordinis re, & nomine obtinet Principatum. Ex quo claret, Apostolicam Sedem, ultra Matris, & Capitis dignitatem, insuper aliam Principis omnium Ecclesiarum Ordinis Minorum dedisse. Sed & Bonifacius IX. in Constit. incipient. Alma Domus B. Francisci. Dat. Roma Non. Octob. Pontif. ann. 4. alio non minoris ponderis titulo eam insignivit, subdens; quæ lapis fundamentalis existit totius Ordinis Fratrum Minorum.*

Ne tamen omnes singillatim hîc referam, ac tædio lectores afficiam, unus Clementis VIII. amplissimum Diploma percurrere satis sit; incip. *In Apostolicæ dignitatis culmine, &c. Dat. Rome Non. Septemb. 1602. quo confirmavit omnia, singula privilegia, indulta, libertates, exemptiones, prærogativas, facultates, favores, gratias tam perpetuas, quàm ad tempus eidem Domui, Custodi Fratribus à prædecessoribus suis, & nominatim ab Innocentio 4. Clemente 4. Nicolao 4. Gregorio 9. Gregorio undecimo, Nicolao 5. Alexandro 4. Bonifacio 9. Calisto 3. Pio 2. Gregorio 13. aliisque concessas. Quoties enim Fratres Minores, ejusdem S. Basilicæ cultores perpetui S. Sedem pro privilegiorum confirmatione rogarunt, toties munificentissimè collata obtinuerunt.*

Ad hæc spectat, quod anno 1690. dum in S. Conventu, licèt indignus, Custodis munus obirem, mihi accidisse memini. Quædam observabam præludia, ex quibus facillimè gravissimum præjudicium S. Basilicæ proximè inferendum prænoveram. ut opportunè occurerem, Romam me contuli. Ibi à Summo Pontifice, tunc Alexandro VIII. perbenignè exceptus, dixi. Mihi, S. Apostolicæ Sedis in Basilica Assisense, quæ nulli potestati subdita est, ministro, onus incumbere, summum præmonendi Rectorem de his, quæ in præjudicium indemnitis ejusdem Ecclesiæ verti possent. Negotium exposui. Respondit Pontifex, optimè se callere Ecclesiam illam specialissimè ad S. Sedem spectare, quapropter eam sibi maximè charam ab omni intendebat præjudicio immunem. Ad hæc plurium Eminentissimorum examini causam expositam, & commendatam commisit, quæ anno sequenti sub Pontificatu Innocentii XII. juxta meum votum est absoluta, & jussu ejusdem Pontificis Decretum executioni mandatum. Ad particularia non descendo, ne proximis injurius videar. Satis pro nunc ostendisse, quàm



gratiosè semper inspecta, & beneficiis locupletata fuerit à S. Sede Sacra hæc Domus, omnium aliarum Franciscanæ familiæ caput, Mater, Princeps, Lapidis fundamentalis.

*Fabricæ conservationi à S. Sede Apostolica  
providetur.*

TITULUS XXXV.

**C**Opiosis pecuniarum largitionibus, quas Summorum Antistitum munificentia, & populorum devotio obtulerat, brevi temporis cursu tam ingenti, admirandoque ædificio manus ultima imposita est. At ne temporis iniuria laberetur, in hoc tota fuit Apostolica Sedes, ut conservationi in posterum, ac futuræ tantæ molis restaurationi provideretur.

Nicolaus siquidem IV. ann. 1288. in literis, *Reducentes ad sedula, &c. Dat. Rente Idib. Maii, Pontific. anno 1.* statuit eleemosinas omnes à fidelibus oblatas, & offerendas in Ecclesia S. Mariæ Angelorum consignandas Ministris, Custodi, Fratribus S. Francisci in Civitate degentibus, ad conservationem, reparationem, ornamentum Ecclesiæ, & Domus, quò sacrum corpus Sancti ejusdem quiescit. Hoc privilegium absque jurgio usque ad annum 1417. servatum est, quo tempore Fratres Conventuales Assisii etiam Portiunculæ Ecclesiam incolebant. Eodem verò anno Conventuales Portiunculæ Ædiculam Patribus Reformatis assignavere, qui nunc de Observantia nuncupantur, à F. Paulo de Trincis Fulginate Laico paulò antea exorti. hi locum ea conditione acceperunt, ut eleemosinæ omnes, pecuniæ, ceræ, paramenta prædictæ Ecclesiæ S. Mariæ Angelorum oblata consignarent Custodi, & Ministris S. Assisiensis Conventus, relicta ibi, ad Custodis ejusdem arbitrium, & judicium, & ceræ, & paramentorum sufficienti portione; quod & servatum fuit à Reformatis, tunc enim protestabantur, velle se regulam servare ad literam, absque glossa, absque privilegiis, ut erat mens F. Pauli eorum institutoris, ideoque nunquam se pecuniam recepturos, nec per se, nec per interpositas personas; sed Conventualibus privilegiatis, à quibus Sanctuarium recipiebant, & sub quorum obedientia vivere promittebant, penitus relicturos. Et id nedum ad parendum Pontificiis jussis, ac ostendendum benefactoribus, & superioribus suis gratitudinis debitum, sed ut Regulæ paupertatem absque ullo privilegio servarent. Cum verò à Communitate, seu Conventualitate Ordinis separari cepissent, & proprios habuissent Vicarios, tentaverunt ab Apostolica Sede aliquam ex pecuniis oblatis partem sibi concedi: unde anno 1454. à Nicolao V. Breve obtinuerunt, quo Minoribus Fratribus Sacri Conventus iniungebatur, ut pro ædificatione cujusdam Dormitorii pro una tantum vice illis solverent florenos centum, & ad ipsum Nicolaum recursum habuere, qui veritate privilegii, & initæ conventionis comperta, præfatum suum Breve, tanquam obreptitium revocavit, & nullius roboris declaravit, & Minores Fratres à solutione reliquorum ducentorum absolvit. Literæ revocationis hujusmodi, Custodi, ac Fratribus Conventus Assisiensis directæ, incipiunt, *Mandavimus dudum. Dat. Romæ die 16. Februarii 1454. diligenter servatæ.*



Succeffivè à Callixtò III. PP. Reformati, nunc modernę Observantię obtinuerunt pro eo anno 1457. ex oblationibus eisdem ducatos quadraginta sibi assignandos, vigore Brevis incipientis, *Decet, & convenit. Dat. Romę Id. Septemb. ejusdem anni.* Sed Pius II. Callixti successor, suis literis incipient. *Vidimus literas. Dat. Florentiæ die 1. Maij 1459.* illud Breve revocavit, nullius esse valoris decrevit, & omnia Ecclesię S. Francisci applicanda iussit. Similia tempore Leonis X. & Gregorii XIII. evenere, ut ex eorum Constitutionibus suo loco ponendis patet.

Ultrà præacceptas provisiones Sixtus IV. observans Fabricam ex parte Occidentali minitari ruinam, excitari, & perfici iussit profundum, excelsum, amplissimum ex solido secto lapide sustentaculum, in quo accedente Ægidii Cardinalis Albernotii liberalitate, plurima aureorum millia impendit. Idem principale impluvium restaurari, & ad formam præcepit elegantiorē reduci. Ulteriùs, ut futurę conservationi consuleret, plenariam perpetuam Indulgentiam, & per modum Jubilæi omnibus fidelibus concessit eam Ecclesiam visitantibus in anniversario corporis S. P. Francisci Translationis ad illam die, confessis, absolutis, & huiusmodi conservationi manus adiutrices porrigentibus; diploma incipit. *Quamvis Altissimus. Dat. Assisi 1476. 8. Kal. Septemb. lectu dignissimum.* Præcepit insuper solemnia Translationis ejusdem quotannis persolvi secunda post Pentecosten FERIA, ut ex ejus Bulla, *Dignum reputantes. Dat. Romę 4. Non. Febr. 1478.* Custodi, & Fratribus Min. Assis. directa.

## *Collis Paradisi sacris decoratur Reliquiis.*

### T I T U L U S XXXVI.

**A**D optimam hujus Sanctuarii coronidem additæ sunt celeberrimæ Christi Domini, B. V. Præcursoris Apostolorum, Martyrum, Virginum, S. P. Francisci, aliorumque Sanctorum, & Sanctarum Reliquiæ, quas ferè omnes Summi Pontifices, aut magni nominis Principes donavere.

Gregorius IX. anno 1220. pro translatione sacri Depositi à Templo Sancti Georgii ad hanc à se fundatam Basilicam, Crucem misit in majori Ara exponendam, ex divino ligno compactam, valdè notabilis quantitatis, duplici transversam asserculo, ad instar Patriarchalis, aurea majori cruce clausam, ut prisca referunt monumenta: nunc verò in ampliori argenteo tabernaculo per lucidam apparens crystallum, servatur. Extat & alia ejusdem salutiferi ligni particula, quam magnus quidam Constantinopolitanus miles dono misit.

S. Ludovicus Galliarum Rex, dum anno 1260. sacram peregrinationem perageret, Assisum veniens, integram spinam ex corona Redemptoris aulam Basilicæ sui S. P. donavit; extat in tabernaculo ex auro obrizo super cylindros Zileni lapidis, qui super basim pariter auream eriguntur, & per specilla circumquaque coagmentata conspicitur. Fratres verò Sancto Regi cervical cannabaceum dederunt, super quod paleis repletum S. P. moriturus caput reclinaverat. Hæc Reliquia in S. Parisiensi Capella regali honorificentia asservatur.



Nicolaus V. cum anno 1454. Assisium venisset, & S. P. corpus mirabiliter stans observasset, extremitatem, seu cuspidem ferrei clavi, quo Cruci affixus fuerat Dominus, quadrato argenteo conditam tabernaculo, per crystallos spectabilem dono dedit.

Sixtus IV. viso sui S. P. admirabili exuvio, inter insignes reliquias, quas Roma Assisium detulerat, largitus est oram manicæ purpureæ vestis, qua Salvator pro nobis passus, indutus fuit, argenteo, latoque Tabernaculo extensam, perq; crystallinum operculum clarè inspectam. Insuper partem inconsumptis vestis Salvatoris ejusdem, argenteo, & inaurato vase reconditam.

De sacro S. Dei Genitricis velo sequenti titulo peculiariter dicam.

Clemens IV. Assisii degens anno 1266. viso S. Patriarchæ Deposito, alia inter munera vasculum obtulit, ex lucidissima montis crystallo ad instar Crucis affabrè expolitum; cujus in medio argenteus est cuniculus, ibique purissimum B. Virginis lac reconditur. Nunc crystallos ipsa in sinu amplioris argentei tabernaculi collocata conspicitur. Dedit insuper de veste, cingulo, capillis ejusdem Dei Genitricis, alio vase argenteo repositis.

Innocentius IV. cum anno 1252. Ecclesias, & Canobium dedicasset, sub amplissima Aræ majoris mensa, & unico expolito perlucido marmore compacta, & elegantissimis columellis innixa, in medio aliam, & grandiusculam quidem columnam erigi jussit, in qua Pontifex ipse S. Jo: Baptistæ costam, quam à Civitate Januæ attulerat, pretioso vase, cum aliis Sanctorum reliquiis, velut in sacro puteo, recondidit.

In argentea capsula clauduntur duo digitorum articuli Ss. Petri, & Pauli Apostolorum Principum. In plano, ac pulcherrimo Tabernaculo pars cutis S. Bartholomæi Apostoli extensa cernitur. In aliis, jisque pretiosis Reliquariis cæterorum omnium Apostolorum Anacleta servantur. Quas omnes Sixtus IV. ad suam Basilicam, & Conventum, cujus extiterat Filius, ex Urbe attulit. Qui dein Romam reversus, per Magistrum Franciscum Sampsonem Generalem Ministrum misit sacra Lipsana Sanctæ Annæ Matris sanctissimæ Matris Christi, S. Mariæ Magdalene, S. Catherinæ V. & M. S. Blasii Episcopi, & M. aliorumque ex Sanctis, quæ aureis, argenteisque thecis condita ritè custodiuntur.

In argentea, & quidem magni ponderis capsula sunt ossa integra brachii S. Stanislai Episcopi, & M. à Cracoviensi Capitulo ad hanc Ecclesiam transmissa, ob solemnem ejus S. Præfulis Canonizationem inibi ab Innocentio IV. celebratam, de qua supra Tit. 23.

Ad sunt tria argentea simulacra, quæ capita, & pectora super suas bases referunt, in quorum uno tria capita, in aliis singula clauduntur quinque ex Sanctis Virginibus, & Martyribus Divæ Ursulæ sociis. Hæc a quodam Reverendis. Patre Soc. Jesu Generali huc allata nostri seniores testantur.

Caput S. Gereonis mart. qui Thebanæ legionis miles extitit principalis, à Serenissimo quodam Sabaudia Duce huc transmissum, capsula argentea servatur.

Sixtus IV. tres Iconas dedit, S. Lucæ manu depictas, quarum una B. Virginem puerum Jesum brachiis gerentem, alia eandem B. V. Filium è Cruce depositum gremio sustinentem, tertia Salvatoris effigiem repræsentant, cui simillima videtur Salvatoris Imago, quæ in Lateranensi Sanctuario adoratur.

In OstensoRIO Argenteo extensum apparet corium, quod S. P. Franciscus desuper lateris vulnus, vel ad illud tegendum, vel ad dolorem mitigandum ferebat. Hoc in medietate scissum, & sanguine congelato aspersum plagæ figuram ostendit; unde in solemnibus Sacrorum Stygmatum per Civitatem processionaliter circumfertur.



Argentea capsula capit calceamenta molli ex materia confuta, quæ S. P. F. post impressionem Stygmatum deferebat, quibus & sanguis congelatus introrsum adhæret. Calceoli lanei manibus S. Claræ intexti, & Beato Patriarchæ missi ad Stygmata pedum tegenda, qui & sacro cruore conspersi apparent, theca pretiosa clauduntur.

Cilicium ex nodosa chorda cameli pilis ad instar loricæ textum, quo nudam carnem S. P. vestiebat, capsula argentea reconditur.

Alba ex lana Tunica, qua indutus S. P. decessit, ampliori arca argentea custoditur, Introspectitur sanguis à sacro lateris vulnere effusus: Hanc B. Jacoba Romana funeralia inter paludamenta ab Urbe ad hanc Civitatem attulerat.

Caputium S. P. figuræ rotundæ, scapulari stricto, oblongo, in extremitatibus plano in lignea capsula, quam tela argentea coraliis, & auro affabrè acupicta cooperit, conservatur.

In secretiori Sacrario reconditum est Originale Diploma Regulæ, quam S. P. ab Honorio III. confirmatam accepit in ampla membrana exaratum; quod à pietate Francisci Cardinalis Barberini Senioris in ampliori argenteo conditorio extensum sub prægrandi crystallo conditum fuit; unde facile legi potest. incipit. *Honorius Episcopus servus servorum Dei, Dilectis filiis F. Francisco, &c.* diffusè totam continet Regulam, addita confirmatione, cum plumbeo signo, quidam ex idiotis asserunt, hanc Regulam manu F. Leonis, Deo dictante, conscriptam; at evidentius patet, esse Apostolicam Literam, & characterem alicujus Cancellarii: cum tamen S. Institutor inter vivos agens, semper illam secum habuerit, hinc tanquam Religionis fundamentum, ac paternæ dilectionis pignus, inter præcipuas Sacri Conventus divitias, ac delicias æstimatur.

Ampla ex argento theca extensam continet Benedictionem, quam S. P. proprio characterem in membrana exaravit, signavitque signo Tau, ac F. Leoni inter discipulos prædilecto tradidit, ut Dæmonis tentationes repelleret. ibi minoribus rubeis literis ejusdem F. Leonis hæc attestatio legitur. *Istam Benedictionem scripsit manu sua B. Franciscus mihi Fratri Leoni.* in calce fecit, & signum Tau, cum suo capite.

Involutam Syndonem sericam, aureis floribus arte Phrygia exornatam videre est, in qua S. Francisci corpus in Ecclesia S. Georgii quatuor ferè annis permanfit, quam etiam B. Jacoba ad decorandum sacrum funus detulerat.

Basis argenteæ statuæ accludit chordam, quam S. P. nudos super lumbos gestabat.

Excellam ex perpolita crystallo Crucem, in cujus medio particula cernitur salutaris nostræ Redemptionis ligni, S. Bonaventura Doctor Seraphicus, dum esset Generalis, & universalia Ordinis Comitia Assisi celebraret, donavit.

Vas portatile aquæ lustralis ex unico pretioso achate confectum, & aspergillum argenteum, quo S. Ludovicus Episcopus Tolosæ utebatur, ipsemet huic Sacrario dedit, cum ad venerandum S. P. Corpus venisset.

Perampla sexangularis tabula quadratam super basim erecta, undique cælaturis, & anaglyphis in coronide præincta, utraque ex parte sanctissimo Jesu Nomine à S. Bernardino Senensi, cum in Collis Paradisi Basilica concionaretur, descripta, publicæ adorationi exposita est. Nunc verò in Larario S. Jo: Baptistæ eleganter ornato propè Sacrarium clauditur, sub transparenti velamine, & maxima devotione percolitur.



Innumeræ aliorum Sanctorum Reliquiæ, quas longum foret singillatim referre, ad tantum thesaurum locupletandum concurrunt.

*De Sacrosancto Velo præcelsæ Dei Genitricis.*

## TITULUS XXXVII.

**C**ælestes inter divitias, quibus hujus Terrestris Paradisi gaza redundat, à fidelium pietate inestimabiliter colitur sacrum velamen, quo B. Dei Genitrix Virgo capite tegebatur, quoque in antro Bethlem infantem Jesum involuit. Hoc ad nostrum Sanctuarium modo admirabili pervenisse vetustus indicat codex, quin & muta picturarum historia satis exprimit, ex quibus omnia ferè sub hoc Titulo contenta decerpfi.

Dominus Thomas Urfinus, nobilis Romanus, Comes Manupelli, cum adhuc juvenia floreret, Dux Italicæ Classis in expeditione contra Saracenos, defuncto S. Ludovico Francorum Rege pro Terræ Sanctæ recuperatione, captivum tenuit quemdam ex Saracenis Damasci Præpositum. Hic, ut libertatem redimeret, victori spondit, thesaurum exhibere, quem Christiani pretiosissimum reputarent; Velum scilicet, quo Maria Filium suum jam natum involuerat, quod ipse inter Ecclesiæ Jerosolymitanæ spolia acceperat, & apud se quàm diligenter tenebat. Urfinus adhuc libenter, inquit, assentiar, dummodo id verum esse firmissimis rationibus comprobet. Cum captivus pretiosam obtulit capsulam, in qua unà cum sancto Velo literæ testimoniales aderant antiqui Patriarchæ Jerosolymitani. Comes tam digno pretio sumpto, captivum Saracenum libertati donavit. Tandem expleto bello, compositisque post varios exitus, cum Saracenis rebus, dux ipse Thomas Romam sua cum classe redibat: at non procul à Cretensi mare, oborta ingenti tempestate, cum nautæ, ac milites mortem jam jam imminentem timerent, ille protinus Velum è sua capsula extraxit, contra aerem expandit, Mariam vocavit, cœteris omnibus Matrem misericordiæ invocantibus: cum dissipatis illicò nubi- bus, quiescentibus ventis, demissis fluctibus, aeri serenitas, ponto tranquillitas rediit.

Romam reversus, animo diu revolvit, quæ in Ecclesia thesaurum illum re- conderet; at dubio perseverante, adhuc apud se retinebat; cum gravi oppres- sus morbo, in vitæ discrimine Deum enixè precatus est, ut locum designaret, in quo servandum vellet sacrum illud operculum. Nocte dormitans vidit in- somniis S. P. Franciscum, sibi specialiter advocatum, dicentem: Thoma sa- naberis: si Velum Virginis, mihi destinatum, meæ Assisienti Ecclesiæ dede- ris. Manè visionem adstantibus narravit agnatis, qui tanto privari thesauro nolentes, suadere cœperunt, visionem illam non veritatis mysterium fuisse, sed somnium. Ingravescibat ægritudo canceri ejus pectori in hærentis, cum S. P. illi secundò apparens, eademque repetens, addit, alioquin morieris. respondit, promitto; & expergefactus deliberatè spondet se adimpleturum. En statim præter spem physicorum valere cœpit, & in sanitate nondum firma- tus, Assisium versus, nobili sodalitiò sociatus, iter agreditur. jam sanus eò pervenit, die 11. Martii 1320. sedente Jo: 22. Custodem, & Fratres in Eccle- sia convocari petiit, ubi coram omnibus ante Aram maximam genuflexus,



gratiam S. P. agens, capsulam protulit, & aperuit, Velum ostendit, omnia, quæ evenerant, distinctè enarravit, in eademque inclusum arcula consignavit, ac votum solvit. Tres ad id convocati fuerunt Notarii, Petrus Pucciatellus, Honuphrius Lutius, Nicolaus Lutius, qui testibus adhibitis eodem die, ad perpetuam rei memoriam, solemni instrumento totam facti seriem describere. Custos tunc temporis erat F. Philippus Baciucci S. T. D.

Sacro munere jam recepto, Fratres in secretiori Sanctuario, & in ejus honorificentiori loco, pluribus sub clavibus condiderunt, ubi adhuc servatur.

Devotionem populi nedum Assisiatis, sed & exterorum erga specialissimum hoc divini Pueri, & purissimæ ejus Matris amoris pignus, nemo satis concipere, aut exprimere posset. Bis tantum quolibet anno, innumeris populis, ex singulis Vallis Spoletanæ Civitatibus, Oppidis, ac Suburbiiis concurrentibus, palam ostenditur. In Festo B. V. ab Angelo Annunciatæ; quo die solemni processione ad Ecclesiam Portiunculæ à PP. Conventualibus fertur; portant Arcam, in qua clauditur, quatuor Levitæ Dalmaticis induti, sub Baldachino. musici præeunt; militum copiarum circumeunt. super majorem illius Ecclesiæ januam in excelsa Propylæo ad id ædificato, post sermonem à Concionatore Conventuali habitum, prius coram populo intra Templum, dein multitudini in latissima platea extra, & ante Ecclesiam stanti, à P. Custode Sacri Conventus pluviali induto, spectandum exponitur, ac ter benedicitur. Mirum, tantam numerositatem, dum sacrum panditur Velum, in profundo silentio genuflexam procumbere; statim verò ac elevatur, omnes unanimiter exclamare, Deique implorare misericordiam. Vidi egomet non semel DD. Cardinales, Episcopos, Prælatos, ac Magnates adstantes tanta pietate ex his vocibus commoveri, ut lachrymas nullatenus cohibere valerent.

Pari celebritate, ac pompa publicè ostenditur sacrum Velum secunda die Pentecostes; processionaliter enim à suo Sanctuario defertur per Collis Paradisi plateas ad supereminentem, amplumque Xistum undique patens, ac testudine tectum: hinc innumera gentium cohors, qua nedum tres subjunctæ plateæ, ac viæ; per quas conspici queat, sed & domorum tecta, agrique infra Urbem inundant. dum observandum, atque adorandum proponitur, alta in populo taciturnitas: dum benedictiones ad quatuor mundi plagas distribuuntur, singuli vocem tollentes, misericordiam poscunt.

Solemnitatis hora est ante Vesperas, paulò post horam meridiei, ut detur exteris ad propria reditus. plures constanter asserunt, dum Sacrum Velum ab Ecclesia egreditur, super illud ex diametro fulgidam cerni stellam, quæ & comitari videtur, usque dum ad eandem Ecclesiam referatur. quapropter sibi invicem indicantes, & Coelum aspicientes, dicunt: ecce stella: ipsam aspice. Hoc evenit prædicta secunda Pentecostes die, cum Sol meridianus ardentius fervet. Illam aspicere mihi pluries contigit, licet non potuerim in eam oculos figere, eo quòd processionaliter incedebam; at visus, cujus debilitate laboro, non ita clarè intueri permisit. piæ tamen multitudini standum.

Uberrima gratiarum munera Benignissima Virgo in sui amoris specimen per Velum hoc impartitur. lubet ex plurimis aliquas canonicè probatas referre. Anno 1364. dum per Civitates, Oppida, & castra Umbriæ pestis crudelissima defæviret, Assisates, quamvis adhuc immunes, vicinum tamen malum timentes, longius abscedebant; cum Fratres, ne desolata maneret Civitas, solem-



solemnem indixerunt processionem , & annuente Episcopo F. Bertrando Lagerio Minorita , per totam Civitatem extra capsam in Tabernaculo velum spectabile detulerunt . En Civitas omnino à lue intacta permanfit : imò & alibi Dei flagellum quievit , ac brevi tempore evanuit .

Eugenio IV. Christi vices gerente , Episcopus , ac Potestas Assisii irreconciliabili odio æstuabant , planè ut qui ortam sedaret litem , nullus inveniretur . cives , velut incerti , studia in contraria scindebantur ; hinc dissidia fovebant , nec ullus inter Assisiatas paci locus patebat . cum verò dies adesset , Annunciationi B.V. sacra , ambo , seorsim ad S.P. Francisci Ecclesiam se contulerunt , ut de more cum Civitatis proceribus piè assisterent functioni ; dumque in sacrario essent , priusquàm sacrum Velum in Arca portatili clauderetur , Episcopus devotè illud est osculatus , dein etiam Potestas , qui extemplo , occulta vi , nec alio respectu sibi invicem obviam venientes , in amplexus pariter , & mutua oscula convenerunt , protestati coram Velo Matris pulchræ dilectionis omnes vel datas , vel cogitatas offensas procul ab animo fugaruros : quo ex tempore apparuerunt arctè necessitudinis vinculo sociati . Hinc omnium ordinum cives animo gestiere , B. V. pro miraculo gratias rependentes .

Mulier per biennium oculis capta , ad deosculandum cœleste hoc velamen manuducta , dum sacra figeret oscula , & preces adderet , voti compos effecta , visum perfectè recuperavit .

Ad aspectum Sancti hujus Velaminis obsessi illicò liberantur , & malæ potestates pelluntur . Tempore inundantis , diuturnioris , ac noxiæ pluviæ palam publica supplicatione defertur , & serenitatem inducit . Testis oculatus sum ego . His , aliisque ejus notæ favoribus B. V. suam ostendit protectionem erga Civitatem , & Ecclesiam , cui tantum suæ dilectionis pignus donavit .

In ampliori ex argento tabernaculo , tanti ponderis , ut duos , aut tres Sacerdotes ad illius elevationem concurrant , à munificentia Cardinalis Alexandri Peretti , Sixti V. Nepotis donato extensum Velum , ac per crystallos utrinque visibile conservatur .

Hujus ad thesauri custodiam , præter Custodem , & Patres deputatos , singulis trienniis à Conventuali Capitulo bini eliguntur Civitatis Patritii , quibus ab eodem P. Custode claves traduntur , ut & vigiles ipsi assistant , quoties publicè ostenditur , aut privatè . nec tamen cuilibet , sed Eminentissimis Purpuratis , Principibus , ac insignioribus Prælatis monstrari solet . ita Patres Generales ad servandum decus tantæ reliquæ decreverunt , ita S. Congregatio Sacrorum Rituum confirmavit .





*Sacra Basilica Indulgentiarum thesauro  
locupletatur.*

TITULUS XXXVIII.

**C**UM *ex Clem. Religiosi de privil.* Religiosi pronuntiantes Indulgentias indiscretas peccent mortaliter, quod prohibetur eis in virtute Sanctæ Obedientiæ, & sub pœna æternæ maledictionis: Indulgentiæ autem indiscretæ, *secundum glos. & Card. in dicta Clem. ac Pan.* sunt quæ aut concessæ non fuerunt, aut invalidè concessæ, aut probari nequeunt, & sunt dubiæ, sic Auctores Summarum Tabienæ, & Angelicæ, ac P. Rodericus Min. Observant. t.2. qq. reg. q. 98. art. 1. & 2. cum omnibus aliis; hinc mihi in hac materia cautiùs incedendum, ut non nisi ex Apostolicis literis à me lectis Indulgentias huic Sacræ Basilicæ concessas describam.

Biennio à transitu S. Patris nondum expleto, Gregorius IX. volens Ecclesiam ad illius honorem, & corporis asservationem magnificè edificari, concessit Indulgentiam 40. dierum Christi fidelibus aliquam eleemosinam pro illo opere facientibus. Bullam præ manibus habeo, incipit, *Recolentes qualiter, Dat. Reate, 3. Kal. Maii. Pontif. Ann. secundo*, qui fuit nostræ salutis 1224. Exemplaria ad omnes Provincias jussu Pontificis misit Generalis Helias, qui ex harum eleemosinarum cumulo, non ex taxa pauperculis Fratribus imposita, ut falsò illi quidam ascribunt, & Templum, & Conventum extruxit. Hæc Indulgentia licèt modò parvi ponderis videatur, eo tamen sæculo & magna erat, & rara; ideoque ad eam lucrandam moti fideles ad tam pium opus copiosas eleemosinas erogabant.

Pontifex idem, cum de Translatione Sacri Corporis ad novam Basilicam ageretur, concessit omnibus eo die usque ad Festum Nativitatis B. V. dignè illam visitantibus, transfretantibus tres annos, transeuntibus alpes duos, & reliquis unum Indulgentiæ annum, ut ex eisdem literis, *Mirificans Misericordias. Dat. Lateran. 17. Kal. Junii Pont. ann. 4.* nec majorem lucrabantur Indulgentiam, illis temporibus, visitantes limina Apostolorum Petri, & Pauli, ut testatus est ipse Gregorius IX. in aliis, *Speravimus hætenus. Dat. Later. 16. Kal. Julii ejusdem anni.*

Ritè dispositis in Anniversario Translationis S. P. die, & per octavam dictam Ecclesiam visitantibus unum Indulgentiæ annum largitus est idem Papa in eadem Bulla, *Mirificans.*

Innocentius IV. literis, *Licet is, de cujus &c. Dat. Perusii. Idib. Februar. Pontif. ann. 9.* dignè Ecclesiam visitantibus in Festivitate S. P. Francisci, per subsequentes quindecim dies, singulis annis, annum unum, ac dies quadraginta.

Pontifex idem. *Si populus Israeliticus, &c. Dat. Assisi, 3. Id. Junii Pont. ann. 10.* eam, ut supra, visitantibus, & manum pietatis ei porrigentibus in Anniversario Dedicationis, & subsequentibus diebus quindecim, duos annos, & 80. dies in perpetuum indulgit.

Idem Innocentius, *Consecrationes Altarium, &c. Dat. Later. 7. Kal. Febr. Pontific. anno 2.* dignè Basilicam visitantibus in festo S. Stanislai Episc. & Mart.



Mart. & infra octavam centum dies annuatim.

Alexander IV. *Pro reverentia B. Francisci*, 2. Non. Maii Pont. anno 4. concessit Custodi Sacri Conventus, ut visitantibus Ecclesiam ex voto, si aliquid in exequutione votorum emisserint, possit eos absolvere.

Clemens IV. *Cum ad promerenda. Datum Perusii Id. Octob. anno primo id est 1265.* in festo S. Francisci, & per octo sequentes dies annuatim, annum unum, & 40. dies, ritè accedentibus indulgit.

Nicolaus IV. *Præcelsa Gloriosissimi. Romæ 4. Nonas Maii, Pont. anno 2.* confessis, ac visitantibus diebus singulis annum unum, & quadraginta dies.

Et in aliis. *Ante thronum. Datum Romæ 12. Kal. Febr. anno 1.* in festo Sancti Patris Francisci, & per septem sequentes dies alium annum cum quadragena.

Idem Nicolaus. *Eximia devotionis. Datum apud Urbem Veterem, Id. Iunii anno 4.* Visitantibus in festis Pentec. Nativitatis, Annuntiationis, Purificationis, & Assumptionis B. M. V. ac Sancti Antonii de Padua, & per earum Octavas, & in Anniversario Dedicationis ipsius Ecclesiæ unum annum, & 40. dies Indulgentiæ.

Bonifacius VIII. *Licet is. Datum Romæ 12. Kal. Febr. Pont. sui anno primo.* Visitantibus Ecclesiam S. Francisci Assisii, centum dies singulis diebus.

Idem. *Ante thronum. Datum Romæ 12. Kal. Febr. anno primo.* Visitantibus eam in festo S. Francisci, & per totam octavam annum unum, & quadragenam.

Bonifacius IX. *Licet is, de cuius. Datum Perusii 2. Kal. Novemb. anno 3.* Visitantibus Capellam S. Catharinæ Virg. & Mart. in eadem Ecclesia Sancti Francisci Assisien. in festo ejusdem in perpetuum quinque annos, & totidem quadragenas.

Idem. *Ecclesiarum, &c. Datum Assisii 5. Kal. Sept. anno 4.* venientibus ad Ecclesiam ipsam benè dispositis, perpetuis temporibus, septem annos, & totidem quadragenas.

Martinus V. *Quantò frequentius. Datum Florentiæ Kal. Apr. Pont. anno 3.* dignè accedentibus, & manus adjutrices porrigentibus annos quinque, cum suis quadragenis.

Sixtus IV. *Inter cæteros Dei Athletas. Datum Romæ 6. Kal. Dec. anno D. 1472.* Visitantibus eandem Basilicam in Solemnitatibus Assumptionis B. M. V. B. Francisci, Antonii de Padua, & Bernardini Sen. ducentos annos, & totidem quadragenas.

Idem. *Quamvis Altissimus. Datum Assisii 8. Kal. Sept. anno 1476.* Visitantibus Ecclesiam in festo Translationis S. Francisci confessis, & elemosinam aliquam dantibus pro conservatione ingentis fabricæ Indulgentiam plenariam à primis Vesperis, usque ad occasum Solis ipsius festi.

Eadem bulla dedit facultatem Custodi pro tempore constituendi Pœnitentiariorum, qui etiam quatuor diebus præcedentibus habeant potestatem absolvendi pœnitentes ab omnibus peccatis, dummodo tam gravia non forent, tum meritò consulenda esset Apostolica Sedes; addita facultate permutandi vota, exceptis visitandi terram Sanctam, limina Sanctorum Apostolorum Petri, & Pauli, ac Jacobi in Compostella, & Religionis; ulterius & constituendi tot Pœnitentiariorum doctos, & idoneos, quot Custos ipse judicaverit opportunos.

Idem Papa. *Dignum reputantes. Romæ 4. Nonas Febr. 1478.* concessit, ut Festum prædictum Translationis in Ecclesia Assisienti sit festum nobile, ac



quotannis celebretur secunda die Pentecosten, quia Translatio ipsa peracta die 25. Maii 1230. eo anno incidit in ipsa die Pentecostes hora vespertina. Et declarat Indulgentias pro ea die concessas etiam ad secundam diem Pentecost. esse transferendas.

Gregorius XIII. Singulari Diplomate, *Omnium saluti. Datum Romæ pridie Id. Octob. 1577.* concessit, ut quoties celebratur Missa in Altari S. Francisci in ejus Ecclesia Assisien. pro anima in Purgatorio existente ipsa ab illis poenis, meritis, &c. liberetur.

Sixtus V. in sua Const. *Ex supernæ dispositionis. Romæ 13. Kal. Dec. 1585.* Motu proprio erexit Archiconfraternitatem Cordigerorum in Ecclesia, & ejus Altari Majore, sub quo requiescit Corpus S. P. Francisci, deditque plenam facultatem Ministro Generali Minorum Conventualium erigendi Confraternitates in Ecclesiis etiam aliorum Franciscanorum Observantium, & Capuccinorum, illasque huic, omnium *Capiti*, aggregandi, & omnia privilegia participandi.

Indulgentiæ autem perpetuæ in illa Bulla expressæ sunt. Quisque fidelis, qui ritè confessus, & Sacra Communione refectus, cordam à Superiore Conventuali benedictam, receperit, & huic Archiconfraternitati aggregatus fuerit, eo die plenariam consequatur. Item in mortis articulo Cordigeri confessi, & nomen S. Jesu ore, vel corde profitentes plenariam obtineant.

Insuper omnes, & singulas Indulgentias, remissiones, ac relaxationes Archiconfraternitati Confalonis B. V. M. in Urbe, & omnes alias Ordini Minorum concessas, dummodò non sint revocatæ, Cordigeris participat.

Idem Sixtus. *Divinæ Charitatis. Datum Romæ, Non. Maii 1583.* confirmavit omnia prædicta, & insuper Cordigeris, qui interfuerint processionibus, singulis mensibus agendis, confessis, & Divino pane refectis Indulgentiam plenariam, aliis verò non Confratribus, qui interfuerint, centum dies. Item prædictis Cordigeris, qui aliis processionibus, vel Divinis Officiis aderint, qui Corpus Christi ad infirmos, vel defunctum ad sepulturam associaverint, aut eleemosinam pauperi dederint, vel pacem inter inimicos composuerint, toties centum dies remissionis de poenitentiis, pro peccatis debitis, relaxavit. Ulteriùs dedit eis libertatem applicandi omnes prædictas animabus in Purgatorio detentis per modum suffragii. Et Ministro Generali Conventualium potestatem, eas communicandi, & participandi cæteris Confraternitatibus.

Paulus V. *sub die 2. Martii 1607.* Omnes supradictas Indulgentias amplissimè confirmavit; & addidit septem annos, & totidem Quadragenas Cordigeris visitantibus Ecclesias Conventualium in festis Sanctorum Francisci, Antonii Patavini, Bonaventuræ, Ludovici Episcopi, Bernardini, & Claræ. Quæ à successoribus concessæ sunt omnibus plenariæ.

Gregorius XV. *die 12. Novemb. 1622.* similiter omnes prædictas Cordigeris confirmavit; & insuper eisdem utriusque sexus, qui ob infirmitatem, vel distantiam, vel legitimum aliud impedimentum non possunt accedere ad Ecclesias Fratrum Minorum Conventualium. Si domi, vel alibi manentes recitaverint quinqutes orationem Dominicam, Salutationem Angelicam, & Gloria Patri, &c. omnes præfatas Indulgentias obtineant, ac si illas personaliter visitarent.

Summarium prædictarum Indulgentiarum Pauli V. & Greg. XV. impressum Romæ in Typographia Reverendæ Cameræ Apostolicæ 1623. Sigillo nostri Procuratoris Generalis munitum, & manu, ac nomine Marcelli Castellutii



Curiae Capitolinae Notarii subscriptum, in Archivio hujus Sacri Conventus asservatur.

Tandem Summus Pontifex Innocentius XII. motus tantum propria devotione erga merita mirabilia Seraphici Patris, sub die 18. Augusti Anni 1695. concessit nostrae Basilicae Assisienti Indulgentiam plenariam perpetuam, & quotidianam pro omnibus fidelibus illam digne visitantibus; quae certe omnibus Indulgentiis maxima est, & complementum nostri thesauri.

In antiquo m. s. alias Indulgentias lego huic Ecclesiae impartitas, sed cum concessae vivae vocis oraculis referantur, eas à Gregorio XV. & Urbano VIII. revocatas censeo, ideoque non recenseo.

Alias autem nostris omnibus Templis concessas, ut plenarias in singulis nostrorum Sanctorum festis, secunda die Augusti, & similes etiam purgantibus applicabiles omitto; cum meum sit solas particulares Colli Paradisi indultas referre.

*In S. Basilica Justorum corpora resurrectionem  
expectant ad vitam.*

## TITULUS XXXIX.

**B**Eatos hic inscribo, quos antiquitus Religio, vel populorum pietas ob sanctimoniae famam tali titulo insignivit. Qua in re à Constitutionibus Apostolicis, & à Sacrorum Rituum Congregationis decretis recedere minimè intendo.

S. Patris Francisci Socios, ac discipulos, qui post illius ad Coelum transitum, ex hac vita migrarunt, plures in eadem Basilica corporis exuvias deposuisse invenio, ut cum sancto Institute ad aeternitatem gloriosi resurgant.

Super Aram Immaculae Virginis, & sub ejusdem simulachro sepulchrum elegans cernitur, crate ferrea munitum, ibique humantur corpora quinque Beatorum, quorum imagines, antiqua manu depictae, ante Virginem prostratae conspiciuntur. Videlicet

B. Bernardi Quintavallis Assisien. quem S. P. suum habuit in Ordine primogenitum, qui, eo consulente, omnia bona, quibus ditissimus erat, pauperibus erogavit. fuerat in patria vir summæ authoritatis, ob nobilitatem, ac opulentiam. Obiit anno 1241. assistente sibi F. Agidio ejus consodale, cui saepe dicenti, Frater Bernarde, sursum corda, respondebat, habemus ad Dominum: dein, Gratias agamus Domino Deo nostro, ambo pariter subjungebant.

B. Sylvestri de Assiso, item S. Patris discipuli, qui adhuc in saeculo quadam nocte dormiens, suam Civitatem aspexit ab ingenti Dracone obsesam, & cum anxius exterminium ejus timeret, observavit Franciscum in aere sublevatum, auream Crucem ex ore emittentem, ac monstrum fugantem, propterea & ipse, copiosa facultate divendita, ac mendicis erogata, illum sequutus est.



B. F. Gulielmi Anglici, qui post mortem tot miracula patrabat, ut Frater Helias ei mandarit desistere, ne Sancti Patris debitæ devotioni præjudicium afferret; ipseque obediens in posterum omnino à miraculis abstinuit.

B. F. Electi Laici de Assisio, Idiotæ quidem, sed Spiritu Intellectus, & Prophetiæ illustris; qui, ut referunt m. s. obviam habens Petrum Cardinalem Albanen. nil de morte cogitantem, vel suspicantem, illi dixit, Domine hodie morieris, & sic evenit. Fuit hic inter primos à Sancto P. vocatos.

B. Valentini, antea Philosophiæ, ac Medicinæ Doctoris, qui ad prædicationem S. P. conversus, quamvis eruditissimus, tanta excelluit humilitate, ut semper Laicus, vilioribus ministeriis addictus esse voluerit.

In Altari S. Jo: Evangelistæ, quò nunc est Sacrarum Reliquiarum conditorium, corpora quatuor principalium S. P. sociorum quiescunt, puta

B. Leonis Confessarii, & omnium S. P. secretorum conscii, quem ipse Oviculam Dei vocabat. fuit unà cum eo in Monte Alverniæ, quando Sacra Stigmata recepit, cui primò illa patefecit. In vita, & post mortem miraculis claruit, præsertim in sanandis malo (ut ajunt) caduco vexatis. Obiit in Colle Paradisi, ubi diu apud Sanctum Patrem moratus fuit, anno sal. 1271.

B. Massæi Marignani, ex Comitatu Assisi, qui fuit humilitatis, & obedientiæ admirabilis cultor, quem S. P. secum Perusiam duxit, ad postulandam Indulgentiam plenariam ab Honorio III. pro die anniversario Consecrationis Ecclesiæ Portiunculæ. Vivens fuit S. Patri familiaris, moriturus Assisium venit anno 1280. plenus dierum, propè illum semper commoraturus.

B. Ruffini de Sciphis Nobilis Assisien. S. Claræ consanguinei, quem S. Pater, adhuc viventem, Sanctum vocabat. Vir summæ humilitatis, cui Deus singularem contulit super energumenos potestatem: unde quoties S. Franciscus obsessos studebat liberare, Dæmonibus minabatur, se velle Fratrem Ruffinum vocare, unde illi statim aufugiebant. Obiit anno 1270. assistente sibi F. Leone.

B. Angeli Reatini nobilis militis, qui cum per suam Civitatem armatus incederet, obvium habuit B. Franciscum sibi ignotum, qui ei dixit, sequere me; ipse verò velut alter Apostolus, projectis armis sequutus est vocantem. Sancto Patri extitit charus, & miraculis clarus.

Prope Sacellum Conceptionis Immaculatæ ad dexteram quiescunt ossa B. F. Joannis Anglici, cujus effigiem in pariete depictam videre est.

Inter Capellam D. Bonaventuræ, & Sacellum S. Valentini conspicitur antiqua imago B. Valentini Narniensis, qui Comes erat cujusdam Castri propè suam patriam, duas habuit filias, quas in Monasterio S. Claræ Deo consecravit, tres filios secum ad Ordinem duxit. In pane, & aqua 30. annis vixit, perque annos decem aquam absinthio immiscuit. floruit circa annum 1378. post mortem miraculis claruit. Obiit in Sacra Carcerum Eremitio; unde corpus ad Sacram Basilicam est translatum.

Sub Suggestu jacet Corpus Beatæ Jacobæ de septem solis nobilissimæ Matronæ Romanæ, S. Patris discipulæ, quæ ab Angelo de proximo illius transitu admonita, ab Urbe statim ad Portiunculam properavit, omnia ad funeralia necessaria secum detulit, infirmum, ac spirantem vidit, & Assisi residuum vitæ ducens, illius Canonizationi, ac Translationi adfuit, & paulo post



post obdormivit in Domino. Ejus effigies vetus in muro cernitur, sub qua, in marmore sculpta legitur hæc inscriptio. Hic requiescit Jacoba Sancta, nobilisque Romana. ferunt m. f. cum illa sepultos esse duos ejus filios, quos Roma secum duxerat, qui tertium Ordinem professi, Assisi postea ex hac mortali vita decesserunt.

In diversis Basilicæ partibus, sparsim in Domino obdormiunt alii venerabiles ejus servi, quorum in antiquo m. f. codice extat memoria, scilicet B. F. Bernardi de Viridantibus nobilis Assisien. qui fuit S. Patris coætaneus, & apud ejus Corpus, quoad vixit, servavit excubias.

B. F. Illuminati Reatini, qui cum S. P. ad Ægypti Sultanum ivit, cui S. P. inter primos vulnera sibi à Christo Domino impressa manifestavit. In Colle Paradisi diu vixit, unde ad Colles æternos evolavit.


B. Guidi Senensis, qui juvenis S. Franciscum Cortonæ prædicantem rogavit, ut ad Ordinem admitteretur, cui S. Pater concessit, ut in Cella sub cava rupe novitius habitaret. Totum contemplationi se addixit. In Sacro Conventu propè Sanctissimum Patrem senectutem, & vitam terminavit anno 1271.

B. Joannis Morici nobilis Assisien. qui post obitum S. P. floruit, virtutibus, donis, ac prodigiis illustris.

B. Ægidii de Capotiis Assisien. quem aliqui cum primo confundunt, qui Perusii obiit, & ibi in nostra Ecclesia sub Altari in Sarcophago mirabiliter invento jacet. Hic autem in Sacro Rivitorti Larario post mortem S. P. diu contemplationi, & pœnitentiis addictus vixit. Moribundus Assisium venit, ubi diem hujus vitæ clausit extremum.

B. Petri de Assisio, viri sinceritate, ac simplicitate præditi, qui vocatus ad gloriam anno 1249. monitus fuit ab Angelo, ut confiteretur peccatum quoddam, in sæculo ab eo patratum, cujus oblitus fuerat; quod Vaddingus scribit T. 1. ad prædictum annum.

A nostris Senioribus, dum essem juvenis, audiui, traditionem extitisse, quòd circa annum 1290. Custos, & Patres Assisien. Conventus, de quorum familia, & numero erant pauci illi, qui apud Sacram Portiuncule ædiculam morabantur; ut corpora quorundam S. P. Sociorum, ac præcipuorum discipulorum, quæ ibi sepulta fuerant, decentius, ac tutius servarentur, ab ea Ecclesiola ad hanc Basilicam transtulerunt; Jam non videtur inverisimile. Tamen cum de hujusmodi translatione aliud non suppetat testimonium, ne veritati præjudicem, fidem suspendo. Plures Dei servos, qui à principio, ac successivè in Sacro hoc Coenobio piè, sanctèque vixerunt, & ab hac vitæ migrarunt, tumulatos hic esse non est ullatenus ambigendum.





*Collis Paradisi virtute , ac gloria  
celebres incolæ.*

## T I T U L U S X L

**N**Ovi terrestris Paradisi nunquam defuere Vigiles , & Cultores , qui operarentur , & custodirent illum , in quo Deus posuit Franciscum hominem , quem ad imaginem , & similitudinem suam formavit , usquedum ad æternam gloriam transferat , permansurum . Nam præter Beatos , quos retulimus , viros , ibidem vita , & morte functos : indubium est , alios Sancti Institutoris socios , discipulos , ac virtutum sectatores , apud dilectissimum Patrem moras traxisse , indeque ad coelestem patriam purificatas animas transmississe .

Fama constans est , etiam per ora Summorum Pontificum , ac Principum resonans , Sacrum hunc locum semper religiosos viros , exemplares , humiles , contemplationi , vigiliis , ac penitentiis addictos , virtutum sanctimonia , ac Dei donis præditos , dignos , ut cum Sancto cohabitarent Institute , quos longum nimis esset referre , habuisse ; solum liceat quosdam nominare jam defunctos , quos spatio quinquaginta annorum , ex quo Religioni sum mancipatus , & sacri loci omnium indignissimus filius , agnovi . Vidi , & alloquutus sum Patrem Josephum à Cupertino , multis annis in Sacro Cœnobio commoratum , qui pluries cordis , & animi mei arcana , soli Deo , mihi que nota , paternè , ac confidenter mihi detexit . Me ad mortem properantem , ex gravi languore , dum essem adhuc novitius , sanitati insperatò restituit ; iussit enim pro medicamento mihi dari Agnum Dei , idest Sanctissimum Eucharistiæ Sacramentum ; quo recepto , eodem die , stupente Physico , convalui . Illum in extasi inter spiritualia colloquia , & in aere sublevatum pluries inspexi . Cujus Beatificationis , & Canonizationis causa , completis jam processibus , autoritate ordinaria , & Apostolica desumptis , agitur in Sacrorum Rituum Congregatione ; ejusque vita descripta , atque Typis promulgata jam extat . De quo Summus Pontifex Innocentius XI. pluries testatus est , se sanctum virum cognovisse . dignum certè à laudato viro laudari .

Cognovi Patrem Magistrum Gabrielem à Caravajo , ejusdem Patris Cupertino Confessarium , mira exemplaritate conspicuum , Charitate , Zelo , Oratione , corporis mortificatione , omnique virtute ornatum . Cujus ad exequias tota Civitas confluit ; & cum à devotis ejus tunica scissa in partes fuisset , necesse fuit corpori ejus aliam super imponere , feretrumque in altum elevare , ne denuo expoliaretur . Quæ vidi , refero . De ipso etiam Innocentius XI. dicere consueverat , se , dum fuit Assisi anno 1649. agnovisse Patrem Joseph à Cupertino , & Patrem Gabrielem à Caravajo , quos virtutibus pares , ac meritis reputabat . Per quamplurium annorum curriculum fuit etiam Sacri loci Conventualis Pater F. Angelus de Santa Agata , officio animarum Parocus , quem idem Pater Joseph pastorem vocabat . Alter Pater Antonius à Carpio Tyronum curæ præpositus , qui post obitum Caravaii confessiones ejusdem Cupertino excipiebat . Hi duo dierum , ac virtutum pleni , Sanctimonix odorem post mortem in Provincia Bononiæ reli-



querunt. Obiit insuper, me adstante, in Sacro hoc Conventu Frater Franciscus de Catanzario Laicus, hujus domus filius, officio Janitor, vir simplex, humilis, patiens, rectus, ac timens Deum, Charitate in pauperes admirabilis; cujus cibus erat niger panis, cum herbis, vel cœpulis, & potus aqua, vel vinum diu ante lymphatum, & ferè corruptum: lectus tabula, vel Ecclesiæ pavementum, post nocturnam orationem: alioquin lætus, affabilis, & omnibus charus. Viventes laudare non debeo, confirmet illos Deus Perseverantiæ gratia.

Nullus dubio est locus, quod Seraphicus Pater apud se voluerit semper aliquot ex selectioribus, & charioribus filiis, qui ex fontibus Salvatoris, ab ejus corpore manantibus, virtutum aquas, salientes in vitam æternam plenis faucibus degustarent; & ab ipso geniti infantes rationabiles, sine dolo, ex plagarum mammis lac concupiscentes delibarent.

Singulari pariter sapientia, & sublimi gloria celebres locus hic veræ voluptatis habuit colonos. Dignum enim semper, & æquum fuit, tanti Ordinis Matrem divinarum scientiarum pabulis suos enutrire filios.

Frater Hieronymus Asculanus S. T. Doctor; qui per omnes Religionis, & Ecclesiæ gradus, primus ex Minoritis ad Petri sedem ascendit; fuit hoc Sacro in loco Conventualis, sicut ipse jam Pontifex testatus est. Duplici enim Diplomate Custodi, & Fratribus Assisien. directo, utroque incipien. *Eximia devotionis*, uno dato Reate 5. Kal. Octob. anno 1. altero ibidem 7. Id. Aug. anno 2. expressè gloriatur in minoribus se Deo devotas laudes hac in Ecclesia obtulisse. Qui propterea biduo ab ejus creatione eisdem Fratribus bullatis literis scripsit, illam eis notificans, ac pretiosa munera mittens, incipiunt. *Suscepimus nuper, licet immeriti. Datum Lat. 6. Kal. Maii anno 1.*

Magister F. Petrus de Candia, secundus ex Religione summus Petri successor, per aliquot annos S. T. Regentiam obivit in Assisiensi Lyceo. Cujus sententiarum liber, ab eo conscriptus, auditoribus explanatus, & Conventui donatus, adhuc in Bibliot. servatur.

Doctor S. T. Frater Franciscus de Ruvere tertius ex Ordine Min. Christi Vicarius, cum esset Juvenis inter studentes Assisii collocatus, & Laureatus fuit; cujus virtutibus, ac moribus illecti Fratres nativi, in filium S. Conventus elegerunt. Unde in Pontificatu hanc suam domum possessionibus, privilegiis, Indulgentiis, immunitatibus, ac donis ditavit; personaliter ad eam visendam rediit, & ruinæ proximam ingenti pecunia à lapsu præservavit.

Frater Felix Perettus de Montealto extitit Baccalaurus in hoc S. Conventu, ubi in Capitulo Generali theses Theologicas, Cardinali à Carpio Protectori præsentī dicatas publico exposuit certamini; quo expleto ab eodem Purpurato Doctorali Laurea solemniter decoratus; inde gradatim ascendens; Concionator, Procurator Generalis, Vicarius Apostolicus, Episcopus, Cardinalis, ad Apostolatus apicem ascendit, Sixtus V. cujus nominis, & gloriæ fama perpetuò resonabit.

Alios autem omnes, & singulos nominare, qui ex hujus Paradisi cultura, ad excolendam vineam Domini Sabaoth, Sanctam videlicet Ecclesiam, evecti fuerunt, nimis arduum esset opus. Cardinales, Archiepiscopi, Episcopi, Inquisitores quamplurimi in eo prius Divino cultui, orationibus, Sacrarum Scripturarum, ac Theologiæ studiis addicti, sacris illis præ eminentiis se dignos reddiderunt; & prope Corpus illud Sanctissimum, unde fontes ema-



nant vivi, quasi ex fluminis impetu lœtificantis Civitatem Dei, sistentes, Virtutum, ac scientiarum undas ebiberunt.

*Seraphicæ Civitatis Antistites ex Minoritis selecti.*

TITULUS XLI.

**E**piscepos Assienses Franciscanos in diversis Catalogis tam variè recensitos lego, ut nihil certum de illis scribere possem, nisi P. Lucas Vadd. in suis annalibus sparsim referret plures, quorum in regeſto Pontificum bullas, & tempora per extensum affert; quosdam ex manuscripta serie, sibi Assisio transmissa deducit. Ipsiſus ergo, quem magis accuratum video, ordinem ex annis eliciam,

Primus biennio post mortem S. Patris Francisci, idest 1226. asseritur Frater Simon Vereduccius Assisiat. quem ex m. f. refert Vuad. t. 4. addit. ad t. 1. n. 14.

F. Nicolaus Brito Sacellanus, & Confessarius Innocentii IV. ab eo Lugduni anno 1247. electus, & consecratus, ac Assisium missus ad deponendum Fratrem Crescentium de Æſio illegitimè intrusum; ut ostendit Vadd. t. 4. addit. ad t. 1. num. 43. & in regeſto ejusdem additionis, tribus Pontificiis literis, quibus totum, quod evenerat, per Papam narratur. Hinc perperam Crescentius inter Episcopos numeratur, cum fuerit Pseudo Episcopus. Nec unquam, ut dicunt, Custos Sacri Conventus, sed totius Ordinis Generalis Minister post Fratrem Heliam anno 1239. electus, & post tres annos in Capitulo Januæ exauthoratus.

F. Nicolaus Anglicus ab eodem Innocentio IV. anno 1255. electus. Hunc ponit idem Vuad. t. 7. in add. t. 2. ex m. f.

F. Illuminatus de Theate, antea Custos S. Con. à Capitulo Cathedrali electus, anno 1273. & à Gregorio X. sanatis quibusdam electionis defectibus, confirmatus, ut liquet ex Bulla t. 2. ad eundem an. in Reg. Pont.

F. Simon de Assisio, cum esset Custos, & DD. Canonici, tempore eis præſcripto non elegissent, à Martino IV. anno 1281. destinatus, ut ipse Papa narrat in Bulla, posita ab eodem historico t. 2. in reg. ad eundem annum.

F. Theobaldus Offreduccius nobilis Assisien. à Clemente V. creatus an. 1307. refert idem auctor t. 4. add. ad 3. n. 3. & etiam ex nostris m. f. eruitur, quod fuerit aliquando Custos S. C.

F. Benedictus Castellus nobilis Interamn. Custos S. C. electus à Capitulo Cathedralis Ecclesiæ an. 1324. ibidem n. 8. ex m. f.

F. Conradus Cerra Custos, à Capitulo eodem electus an. 1333. & à Jo: XXII. confirmatus, t. 3. ad eum annum n. 14. Vuadd. ponit Diploma.

F. Pastor de Serrascuderio à Benedicto XII. an. 1337. electus, qui post biennium translatus est ad Archiep. Ebredunen. & tandem Cardinalitia dignitate donatus. Liquet ex Bullis add. an. & successivè relatis.



F. Nicolaus Zucii Assisien. Custos, qui à Benedicto XII. in locum Pastoris successus anno 1339. postea etiam Vicarius Pontificius Romæ in spiritualibus, dum Papa Avenione moraretur, est deputatus. Vide Bullas in Vuad. ad annos prædictos.

F. Bertrandus ex Episcopo Adjacensi, ad Assiensem an. 1344. à Clemente VI. translatus, qui postea à Gregorio XI. an. 1371. inter Purpuratos est cooptatus; cujus diplomata refert Vuad. ad eos annos.

F. Jacobus antea Episcopus Fundanus ab Urbano V. an. 1368. ad Assisiam Cathedram destinatus. affert Bullam.

F. Thomas Racani nobilis Amerinus, prius Inquisitor Vallis Spoletanæ, & Custos S. Con. deinde ab Urbano V. an. 1374. ad hunc Episcopatum evehctus.

F. Nicolaus Vannius Assisien. ex Custode ab Innocentio VII. anno 1405. Patriæ Antistes constitutus extitit, ad eundem an.

F. Andreas antea Inquisitor in Provincia S. Francisci, & Custos S. Conv. deinde à Bonifacio IX. anno sal. 1392. Assisien. Præsul electus.

F. Benedictus Nursinus, cum esset Custos, à Capitulo Assisien. electus, ac postulatus fuit an. 1417.

F. Theobaldus Pontus à Martino V. an. 1425. fuerat Custos.

F. Damianus de Bussellis ei successit, eodem Pontifice an. 1429.

F. Carolus Nepis nobilis Assisias, item Custos, an. 1458. A Calixto III. sacris infulis Laureatus.

F. Bartholomæus Vagnotius de Assisio pluries Custos, tandem à Paulo II. an. 1465. ad patriæ thronum evehctus.

F. Andreas Ægidii nobilis Assisien. cum esset Custos à Sixto IV. suæ Civitatis Antistes constitutus est an. 1475.

F. Franciscus Insignia, item Patritius Assisien. cum esset Vice legatus Perusii pro Cardinali Sabellio, ab eodem Sixto IV. anno 1481. Patriæ Præsul constitutus.

Omniū prædictorum suis locis, & annis P. Vuadd. accuratissimè electiones adducit, plurimorum per Bullas, quorundam per relationes.

Fratrem Marcum de Assisio ad Episcopatum Cassanensem anno 1268. à Clemente IV. destinatum, repugnantibus Ordinis superioribus, quia absque eorum licentia dignitatem acceptaverat. At Pontifex omnium supremus, sanatoriam dedit; ut constat ex ejus dipl. *Significavit nobis. Datum Viterbii 12. Kal. Maii, Pont. anno 4.* diffusè ab eodem Vuad. relato t. 2. in Reg. ad an. 1268. Ubi Papa Fratrem Marcum præfatum his verbis commendat. *Nos attendentes multiplicia dona virtutis, & gratiæ, ac laudabilis vite mrita dicti Fratris; sperantes quoque, quòd per ipsius Ministerium Cassanensi Ecclesiæ in spiritualibus, & temporalibus provenient incrementa; mandamus &c.* De hoc insigni viro tantus sufficit testis.

P. Vuadd. tom. 3. an. 1307. n. 12. refert Fratrem Andreutium de Assisio Episcopum, à Clemente V. cum aliis septem Minoritis creatum, & cum eis in Tartariam missum ad instituendas ibi Catholicorum Ecclesias.

Quamvis Pater Seraphicus ob profundam humilitatem pluries dixerit, ac suaserit filiis suis, ne Dignitates Ecclesiasticas appeterent, oblataque acceptarent: tamen ad exaltandam ejus humilitatem disposuit, ac voluit Deus illum, ejusque filios sic honorare, ut quamplures ex eis ad majores, & ad summam sublimarentur. Neque promoti ob id judicandi sanctæ Insuperis voluntati contradixisse, ut quidam indiscreti ab initio arbitrabantur: namque



S. Pater in primis se, suosque Voluntati Divinæ, ac pedibus S. R. Ecclesiæ subjecit. nec Sanctus Bonaventura acceptando Cardinalitiam, nec S. Ludovicus Episcopalem dignitatem, peccavit, non est enim vera humilitas, quæ obedientiam excludit.

*Qui Corpus S. Patris viderint in Paradisi Colle  
reconditum.*

TITULUS XLII.

**O**Mnes eos, qui primis illis annis sacrum, & admirabile funus conspexerunt, referre arduum, & ferè impossibile est. Licet enim non esset omnibus patens locus, & liber accessus; superiores tamen, & fratres inibi conventualiter viventes, ac alij, referentibus fabricæ artificibus, qui operi insudarant, facilè scire poterant: & magni Principes, qui devotionis gratia sanctum locum visitabant, ad illud aspiciendum admittebantur. Ex quibus aliquos principales ex antiquis monumentis hic exprimere intendo.

Vidit Gregorius IX. & cum eo Cardinales, ac selecti Prælati, novennio à S. P. transitu, hoc est anno 1235. ut narravi tit. 16.

Innocentius IV. Qui jam cum esset Cardinalis interfuerat Canonizationi cum eodem Gregorio, & illud palam expositum observaverat, creatus Pontifex, Assisium venit anno 1253. ubi per septem menses moratus, Ecclesiam, & Conventum consecravit, & sacrum corpus pluries visitans, suæ plenè satisfecit devotioni, & suorum familiarium, quos secum admittebat.

Cum Innocentio IV. aderat Cardinalis Ostiensis de Comitibus, qui ei in supremo Præsulatu successit, Alexander IV. qui cum non semel inspexisset corpus illud Divinis jaculis transfixum, ut ipse testari videtur suis literis. *Benigna operatio, &c. Datum Anagninæ 4. Kal. Novemb. anno primo.* eisdem iussit universos fideles in Stigmata S. Francisci indubitanter credere, & impugnatores, quos invidos, temerarios, & sacrilegos pronuntiavit, divinæ subjecit ultioni, imò per Constitutionem, *Quia longum esset, &c. Datum Anagninæ 5. Kal. Aug. Pont. anno 5.* mandavit Archiepiscopis, & Episcopis Castellæ, & Legionis Regnorum, ut quosdam Doctores, & Concionatores, temerè Francisci plagis, scriptis, ac dictis adversantes, ad se retractandos compellerent, alias excommunicationis sententia eos mulctarent. justè siquidem, cum potuerit dicere, *Quæ vidimus, annunciamus vobis.*

Urbanus IV. desiderio flagravat illud videndi, sed morte præventus non potuit, ut supra tit. 29. narratum est.

Clemens IV. anno 1265. sui Pontificatus primo Assisium petiit, ac personaliter videre, ac venerari voluit S. Francisci, & D. Claræ pretiosas exuvias, quorum protectioni S. R. Ecclesiam, & Sedem Apostolicam commendavit, ut ab impij Manfredi furore, & insidiis incolumes servarentur.

Nicolaus IV. ex Ordine Minorum primus, anno 1288. electus, non in Pontificatu, sed dum esset Generalis, & Cardinalis vidit, ut in veteri m. s. lego.



lego. Nec ambigendum est, nam primo illò sæculo superioribus notus erat locus, & non adhuc impermeabilis accessus.

Æcubæ Sueffana Regina Cypri, quæ voti causa ex suo Regno ad Collem hunc sanctum venit circa annum 1240. ad conspiciendum, & adorandum sacrum corpus admissa fuit. Ingentia munera D. Francisco obtulit; in hac Ecclesia sepulta communem resurrectionem expectat.

Nicolaus V. anno 1449. cum esset Assisi, & in sacra Æde moras traheret, videre & ipse voluit S. Corpus, quod pedibus suis stans, ac stigmatizatum, eodem planè modo, ac situ contemplatus est, quo tot alii antea conspexerant. Quidam scriptores narrationem de hac visione referunt, quam sequenti Titulo examinabimus.

Ægidius Carillus Albernotius Hispanus Cardinalis, æterna dignus laude, cum esset Apostolicus Italiæ Legatus, in Sacro Assisiensi Coenobio diù residentiam tenuit, Sancto Francisco arcta devotione addictus; qui vulneratum Redemptoris simulachrum inspicens, tantam erga Divum pietatem, & erga filios ejus dilectionem concepit, ut ibi vivens fabricam lapsui proximam reparari suis sumptibus jufferit, Ecclesiæ ædificium additione elegantissimi Lararii S. Catharinæ sacri compleverit, ac morti proximus præceperit corpus suum illuc deportari: demum pro ædificii complemento quadraginta millia aureorum legaverit.

Sixtus IV. dum Generalatus Ordinis munere fungeretur, advertens facilitatem paulatim invalescentem admittendi Personas gradu sublimes ad tantum thesaurum inspiciendum pluries præceperat Custodibus, ac Fratribus, ne amplius quemquam ad illum introducerent. At fratres, petentium auctoritate pressi, jussui obtemperare vix potuerunt. Unde Petri claves jam tenens, Assisium se contulit anno 1476. & ut Fratres à molestiis eximeret, ac thesaurum tutiorem redderet; viso, ac recognito sacro tumulo, cum sociantibus quibusdam selectis, inter quos adfuit B. Jacobus de Marchia, quid agendum esset, cum eodem deliberavit: dixerat Dei servus, secretum Regis abscondere bonum esse, & magnum illud fidei nostræ argumentum jam satis notum, futuris temporibus reservandum, quando Ecclesiæ Navis inter persecutionum fluctus agitabitur, & ferè ad extinctionem declinabit. Tunc enim Deus, ad firmandam Ecclesiæ fidem, nostræ Redemptionis vulnera, condensa revelabit, & tunc fideles omnes in Templo dicent gloriam. Tanto Papa admonitus Oraculo, & divino inspirante Flamine, jussit cuniculum, seu ambitum, per quem ad Ecclesiam infimam erat accessus, & scalam, per quam erat descensus, denso aggere ex lapidibus, ac coementis compacto repleri: unde moraliter impossibilem reddidit accessum; cum non sine multorum artificum diuturno labore referari possit. Tali interposito insuperabili (ut ita dicam) impedimento, cessavit spes eò perveniendi, & paulatim evanuit memoria ingressus. Licet enim, ut fama est, semper sit aliquis Religiosus, qui sub sigillo usque ad mortem id sciat, non tamen datum est ei illuc penetrare: Tentarunt aliqui, pietate, vel pia curiositate ducti, ex locis abditis sibi viam aperire; at citò ingentia saxa, & durissimos scopulos, quibus collis abundat, invenientes, delusi ab incepto opere destiterunt, & ne detecti afficerentur injuria, illicò fugæ sese dederunt. Situs tentati sunt mihi noti; personas scio; eas nominare non licet. Hinc non possum non irridere quorundam fabulas, dictis, & scriptis promulgantium S. Corporis visiones ab aliis obtentas post prædictum annum 1476. cum ad aperiendum ac-



cessum plurium dierum requireretur patens, & ingens labor. Unde tota commoveretur Civitas, & Fratres omni vi obstarent, timentes thesaurum rapi, vel saltem minui.

*Relationes veræ ab apocryphis secernuntur.*

## TITULUS XLIII.

**H**OC nostro sæculo decimosæptimo quædam in lucem datæ apparuerunt attestations de visione corporis S. P. Francisci, quas, ad veritatem purè habendam, liceat examinare.

Primam lego in Chronicis à P. Marco Ulyssipon, conscriptis an. 1559. ab Horatio Diola ad Italicum idioma translatis anno 1582. & Venetiis impressis anno 1606. quam affert part. i. l. 2. c. ult. pag. mihi 282. asseritque missam à Domino Blaso Adriæ Duce ad magnum militiæ Præfectum Generalem Hernandez Cordubensem; in qua à Jacobo Abbate, qui postea fuit Episcopus Ariani, narratur, quomodo Nicolaus Papa V. visitavit, & vidit Corpus S. Francisci stans, incorruptum, sanguifluis adhuc plagis insignitum, & fragrantiam diffundens: à latere verò ejusdem Sacelli monumentum, æneo clausum opertorio, in quo corpora quorundam sociorum S. P. quiescunt; Abbas verò à Cardinali Astorgio hæc audierat in extremis vitæ constituto, qui fuerat ab eodem Pontifice ad præfata omnia conspicienda vocatus. Hæc omnia verissima sunt, conformia antiquis monumentis, & relationibus aliorum, qui digni fuerunt hæc mirabilia conspiciere. Corpora verò, quæ sunt in illo Sarcophago non sunt primorum, sed aliorum quorundam discipulorum.

At Pater Lucas Vuadd. qui suos annales luci dedit an. 1625. t. i. ad an. 1250. n. 4. nimis variam, & alteratam eandem refert: variam quidem in personis relatis, quod parum esset; sed falsam, & alteratam in his, quæ non satis fideliter ei fuerunt suggesta: Addit enim, quòd coram corpore S. Patris Francisci sit aliud corpus in genua flexum, habitu Ordinis Prædicatorum indutum: quòd corpora Sociorum videantur in tribunis hinc, & inde juxta ordinem eorum disposita; eò quòd corpus B. Agidii stet ante januam loci. Beati autem hujus ossa sepulta sunt Perusii, ut diximus. Primorum verò Sociorum in Sacellis B. Virginis, & Reliquiarum, aliorum tamen, quæ propè corpus S. Patris jacent, clausa in monumento, non sub tribunis hinc, & inde disposita. Quod verò adjungitur de Corpore Sancti viri Ordinis Prædicatorum, cujus etiam fronti verbosi quidam stellam affigunt, falsum adinventum omninò judicandum est. Nam ut mihi adhuc juveni ab hinc 40. annis retulit Pater meus Magister tunc octogenarius, vir doctus, & fide dignus; cum primò in lucem prodiret prædicta enarratio, licet Idiotæ, & simplices, etiam ex nostris applaudere viderentur, seniores tamen eam irridebant, quin palam asseriebant, hoc extitisse alicujus malevoli artificiosum adinventum, ad suscitanda inter dignissimos PP. Dominicanos, & nos Conventuales Franciscanos dissidia. Unde paulo post, nostris instantibus, ob inauditam fabulam, Sedes Apostolica sub excommunicationis pœna, ne id asse-



assereretur, prohibuit. Corpus D. Dominici Bononiæ, ubi obiit, statim sepultum, & post Sanctissimi Patris Canonizationem, ad Altare ei dicatum, translatum, ac in elegantissima reconditum arca fuit. Ibi à fidelibus venerabiliter adoratur; nec Deus suppositam istam translationem alicui revelavit; sicut veram corporis S. Catharinæ V. & M. per Sanctos Angelos ad Montem Sinai pluribus iustis, imò & toti Ecclesiæ notificavit. Nec ipse, qui Veritas est, potest fideles suos decipere, si adorantibus corpus, quod sciunt ibi servatum fuisse, Deus illud clam sustulisset, & nemini indicasset. Narratio ergo præfata tot falsis aspersa, salvis veris, parvifacienda erit.

Aliam attestationem, nomine Galeotti de Galeottis de Bistochio exaratam, refert P. Vuadd. ibidem num. 5. quam dicit sibi transmissam ex Archivio S. Mariæ Angelorum, apud Assisium. In ea introducitur Galeottus quidam enarrans filio suo, se anno 1509. vidisse S. P. Francisci corpus, ducentibus, & comitantibus P. Custode Julio de Licio, & Fratre Justino de Collestatto Sacrista, à quibus, addit, multo nummo, suis votis cooperante Sancto Patre, consensum extorsisse. At certo certius hæc quoque fabula est, vel satyra, vel utrumque. Nam corpora istorum trium gloriosis dotibus prædita non erant, ut possent penetrare impenetrabile obstaculum. Custos sine Fratrum nativorum consilio, & assensu nil poterat attentare, ni voluisset justum ipsorum, & Civium, ab ipsis in hoc casu justè excitatorum experiri furorem: præcipuè cum esset advena, puta Apulienfis, & Sacrista, ut asseritur, extraneus; de quibus nativi piè suspicantes, in hac re summam diligentiam adhibuissent, ne illorum libertati datum esset, tantum thesaurum vel in totum, vel in partem furari, & ad proprias regiones transferre. Licet enim zelo suspicionem habere de eo, quod à pietate alterius attentari posset. Tandem impium est, asserere Religiosos Sacerdotes pretio corrumpi passos esse; & prorsus temerarium, ac iniquum addere Sanctum Patrem cooperatum fuisse sacrilegis illis tribus, qui pecunia emere, ac vendere sui visionem tentavissent. Cum primò hanc enarrationem legi in Vuadd. rogavi Patrem Franciscum de Abastia Min. Observ. tunc Portiunculæ dignissimum Guardianum, virum insignem, versatum, & ingenuum, mihi magna amicitia conjunctum, an verum esset ex Archivio illius Conventus Patri Vuaddingo transmissam fuisse attestationem præfatam? statim respondit: valde miror, nam nihil hic habemus, & nihil scio de hac re. Post aliquot annos idem quæsi à P. Antonio de Abastia Lectore Jubilato, illius Cœnobii actuali Guardiano, Religioso integerrimo, studioso, ac sincero; qui & stupens dixit; Amice certè suspicor historicum fuisse deceptum, sed fuisse artificiosam hanc relationem ex tempore mihi suadeo: nam anno, in quo supponitur data, Minoritica Conventualitas tot angustiis, adversitatibus, ac persecutionibus angebatur; ut nisi Patri ejus Francisco suum sibi complacuisse servare gregem, ad nihilum redacta fuisset; nec fuit impossibile, ab aliquo ex adversariis, ad eam diffamandam, quasi Visionem Corporis S. Patris venalem exponeret, hanc fabulam ipsis injuriam, & S. Patri blasphemam, compactam fuisse.

Pro futuris autem temporibus magis cavendam moneo attestationem quamdam, clam inter simplices divulgatam, & paulatim palam divulgandam, cujus exemplar vidi manuscriptum, & audiavi jam impressum extra Italiam fuisse. Afferitur, quod anno 1649. die 3. Octobris, 2. noctis hora, de licentia Papæ Innocentii X. Duo Cardinales, duo Generales Conventuales, actualis videlicet, & prædecessor, & duo Fratres Capuccini, descende-



ruunt ad Corpus S. P. Francisci videndum, quod invenenerunt in pedes erectum, super acumen Porphyretici Cordis eleganter insculpti, integrum, incorruptum, plagatum, habitu, caputio acuminato, sursum erecto, & unito cum eo, indutum. Vidique geographicam delineationem, attestationi prædictæ annexam, & omnia prædicta clarè representantem. Laus Deo. Quam concinnè hoc mendacium compactum est? Eo anno ego eram in Sacro Conventu Novitius. Die 3. Octobris S. P. Francisci vigilia ad festum venerunt DD. Cardinales Angelus Rapacciolus, & Cæsar Facchenettus, eisque obsequens Generalis Minister M. Angelus Catalanus, aderat quoque Exgeneralis Jo: Baptista Berardicellus. Media nocte inter vigiliam, & festum D. Cardinalis Rapacciolus Missam in Pontificali cum omni pompâ cantavit; sicut manè post Tertiam D. Cardinalis Facchenettus: quod etiam aliis annis de licentia Summi Pontificis egerunt piissimi Purpurati. Totum hoc verum est, ipse vidi. At quòd viderint Sanctum Corpus, sicut impossibile, sic ridiculum est. Nam pluribus noctibus ante festum Sacristæ, ac Ministri in Ecclesiâ vigilant, ac laborant, ornando Altaria, disponendo per medium Templi, & per totum in circuitu lampades, ad illuminandam noctem illam solemnem, quæ tota ferè consumitur in decantandis Matutino, ac Missa, adstante innumerabili populo; præcipuè si Pontificalia agenda sint, eadem nocte parari debent Presbyterium, Baldachinum, Abacus, Vasa Argentea, & Sacra pretiosiora indumenta. Unde humano captui incredibile videtur, personas adeò insignes tam arduum opus attentasse; nisi asseratur, quòd invisibiliter, & insensibiliter eò se transtulerint. Dicat quæso hujus fabulæ inventor: Quinam artifices illam magnam congeriem amoverunt, quæ ambitum replet? Quò detulerunt? Quot dies, & noctes insumpserunt? An fuit Angelus, qui lapidem tam grandem, imò tot saxa revoluit? An Cardinales, an Generales amoverunt ab ostio monumenti? Quorsum accesserunt? Tantum à veritate abest, quòd Innocentius X. licentiam hanc dederit, ut eodem anno nomine magnæ, ac pii simæ Principis de hac re rogatus, negaverit, dicens. Tunc videndum fore S. Francisci corpus, quando Deus iterum illud manifestare dignabitur. Quomodo sciunt Generales remotarum nationum accessum illum inaccessibilem? An dum eliguntur Generales, coelitus infunditur eis hæc notitia? Nonne ridiculum est, asserere Generalem Catalanum Patribus Capuccinis tam invisum, propter librum de forma indumenti S. P. Francisci, eos ad illius intuitum admisisse? Si locum sciebat, ut fabulator supponit, tam faciliter accessibilem, jam pluries antea vidisset; si acumen illud super caput vidisset, vel abstulisset, vel sibi contradicentibus observare non permisisset. Quando, à quo Cor illud in Porphyride sculptum sub pedibus Sacræ Sarcinæ fuit locatum?

Cum hanc fabellam prima vice perlegi, objerat jam D. Cardinalis Rapacciolus, vivebat adhuc Facchenettus Spoleti Episcopus, & Sacri Collegii Decanus. Quadam die anni 1680. dum Lectiones Sacræ Scripturæ exercerem in ejus Cathedrali, ab ejus benignitate ad familiaria colloquia admissus, omnia, quæ legeram, supradicta illi retuli. Qui ira candens, Quis (inquit) tam audaciter hæc mendacia protulit? aliaque in suspectos exaggeravit. Jam cum iratum vidissem, rogavi, ut dignaretur hæc futilia irridere, nam mendacia suis se implicant laqueis, ac tandem semper triumphat Veritas. Tunc pacatè subdidit. O Utinam dignus essem videre!



Hæc mea confutatio ad manus fabulantium istorum certò perveniet, qui cum viderint se detectos, forsàn circumstantias, & Personas Comediæ, variabunt. Præscientiæ clypeo muniti, cauti sumus, neque omni spiritui credamus: multoties enim fabulæ per has semitas penè transeunt in historias; & nugæ per aures simplicium transeunt, eorum cordibus tam tenaciter inscuntur, ut non sine labore avelli deinceps possint.

*Sedes Apostolica prohibet accessum.*

TITULUS XLIV.

**P**ostquam Sixtus IV. in Colle Paradisi reconditum vidit thesaurum, & Beati Jacobi consilio, ac divino instinctu ulterius videri prohibuit; Successores ejus eodem ducti motivo, in eodem perstiterè proposito, & sub censurarum pœnis innovarunt. In mente quidem habuit piissimus Pontifex Pius V. sacrum illud Corpus oculis contemplari, ideoque, (ut refert noster Rodulfus, qui tunc Ordinis Secretarius erat) Ministro Generali Joanni Pico Papa suam patefecit intentionem; cumque Generalia difficultatem, & ignorantiam loci evacuandi, ex quo pateret accessus, proposuisset; jussit Beatus Pius, pluribus ex locis aperiendum, ut reperiretur via, quâ sibi admonito, & opportunè accedenti, daretur ingressus, unde ad hoc Ministros Assisium misit; Qui diebus, noctibusque suffodientes, universaque loca tentantes, superna vi lassati, ab opere destiterunt. Cujus rei monitus B. Præsul, Dei voluntatem agnoscens, & ipse sub pœna excommunicationis ulteriorem prohibuit perquisitionem: inspiravit enim ei Deus, tam evidens fidei nostræ argumentum, in majori ejusdem fidei periculo esse revelandum.

Tempore Pauli V. quidam Excelsus Princeps Superiores Ordinis admonuit se Assisium aditurum, efficaci desiderio ductum, conspiciendi S. Francisci corpus. Illi insuperabiles difficultates, & Pontificias prohibitiones objecerunt. Sed cum fama postea divulgaret Dominum illum devotionis prætextu, magna comitante caterva adventurum; Fratres D. Cardinali Protectori Alfonso Vicecomiti omnia detulerunt; timebant enim violentiam aliquam sibi ipsis inferendam. Cardinalis totum Summo Pontifici significavit, à quo mandatum accepit, intimandi Fratribus Decretum, quod adhuc in Sacristia expositum, patenter legitur, cujus hic pono exemplar.

*Alfonso Miser. Divina tit. S. Sixti S. R. E. Cardinalis  
V. Comes Ordinis Minorum Conv. Protector, &c.*

**E**X Ordine, & Mandato Sanctissimi P. N. Pauli Papæ V. nobis facto, omnibus, & singulis, cujuscunque gradus, conditionis, & præminentiae existant, districte interdiciamus, & prohibemus, sub pœna excommunicationis latæ sententiæ, & ipso facto incurrendæ, ne in futurum



audeant, & præsumant sub quovis prætextu, aut quovis colore, in Ecclesiis, & Monasterio B. Francisci Civitatis Assisi Ordinis Minorum Conventualium perquirere, seu aliquam diligentiam quovis modo facere, pro inveniendo corpore, & loco, ubi requiescit Corpus Gloriosissimi P. S. Francisci; quam excommunicationis pœnam incurrant Fratres ejusdem Conventus, tam si hoc attentare præsumpserint, quàm si aliis auxilium, aut favorem quomodolibet præstiterint, vel contra hanc prohibitionem Apostolicam aliquid tentantibus omnibus viribus non restiterint. Hoc verò nostrum decretum mandamus Custodi ejusdem Conventus, quamprimùm publicari curet Fratribus, in loco, ac more solito, ac registrari in Archivio, & copiam autenticam retineri semper affixam in tabella lignea conspicuè in Sacristia ejusdem Ecclesiæ. Datum Maceratæ die 28. Mensis Augusti 1607.

A. Cardinalis Vice-comes.

Locus ✕ Sigilli.

Jacobus Allegrettus Secr.

S. Petri locum tenente Innocentio X. Anno 1648. Maria à Sabaudia Regia, ac Ducali stirpe Infans, S. P. Francisci Tertii Ordinis Professa, dum Assisi moraretur, Seraphici Institutoris obsequiis tota incumbens, ardenti flagrans desiderio sanctum illius Corpus inspiciendi, misit ad Summum Pontificem pro petenda, & obtinenda licentia, ut suam devotionem hac in re explere posset. Sed Summus Rector respondit, Corpus S. Francisci revelandum, cum divinæ providentiæ placuerit; nec esse tentandum Deum, ut nostræ fidei mysteria fiant evidentiæ: Interim Dominam suo nomine monendam, oculis potius mentis, ac fidei intuitu suum Sanctum Patrem, ac Protectorem venerari, quò majus meritum cumularet. Hæc omnia mihi retulit P. M. Michael Angelus Catalanus Exgeneralis anno 1666. cum jam esset Episcopus Iterniæ: ex cujus narratione cognovi, ipsum missum fuisse à Domina mediatorem, & imploratorem ad Summum Pontificem. Hinc facile intelligi datur, quàm distet à veritate, eundem Papam aliis dedisse facultatem, quam dignissimæ Domine denegaverat.

*Insignium Personarum corpora in Colle Paradisi  
quiescunt.*

## TITULUS XLV.

**P**ropè Seraphicum Patriarcham Principes quamplures tumulari voluerunt, ut cum illo resurgentes, Advocatum experirentur apud supremum Judicem.

Martinus Papa IV. Perusii morti proximus Cardinali Sabellio, qui in suprema dignitate ei successit, commisit, ut corpus suum Assisum deferretur, & in



& in Ecclesia S. Francisci Minoritico habitu indutum sepeliretur. Idem Cardinalis, Pontifex creatus Honorius IV. exequutioni mandari jussit; at Cives Perusini propter multa miracula, & gratias, quæ obtinebant ab eodem S. Pontifice, non acquieverunt. Vide literas Apostolicas ejusdem Honorii. *Vestram non credimus, &c. & sincera illa, &c.* suo loco.

Joannes Brennus Rex Jerusalem, & Imperator Constantinopolitanus, circa annum 1235. post aliquot regiminis annos, rogabat Deum, ut ipsi certam suæ ostenderet animæ salutis viam: ter cælitus admonitus, quod si salvari cuperet, relictis mundi dignitatibus, Franciscanos indueret cineres, & Ordinem Minorum ingrederetur: resignatis coronis Balduino ejus genero, Religionem ingressus, ac in ea piè aliquandiu moratus, in Domino obiit, cujus Corpus Assisium, ut desideraverat, translatus, jussu Innocentii IV. ibi commorantis anno 1253. sub Ambone marmoreo honorificè conditum fuit.

Æcubea Regina Cypri ex voto Assisium venit, ut advocatum suum S.P. Franciscum visitaret, cumque ad proprium Regnum rediret; Anconæ gravi morbo laborans, jussit corpus suum in Ecclesia ejusdem Sancti Assisi tumulari; quò statim post mortem delatum, in excelso mausoleo, ex albo lapide, thalamum Regium representante, cum duobus Angelis, cortinas hinc, & inde dilatantibus, & Reginæ simulachrum ostendentibus, conditum fuit. Super lecti laqueare cernitur Statua B. Virginis, brachiis divinum puerum gestantis; & coram ea paulò inferius simulachrum Reginæ super leonem sedentis. Sub thalamo cernebantur parvæ sanctorum duodecim Apostolorum statuae, quæ temporis injuria nunc fractæ visuntur: inter quas sculpta sunt Reginæ, vel Regni insignia in stemmate quadripartita, & in qualibet parte Crux major in medio circuli, cum quatuor minoribus, supra, & infra dispositis. Undique tota moles elegantibus cingitur ornamentis: dicunt opus fuisse Fucci Florentini Architecti, & sculptoris suo tempore celeberrimi. Nostra m. s. referunt Reginam prædictam obijisse circa annum 1240. & maximam pecuniæ summam fabricæ complendæ legasse, pro cujus Anima quotannis, gratitudinis causa, celebrantur funeralia cum omnibus missis.

In Sacratio S. Antonii Abbatis Ducibus Spoleti erecto, & Ecclesiæ addito, extra cornu Epistolæ in pariete jacent corpora Dominorum Blaschi Patris, & Graciæ filii; quorum simulachra marmorea in eleganti Arca conspiciuntur. Eorum fata refert ibi sculptum hoc Epitaphium.

*Magnanimus miles, Prudens, pius,  
Egregiusquæ, cultor Justitiæ, servator honesti,  
Blaschus Fernandi, pacis compertor amata,  
Hispanus natus, morum venustate præclarus.  
Anconitanæ Marchio Marchiæ tempore multo,  
Rector Bononiæ, Dux Spoletanus haberis.*

Et paulo infra sic legitur.

*Inclitus iste Senator, belli maximus auctor,  
Proditus hic Burgo luci, mactatus ibidem,  
Et genitus Gracias, acerba morte peremptus.  
Hicque jacent ambo genitor, genitusque vocati,  
Quos Deus Elisis præponat sedibus almis.*

In cornu Evangelii juxta idem Altare consimile elegans monumentum cernitur, quò condita sunt ossa quorundam Baronum, & Ductorum insignium militum, ejusdem Fernandi stirpis, & Cardinalis Ægidii Albenotii agnatorum.



In plano Sacelli Sacrarum Reliquiarum, intra Conclave, humata requiescit Sereniss. Maria à Sabaudia, cujus Epitaphium ab Alexandro VII. compositum, tantæ Heroinæ virtutes planè singulares amplectitur.

*Maria Caroli Emmanuelis Sabaudia Ducis,  
Et Catherina Hispania Infantis filia.*

*S. Francisci Tertium Ordinem veste, moribus, virtutibus professa.  
Vite asperitate, continentia, convertendi Hæreticos studio,  
Sacris peregrinationibus, alendis pauperibus, Templis ornandis  
Magnam sanctimoniam famam consecuta, obiit Roma.*

*A. D. 1656. ætatis 62. Atque hic, ubi sepulchri locum sibi delegit,  
Sepulta est.*

Lapidem sepulchralem, totumque Capellæ planum hinc, & inde amplectuntur insignia Sabaudia Ducum, variis, pretiosisque lapillis affabrè intertexta; sub quibus montes, & superius Stella, quæ sunt Domus Chisæ stemmata. Hæc ex Devotione erga Dei famulam, ipse Papa apponi mandavit. Totam molem pavementum adoperit, ne pedibus conteratur. Pro anima ejusdem Infantis prima Missa in majori Altari, sub quo stat gloriosissimi S. P. Corpus, quotidie celebratur.

In Capella S. Martino sacra, sub laterali muro ad dexteram Altaris reconditur Cadaver Domini Sigismundi Caroli Ducis Radzivil Poloni, qui visitandi gratia sacra Italiæ loca, cum Assisium venisset, & sua sancto Patri obsequia præstitisset, febre correptus, eo in loco, ut disposuerat, sepultus est anno 1638. Adhuc servantur in fericis, auro impressa ejus insignia cum Epigraphe.

*Sigismundus Carolus Radzivil,  
Dux in Oliva, & Miesvicsz,  
S. Romani Imperii Princeps,  
Comes in Mir, & Midlowviec,  
Palatinus Novogradensis,  
Eques Militenfis, Commendator Pofnaniensis,  
Stolevicensis, & Pocieiki.*

Ægidius Carillus Cardinalis Albernotius Hispanus Archiepiscopus Toletanus, Apostolicæ sedis, Avenione commorantis, in tota Italia Legatus, suam residentiam ut plurimum in sacro Collis Paradisi Conventu tenuit, qui amplissimis muneribus ad complementum, & munimentum fabricæ opitulatus est: extant propterea in altiori muro ejus insignia: moriturus anno 1367. iussit suum corpus in Iarario S. Catherinæ V. & M. quod ipse in ejusdem Collis Basilica à fundamentis sumptuosè erexerat, deponi, usque dum Toletum ad suam Cathedralem transferretur. fuerunt quidem ossa ejus illuc delata, sed partes tenuiores in priori loculo remanserunt. Pro cujus anima quotannis prima die Septembris solemnes celebrantur exequiæ.

In Sacello S. Ludovici à Cardinali F. Gentili de Monteflorum Minorita erecto, ac in pariete post Altare ab eo avulsum, ejusdem Corpus in Domino requiescit. A Bonifacio VIII. ea dignitate donatus fuerat anno 1298. Qui Avenione moriturus 1312. præcepit Assisium suum deferri cadaver, & ibi tumulari. Effigies ejus, & insignia in vitreis fenestrarum valvis depicta cernuntur.

Franciscus Urfinus Diaconus Cardinalis S. Lucie in Silice, à Bonifacio VIII. creatus anno 1294. Sancto Patri, cujus nomine gloriabatur, verè devotus, ex Gallia in Italiam rediens anno 1312. in itinere obiit, cum iussisset in



hac Basilica sepeliri. Ejus effigies, alba, & Dalmatica induti, capite mitram gerentis, junctis manibus, ac genuflexi, inspicitur in laterali muro sacelli S. Mariæ Magdalenæ, unde creditur sub eodem pariete tumulatus.

Neapolio Ursinus Cardinalis Diaconus Sancti Adriani, à Nicolao IV. anno 1288. purpura insignitus, Umbriæ, & aliarum Provinciarum Legatus, qui sexaginta ferè annis in ea dignitate vixit, insignem Capellam S. Martino Episcopo sacram in hac Ecclesia erexit. Avenione, ubi anno 1347. decessit, ut præceperat, translatus in sarcophago post Altare (ab eo tamen distante) conditus fuit.

Joannes Jordanus Ursinus Romanus Princeps, ejusdem Neapolionis germanus, sepultus quiescit in Sacello S. Jo: Baptistæ prope Sacristiam ab ipso à fundamentis erecto. Ferunt ibidem cum eo tumulatum Thomam Ursinum ManupPELLI Comitem, ejusdem Joannis consobrinum, qui sacrum B. V. Velum nostræ obtulerat Basilicæ. De prædicto Jo: Jordano in antiquo m. s. reperiò, quod propè Altare S. Jo: Baptistæ, ubi requiescit, exposita fuerit in charta membranæ devota hæc expressio.

*Rogo te Beatissime Franciscè gloriose, ut gratia sanctissimorum  
meritorum tuorum sit mediatrix apud clementissimum Crucifixum  
pro me indigno servo tuo devotissimo Joanne Jordano Ursino,  
ut merear juxta suam voluntatem vivere, & pro sua sancta  
fide Catholica vitam finire sibi acceptam, ad laudem, & gloriam  
nominis sui sanctissimi. Amen.*

In calce ejusdem supplicationis delineatum extabat stemma nobilissimæ Ursinorum familiæ, & hinc inde legebatur inscriptio.

*Joannes Jordanus Ursinus de Aragonæa,  
Christianissimi Regis Ordinis S. Michaelis Eques.*

Quod totum temporis injuria consumptum evanuit: sed renovari debuerat: cò vel maxime quòd pius Princeps inter vivendum eam apposuerit. Et quidem nobilissima Ursinorum progenies, exemplo Nicolai III. ex ea assumpti, eximie devota semper S. Patri, ac ejus Ecclesiæ mirè benefica fuit. cujus stemmata multiplicia intus, & foris conspiciuntur.

Guido Montis Feltrii, Urbini Comes, ac Princeps, ob militarem potentiam celeberrimus; qui summis Pontificibus, & eorum militiæ infestus, diù terrorem incusserat; Tandem malè parratorum poenitens, humiliatus ad pedes Bonifacii VIII. se projecit, veniam petiit, ac obtinuit anno 1296. Inde Principatu renuntiato, Ordinis Minorum Religionem ingressus, & Anconæ in Ecclesia S. Francisci à Ministro Provinciali indutus fuit. In ordine piè, ac humiliter vixit, errata lachrymis, ac jejuniis diluens, & (quicquid in eum mordax Dantes licentia poetica cecinerit) religiosissime in Sacra Assisiensi domo obiit, ac in ea tumulatus; Id etiam contestantur historici, qui eo tempore vivebant, Marianus, & Jacobus.

In plano Lararii S. Bonaventuræ, coram Altare amplum monumentum erectum est, lateribus opertum, in quo condita sunt ossa quamplurium, & ferè omnium Episcoporum Assisiensium, ex Ordine Minorum.

In propileo propè thalamum, seu mausoleum Reginæ Cypri ad levam humanantur ossa Fratris Caroli de Nepis, Assisiatis Episcopi, ut indicant stemmata nobilis hujusce familiæ, in parte exteriori apparentia.

In plano Sacelli S. Antonii Patavini, ante Aram quiescunt Cineres D. Teocrimi Teocrimii Lucensis Patriarchæ Hierosolymitani, & Assisiatis Antistitis, cujus insignia in lapide Sepulchrali seu pta cum hac inscriptione cernuntur.



D. O. M.

*Tecrimo Tecrimio nobili Lucensē**Episcopo Assiati, Patriarchæ Hierosolymitano.**Viro ut præsentis humanitatis, ita candoris antiqui,**At Prudentiæ omnium temporum.**Quem Urbanus Octavus P. M. privato quondam sibi charum,**Post Princeps, multis aulæ muneribus adlectum,**Et cum laude, ac fide perfunctum;**Ubique benevolentia, ac judicio suo dignum invenit.**Obiit an. sal. 1632. ætatis suæ 73.**Joannes Tecrimius fratris filius**Patruo optimo, ac benemerentissimo p.*

Post Altare Sancti Valentini in terra cernitur Sepulchrum, in cujus lapide delineata est effigies Religiosi Minoritæ, cum inscriptione.

*Hic jacet Hugo de Hergilopo Anglus, Magister S. T. quondam Minister Anglia.*

*Obiit 3. Id. Sept. A. D. 1302: Orate Deum pro anima ejus.*

In ampla planitie ante Altare Conceptionis purissimæ Virginis multa sepulchra, in quibus quamplurium insigniorum Fratrum Minorum ossa requiescunt, ac in marmoreis opertoriis eorum effigies delineatæ, & nomina sculpta exprimuntur, ac dignitates.

In primo prope Capellam S. Nicolai absque effigie legitur. Hic jacet Ven. Religiosus F. Franciscus Macharelli de Assisio, qui fuit Minister Provincialis Provinciæ S. Francisci, cujus corpus Pisis depositum, & Assisium honorificè portatum. Anno Domini 1347.

In aliis sunt etiam conditorum Imagines. videlicet. Hic requiescit P. F. Andreas de Galiano Minister Provinciæ S. Francisci, qui obiit anno 1350. die 3. Decembris.

Sepul. Ven. P. F. Joannis de Spello in S. Theolog. Magistri, & lectoris sacri Conventus Assisii Anno D. 1362.

Hic jacet F. Angelus de Assisio S. T. Magister, & Inquisitor hæreticæ pravitatis Anno D. 1362. die 1. Februarii.

Sepulc. Ven. Fratris Joannis de Assisio, qui fuit bis Minister Provinciæ B. Francisci. Obiit Anno D. 1362. die 7. Aprilis.

Sep. F. P. Fulginensis S. T. Magistri Terræ Sanctæ, Romanicæ, & S. Francisci Provinciarum Ministri. Obiit A. D. 1461.

Sep. F. Bartholomæi Perusien. S. T. Magistri, Provinciæ S. Francisci Ministri, qui obiit A. D. 1491. die verò 13. Augusti.

Ferunt in eisdem monumentis sepulta esse corpora quamplurium insigniorum ex PP. S. Conventus Magistris, Inquisitoribus, & celeberrimis Concionatoribus, ac Custodibus. Colligitur Viros præclaros etiam in primis Ordinis sæculis à nostris senioribus honore affectos fuisse, & Magisterii, Doctoratus, ac Inquisitoriatus gradus, qui in solis Minoribus Conventualibus perdurant, semper viguisse.



*Sacrorum Stigmatum veritas ab Apostolica Sede  
comprobatur.*

TITULUS XLVI.

**V**Ita functo, & jam Sanctorum fastis adscripto Seraphico Institutore; cum jam fama per universum Christianum Orbem ejus Corpori divinitus impressa vulnera buccinaret, & per Ecclesiastum ora divulgaret: nonnulli docti Viri, sæculi sapientia inflati, qui mundana scientes, divina ignorare solent, hujusmodi veritati dictis, scriptis, argumentis, & concionibus contradicebant, animosè palam asserentes Hæreticos esse id promulgantes, ac deceptos simplices, id credentes. At Apostolica Sedes, quæ cathedra Sanctæ fidei extat, & ab ea edocti summi, & irrefragabiles Magistri eorum superbiam dejicere, audaciam frangere, & fideles in confessione tanti mysterii confirmare sategerunt.

Gregorius namque I. X. anno 1237. sequens dedit diploma, cujus authenticum exemplar in Archivio Paradisi Collis extat, lectu dignissimum.

Gregorius Episcopus Servus servorum Dei.

*Universis Christi fidelibus præsentis literas inspecturis.  
Sal. & Apost. Benedic.*

**C**onfessor Domini gloriosus B. Franciscus, qualis vitæ meritis processerit ad patriam perpetuæ claritatis, explicare literis arbitramur fore superfluum, cum id ferè pervenerit ad fidelium notitiam singulorum. Veruntamen grande, ac singulare miraculum, quo ipsum Sanctorum splendor, & gloria, Dominus Jesus Christus mirabiliter decoravit, universitati vestræ, tenore præsentium, non indignè duximus exprimendum: videlicet, quòd idem Sanctus, cum adhuc spatium præsentis vitæ percurreret, & postquam illud feliciter consumavit, manibus, latere, ac pedibus specie Stigmatum extitit insignitus. Quo ad nostram, & fratrum nostrorum deducto notitiam, & cum cæteris ejus miraculis per testes fide dignissimos probato solemniter, ex ipso specialem causam habuimus, quòd Confessorem eundem, de dictorum Fratrum, & omnium Prælatorum consilio, qui tunc apud Sedem Apostolicam existebant, Sanctorum Catalogo duximus adscribendam. Igitur cum id ab universis fidelibus credi firmiter cupiamus; devotionem



vestram rogamus, & hortamur in Domino J. C. in remissionem vobis peccaminum injungendo, quatenus ab assertione contrarii aures de cætero penitus avertentes, Confessorem eundem pia vobis reddatis veneratione propitium: ut ejus meritis, & precibus & in præsentia à Domino prosperitatis gaudium, & in futuro felicitatis æternæ percepisse solatium exultetis.

Datum Viterbii, nonis Aprilis, Pont. nostri anno XI.

At quia in Moravia Episcopus Olomucensis mordicus impugnabat hanc veritatem, & suis literis promulgari jusserat superstitiosum, & falsum esse dicere S. Franciscum Stigmata Christi in suo Corpore habuisse; Pontifex ipse illi gravissimis objurgavit literis, quas ex Archivio prædicto affero.

Gregorius Episcopus Ser. Servorum Dei.

*Ad perpetuam rei memoriam Ven. Fratri, Episcopo  
Olomucensi. Sal. & Ap. Ben.*

**U**Sque ad terminos orbis terræ præsumptionis tuæ signa protendens, patentes literas exhibendas universis Christi fidelibus, cuidam, ad sobrietatem spernenti sapere, ac damnabiliter dedito blasphemii, manu lubrica concessisti; quas inter aliqua pietati conformia, & quædam obnoxia puritati continere percepimus; quòd (cum solus Patris æterni Filius fuerit pro humana salute Crucifixus; & ipsius dumtaxat Vulnera devotione supplici adorare debeat religio Christiana) nec Beatus Franciscus, nec Sanctorum aliquis cum Stigmatibus sit in Ecclesia Dei depingendus; & quòd peccat contrarium asserens, nec illi tamquam inimico fidei, credulitas adhiberi ulla debeat. Super quo non modicum admirantes, quæ sit causa suasionis hujus, non indignè providimus perscrutari; ut si fortè bona sit (quòd impossibile creditur) commendabilis habeatur, quòd si non, in oblivione detur; & tu inductus spiritu pœnitudinis, ad suggerendum salutare contrarium promptus, & facilis habearis. Etenim super his ex eo sumpsisti forsitan argumentum, quòd sit indecens in subditis, ut planta sibi prætendat insignia capitis. Ad hæc quidem providentes; etsi non multa, quæ possumus, tamen breviter quædam, perspicuè præsidium rationis habentia, respondemus, videlicet, quòd Dei sapientia, quæ de limo terræ similem sibi formans hominem, similem illi fieri per Incarnationis Mysterium, ut ipsum à morte redimeret, non contempsit; dilectum sibi B. Franciscum suorum specie Stigmatum decoravit. Quæ temeritas? quòd peccatum? si tam singulare privilegium, ad indulgentis gloriam, picturæ testificatione pateat oculis devotorum? nonnè, ut fileamus de aliis, Princeps Apostolorum eximius, licèt positione dissimili, quandoque pingitur Crucifixus? sed dicis intrepidus: cum præteriri nequiverit, quòd de Cruce Petro veritas indicaverat, neque improprie suspensus in Cruce dicitur, neque incongruè tali damnatus supplicio figuratur: sed de Francisci Cruce, vel Stigmatibus, quòd veritatis indicium? quòd probabile argumentum? Si quidem nota sæculis vita ipsius respondeat; quòd postquam Religionis assumpsit habitum, vacando virtutibus, continuum carnis subiit cruciatum.



De Stigmatibus verò plures fide dignissimi, quos miraculi tanti conscios divinæ placuit reddere potestati, testimonium veritati perhibeant; & ad ipsam hoc fidelis Ecclesia suffragetur, quæ ex hujusmodi miraculo, cum multis aliis, debita solemnitate probato, causam specialem habuit, quòd eundem Sanctorum Beatorum Catalogo reverenter adscripsit. Quid ad ista quasi mundo publica, & tibi per consequens non ignota, respondes? Nisi quòd voluntatis arbitrium præferens rationi, nos, vel Deum potius gratis offendis, ac utique dilectorum Fratrum Minorum Ordinem, nimis improvidè perturbas? Ad cor igitur, qui os in Cœlum ponere præsumpsisti (ut de reliquo taceatur) sine mora revertere: ad iram supremi Judicis mitigandam studia suscipe poenitudinis, provisorius, ut scandalum, quod quantum in te fuit, universitati fidelium per prædictas intulisti literas, deleatur; & dilectorum Fratrum Collegia sint in Theutoniæ partibus in reverentia consueta. Quòd, ut tantò facilius, auctore Deo provenire valeat: fraternitati tuæ in virtute S. Obedientiæ per Apostolica scripta præcipiendo mandamus, quatenus cordi tuo pro solemnī voto constituens, quòd aliquid de cætero, ex quo provocari superna majestas, vel Sedes Apost. justè conturbari valeat, non attentans, prædictum privilegium, quo celsitudinis Divinæ dignatio sui Confessorem nominis reddidit gloriosum, damnabiliter infligere, aut impingere calumniis non præsumas; sed celebrem, ad honorem Conditoris, quantum in te fuerit, humili devotione procures; firmiter crediturus, quòd idem Sanctus, cum nostræ mortalitatis habitum bajularet, prædictis Stigmatibus exstitit insignitus; & licèt ipse, contemnens laudes hominum, celare semper studuerit, ea tamen, migrans ad Paradisi patriam, concurrentium obtuitu publicavit. Datum Viterbii 2. Kalendas Apr. Pont. nostri anno XI.

Sequens Epistola pertinet ad Concionatorem quemdam Religiosum, qui multa proferebat contra S. Stigmata S. P. Francisci, directæ ad Superiores Ordinis illius Predicatoris.

Gregorius Episcopus Servus Servorum Dei.

*Dilectis filiis Provincialibus Ordinis....*

**N**on minùs dolentes accepimus, quàm mirantes, quòd quidam Frater vestri Ordinis, Evechardus nomine, immemor, quòd sermo prædicantium salis gratiæ semper habere debeat condimentum; cum pervenisset Opaniam Moraviæ Civitatem, de prædicante transiens in blasphemum, in communi dicere non expavit, quòd in laudem B. Francisci per quosdam ex discipulis suis piè deposita, deberent haberi pro reprobis, quòd in ejus corpore Stigmata non fuissent. Quid ultra? nec Christo, qui Sanctum eundem manibus, pedibus, ac latere hujusmodi Stigmatum privilegio decoravit; nec nobis, qui ex tanto miraculo, cum cæteris solemniter probato, causam specialem habuimus, quòd ipsum adscripsimus catalogo Beatorum, deferendo; dicti Fratris elatio in tantam prorupit insaniam, quòd di-



discipulos memoratos, eorum populo quæstuarios, & falsos prædicatores appellans, impudenter asseruit, quòd in ipsos, & consimiles auctoritate nostra, excommunicationis posset sententiam promulgare. Verùm, cum non solum jam dictæ nequitiae protulerit verba; sed & ipsis alia perversa, proximorum pace, suaque salute postpositis, cumulaverit: discretioni vestræ per Apostolica scripta in virtute obedientiae districtè præcipiendo mandamus; quatenus, si præmissis veritas suffragatur, Fratrem eundem, apud quemcumque fuerit, suspensum à prædicationis officio, ad nostram mittatis præsentiam, pro meritis recepturum. Datum Viterbii 2. Kalendas Aprilis Pont. nostri anno XI.

Alexander, qui Dei prodigium in Sacro Corpore non semel viderat, eam veritatem singulari diplomate expressè confirmavit, mandans celebritate annua, prædicatione, veneratione frequenti ea divina beneficia, B. Confessori collata recenseri. Quod attentè legendum ex nostro Archivio propono; refertur etiam à P. Vyand. T. 2: an. 1255. n. 9.

Alexander Episcopus Servus Servorum Dei.  
Ad perpetuam rei memoriam.

*Venerabilibus Fratribus Archiepiscopis, & Episcopis, &  
aliis Ecclesiarum Prælatiis, præsentis literas  
inspecturis, & audituris.  
Sal. & Apost. Bened.*

**B**Enigna operatio divinæ voluntatis in cælo potens, & innovans singula sapienter, & immutans mirabilia super terram, postquam Dei filius victor mortis ad Patrem, undè descenderat vehiculo propriæ majestatis ascendit, mirificæ fortitudinis viros ad consumationem Sanctorum diversis temporibus suscitavit, à quibus testimonium spei gloriæ cum Christo, in Deo reconditæ firmaretur; & Ecclesiæ Sanctæ ad promissam requiem festinandi in hoc peregrinationis exilio, quod tædiosa desiderii ejus dilatione protrahitur, per ipsos consolationis solatium perveniret. Inter alios autem diebus nostris B. Franciscus almus Christi Confessor apparuit, signis, & virtutibus gloriosus. Qui clarissimus piè vivendi meritis, & exemplis Sanctam fecundavit Ecclesiam, & caligantia præsentis ætatis tempora fulgoris sui lampade illustrans, viam justitiæ perfectè præparans in eremo altissimæ paupertatis, quam ipse currens, & alacriter exultans contra carnem, mundum, & Diabolum, velut gygas, traxit post se de inferni faucibus, & traduxit ad Dominum populum humilem, bonorum operum sectatorem; sicut effusa super faciem orbis terræ copiosa professionis ejus religiosa generatio patefacit. Ut autem ad illuminationem gentium celebris ejus memoria, tamquam rutilum sidus in corusco firmamenti mystici æthere servaretur; multis eum divina potentia, adhuc militantem inter homines, & demum in Sanctorum agmine triumphantem dignata est clarificare miraculis; quæ fel. recor. Gregorius Papa prædecessor noster, ne illa vel periret æmula Sanctitatis iniquitas, vel



vel oblivionis digitus, qui rebus gestis citò superducitur, abolefceret; fo-  
lertissimis inquisitionibus indagata, & comperta fidelissimis documentis fecit,  
ad laudem Dei, & augmentum fidei, & instructionem salubrem tam præsen-  
tium, quàm etiam futurorum monumentis perpetuis commendari; eundem  
Confessorem Sanctorum catalogo adscribendo, sicut in plurimis locis liquido  
per ipsius prædictas literas apparet, harum seriem explicitè continentes.  
Porro quia longum esset, nedum exatere per singula, verum etiam succin-  
cta relatione perstringere clara virtutis divinæ prodigia, quæ tam in opera-  
tionibus sanctitatis, quàm etiam in aliis mirabilibus argumentis probaverunt  
eundem Confessorem tenere cum Sanctis solium gloriæ in excelsis; signanter  
vobis ante oculos proponere volumus recolenda frequentius, & vehementius  
admiranda illa saltem jucunda Dominicæ passionis insignia, quæ in ejusdem  
Sancti Corpore manus cœlestis operationis impressit. Viderunt namque ocu-  
li fideliter intuentes, & certissimi palpantium digiti palpaverunt; quod in  
manibus ejus, & pedibus expressa undique similitudo clavorum de subiecto  
propriæ carnis excrevit, vel de materia novæ creationis accrevit; quæ equi-  
dem idem Sanctus studiosè ab oculis hominum, quorum refugiebat gloriam,  
dum viveret, abscondebat. Inventa est patentius in ipsius defuncti Corpo-  
re, non inflicta humanitus, nec facta plaga vulneris lateralis, quasi aliquid  
instar lateris Salvatoris; quod salvationis, & redemptionis humanæ in Re-  
demptore nostro protulit Sacramentum. Quæ quidem plaga, sicut quosdam  
ex fratribus sibi familiariter adherentibus latere non potuit, propter deflu-  
xum humoris; sic diù antea viruerat in vivente. hæc igitur mira, & decora  
novæ demonstrationis indicia magnæ debent esse devotionis divitiæ Christia-  
nis, & inestimabiles religiosis deliciæ in spiritualibus communis Ecclesiæ Or-  
thodoxæ: cum ex his sincera fides Christi accipiat, quod etiam illi possint ef-  
fe passionis Christi, sine extrinseco persecutore, consortes, qui pro ejus  
amore carnem suam cum vitiis, & concupiscentiis voluntariæ crucifigunt.  
Sanè de præfato Sancto hæc certius asserentes, indoctas fabulas, seu vanæ  
inventionis deliramenta non sequimur; cum ea nobis dudum nota fecerit ple-  
nior fides rerum; quando videlicet in minoribus constituti, Confessoris ejusdem  
familiarem, ex munere divino, meruimus habere notitiam, præfati præde-  
cessoris nostri domesticis obsequiis tunc temporis insistendo. Cum igitur  
oporteat cavere prudenter, nè tanta patrocinii gratia, humano generi cæli-  
tus in memorato Confessore collata in vacuum assumatur; universitatem  
vestram rogamus, monemus, hortamur attentè, per Apostolica vobis scri-  
pta mandantes; quatenus ejusdem Confessoris pretiosa merita celebritate an-  
nua, prædicatione frequenti, & veneratione assidua recensentes, ad ipsius de-  
votionem gratiæ divinæ memoriam subditos vestros excitetis monitis, ut eo  
pro universo fidelium populo, ac præsertim pro his, qui eum invocarint, di-  
vinam misericordiam implorante, mercantur supplices, quod operum possi-  
bilitas obtinere non potest, ejus intercessionibus impetrare. Nemo itaque  
eidem Sancto audeat de cætero esse molestus in Corpore suo Christi trium-  
phalia Stigmata præferenti. Si quis igitur spiritu temerariæ præsumptionis  
insaniens, divini muneris invidus, Apostolica indicia sacrilegus impugnator  
præmissa, vel alia prodigiorum signa, quibus in Ecclesia Dei Sanctitas præ-  
dicti Confessoris eluxit, improbæ contradictionis morsibus obtrectanda cre-  
diderit: volumus, & mandamus, ut eum sanæ menti restituat judicialis se-  
veritas disciplinæ; ità quod districta proprii Prælati castigatione correctus  
Dei opera blasphemare dediscat, & fidei Catholicæ fructus, de pia mirabi-



Hum Domini credulitate pullulans , non arescat . Nulli ergo omnino hominum liceat hanc paginam nostræ prohibitionis , confirmationis , & voluntatis infringere , vel ei ausu temerario contraire . Si quis autem hoc attentare præsumpserit indignationem omnipotentis Dei , & Beatorum Petri , & Pauli Apostolorum ejus se noverit incursurum . Datum Anagninæ 4. Kalend. Nov. Pontif. nostri anno 1.

Ad frangendam ignaviam Nebolenum quorundam , qui in Regnis Castellæ , & Legionis audaciter contra S. P. F. Stigmata oblatrabant ; idem Alexander sequentes literas misit , quibus constanter pro veritate divinum hoc privilegium sustinuit : quæ etiam do ex vet. Codice , & referuntur ab eodem Historico ad Annum 1259. n. 1.

Alexander Episcopus Servus servorum Dei.

*Dilectis fratribus Archiepiscopis , & Episcopis , per  
Castellæ , & Legionis Regna constitutis ,  
præsentes lit. insp. Sal. &  
Apost. Bened.*

**Q**uia longum esset nedum exarare per singula , verum etiam , &c. ut in superiori diplomate , usque ad illa verba , pullulans non areret , & sequitur .

Verum post hujusmodi nostras exhortationes , & literas , ex relatione quorundam fide dignorum , dolentes referimus , & conturbati , quod nonnulli Religiosi , & Clerici Saculares de Castellæ , & Legionis Regnis , circa dictum Confessorem condignam reverentiam gerere contemnentes ; quandoque in publico , & frequenter asserunt in occulto , quod idem Confessor non habuerit Stigmata memorata . Ipsi etiam in tantam prorumpunt intaniam , quod de Imagine Confessoris ejusdem , ubicumque depictam illam inveniunt , Stigmata ipsa damnabiliter abolent , & faciunt abolere ; prohibendo Pictoribus , nè præfatum Confessorem cum Stigmatibus depingant eisdem : propter quod ipsius Confessoris honori , & devotioni fidelium multum adimitur ; ac Venerandæ Religioni dilectorum filiorum de Ordine Minorum gravissimè derogatur . Cum itaque super his ad honorem Altissimi opportunum per nos deceat remedium adhiberi , Apostolica auctoritate decernimus , ut omnes de Regnis prædictis , qui de Imagine Confessoris ejusdem hujusmodi Stigmata aboluerint , seu abolere fecerint , & qui prædixerint dictum Confessorem ipsa Stigmata nullatenus habuisse , cujuscumque ordinis , vel conditionis existant , eo ipso laqueum excommunicationis incurrant , à qua non possint absolvi , nisi personaliter Apostolicam Sedem adeant , super hoc beneficium absolutionis petaturi . Et si tales fortè Doctores , seu Lectores in Theologia , seu quacumque alia facultate fuerint , Lectionis si Doctores , Prædicationis officiis , si Prædicatores , si verò potestatem audiendi confessiones habeant , ea sint omnino privati ; & quilibet ipsorum , qui hujusmodi officia , vel potestatem simul habuerit , similem horum privationum incurrat . Ut autem hujusmodi presumptionibus finis desiderabilis imponatur



ponatur, fraternitati vestre per Apostolica scripta districtè præcipiendo mandamus, quatenus seriem præsentium omnibus Religiosis, & Clericis Sæcularibus exemptis, & non exemptis vestrarum Civitatum, & Diocesam fideliter per vos, vel alium, seu alios exponatis: facientes excommunicationem, & privationem huiusmodi, appellatione remota, firmiter observari; contraditores per censuram Ecclesiasticam, appellatione postposita, compescendo. Præceptum verò nostrum in hac parte taliter adimplere curetis; ut iniuria, quam Dei filius in Sancto suo super his pati dignoscitur, cordibus vestris esse molestissima videatur: ita & per consequens gratiæ divinæ præmium, & nostri favoris vobis proveniat incrementum. Dat. Anagninæ 5. Kal. August. Pont. nostri anno 5.

Nicolaus III. pro eadem veritate in Ecclesia Dei firmanda anno 1279. confirmavit Constitutionem Gregorii IX. primam, ab eo datam super hanc materiam sequenti diplomate.

**Nicolaus Episcopus Ser. Servorum Dei.**

*Universis Christi fidelibus, ad quas literæ istæ pervenient,  
Sal. & Apost. Benedic.*

**L**iteras fel. recor. Gregorii Papæ IX. prædecessoris nostri non abolitas, non cancellatas, non vitiatas, vera bulla bullatas inspeximus diligenter; quarum tenorem de verbo ad verbum ex certa scientia præsentibus fecimus adnotari, concernentes, & statuentes, ut idem tenor eandem vim, eundemque vigorem, & idem robur per omnia obtineat sic insertus, quæ ipsæ literæ ipsa bulla munitæ obtinere noscuntur; etiam si dictæ literæ numquam in posterum apparerent, & eadem sibi fides in iudicio, & extra iudicium adhibeatur omnino, quæ prædictis originalibus literis præberetur. Prædictus verò tenor secundum literam talis est. Gregorius Episcopus Ser. Ser. Dei. Universis, &c. Confessor Domini gloriosus B. Franciscus, qualis vitæ meritis, &c. & sequitur per omnia, ut supra in prima bulla hic recensita, usque ad illud. Datum Viterbii, &c. & addit. Nulli ergo omnino hominum liceat hanc paginam hujus nostræ attestationis, annotationis, Constitutionis infringere, vel ei ausu, &c. Si quis autem, &c. Datum Suriani 8. Kalend. Sep. Pontif. nostri anno 2.

Sedente Nicolao IV. Religiosus quidam Concionator, non audens impugnare veritatem Stigmatum S. P. Fran. in quadam concione, odiosa comparatione illa vilificare studuit; undè ad Superiores illius Ordinis, quem Papa exprimit, hic autem desero, infra scriptum dedit mandatum, relatum etiam à Vuad. T. 2. ad annum 1291. n. 24.



Nicolaus Episcopus fervus fervorum Dei.

*Dilecto filio Provinciali . . . Fratrum Ordinis . . .  
Provinciae Tusciae.*

**C**UM ad aures nostras insinuatione multiplici pervenisset, quod Frater Thomas de Ayerfa tui Ordinis, cum in die festivitatis B. . . Martyris publicè prædicaret, suis terminis non contentus, in obrectationem Stigmatum Crucifixi, quibus B. Franciscus certo, & singulari dono insignitus fuisse dignoscitur, temeraria objurgatione prorupit, ut signa Dei vivi Beato . . . Martyri, & B. Francisco mortui Dei signa, & hæc superficialiter, sicut cernitur in picturis, adscriberet. Nos super his non sine admiratione commoti, hoc diligenter attendimus, quod Sancta Romana Ecclesia de Beato Francisco, & Stigmatum ejus infixione sollicita, illa in carne ipsius non superficialiter, sed in interiora per carnem, nervos, & ossa in quinque partibus, manuum, pedum, & lateris in certos, & congruos fines ingressa; ita ut non virtute naturæ, sed miraculoso gratiæ dono sic fieri, vel esse potuerit, per testes legitimè comprobatum accepit; & ut sic de Stigmatibus ipsius B. Francisci teneatur, & venerabiliter observetur, irrefragabili sanctione firmavit: ex quo ambiguum videri non potest, sacrilegii subire discrimen, quicumque negare, vel improbare audeat, quod ipsa Mater Ecclesia tantæ sanctimonix spiritu, non omissio humanæ justitiæ molimine, confirmavit. Propterea Fratrem ipsum, ut ex ore ejus scire possemus, si secundum ea, quæ nobis insinuata fuerant, facti veritas se haberet, ad nostram præsentiam duximus evocandum. Qui postmodum in nostra præsentia constitutus, post aliquam discussionem, fuit spontè confessus; quod de signis hujusmodi prædicaverat, ea in Martyre præfato viventis Dei fuisse, non mortui; & quæ in B. Francisco fuerant, fuisse Dei mortui, & non viventis. Nos igitur dicti Fratris assertionem improbam, & temerariam attendentes, qua de Salvatore, & Stigmatibus ejus periculosè distinguens, Christum in Sanctis suis asseruit nunc mortuum, nunc viventem; cum tamen, qui manet in æternum Christus, non minùs, aut plus viveret in Martyre, cum illum signo martyrii coronaverit, quàm militanti Confessori, qui Crucem suam tulerat, & nudus nudum sequebatur, cum dedit illi, ut Stigmata sua excellentissimo privilegio in carnis suæ materia præteraret: quæ quidem vivo adhuc ipso Confessore, & postmodum defuncto, humanis oculis, & tacui patentissimè claruerunt. Memorato Fratri Thomæ, ut juxta ea, in quibus perniciofa subtilitate deliquerat, poenam agnosceret, pro nostra quidem patientia suo demerito leniorem, prædicationis officium, ac docendi ministerium usque ad septennium nos interdixisse cognoscas. Quocirca discretioni tuæ per Apostolica scripta mandamus, quatenus interdictum nostrum hujusmodi circa ipsum Fratrem Thomam præcures, & facias inviolabiliter observari: & tu ovem tuam cognoscens, ac morbum ejus, & appositam medicinam, ac illam boni pastoris more custodias, ut ipsa, & aliis per exemplum, & sibi per meritum obedientiæ convalescat; & ex hoc tuæ custodiæ reconditudo dignè possit à nobis in Domino commendari. Datum Romæ apud Sanctam



Ann. Mariam Majorem 12. Kalendas Decembris, Pontificatus nostri anno quarto.

Benedictus X. qui etiam XI. dicitur, ex præclarissimo Prædicatorum Ordine assumptus, ut veritatem hanc firmaret, omnemque dubietatem dirimeret, festum Impressionis Sacrorum Stigmatum in Corpore B. Francisci instituit, & anniversaria solemnitate cum officio celebrari jussit, cum moraretur Perusii anno 1364. ut constat ex actibus Capituli Generalis, eodem anno Assisii celebrati, quam festivitatem Sixtus V. Paulus V. & Urbanus VIII. per omnem Ecclesiam confirmarunt.

Quis autem fuerit tam admirandi operis Auctor, seu sculptor tam egregii Simulacri, in dubium revocandum non est; fuit ipse Dominus J. C. Atamen hoc nostro sæculo non defuerunt aliqui inscii, ne dicam invidi, qui tale opus Archangelo Michaeli, vel alteri de Choro Seraphim cœlesti Spiritui adscribant. Ad quorum ignaviam evincendam sufficerent præfata Summorum Pontificum decreta, & Historia à S. Bonaventura conscripta, in qua Christus ipse, sub aspectu Seraphico, sex alis tectus, sed Cruci affixus, & plagatus ad id venisse asseritur. Unde Ecclesia fatetur; signasti Domine servum tuum Franciscum, signis redemptionis nostræ; Dominus ergo, non minister illum signavit. In Oratione quoque precatur; Domine J. C. qui in Carne Beatissimi Francisci passionis tuæ Sacra Stigmata renovasti, & in Hymno ad Laudes, ab Urbano VIII. festivitati aptato, dies refulsit lumine, quo Sanctus hic de Corpore Christi recepit Stigmata. Sed advertendum, quod Breviaria quædam noviter impressa, nescio an Typographorum incuria, vel industria, non amplius *de Corpore*, sed *in Corpore* habent; at primæva, jussu ejusdem Papæ impressa, & ad intentionem ipsius, clarè *de Corpore Christi* exprimunt.

*Epitheta Corpori Sancti Patris Francisci à Sede Apostolica tributa, & prærogativæ Colli Paradisi concessæ.*

## TITULUS XLVII.

**E**X Summorum Pontificum diplomatibus observanda occurrunt laudum, encomia Sacris exuviis S. P. tributa; quæ quisque suis locis requirere poterit.

Gregorius IX. *Is, qui Ecclesiam*. tam pretiosus thesaurus, Sanctum videlicet Corpus illius, &c. Idem. *Mirificans Misericordias*. Gloriosum Corpus, & in alia consimili dicit, gloriosissimum Corpus. Et in alia, *Speravimus hactenus*. Sanctissimum Corpus.

Innocentius IV. *Licet is, de cujus*, in ea Ecclesia B. Francisci gloriosum Corpus requiescit. Idem. *Si populus Israeliticus*. Ecclesia, in qua pretiosum Corpus ipsius multis miraculis coruscans requiescit.

Alexander IV. *Benigna operatio*. scripsit hæc. Admiranda passionis dominicæ insignia, quæ in ejusdem Sancti Corpore manus cœlestis operationis impressit. Et infra. Nemo itaque eidem Sancto audeat de cœtero esse mole-

stus;



stus, in Corpore suo triumphalia stigmata præferenti. Et in alia *cum ad aures nostras*. signata in Carne ipsius non superficialiter, sed in interiora per carnem, & nervos, & ossa in quinque partibus, manuum, pedum, & lateris ingressa, non virtute naturæ, sed miraculoso gratiæ dono. In eadem. Christus Dominus dedit illi, ut stigmata sua excellentissimo privilegio in carnis suæ materia portaret.

Clemens IV. *Clara merita*. In qua Ecclesia ejusdem Corpus venerabile requiescit. Idem. *Cum ad promerenda*. in qua Sanctissimum Corpus ejus venerabiliter, &c. Item in Concistoriali, *Is, qui Ecclesiam*. in loco, qui dicitur Collis Paradisi, reconditus est tam pretiosus thesaurus, Sanctum Corpus illius.

Nicolaus IV. *Dum sollicitæ cogitationis*. Gloriosa Beatorum Francisci Confessoris, & Claræ Virginis Corpora. Idem. *Præclara gloriosissimi*. Ecclesia, in qua Corpus ejus Sanctissimum req. In alia. *Excitemur ab intimis*, in qua Gloriosum requiescere noscitur Corpus. Et in alia. *Præclara*. dicit Sanctissimum Corpus.

Bonifacius VIII. *Ante thronum*. In qua Corpus ejus Sanctissimum.

Bonifacius IX. *Præ fulgore*. In cujus Ecclesia Gloriosum Corpus ejusdem Sancti venerabiliter requiescit.

Sixtus IV. *Quamvis Altissimus*. Ait, quod Corpus D.F. est quasi signum Dominici fœderis, passionis scilicet Domini nostri J. C. in cujus carne renovata Stigmata gestant pacem. Et infra. Quasi arcus refulgens inter nebulas gloriæ.

Alii Pontifices passim tam admirandum Divini amoris prodigium eisdem titulis honoraverunt. Et Seraphicus Doctor S. Bonaventura de illius traslatione scripsit. Corpus illud Domino dedicatum. Et Sacer thesaurus regis altissimi bulla consignatus.

Prærogativæ Basilicæ Collis Paradisi non minus Pontificiis oraculis sunt assertæ, nam Gregorius IX. in sua Concistoriali Constitutione. *Is, qui Ecclesiam suam*. Cum construatur Ecclesia. Prærogativa libertatis, & honoris gaudeat. Quam sub B. Petri, & nostra protectione suscepimus. Nulli, nisi Romano Pontifici sit subjecta. Ordinis, cujus institutor, & Pater extitit S. Franciscus, Caput habeatur, & Mater. In ea per Fratres ejusdem Ordinis perpetuò inserviat. In ea nemo audeat sententias excommunicationis, & interdicti promulgare. Immunitate cum suis pertinentiis gaudeat. Nulli liceat illam temerè perturbare. Ei præjudicantes excommunicationi, & divinæ ultioni subjaceant. Cunctis verò ei sua jura servantibus sit pax D. N. Jesu Christi, hic fructum benedictionis percipiant, & præmium beatitudinis inveniant. Idem. *Speravimus hactenus*. In honorem ejus (S. Francisci) Ecclesiam fundare volentes, de manibus nostris lapide primario ibi posito.

Libertatis titulis decorata semper niteat celebris, & insignis.

Cui illam concessimus Indulgentiam, quæ limina BB. Petri, & Pauli visitantibus concedi consuevit. Idem. *Recolentes qualiter*. Eadem Ecclesia libertate donata, sub speciali Apostolicæ Sedis tutela consistens, alicui non possit injuriis, sed quiete, sicut libertate fruatur.

Innocentius IV. *Si populus Israeliticus*. Ecclesiam in honorem Beatissimi Confessoris Francisci nos ipsi duximus dedicandam. Idem. *Consecrationes Altarium*. Ecclesia, quæ per nos ad honorem Dei, & B. F. Dominica ante festum Ascensionis Dom. extitit dedicata.



Clemens IV. In sua Concistoriali; *Is, qui Ecclesiam.* Cum in Colle Paradisi constructa sit Ecclesia, in qua reconditus est tam pretiosus Thesaurus. Et sequitur ad litteram, ut in consimili Greg. IX.

Nicolaus IV. *Suscepimus nuper*, ad venerabilem Ecclesiam B. Francisci de Assisio grandem, & continuum gessum us devotionis affectum. Et paulo infra. In signum autem dilectionis huiusmodi, & evidens specialis reverentiae argumentum, quam ad praefatam Ecclesiam, & eundem Beatissimum Confessorem habuimus, & habemus, ac etiam habere proponimus in futurum, donamus, &c. Idem *Præclara Gloriosissimi*. Volentes praedictam Ecclesiam, quæ totius Ordinis vestri Caput existit, specialiter honorare; & subinde. Nullus omnino Ecclesiam ipsam, quæ nulli, nisi Romano Pontifici est subiecta, & totum locum ipsius, cum pertinentiis suis, Ecclesiastico supponere valeat interdicto, absque speciali, & expresso mandato Apostolicæ Sedis, faciente plenam, certam, determinatam, & expressam mentionem de indulto huiusmodi Ecclesiæ, & loco praedicto. Idem *Eximia devotionis*. Ut Ecclesiam vestram in ejusdem S. F. honorem constructam, in qua devotas Altissimo laudes obtulimus in minori officio constituti, præcipuis prosequamur honoribus. eadem verba repetit in alia.

Bonifacius IX. *Præ fulgore, &c.* Ecclesia, in qua, &c. Quæ totius Ordinis Fratrum Minorum quasi lapis fundamentalis existit, quam Rector omnipotens singulari gratia illustravit, ob grandia merita dicti Sancti.

Sixtus IV. *Quamvis Altissimus, &c.* Cupientes, ut Ecclesia Domus ejusdem Sancti Assisien. dudum egregiis structuris, & opere admodum sumptuoso constructa; quæ inter alias omnes Ecclesias dicti Ordinis, tum structurarum, & ædificiorum magnitudine, tum ratione loci, in quo sita est, Re, & Nomine obtinet Principatum. Idem Sixtus IV. *Ad insignem, venerandamque Ecclesiam Domus S. F. Assisiat. &c.* Nostræ peregrinationis Alumnæ; quæ ipsius Ordinis Caput est, quam nuperrimè reparari, & instaurari opere sumptuoso fecimus. In alia *Et si cunctis, &c.* Domus ipsa cæteras ejusdem Ordinis Doms venustate antecellit, & in ea Gloriosum Corpus dicti Sancti devotissimè conservatur: ejusque fratres nullum alium habent, præter Romanum Pontificem defensorem.

Sixtus V. *Divinæ Charitatis altitudo, &c.* Insignis, & celebris Ecclesia Domus ejusdem S. Fran. Assisien. Ordinis Fratrum Minorum Convent. nuncup. in qua quidem Ecclesia, sub illius Altari majori Corpus ejusdem S. Franc. &c. Et in alia, *Ex supernæ dispositionis, &c.* eadem verba repetit.

Hæc sunt Oracula Summorum Pontificum, quibus si vel in minimo adversentur historiæ, jam non historiæ, sed nugæ, & fabulæ sunt censendæ, ad quas conversi sunt, qui auditum à veritate averterunt.

Jure ergo à Seraphico Doctore S. Bonaventura inter omnes Ecclesias Ordinis Minorum, sola hæc titulo Basilicæ extitit decorata, dum ait: ad Basilicam in honorem ipsius constructam Corpus illud Domino dedicatum translatum est.



*Rivitorti Sanctuarium.*

## TITULUS XLVIII.

**C**ollem Paradisi amœna loca, ad spirituales capeffendas delicias, circumstant, quæ ei tamquam capiti membra, adhærent, jamque ante Ordinis divisionem, Patris Custodis Assisi jurisdictioni subiiciebantur. De singulis libet aliqua principalia delibare, dum in faciem locorum confilio, & antiqua monumenta ante oculos teneo. Qui enim à longe scribunt, famæ, quæ crescit, & alteratur eundo, stant; aliorum relationes aliquando vitiatas transcribunt, & quandoque à se ipsis adinventæ subiungunt. Hinc legentibus simul, & loca videntibus, ridicula potius, quàm credibilia, quæ narrantur apparent.

Hic observandum, quòd diù antequam Franciscus nasceretur, vir quidam devotus, qui ad declivia Montis Subasii habitabat, Zaccardus nomine, vel cognomine in suo quodam agro, planitiem versùs ab ejus domo distante, juxta sinuosum Rivum, ab eodem monte descendente, Oratorium quoddam rurale erigi fecit; & in muri interioris prospectu Imaginem B. V. Mariæ sedentis, & super genua è cruce depositum Filium sustinentis, superque eum plorantis, depingi curavit. Hinc, & inde duas Cellulas, Oratorio connexas adiecit, ac devotum eremicolam collocavit, cum quo sæpè spiritualia colloquia habebat, ei que suis eleemosinis subveniebat. Locus jam vocabatur Sancta Maria Zaccardi; ita à senioribus Comitatus incolis appellatum, egomet non semel audivi: à propinquo tamen torrente dicitur Sancta Maria Rivitorti; à primævo incolatu S. P. Francisci à quibusdam vocatur Sanctus Franciscus paruulus. Mortuo Zaccardo, Eremita locum deservit, antequam eò loci veniret Franciscus Juvenis, qui ab immundo hoc mundo nudus egressus, ut alium verè mundum inveniret, rudi, brevi, & angusta tunica contextus, quam pristinus sibi dedit amicus, eleemosinis à pietate fidelium obtentis tres, jam notas, instauravit Ecclesias. Hinc ad Xenodochium leproforum, ut eis inserviret, se contulit: qui locus à Civitate mille passibus distat. Stat adhuc ibidem vetus Ecclesia S. M. Magdalena, cui adiacentia prædia ad commune pertinent hospitale.

Cum ibidem aliquot diebus moratus esset, solitaria loca quærens amica moeroribus, quodam sero per planitiem Orientem versùs, ad sexcentos passus procedens, ad eam Adiculam Zaccardi pervenit, quam ingressus, ut observavit Virginem super Filium plorantem, gemitibus inenarrabilibus Redemptoris diram passionem, & Matris compassionem tota nocte ploravit. Inde patens habitaculum, & derelictum aspiciens (hæredes enim, ablatis possibus, & valvis, id deseruerant) secum statuit ibi moras ducere; quò commodè posset frequenter ad parum distantes leprosos accedere, & Missis audiendis vacare.

Quandoque Assisum ibat ad prædicandam in Ecclesia S. Georgii, vel in platea penitentiam. Ubi quadam nocte apud Bernardum Quintavalle Patrium hospitatus, ab eo, ex recondito loco, in majori noctis silentio orans, miræque splendore cinctus, in extasim raptus visus est. ex quo nobilis ho-



spes desiderium concepit sese illi jungendi. Sequenti manè: ad Ecclesiam Sancti Nicolai insimul perrexerunt, Missaque audita, ter librum Evangeliorum Franciscus Sacerdotem rogavit, ut aperiret; tribus Evangelicis monitis jam auditis, si vis perfectus esse, vade, vende omnia, quæ habes, & dâ pauperibus. nihil tuleritis in via, & qui vult venire post me, abneget semetipsum, & tollat Crucem suam, & sequatur me; statim ad Bernardum reversus dixit. Hæc est vita, & Regula nostra, omniumque, qui volunt nostræ societati conjungi. Aderat ad hæc Petrus Cataneus Cathedralis Ecclesiæ Canonicus, qui cum Bernardo, Francisco sese junxit; eodemque die Evangelica monita executioni mandarunt; & cum eo ad Oratorium Rivitorti perrexerunt. S. P. tria vilia indumenta, suo conformia, parari curavit; septima die divinitus ductus comparuit Ægidius, rogans cum illis admitti; itaque Sanctus hosce tres primos, coram Altariolo ante Beatam Virginem, ab eo erecto, suo acquisivit consortio, eosque ad probationem in primo illo Seminario admisit, atque in præceptis Evangelicis erudit. Aliquando ad alias regiones, prædicandæ poenitentiae gratia, cunctes, ad præfatum locum redibant, simulque morabantur sub disciplina tanti magistri.

Exactiores Chronologi asserunt hoc Religionis principium fuisse 16. Kal. Maii anno sal. 1208. Infra biennium alios novem Assedlas assequutus est. Interim suam Regulam scripsit, & tandem cum duodenario suorum numero novitiorum, Romam adiit ad Innocentium III. in D. Petri solio sedentem, à quo Regulæ approbationem obtinuit; solemnem professionem emisit, & Minister Generalis instituti Ordinis constitutus fuit; ejus socii, Papæ jussu, in manibus ejusdem S. Patris, vel (ut quidam scribunt) Joannis Cardinalis Episcopi Sabinensis professionem fecerunt.

His peractis, ab Urbe recedentes, & ad primarium fluxuosi rivuli Seminarium cum S. Institute jam professi rediere: ibidem Vota, & Regulam juxta emissam Professionem observare cæperunt. Hinc nocte illa memorabili, Dominicum diem præcedente, & absente S. Patre, eundem super curum igneum, & super sanctuarium circumvolantem conspexere, solaribus radiis micantem. Ibi S. Pater illorum penetrans secreta cordium, uti opus erat, paternè admonerat. Eo loci (ut sparsim scripserunt tres ejus socii, quorum manuscripta præ oculis habeo) quadam nocte, ad vocem unius ex fratribus, qui sentiens se fame deficere exclamabat, morior, S. P. accurrens cum aliis, cibos afferri jussit, & ne miser ille verecundaretur, secum comedit; alios sic charitatem docens fraternam. Ibi, ne erubescerent elemosinam petere, eos hortabatur, exemplo Christi Domini, qui cum Apostolis idem in terris egit; sed et eos corripiebat, qui nimia familiaritate cum sæcularibus agentes, plura ab eis, quàm necessaria pro unica die forent, extorquebant. Ibi hyemali tempore fratrem graviter ægrotantem recenti vva, ex nuda vite aulsa refectum statim sanitati reddidit. Ibi ipse luxuriæ stimulis à satana pressus, nudus à cellula profiliens, in circumjacentes nives sese projecit, & rudia simulachra ex ipsis confecta amplexus, suo corpori dicebat: Ecce, frater Asine tua uxor, tui filii; illos tuo calore confove, nam frigiditate rigent: sic carnem demuit, & diabolum elusit. Illuc cum Præsul quidam ivisset, Sanctum Patrem visurus, volens ejus cellam intrare, invincibili vi repulsus est, eò quòd conscientia gravaretur: unde ad se reversus, culpam suam ceram omnibus dixit, & Sanctus Pater obviam veniens, amplexatus est eum. Illac non longè transiens cum immodica pompa Imperator Otho IV. Romam versùs pergebat, at S. Pater noluit eum excipere, sed milit



ad cum unum de Fratribus, qui illi suo nomine diceret, tantam gloriam brevi tempore ad nihilum redigendam, quod & evenit; anno enim sequenti à Summo Pontifice excommunicatus, ab Imperio pulsus fuit.

Inde sæpius suos filios ad vicinum leproforum Xenodochium emitebat, vel ducebat, tum ad Missam audiendam, & à sancta peccatrice penitentiam addiscendam, tum etiam ad humilitatem, & charitatem erga languidos exercendam. Hæc illorum erat oblectatio, ac voluptas Tyronum.

Sanctus hic locus tunc à publica via, quæ Fulgineo Perusiam ducebat, ducentis circiter passibus distabat: undè solitarius erat, non tamen adeo asper, remotus, atque sylvester, ut à quibusdam falsò describitur, nam in amœna planitie, fertili, & ex melioribus Assisiensis comitatus extabat, & extat. Nec tam angustus, ut vix duodecim sedentes caperet, video enim in solo Oratorio, dum ibi spiritualia peraguntur exercitia, viginti personas genuflexas contineri: unde justos illos non tam incommodè capiebat. Domus etsi angusta, multos pace, & charitate coniunctos facilè amplectitur; at Palatium, in quo est discordia, duos nec capit aliquando germanos. In Cellulis ipsis, tabulas super, & paleas dormiebant; Sanctus Pater humi jacebat; Aliqui alternatim in Odeo noctis vigiliis custodiebant. Ibi S. Præceptor jugiter Christi D. Passionem, & mortem, ac S. Matris compassionem suos deplorare docebat, sæpius cum eis reperens, Adoramus te Christe, & benedicimus tibi, quia per sanctam crucem tuam redemisti mundum. Ibi tandem Deus secus decursus aquarum plantavit vineam justorum, qui in lege ejus meditabantur die, ac nocte, ut fructum suum darent in tempore suo.

Modò magis patens est locus; cum etenim via verus, per imam vallem olim directâ, canosa nimis, & impermeabilis evasisset; jussu Sixti V. novâ ad montis radices, ante fores ipsius sanctuarii, inde non procul ab Ecclesia D. Mariæ Magdalenz, ad Portiunculam usque, & inde Perusiam versùs, ad reddendum faciliorem transitum, & eos per sancta loca ducendos, directâ, & strata jam fuit.

Sanè mirum est, quòd sacer iste flexi rivi locus, adhuc integer conserveatur, tota stante structura, quamvis aquæ nedum cum alluant, sed etiam in hyeme ex ipso scateant. Ostendit Deus, quòd servus ejus Franciscus ædificavit domum suam supra firmam petram. Quòd & de aliis Sanctuariis observandum, quæ nec temporis omnia vorantis rabie, nec murorum debilitate cadunt, sed divina manu sustentata consistunt.

Cum igitur integro ferè triennio, partim solus, partim cum duodecim primis Fratribus inibi permansisset S. Institutor, & alii passim ad ejus Ordinem admitti peterent, considerans plures ibidem cohabitare non posse, & ad multiplicationem corporum, multipliciter requiri locorum; cum suis proposuit, ac statuit primo illi hospitio aliud, & successivè alia esse conquirenda. Propterea Episcopum Assisiatem rogavit, ut Ecclesiam aliquam, vel Eremum extra Civitatem sibi, suisque concedere dignaretur; qui se excusavit, cum nullam tunc haberet vacantem. A Capitulo etiam Cathedralis Ecclesiæ propter simile impedimentum exclusus, ad Abbatem Sancti Benedicti Monasterii montis Subalii se contulit, à quo benignè exceptus, Ecclesiolam ruralem sui juris, & domunculam, parum ab ea distantem, in qua sacerdos sæcularis, à monachis ad celebrandum diebus festis destinatus, se colligebat, obtinuit. Ad eam cum suis accessit, paulò plus milliario à fluxuoso Rivo distantem, quæ cum non majoris esset capacitatis, quàm primævum sacellum, illi duodecim cellulas, ex viminibus, & ceno, in figuram par-



vorum tabernaculorum constructas, & ab invicem separatas addidit. Nec omnino pristinum deservit locum, cum eo indigeret, ad retinendos accedentes novitios: quin & successivè paulatim crescentibus fratribus, locum Carcerum in monte Subasio ab eisdem Benedictinis, & alia alibi à devotis assignata recepit. Non enim ad destruendum fundamentum, sed ad erigendum super illud idæatum ædificium sequentia quæsit hospitia.

Quòd autem apud eundem obliquum riuulum successivè semper aliqui fratres habitaverint, constat ex antiquis Sacri Conventus libris, ac regeſtis, in quibus Vicarii Rivitorti, & aliorum locorum, eidem annexorum, deputati leguntur. Testis est etiam solidus lapis, sub pavimento dexteræ Cellulæ repertus, cum anno 1586. in ea ponerentur fundamenta pro columnis, quibus novi majoris Templi testudines sustinerentur. lapis cernitur propè Aram Templi majorem, in quo antiquiori charactere hæc scripta leguntur.

*Hic juxta sinuosum Riuum B. Ægidius Assisien. & F. Conradus*

*Offidanus de Piceno, more patrum, in sinum Dei quieverunt*

*quamplurimum. Ita F. Nicolaus à Sebenico Dalmata.*

B. Ægidius non ille primus intelligendus: sed alter de Capotiis, qui circa annum 1270. floruit. frater verò Conradus de Offida fuit unus de sanctæ paupertatis zelatoribus, tempore Cælestini V. cujus socii ab obedientia Ministro Generali debita, servandæ paupertatis prætextu, fugientes, in Græciam recesserunt. Solus frater Conradus noluit pro paupertate obedientiam omittere, sed utramque simul retinuit, apud primum Ordinis locum commoratus circa annum 1294. Quòd verò legitur in sinum Dei quieverunt quamplurimum, non de Sepultura ipsorum, sed de quiete animi ab eis ibi reperta, & de contemplatione diuturna, qua anima in sinum Dei quiescit, est sermo. frater Nicolaus de Sebenico circa annum 1315. post illos Vicarius ibidem moras duxit, & memoriam illam sculptam reliquit. Exinde colligitur à primis Religionis sæculis, aliquo commodiori habitaculo adiecto, semper in sancto loco commoratos fuisse, & illum nunquam deservisse Minores.

Vivente etiam Sancto Patre eo in Oratorio Missas celebrare fratres Sacerdotes ceperunt. Nam cum Parochi obstarent, ne Minores extra Ecclesias Parochiales sacrificarent, dicentes id in eorum fore jurium præjudicium; Honorius III. suis literis incipientibus, *Quia populares tumultus. Datis Reate 3. Nonas Dec. Pontificatus anno 9. qui fuit Sal. 1224. & Religionis an. 17.* primò concessit, ut fratres Minores in suis locis, & Oratoriis possent Missas celebrare cum Altari viatico, reservato omni Parochiali jure. Et cum adhuc Parochi reclamarent, Gregorius IX. post quatuor annos, mortuo iam Sancto Institutore, per alias suas, *Nos attendentes. datas Assisi 4. Idus Junii. Pont. an. 2.* idem privilegium confirmavit. Unde potuerunt, ac debuerunt fratres in primævo illo Oratorio hujusmodi uti privilegio. Ac propterea S. Pater exinde voluit unicam Missam in suis Oratoriis, & locis quotidie celebrari, ad quam omnes fratres in eis commorantes, & soli, devotè assisterent; ut videlicet Parocorum, quos venerari volebat, querelas evitaret: nec summi Pontifices tale indultum Ordini fecissent, nisi illi reclamassent.

Hinc à veritate distant scriptores quidam, qui sacro Rivitorti Canobiolo infesti, omni arte student illius abolere memoriam, quorum animositatem P. Magister Carolus Rainerius novissimè tractatu veritatum fundamentalium differt. prima egregiè convincit, ad quem lectorem remitto. Solum addo; cum dicunt, non extare de eo memoriam apud antiquos scriptores. legant



Vitam, seu acta S. Patris, à tribus ejus sociis de proprio visu descripta, quæ nunc lego, & puto esse Originalia, vel saltem prima exemplaria, ac velint nolint, hæc invenient, quæ transcribo. *Quodam tempore in primordio, scilicet tempore, quo B. Franciscus capit habere fratres, manebat cum illis apud Rigum tortum; quadam nocte, &c. narrant multa, quæ ibi acciderunt, quinque capitibus, quorum initia à primo tempore, & eodem loco desumuntur. post medium legendæ in alio capite hæc scribunt. Quodam tempore in primordio Religionis, cum maneret apud Rigum tortum cum fratribus, quos tunc habebat, ecce quidam, &c.* Nonne isti sunt omnium antiquissimi scriptores Ordinis, ac testes omni exceptione majores? Nonne sæpè in ea historia scribunt, vidimus nos? legant, videant. Rivus adhuc tortuosè currit: Sacellum integrum stat: sociorum scripta servantur. Oculos livori claudant, veritati aperiant, ut eam agnoscentes ad Dei laudem fateantur.

Quòd locus à D. Bonaventura dicatur Tugurium, ab aliis tugurium, Antrum, ac vivorum sepulchrum: hæc non ad contemptum, & spreum accipienda; cum potius sint Epitheta, & Elogia, paupertati, ac humilitati Sancti Institutoris conformia.

Sanctum hoc habitaculum semper in sua vetustate permansit; solum pavementum ad binos palmos fuit elevatum, propter aquas ab eo aliquando emanantes, quæ ingressum devotis prohibebant; & duarum casularum laquearia, arundinibus, & cæmento tecta, quæ antiquitate labentia, ex eadem materia refecta cernuntur. Etiam Imago Beatissimæ Virginis in pariete olim depicta, temporis, & aeris iniuria collapsa, in textili materia refecta est, additis hinc, & inde genuflexis S. P. Francisco, & Diva Maria Magdalena plorantibus super mortuum Redemptorem, cum Matre Virgine.

Usque ad tempus Sixti V. Sacellum nudum, aerique expositum permansit, cum anno 1586. circa illud in proportionata distantia erui cæperunt fundamenta ad ampliorem Ecclesiam erigendam, in cujus sinu undique avulsum sanctuarium concluderetur. Ecclesia hæc satis elegans, & capax, in tres divisa naves, testudinibus contecta anno 1640. piorum eleemosinis completa, extitit. Interim etiam propè murum novi Templi modicus Conventus erectus est, quem memini me vidisse; in parte enim inferiori officinas habebat, in superiori verò Aulam, & sex Cellulas. Anno 1645. die 20. Maii P. Magister Michael Angelus Catalanus, tunc Socius, & Assistens Ordinis novo majori Conventui excitando intentus, fundamenta benedixit, & primum in eis lapidem cruce signatum locavit. Post biennium fundamentis repletis, & aliquantum elatis muris, P. Catalanus electus Minister Generalis complendæ fabricæ animum dedit. In ejus sexennio magnifica moles majori ex parte constructa apparuit. At dein evectus ad Episcopatum Iternæ opus aliis complendum reliquit. loci paupertas paulatim partem aliquam addidit. At Pater Magister Antonius de Averfa, alter Generalis Minister totum ferè ad complementum reduxit. Hæc pro veritate referre volui, ad fabulas quasdam diluendas. addere liceat quòd non semel mecum recogitaveram. Alia loca Sanctus Pater ab hominum pietate, Deo inspirante, obtinuit, solum Oratorium apud fluxuosum Rivum ab hominibus derelictum, à solo Deo servatum sibi, suisque paratum invenit; ut à solo Deo Minorum Ordinis institutionem sibi commissam agnosceret, suosque primos alumnos ex loco, semper divinæ Providentiæ confidendum doceret. Magnus verè Deus, & laudabilis valde, qui ex tam exiguo fundamento tam ingens Aedificium excitavit.





*Ecclesia et Conuentus Rivitorti prospectus*

*Franciscu Providan<sup>s</sup> de et scul<sup>t</sup>*







Hic oritur dubium, mihi aliquando obiectum. Si Sanctus Franciscus in Oratorio apud totum Rivum suum fundavit Ordinem, cur id non dicitur Caput, & Mater totius Ordinis? Cur hæc prærogativa tribuitur Ecclesie Assisiensi, quam tot aliæ in Ordine præcesserunt? Huic obiectioni tenerentur respondere tot Summi Pontifices, qui illam solam, non aliam jusserunt habendam, & esse caput, matrem, Principem, &c. At quia teneor, ut filius S. R. Ecclesie, quæ à Sede Apostolica sunt ordinata, rectissima defendere, dico, quod fundamenti, & Capitis prærogativæ, sicut distantes, sic diversæ sunt. Pes est fundamentum, sustentans totum corpus humanum, Caput est culmen, & complementum illius. Nec pedi competit celsitudo capitis, nec capiti congruit infirmitas pedis. Idem judicium de corpore mystico faciendum. Ecclesia Evangelica Catholica in Sacro Cœnaculo Sion fuit fundata, ubi Divinus Pontifex primò Sacramenta instituit, Sacerdotes ordinavit, primum sacrificium Patri obtulit, mysteria Redemptionis discipulos docuit. Itidem Spiritus Sanctus eorum corda fide confirmavit, spe roboravit, & Charitate incendit. Indeque Apostoli ad doctrinam Evangelicam divulgandam per Regna, & Provincias distributi se contulerunt. Et tamen Sanctum illud cœnaculum non dicitur Caput, & Mater omnium Christiani orbis Ecclesiarum; sicut jure his titulis gaudet Sacra Lateranensis Basilica; non quia origine, & tempore prima, cum tot aliæ præfuerint Romæ, & alibi Ecclesie; sed quia ad complementum totius Ecclesiastici corporis, promulgata jam, ac stabilita fide, à Summo Pontifice S. Sylvestro fuit solemniter fundata, & assistentibus Imperatore, ac Primatibus, Pontificali ritu consecrata; ac ideo in ea Apostolorum Principum capita collocata. Cum ergo Ecclesia universalis exemplar sit Ecclesiarum omnium sibi subditarum; idem dicendum erit de Minoritica Ecclesia, cujus locale, & originale fundamentum, ac principium extitit Riviflexi Sacellum; Caput, & Mater Collis Paradisi Basilica, à summo Sacerdote Gregorio IX, adstantibus Purpuratis, Principibus, & Prælatibus solemniter fundata; & ab Innocentio IV. Christi Vicario Pontificali ritu consecrata: Ideoque jure Capitis, & Matris prærogativis ab Apostolica Sede decorata; Sanctissimi Fundatoris Corpore, tamquam ejus sponsa, & filiorum læta Mater donata; ac Sacrorum Stigmatum thesauro ditata.

Jus suum unicuique tribuamus. Esto Rivuli Sacellum humile, ac profundum tanti ædificii fundamentum. Sit Paradisi Collis sublime Caput & excelsum ejus fulcimentum, ac summum complementum. Interea illius iconem do.





*Portiuncula Sanctuarium.*


## T I T U L U S    X L I X.

**P**atres Benedictini olim Ecclesiæ, & Monasterii eorum fundatoris nomini dicatæ, in Monte Subasio, prope Assisium habitantes ante annum nostræ salutis millesimum, diversa facella sparsim in comitatu ejusdem Civitatis, ad excitandam fidelium devotionem construi curarunt. Inter quæ Ecclesiola Sanctæ Mariæ Angelorum ad similitudinem, & æqualitatem alterius à S. Patriarcha Benedicto prope Sublacum, in honorem ejusdem Angelorum Reginæ erectæ, quæ à vicina Villa Portiunculæ nomen accepit, celebris fuit, eademque denominatione appellata.


Hanc ferè labentem juvenis Franciscus ab initio suæ conversionis, anno scilicet 1206. inter alias instauravit. Eam frequenter ad orandum, & Missæ sacrificium audiendum visitabat, præcipuè cum moraretur apud leprosos, & in Sacello Rivitorti. In illa plures habuit inspirationes divinas, ac spiritum fervoris, & gratiæ concepit. Ibi contemplantur Angelicæ Salutationis, Divinæ maternitatis, ac Verbi Divini Incarnationis arcana; & ad suum tugurium reversus meditabatur Mortis, ac Passionis Christi, & almæ Virginis compassionis mysteria. Utrobique à Sanctæ Dei Genitricis imagine mens ejus sacris Idæis replebatur.

Instituto jam Ordine, Sanctus Pater illius ampliacioni intentus, à Benedictino Abbate circa initium anni 1211. hanc Ecclesiam cum casula habuit; quam nec in proprietatem acceptavit, sed tanquam simplex hospitium advenis, & peregrinis, nec domum, nec locum, nec aliquam rem habentibus, assignatum. sacra ædícula, veluti adhuc in sua structura integra cernitur, tam angusta erat, & est, ut unicum Altare, & quidem arctum habeat. Gurgustium verò vix pauperrimæ suppellectili continendæ sufficiebat. Unde duodecim illæ cellulæ rotundæ, ex vili materia, ad excubias potiùs servandas, quàm ad somnum capiendum aptæ, ac binæ ante Ecclesiam ordinatæ fuerunt: totusque ambitus virgultis, ac spinis conseptus. loci prospectum, ex vetusta tabula, hucusque in eo Conventu servata, delineatum habet.











Hanc Ecclesiam super omnes alias S. Franciscus & coluit, & dilexit; in qua ad coeptæ perfectionis culmen pervenit. In ea Angelorum familiaritate, Beatissimæ Virginis, & ipsius Christi Domini visionibus, & colloquiis dignatus est. Ex ea initiatum jam Ordinem dilatavit, & ultra duodenos, annos quamplurimos admisit. Propè illam discipulos verbis, & exemplis ad Christi Domini sectanda vestigia direxit. Ibi vigiliis, orationibus, flagellis, jejuniis, ciliciis, ac spinarum punctationibus carnem suam domans, spiritum vegetiorem, ac puriorem reddidit. Illam, in signum suæ ardentissimæ devotionis, à septem Episcopis solemniter dedicari curavit; ac in anniversario consecrationis die plenariam Indulgentiam pro singulis annis visitantibus impetravit.

Quæ Indulgentia inter omnes alias specialissima multis de causis habenda est. Nam eam Christus Dominus ipse, ad petitionem famuli sui, & intercessionem almæ Matris promisit, & suo Vicario Honorio III. inspirans, promovit. Idem divinus Redemptor diem, in quo fideles eam consequerentur, determinavit, quem etiam Papa comprobavit. Singularis equidem, quam septem Episcopi jussu Summi Pontificis publicarunt: qui cum vellent eam tantum pro decem annis pronuntiare (non enim consueverat tunc Apostolica Sedes plenarias Indulgentias perpetuis annis concedere) occulta vi moti, non potuerant pronuntiare, nisi perpetuam pro tali die. Insignis certè, quam ipse Seraphicus vir, qui eam impetraverat, etiam coram ingenti populo promulgavit, dicens (ut retulerunt qui audierunt) ego volo vos omnes mittere ad Paradisum, & annuntio vobis Indulgentiam, quam habeo ab ore Summi Pontificis, & omnes vos, qui venistis hodie, & omnes, qui venerint tali die annuatim bono corde, & contriti, habeant Indulgentiam omnium peccatorum suorum: Ego volui pro octo diebus, sed non potui, nisi pro una die semper memorabili in Ecclesia Catholica; cum per eam Salvator ostenderit veritatem thesauri Indulgentiarum, & auctoritatem suo Vicario collatam, eas concedendi; non enim, nisi dependenter ab illo voluit concedi. Utique celebranda tot signis, & miraculis cælitus approbata. Summi æstimanda, quàm, etiam Jubilæi tempore, ceteris suspensis, Sedes Apostolica consuevit validam conservare. Specialis quidem, quia libera, sine oblationibus, & onere alio, quàm præmissæ confessionis, ac personalis ingressus in Sanctuarium illud. Amplissima sanè, quam in honorem Sancti Impetratoris, Summi Pontifices ad omnes Franciscani Ordinis Ecclesias (additis tamen oneribus dignè communicandi, & orandi) dilatarunt. Verè meritoria, quia æstivo tempore, die secunda Augusti, sudoribus, ac laboriosis peregrinationibus comparanda. Certissima, & infallibilis, quam S. Patris Socii, Episcopi Assisates, & historici sinceri, uniformiter sunt testati: immò & Summi Pontifices, Apostolicis diplomatibus commendarunt, atque ratam habuerunt. Hunc locum S. Pater, non dono acceptavit, sed titulo hospitii accepit, quoties donatores repetiissent, recessurus: Unde in signum gratitudinis, & quasi pensionis quotannis P. Abbatì Benedictino Fiscellam pisciculorum mittebat; & à Monacis loco eleemosinæ vas oleo plenum recipiebat; qui mos post duo sæcula, & ultra paulatim in oblivionem transiit.

Prope hanc Ecclesiam, in ejus Cellula S. Pater obdormivit in Domino; cujus transitum, depositionem, ac solemnem ad Civitatem delationem graphicè S. Bonaventura describit.

Locum Sanctus Pater in pauperrima structura, ut paraverat, reliquit, iussitque, ut semper ibidem niteret sancta illa humilitas. Quod ne Patris voluntati refragarentur, fratres Assisensis Basilicæ nunquam ædificia addiderunt.



derunt. Postquam verò nuper exortæ Reformatorum familiæ, quæ à F. Paulo Trincio Laico Fulginensi, retenta obedientia ad Ordinarios Ordinis initium sumpsit, cum aliis Eremiticis, à Conventualibus assignata fuit. multis etiam annis in sua prima simplicitate permansit. Ostenderunt Patres Conventuales in ea assignatione paternam erga filios adolescentes dilectionem, & isti erga suos Patres filialem obedientiam, & subiectionem ea conditione, ut eleemosinæ pecuniariæ, & pretiosæ, quas in ea ædícula fideles offerrent, juxta decreta Summorum Pontificum, ad Sacrum Assisiense Cænobium pleno jure spectarent, quibus Reformati libenter consentientes, dixerunt sese omnibus privilegiis à Sede Apostolica Ordini concessis renuntiare, & ad præscriptum literalem Regulæ nec per se, nec per interpositas personas, unquam pecuniam recepturos: eò maximè quòd in signum gratitudinis, & debiti, eas benefactoribus tenebantur relinquere. Dum familia perseveravit sub obedientia Prælatorum Ordinis, pactis omninò stetit. At cum in Congregationem transiit, & proprios Vicarios, cum sola dependentia à Generali, concedente Eugenio IV. anno 1440. obtinuit; ceperunt Patres illi paulatim eas eleemosinas pro se ipsis, & loco procurare, ut jam scripsi. Cum autem Congregatio ad statum Religionis à Leone X. qui Vicarios creavit ministros, & eis commisit primi eorum Generalis electionem, evecta fuit; apud eundem Pontificem, ipsis tam beneficium, procurarunt eleemosinas omnes ad se trahere. At Papa maturius eorum professionem, antiquorum conventiones, & suorum prædecessorum uniformes dispositiones considerans, Diploma dedit Custodi, & fratribus domus S. F. Assisien. incipiens, *Cum nobis relatum fuerit, &c.* Romæ die 22. Augusti 1515. quo omnia innovavit Decreta, & Privilegia eis concessa, & expressè decrevit, eleemosinas omnes ad Ecclesiam S. Fran. ejusque domum perpetuò spectare. Iterum à Gregorio XIII. subriperunt oretenus facultatem ponendi in Ecclesia capsam unam, in qua eleemosinæ à fidelibus jactæ ad ipsos provenirent. Sed Pontifex admonitus, Breve expedivit, quo se deceptum fuisse fassus est, concessa revocavit, & motu proprio prædecessorum confirmavit statuta. Incip. *Incet aliàs.* Dat. Romæ die prima Novembris 1583. suo loco relatum lege, & totam historiam, à tanto teste descriptam, habebis. Tandem post tot vanos conatus, animo constantes ab Urbano VIII. intentum obtinuerunt. Pertæsus enim Papa discordiæ, quæ inter utriusque Ordinis Fratres in Ecclesia die Indulgentiæ ob pecunias oriebatur, ad abolenda scandala, omnes eleemosinas fratribus Observantibus adjudicavit; Conventualibus verò duo millia scutorum ad fructum (ut ajunt) ponenda, semel assignari præcepit.

Eodem progressu loci status incessit, nam usque dum Reformatorum stetit Familia usque ad Eugenium IV. sacra illa habitatio in prima exigua paupertate permansit. Cum autem in Congregationem adolevit, ad commodiorem plurium Fratrum capacitatem, Dormitorii additione, relicta tamen Sancta Adicula intacta, fuit ampliata. Tandem in Religionem assumpta, magnum, qui nunc extat, Conventum ædificare ceperunt; & ablatis illis primis Cellulis, eò loco, anno 1569. die 25. Martii, novi amplissimi Templi fodientis fundamentis primas manus dèdere; & ad majorem B. Virginis gloriam, ac ad ditandam paupertatem, exaltandamque S. Patris humilitatem, Aedificium inibi magnificum, & admirabile, sacram Adiculam continens, & Conventum verè maximum, ac insignem, nunc ferè completum, construxerunt. Cujus prospectum, Ecclesiam ex regione Occidentali patentem, cum incluso Sanctuario, ostendentem, inspiciendum propono.



Assini Pars




*Novi Templi et Conventus Sanctae Mariae de Portentosa Plancta*

*Franc. Provident. del. et scul.*










*Templum Sancte Mariæ Angelorum ab Anno 1559 die 28 Martij fundatum et exstructum cum interiori Prospectu et Novi Conventus pars & Francisc. Proudon. delit et Sculp.*







96.3.2



*Sanctæ Cappellulæ B<sup>e</sup> Virginis prospectus et planta.*

*Fran<sup>s</sup> de Prati de c<sup>o</sup>scul*







Aliqui potius singulari devotione erga sanctum locum piè meditatores, quàm temporum, locorumque realem, & invertibilem cursum attendentes, huic Sanctuario initium, & fundamentum Minoritici Ordinis tribuunt. Quorum pietati adhærerem, si meæ mox exprimendæ distinctioni consentirent. Quodcumque temporale, in partes divisibile, multipliciter dici potest inchoatum. Mundus ab æterno in mente Divina conceptus, potest dici in æternitate Idealiter initiatus. At realiter positus in esse, in primo temporis instanti dicitur incepisse. omnium partium, successivè in eo positarum, completa productione, adhuc dici potest creatum sex dierum cursu. Similiter discorro de Ordine Minorum, qui fuit primo Idealitus in mente S. Institutoris; ubi, & quando primam habuit inspirationem, secumque cogitavit de eo fundando, & erigendo: at hæc idealis, non vera, & actualis inceptio fuit, extitit hæc in loco, & tempore, ubi, & quando primò Religiosos coadunavit, cum eis Regulam professam, jure emissi voti, servavit. Si velimus aliud nobis magis amplum præfigere principium, dicamus, comprehendere etiam propagationem, & dilatationem Ordinis Fratrum, & locorum additionem complectentem; adeoque demus aliquod initium parziale habuisse in hospitio S. Mariæ Angelorum, quod illi primò proximè adiunctum fuit. Idealis autem inchoatio non est ad nostrum propositum; nam nec mundus realiter ab æterno fuit in se, nec Ordo Minorum quando S. Franciscus illum futurum mente concepit.

Asseri posset aliud principium Romæ habuisse in Palatio Apostolico, ubi S. Pater confirmationem Regulæ obtinuit, ad pedes Innocentii III. professionem emisit, primus Ordinis Generalis Minister ab eo creatus est, ejusque novitii jam apud Tortum Rivum probati professi sunt. Unde ex acceptione, multiplex est assignabile fundamentum locale: eo semper salvo, quòd super præterita nulla datur potentia.

Non desunt qui asseverent Minorum Religionem habuisse principium in Aula Episcopali Assiensi coram Episcopo, ubi primò S. Franciscus Patri, ac mundo per omnia vale dixit.

Alii fundatam volunt in Ecclesia S. Nicolai, ubi auditis tribus Evangelicis consiliis, ad Bernardum, & Petrum conversus dixit, hæc est norma vivendi, & Regula, quam servare debemus.

Aliqui putarunt in Xenodochio leproforum, teste Francisco Bartoli de Assisio, cujus librum antiquum manuscriptum, vix legibilem, habeo, ubi ait: Hospitale leproforum, in quo incepit Ordo Fratrum Minorum, omnia hæc principia Idealita, & imaginaria sunt.

Imago illa vetustior, quam S. Pater in pariete sacre Ædiculæ depictam invenit, & illic permanens adoravit, B. Virginem super Choros Angelorum ad Coelos assumptam referebat, juxta denominationem Ecclesiæ; mox temporis iniuria cæmentitia lorica corruit. Quæ autem nunc super Altare in tabula depicta exposita cernitur, & B. Virginem sedentem, & Angelum genuflexum illam salutantem, cum Vase florum intermedio, ostendit; & quæ nolarum, & Organorum jublatu ad excitandam peregrinorum devotionem, detegitur; circa annum 1300. à Puccio Capanna Florentino, inter sui temporis pictores egregio depicta est, qui cum Assisii uxorem duxisset, nobili Pucciorum familiæ originem dedit.



*Sacra Carcerum Eremitus.*

## T I T U L U S L.

**I**dem Patres Benedictini, qui Portiunculæ fanum Sancto Patri Francisco dederunt; in monte Subasio Eremitum à Monasterio per miliarium directè distantem, in clivo bipartiti montis, ubi extat opacus lucus, propè præcipitem torrentem, aquas ex vorticibus cadentes excipientem, & in via diffundentem, construxerant: Ubi Religiosis vitam solitariam, & contemplativam quandoque ducere cupientibus, in angustis cellulis, quin veriùs in antris degere concedebatur. Unde & nomen Carcerum crediderim traxisse. Hunc locum Sanctus Pater à prædictis optimis Patribus, eum summo-pere diligentibus, anno 1216. obtinuit. Ibi suffossam petram in sepulchri formam sibi delegit, ut habitaculum, & in durissimo saxo somnum, capiens, super ligneum cervical caput reclinabat. Extat adhuc concavus ille lapis. Inde ad visitandos filios, non longè apud flexuosum rivum, & longius à Portiuncula commorantes se conferebat; Utrinque aliquot ex eis alternatim reducebat; ut in ea palestra contra Tartareos hostes exerceret. Ibi Dæmonis insidias deludebat; eumque infestissimum per subterraneam cryptam præcipitem dedit.

Hoc sanctuarium, inter alios celebres cultores, memorabilem habuit F. Rufinum, qui sub rupe poenitentiam admirabilem peragebat. Cui Cacodæmon, in Angelum, imò in Auctorem lucis transformatus, Crucifixum pluries videndum se præbuit, illi præcipiens à Francisci amicitia separari, quem hypocritam ab æterno damnatum, disiecitabat. Unde deceptus miser, sancti viri consortium devitabat, & diutius ab ejus familiaritate abstinuit. At Franciscus, qui melius hostis noverat thecnas, cælitus admonitus, misit Fr. Massæum ad illum & vocandum, & secum ducendum. Indignatus Rufinus respondit, nil sibi ulterius agendum cum filio Bernardonis. Hanc obstinationem precibus, ac lachrymis fidelis condiscipulus superavit, & quamvis reluctantem secum traxit. Quam amantissimus Pater ut vidit, infelix Rufine, inquit, cui aurem, & fidem dedisti? nonnè dæmoni præcipitium tibi suadenti? Totam inde tentationum seriem, ac si præsens fuisset, retulit: Et signa agnoscendi inimici astus eum edocuit; Ex tunc conterriti maligni spiritus, quoties ille ad locum, quò erant energumeni, appropinquabat, dæmones obsidentes, clamabant, ecce inimicus noster, exire cogimur. Cumque aliquando S. Pater Franciscus in Monte Alvernæ sub rupe orans, à dæmonibus saxa desuper jactantibus, turbaretur; comminabatur, dicens, si non quiesceris, vocabo F. Rufinum; jamque illicò discedebant.

Itidem Fratres Bernardus Quintavalle, Leo, & Angelus, & alii Sancti Patris socii, ipso vivente, & post ejus transitum, solitudinis, & contemplationis degustandæ gratia, sæpè in sancto loco se colligebant; ac post ipsos successivè alii poenitentiis assuefacti. unquam defuit aliquis, ex his, qui in Sacro Conventu morabantur, qui exercitiorum causa in ea sacra Eremita moram non traheret.

Insignem habuit Incolam Beatum Valentinum Narniensem, olim cujusdem





Evemus Sacra Carcerum

Franciscus Pons dorus del. et scul.







Castri Comitem, qui duas filias in Conventu S. Claræ Deo consecravit, & tres filios ad Minores secum duxit. Trīginta annis in Religione vixit, & floruit circa annum 1355. ex quibus per plures annos inter astra Carcerum admirabili pœnitentia, pane, aqua, & absinthio contentus vitam duxit, atque ibidem animam Deo reddidit. Corpus miraculis clarum à suis fratribus Assisi Conventualibus ad Basilicam Collis Paradisi translatum fuit circa annum 1378. biennio antequam locus nascenti Reformatorum familiæ, quæ postea de Observantia dicta est, assignaretur. Unde miror P. Franciscum Gonzagam, ubi agit de hoc loco par. 2. liberè scripsisse, Nilum Patres Conventuales ob aliqua incommoda deservisse. Nam semper ibi duo, vel tres Assisiensis Conventus fratres incolæ, ad agenda spiritualia exercitia, & ad veræ quietis contemplationem degustandam, alternatim distributi commorabantur. Semperque locus in ea simplicitate, quam ab initio habuit, per duo sæcula servatus fuit.

Anno autem 1380. cum jam frater Pauluccius Trincius duodennio antea suorum Reformatorum familiæ initium dedisset, & loca remota à superioribus peteret, in quibus vitam Eremiticam cum suis ducere posset, Minister Provincialis S. Francisci Frater Matthæus de Amelia inter alia loca sylvestria, & solitaria, etiam sacram hanc Eremitum assignavit. Cumque prædictus Dei servus plures velleret ibi suos asseclas collocare, Dormitorium paupertati, cujus fervidus erat zelator, conforme, & angustas necessarias officinas addidit, ac ibi octo optimorum Religiosorum familiam instituit.

In hoc sanctuario diu commoratus est B. Antonius de Stroncono, sanctitate insignis, quem paucis ab hinc annis S. Rituum Congregatio Beatum dici, & coli decrevit.

Cum autem tempore Clementis VII. circa annum 1530. ex illa prima alia strictior prodierit Reformatio, sub propriis, ac distinctis Provincialibus Ministris in arctiori paupertate firmata: locus Carcerum à Patribus Regular. Obser. nuncupatis derelictus, à Religiosissimis Patribus novæ, & exactioris observantiæ inhabitari cepit, ubi magna exemplaritate morantur.

Enituit semper erga Religiosos in ea sancta domo divina Providentia. Cum enim circa celsitudinem montis situs hiemali tempore propter ingentes nives, & glacies, sæpè per integros menses impervius evadat, ac Patres illi ex quotidiano quæstu vivant: nunquam tamen eis deest Deus corda movens devotorum civium, & inferioris partis incolarum benefactorum, qui omni vi, ac labore sibi viam aperiunt, eisque eleemosinas, ac provisiones deferunt. iactantes enim cogitatum suum in Domino, ab ipso enutriuntur. Sancti loci prospectum hujus paginæ figura pandit.



*Sancti Damiani Conventus.*

## TITULUS LI.

**R**uralis Ecclesia Sancti Damiani, extra Civitatem Assisi olim erecta, tam modicis erat redditibus sustentata, ut quamvis angusta, pauper tamen Sacerdos illius sacellanus non haberet unde illam jam labentem instauraret. Hanc ingressus juvenis Franciscus, dum attentius coram Crucifixi imagine preces funderet, hanc vocem audiens, vade Franciscus repara domum meam, quæ labitur, operi se accinxit. Sed cum propter Patris avaritiam, pecuniam ex mercibus divenditis collatam in tam pium opus nequisset impendere; cum Patre mundanis operibus abrenunciatis, piorum eleemosinis reparavit.

Instituto jam ab eo Minorum Ordine, ac mirè propagato: nobilis Virgo Clara cupiens & ipsa mundo exonerata, post Sancti Viri vestigia Christum sequi, ad illum in Cœnobiolo Portiunculæ se contulit; eique sanctum patefecit desiderium; à quo in proposito confirmata, paulò post ibidem tonsa crine, cineracea veste induta, indissolubili nexu Christo sponsa juncta extitit. Ut eam providus Pater ab insidiis mundi præservaret, ad Monasterium quoddam in ingressu Civitatis positum duxit, ac sacris illis Monialibus sibi devotis commendavit. Hic tantisper mentem sistere non pigeat; modica enim, & ferè nulla de ipso scriptores referunt, cum tamen antiqua monumenta aliqua scitu digna me doceant.

Antiquitus locus iste Palatium erat, cujus structura adhuc permanens magnificum fuisse ostendit. Ibi duo Cives Germani fratres morabantur; qui propter bona temporalia dividenda, mutuis inter se odiis fervebant, ac malo dæmone instigante, unus alterius vitæ insidiabatur. Cumque quadam die ambo armis præcincti, ira bacchantes altercarentur: illicò inter eos à Deo missus refulsit Angelus, cujus aspectu territi fratres, ad pedes ejus in solum corruerunt. A cælesti nuncio erecti, dulciter moniti, leniterque correpti, & ad fraternam pacem inducti, eo præsentem genuflexi, in mutuos amplexus, & oscula fraterna constricti, deinceps in amoris concordia vixerunt. Conciliatis animis, statim Angelus ab eis discessit, ac evanuit. Inde nobiles viri memores beneficii, tutelari Numini grati, domum illam ad Monasterii formam aptarunt, in cujus inferiori aula Ecclesiam construxerunt, quam Sancti Angeli Pacis vocari voluerunt, totumque locum sanctimonialibus Benedictinis dederunt: corrupto autem nomine S. Angeli Panisii dicta est. Adhuc servatur Ecclesia cum Altari, licet modò simplex sit oratorium: in pariete antiquissima pictura cernitur, miraculum præfatum demonstrans; Angelum videlicet stantem, juvenes armatos ad ejus pedes genuflexos, ac se invicem osculantes. Ibidem nunc aliquæ Tertiæ Ordinis sorores sæculares, sub patrocinio Sacri Conventus viventes, & advenas ejusdem instituti sorores peregrinas hospitio recipientes cohabitant.

Ad hoc ergo Monasterium Sanctus Pater Franciscus almam Virginem Deo desponsatam adduxit, & sub Angeli pacis tutela consignavit. Ibi à consanguineis, qui eam à sancto proposito retrahere conabantur, sæpius turbata, illis



illis viriliter restitit. Ibidem tenacioribus divini amoris funiculis ambæ constrictæ, agnatorum violentias superarunt: & astus Inferni Amazones invictæ profligarunt. Inde Agnes illa innocens, dum violenter à suis traheretur, velut columna immobilis tanto pondere stetit, ut amoveri nulla vi potuerit. Ad eundem locum aliæ quoque Affiliatæ Juvenculæ Virgines accurrentes, post eas ad Christum Regem adductæ accesserunt. Non enim ad modicum tempus ibi moras duxerunt.

Interim S. Pater ad prædictum S. Damiani Presbyterum se contulit, eumque rogavit, ut novo sacrarum Virginum cætui Ecclesiam illam cum adiacenti medico territorio, pro Christi amore resignaret. Ille libenter annuit, & accedente Episcopi consensu, piorum eleemosinis, & præcipuè Claræ, & Agnetis parentum, & consanguineorum, qui illarum experti satis constantiam pacatis animis divinæ jam se commiserant voluntati, Monasterium ad paupertatis modulum, capax tamen, ac sufficiens, supra, & circa Ecclesiam erectum fuit. Ad quod Sanctus Pater filiam suam Claram, cum eius Affectis adduxit, eamque illis Abbatissam præfecit. Pius quoque Presbyter in proxima sua domo, quoad vixit, illarum spirituali curæ destinatus habitavit.

Moniales Sancti Angeli Pacis, seu Panfi post mortem D. Claræ ad Monasterium Ecclesiæ ejus nomini dicatæ transferunt. Pristinum cænobium sororibus Tertiæ Ordinis domicolis assignaverunt, quod adhuc retinent, stante loci structura illam magnificentiam portendente. De hoc Monasterio etiam P. Vvadd. t. p. ad an. 1212. plura scripsit, ex iis, quæ retuli; sed non satis edoctus, duo Monasteria asserit fuisse, primum S. Pauli, alterum Sancti Angeli de Panfo, in quibus Dei sponsa se abdidit, antequam ad Sanctum Damianum accessisset. At Ecclesia S. Pauli Parochialis erat, in medio Civitatis posita, ad Benedictinos montis Subasii pertinens; nec aliam Divo gentium Doctori dicatam reperio. Prædicto S. Angeli pacis Cænobio nunc adhæret Clericorum sæcularium Seminarium, à Crescentio Episcopo nobili Romano institutum, cujus ædificium eandem antiquitatem ostentans, partem ejusdem Palatii, ac Monasterii se fuisse demonstrat. Jurè à præfato Antistite Seminarium Seraphicum appellatum est, puto, ab incolatu, quem Seraphina Mater ibi primitus tenuit.

In portum itaque novi Monasterii à Sancto Institutore illi paratum nobilis naucleria navigio castitatis cum suis se recepit comitibus: eo naviculam apulit, ubi ulterius non potuit naufragium timere. Sanctum hoc habitaculum semper sub divina providentia, ac tutela positum fuit. Numquam defuit Deus ancillis suis, quibus in urgentioribus necessitatibus sæpius mirè subveniebat; cum enim egestas magis premeret, tunc insperatò à divina munificentia, & à populorum pietate uberiora deferebantur subsidia. Etiam in majoribus periculis constitutis adfuit superna virtus omnipotens: ut cum Saracenis Civitatem obsidentibus, ac Monasterio insidiantibus, & per aptatas scalas jam muros ascendentibus, ad preces ancillæ suæ, præfens intonuit Dominus, & altissimus de Coelo dedit vocem suam, ac sub pedibus impiorum commota terra, illos præcipites dejecit, & à rota Provincia in fugam dispersit.

Inde sanctitas castissimi Collegii odorem suum per Christianum orbem diffundebar, cujus fragrantia tracti ipsi summi Pontifices Gregorius IX. & Innocentius IV. ad Sanctam Virginem visitandam accessere. Ille præcipuè, qui morituræ personaliter benedictionem, ac plenariam indulgentiam impertivit:

ejusque




ejusque funeri, comitantibus pluribus S. R. E. Cardinalibus, ex quibus Episcopus Ostiensis in laudem ejus funebrem orationem habuit, assistere voluit. Orator ipse, qui in Pontificatu successit, Alexander IV. illam Sanctarum Virginum catalogo adscripsit.

In eodem sanctuario plurimarum Virginum corpora requiescunt, earum inquam, quæ antequam facer ille Chorus ad novum in Civitate extructum Monasterium transisset, ab hac vita migrarunt. Plurimas ibi quadraginta annorum spatio sancta magistra discipulas habuit, cum anno 1228. in publico Instrumento, quò sacra Virgo Terram quamdam Olivatam propè Tesium positam, & Monasteriis relictam, Cathedrali Capitulo vendidit, quinquaginta tres Moniales nominatim numerentur; cujus instrumenti authographum refert Vvad. t. p. ad an. prædictum n. 15. lectu dignissimum. Ex sacro autem illo tumulo multoties suavissimus spirat odor, quem ego ipse non semel olfactu percepi.

Postquam illinc discesserunt Moniales Clarissæ, locus sub jurisdictione Cathedralis Capituli D. Ruffini venit, qui postea anno 1373. ab eo adolescenti Reformatorum familiæ assignatus exitit; & tandem tempore Clementis VII. tunc exortis strictioris Observantiæ Reformatis fuit resignatus, ubi exemplarissimè viuunt.

In hac S. Damiani Ecclesia, super Altare Beato Antonio de Stroncono dicatum, requiescit ejusdem Beati corpus integrum, incorruptum, flexibile. Scriptorum aliqui fundatum asserunt Clarissarum Ordinem in sacra Æde Portiunculæ, ubi Virgo Clara Christo desponsata fuit. Alii Angeli pacis obliiti, hoc initium Ecclesiæ, & Monasterio S. Damiani tribuunt. Quisque suos studet extollere lapides. miror, quòd iidem negantes Minorum Ordinem fundatum fuisse apud Rivum tortum, licet in eo Sacello S. Pater cum duodecim fratribus diu commoratus fuerit, eosquè sub obedientia regulari habuerit; postea scribant unicam suffecisse Religiosam, ante conditionem, & approbationem regulæ ad fundandum Ordinem, qui essentialiter importat inter plures personas regulatam seriem. At tanti ædificii amplum debuit esse fundamentum. dici potest, quòd in Ecclesia Angelorum Regina fuerit idæatum, in Canobio S. Angeli Pacis, multiplicatione aggregatum: & in Conventu Sancti Damiani Regulari lege firmatum, ac completè fundatum; inde ædificium ampliatum, elevatum, ac per orbem diffusum. Unicuique loco suam laudem tribuamus: ità tamèn, ut præteritorum temporum, & operum invertibilem ordinem non pervertamus. Hujus quoque sanctuarii scenam hic figuratam obijcio.







*Ecclesia, et Locus Sancti Damiani*

*Franciscus Proudonus deli. et Scul.*







*Divæ Claræ Templum, ac Monasterium.*

TITULUS LII.

**I**Nter primarias Urbis Assisiensis Ecclesias, olim celebris fuit Parochialis Collegiata S. Georgio M. sacra, in qua Adolescentulus Franciscus sub disciplina piissimi Sacerdotis educatus prima Grammaticæ rudimenta didicit, & post conversionem pluries prædicando, populum ad poenitentiam hortabatur. Post cujus mortem ad eandem Ecclesiam corpus ejus divina manu cælatum delatum, ac depositum fuit; ubi spatio trium annorum, septem mensium, ac dierum viginti permanfit. Ibidem à Gregorio IX. nondum expleto ab ejus morte biennio, solemni pompa sanctorum albo adnotatus fuit: Inde ad novam Basilicam sacro translato corpore, Pontifex ipse Claræ Virgini, in Monasterio S. Damiani adhuc viventi, eandem S. Georgii Ecclesiam donavit: jussitque propè illam Monasterium construi, in quo Sacræ Virgines tutius, & commodius cohabitarent: ad quod considerabilem pecuniæ summam assignavit. Convenientibus quoque piis eleemosinis à civibus collatis opus feliciter inchoatum est.

Reperiebatur Assisi Jacobus Alemannus, qui Collis Paradisi Basilicam, cum triplici Ecclesia, & admirabili Conventu architectatus fuerat; cui etiam novum opus conficiendum fuit iniunctum. constat ex ædificiorum similitudine, utrumque ab eodem auctore prodiisse. Hic ergo locum, situm, & agenda perpendens, totum novum Templum à fundamentis erexit propè antiquum, cujus solidiorem partem ideo destinavit, aliam lateralem ruinæ proximam diruit, ac Monasterii impluvio assignavit: relicto integro sacello, quò S. Patris corpus fuerat depositum; quod adhuc Sacellum integrum in medio claustrì à sanctimonialibus cultum, & circum ornatum devotè custoditur. Ad sternendam plateam ante novam Ecclesiam, collis declive repleri, ac solidi muri vi sustineri curavit. monasterium in Collis radice amplissimum ad meridiem excelsis, ac solidis propugnaculis sussultum, construxit. Templum magnificum, formam crucis referens, ad Archetypum celsioris D. Francisci ex politis lapidibus ejusdem speciei, ac formæ erexit. Totum ædificium ex materia, forma, figura, situ, structura, altitudine, ac latitudine, admirabile, & æternitati compactum censerì potest.

Vixit sancta Virgo donec magna hæc moles sibi parata ad complementum adduceretur, & jam inhabitari posset monasterium: mundissimum corpus ad Civitatem delatum, in novo Templo locatum fuit: quò etiam cum matre dilectæ filiæ ad commorandum iuerunt.

Peracto ab ejus morte biennio Alexander IV. in Ecclesia Cathedrali Anagninæ die 15. Augusti 1255. insigni pompa, solemni ritu, illam inter Sanctas Virgines connumeravit. anno 1260. jussu ejusdem Pontificis, magno populorum concursu ab Episcopis Assiatis, & Perusino corpus ejus recognitum, ac integrum, & incorruptum, undique fragrans, & velut dormiens repertum, sub majori Altari in capsâ plumbea, alia lapidea undique recta, clausum translatum fuit die 2. Octobris.

Post alios quinque annos, nempe 1265. Clemens Papa IV. Assisum venit ad visitanda corpora SS. Francisci, & Claræ. Cumque jam Seraphici Patris Basilica ab Innocentio IV. fuisset dedicata; ipse consecravìt Altare majus, sub quo Sanctæ Institutricis corpus reconditur: Interim dedicantibus totam Ecclesiam intus, ac foris S. R. E. Cardinalibus, ab eo ad id deputatis; solemnitati ad-



adstante Romana Curia, ac populorum ingenti multitudine. Decrevit Pontifex novum Templum ipso S. Claræ nomine deinceps decorari; relicto Altari D. Georgio m. sacro. Unde Ecclesia ipsa inter insigniores Basilicas, Pontificali consecratione decoratas, computanda est.

Vetustissima Crucifixi imago super tabulam picta, ex qua Franciscus adhuc juvenis vocem Domini audivit, à Monialibus ex pristino S. Damiani domicilio allata, in interiori novi Monasterii choro super Altare locata fuit, & ab eis per ferream cratem peregrinis, ac devotis videnda, & adoranda exponitur.

Post tres menses à Seraphicæ Matris obitu, ejus dilectissima soror Agnes ad Paradisi gaudia sororem sequuta ascendit; miraculis æquè clara, virtutibus, ac Sanctimonix fama insignis: cujus corpus in Sacello ejusdem Templi sanctis Angelis dicato honorificè conditur. Ibidem Dei sponsæ Amata consobrina S. Claræ, & Benedicta post eam prima Abbatissa, pari honore conquiescunt.

Servantur in eadem Basilica ossa primarum Dei famularum, quas Civium, & populorum pietas, ut Beatas coluit; præcipuè Hortulanæ matris, Balbinæ, & alterius Agnetis neptium, alterius Balbinæ, Christinæ, Philippæ, Cæcilix, & aliarum S. Institutricis sociarum, & Affeclarum.

In interiori sacello, ubi S. Patris corpus dudum servatum fuit, modò quiescit corpus B. Franciscæ Monialis conversæ; super cujus tumulum, postquam fuerat sepulta, mense Januario, Rosæ pulcherrimæ cum cespitibus exortæ apparuerunt.

Templum hoc ab insignioribus illius sæculi pictoribus, qui Collis Paradisi Ecclesias, egregiis eorum operibus exornaverant, fuit pariter totum interiùs decoratum. At temporis iniuria corrumpente jam parietum superficie, dealbatum est: unde rudis illa, sed venerabilis vetustas desideratur. servatur tres imagines in tabula, à Giunta Pisano Græcorum alumno delineatæ, quæ Crucifixum Dominum, B. Matrem Virginem, & S. Claram exprimunt: postque majorem Aram locatæ conspiciuntur.

Hujus Basilicæ sacre Reliquiæ sunt. Crucis Christi plura fragmenta; integra Spina; Spongiæ, flagelli, lintei, sindonis, cunarum, mentæ, sepulchri variè particule. B. Dei Genitricis de Capillis, Velamine, Cingulo, Veste. Pars cinerum S. Præcursoris Joannis. SS. Apost. Petri, Pauli; Jacobi, Matthæi, Bartolomei, Simonis, Taddæi, SS. Martyrum, Pontificum, Confessorum, ac Virginum quamplurium. Quarum aliquæ sub Altaribus ab eodem Clemente IV. & Cardinalibus, qui aras, & templum dedicarunt conditæ sunt: aliæ in Altari SS. Crucifixi honorificè asservantur.

Singularia S. Claræ sacra ipsana sunt, Velamina, vestes, chorda, pretiosus Annulus ei ab Innocentio IV. donatus. S. P. Francisci calceolus lineus, à S. Clara cum alio ei missus, quos post impressionem sacrorum stigmatum deferebat. Penula, seu Tunicula, qua ab Episcopo coopertus fuit, cum nudatus coram eo, Patri, ac mundo abrenunciavit. Emplastrum à S. Clara compactum, quod super laterale vulnus ad illud tergendum, ac dolorem mitigandum S. P. ferebat. Ibi concretus sanguis adhuc apparens asservatur in argentea capsula à D. Cardinali Bo romeo donata.

Moniales sanctæ fundatricis primogenitæ apud ipsam Matrem commorantes, quàm religiosè convivunt. Regulam ab Urbano IV. ipsis assignatam proficentes; exactèque observantes; die, noctuque divinis officiis, orationibus, aliisque sacris exexercitiis addictæ. Bona possident in communi, nihilominus Institutricis paupertatem, quæ præsertim in egestate, parsimonia, afflictione, & mortificatione corporis consistit, singulæ perfectè imitantur.






*Sancæ Clare Virginis Templum et Monasterium*

*F. de Wit del.*










SACRI CONVENTUS  
ASSISIENSIS  
HISTORIÆ  
LIBER SECUNDUS.

Honorius Episcopus Servus servorum Dei.  
sal. & Apost. bened.

*Dilectis filiis Fratri Francisco, & aliis Prioribus,  
seu Custodibus Minorum Fratrum.*




Um secundum consilium Sapientis, nihil sine consilio faciendum, ne post factum poenitudo sequatur; expedit cuilibet excelsioris viæ propositum aggressuro, ut præcedant palpebræ gressus suos; vires videlicet proprias discretionis moderamine metiendo: ne si (quod ablit) altiora se querens in commotione dederit pedem suum, retrò respiciat, in salis statum convertendus, pro eo quòd sui sacrificium, quod Domino fuerat oblaturus, sale Sapientiae non condivit. Sicut enim sapiens desipit, si non fervet; sic fervens confunditur, si non sapit. Quare penè in omnis Religionis Ordine providè instituitur, ut Regulares observantias suscepturi, certo tempore ipsas probent, & probentur in eis; nè sit locus de coetero poenitudini, quam non potest levitatis occasio excusare. Auctoritate itaq; nobis elargita, vigore præsentium inhibemus, ne aliquem ad professionem vestri Ordinis, nisi per annum in probatione fuerit, admittatis: post factam professionem, nullus fratrum Ordinem vestrum relinquere audeat, nec relinquentem retinere. Inhibemus etiam, ne sub habitu vitæ vestræ liceat alicui extra Obedientiam vagari, & paupertatis vestræ corrumpere puritatem, quod si quis fortè præsumperit, liceat vobis in fratres ipsos, donec resipuerint, censuram Ecclesiasticam exercere. Nulli ergo omnino hominum liceat hanc paginam nostræ inhibitionis infringere, vel ei ausu temerario contraire. Si quis autem hoc attentare præsumperit, indignationem Omnipotentis Dei, & Beatorum Apostolorum Petri, & Pauli se nove-



rit incursum . Datum apud Urbem veterem 10. Kal. Octobris Pontificatus  
anno quinto .

Pendet Bulla .

*Ad observantiam præfati Diplomatis respicit textus ille Regulæ, non liceat eis de ista  
Religione exire, juxta præceptum Domini Papæ, quia nemo mittens manum, &c.*




Honorius Episcopus servus servorum Dei.

*Dilectis filiis Fr. Francisco, & aliis Fratribus  
Minoris Ordinis Sal. & Ap. ben.*

**D**evotionis vestræ precibus inclinati, auctoritate vobis præsentium indulgemus, ut in Ecclesiis, si quas vobis habere contigerit, cum generale terræ fuerit interdictum, liceat vobis clausis januis, excommunicatis, & interdictis exclusis, submissa voce divina officia celebrare. Nulli ergo omnino hominum liceat hanc paginam nostræ Indulgentiæ infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, & Beatorum Petri, & Pauli Apostolorum ejus se noverit incursum. Datum Anagninæ 2. Kal. Aprilis. Pontificatus nostri anno sexto.

Pendet Plumbeum signum, cum inscriptione, Honorius PP. III.



Honorius Episcopus servus servorum Dei.

*Dilectis filiis Fratribus Minorum Ordinis.*

**Q**uia populares tumultus, tanquam qui vestro adversantur proposito, fugientes, secretos recessus libenter appetitis, ut in sancta quiete liberiori orationi vacare possitis: nos attendentes orationum vestrarum suffragia plurimum opportuna; quoniam eò efficacior esse debeat vestra intercessio apud Deum, quo perfectè viventes, ejus digni estis gratia potiori. Considerantes vobis negandum non esse, unde nemini derogatur, dum vera exposcit religio, ut quæ sunt etiam de gratia speciali vobis concedere debeamus. Devotioni vestræ, cum professi paupertatem sitis, pariter & amplexi, non temporale commodum, sed spirituale quærentes; auctoritate præsentium, vestris inclinati precibus indulgemus, ut in locis, & oratoriis vestris cum viatico altari possitis Missarum solemnias, & alia divina officia celebrare, omni Parochiali jure Parochialibus Ecclesiis reservato. Nulli ergo omnino hominum liceat hanc paginam nostræ concessionis, & Indulti infringere, vel ei ausu temerario contraire; si quis autem hoc attentare præsumpserit, indignationem Omnipotentis Dei, & Beatorum Apostolorum Petri, & Pauli se noverit incursum. Datum Reate 3. Nonas Dec. Pontificatus nostri anno 9.

In Plumbo.

Hono-




Honorius Episcopus servus servorum Dei.

*Dilectis filiis Fratri Francisco, & aliis Fratribus de Ordine Fratrum Minorum sal. & Apost. bened.*

**S**olet annuere Sedes Apostolica piis votis, & honestis petentium desideriis favorem benevolum impartiri. Ea propter, dilecti in Domino filii, vestris piis precibus inclinati, Ordinis vestri regulam à bonæ memoriæ Innocentio Papa prædecessore nostro approbatam, annotatam præsentibus auctoritate vobis Apostolica confirmamus, & præsentis scripti patrocinio communimus, quæ talis est. *In nomine Domini, Incipit Regula Fratrum Minorum, &c. Tota per extensum ponitur.*

In fine. Nulli ergo omnino hominum liceat hanc paginam nostræ confirmationis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, & Beatorum Petri, & Pauli Apostolorum ejus se noverit incursurum. Datum Lateran. 3. Kal. Decembris, Pontificatus nostri anno Octavo.

Pendet plumbeum signum.



Sequens diploma Seraphicus Pater petiit, & obtinuit ab Honorio III. ad compescendos Fratres Apostatas, & fugitivos, eorumque fautores, ac receptores. Plurimi enim jam emissæ professionis pertaxi, religionem deserebant, ut liquet ex ipso diplomate.

Honorius Episcopus servus servorum Dei.


*Venerabilibus Fratribus Archiepiscopis, & Episcopis, & dilectis filiis Abbatibus, Prioribus, Archidiaconis, Decanis, & aliis Ecclesiarum Prælati, ad quos literæ istæ pervenerint, sal. & Apost. bened.*

**F**ratrum Minorum continent instituta, ut nullus ad professionem sui Ordinis, nisi per annum in probatione fuerit, admittatur; ne fortè altiora se quærens, retrò tandem respiciat, tanquam in commotionem dederit pedem suum. Sed & nulli ejusdem Ordinis Fratrum post factam professionem, licet Ordinem ipsum relinquere, nec relinquentem alicubi retinere. Nosque Prioribus, & Custodibus Fratrum ipsorum concessimus, ut in discedentes liceat, donec resipuerint, Ecclesiasticam exercere censuram: quia cum probati fuerint, nullus locus est pœnitundini, quam aliàs posset levitatis occasio excusare. Nunc autem non sine admiratione accepimus, quod, sicut relatum est nobis, cum prædicti Priores, & Custodes taliter discedentes excommunicatio-



ni subjiciunt, hos aliqui vestrum tanquam excommunicatos evitare non curant: unde illos magis obstinari contingit, & distortum Fratrum Religionem, & Ordinem infamari. Quia verò, & si universis liberum sit in votendo arbitrium, nec necessitas in votis locum habeat, sed voluntas; usquè adeò tamen solutio necessaria est post votum, ut non sine propriæ salutis dispendio, alicui resilire liceat ab iis, quæ spontè, ac solemniter repromisit. quare *nemo mittens manum ad aratrum, & respiciens retrò aptus est Regno Dei*. Ananias, & Saphira, quæ abjere retrorsum, Sancto Spiritui mentientes, à conspectu Apostolorum Principis mortui scribuntur successivè delati. Universitatem vestram monemus, & hortamur in Domino per Apostolica scripta mandantes, quatenus ne quis vestrum in peccatis suis moriatur, & ut Ordo hujusmodi detractioni subiaceat, sit occasio; discedentes post professionem ab eis, præsertim excommunicatione notatos ab ipsis, evitetis omninò; quos etiam cum ab eisdem Prioribus, & Custodibus fueritis requisiti, excommunicatos nuntiare curetis; ut cum se demum cognoverint, inter homines vivere, ac humano carere solatio, ad Ordinem suum, reddendo Deo votum, quod in ejus susceptione devoverant, revertantur. Datum Lateran. 15. Kal. Januarii, Pontificatus nostri anno octavo.

Pendet plumbeum signum, habens Apostolorum facies, & inscriptionem eandem, scilicet, Honorius PP. III.



Gregorius Episcopus servus servorum Dei.

*Dilectis filiis Fratribus Minoribus  
sal. & Apost. bened.*

**N**Os attendentes vestrarum orationum suffragia plurimùm opportuna, quoniam eò efficacior esse debet vestra intercessio apud Deum, quò perfectè viventes ejus digni estis gratia potiori. Considerantes quoque vobis negandum non esse, unde nemini derogatur, dum vestra expostit Religio, ut quæ sunt etiam de gratia speciali vobis concedere debeamus. Devotioni vestræ auctoritate præsentium, vestris inclinati precibus indulgemus, ut in locis vestris liceat vobis habere Oratoria, in quibus cum viatico altari possitis Missarum solemnia, & alia divina officia celebrare, omni Parochiali jure Parochialibus Ecclesiis reservato. Et ne de hoc jure possit quæstio suboriri, illud circa oblationes, decimas, & primitias intelligimus, quæ à Laicis solent Clericis exhiberi, quibus defraudari nolumus Parochiales Ecclesias, occasione Indulgentiæ supradictæ. Nulli ergo omninò hominum liceat hanc paginam nostræ concessionis infringere, vel ei ausu temerario contraire. Si quis autem hoc attentare præsumpserit, indignationem Omnipotentis Dei, & Beatorum Petri, & Pauli Apostolorum ejus se noverit incursum. Datum Assisi 4. Id. Junii, Pontificatus nostri anno secundo.

Pendet serico laqueo innixum signum plumbeum: cum inscriptione, Gregorius PP. IX.




Gregorius Episcopus servus servorum Dei.

*Dilectis filiis Ministro Generali, & Fratribus  
Ordinis Min. S. &c.*

**R**ecolentes qualiter sancta plantatio vestri Ordinis sub B. memoriæ Patre Francisco incepit, & mirabiliter profecit per gratiam Jesu Christi, flores sanctæ conversationis longè, latèque proferens, & odores, ita quòd in deserto hujus mundi Sacræ Religionis honestas ab eodem Ordine procedere videatur; dignum esse prævidimus, & conveniens, ut pro ipsius Patris reverentia Ecclesia, in qua recondendum est corpus ejusdem, speciali prærogativa gaudeat libertatis, ut idem Pater, per quem tantus fructus provenisse dignoscitur, honorificetur etiam in hoc, quod eadem Ecclesia libertate donata, nulli alii, quàm Romano Pontifici sit subjecta. Quare sub speciali Apostolicæ Sedis tutela consistens affici non possit injuriis, sed quiete, sicut libertate plenius perfruatur. Ea propter fundum pietatis obtentu nobis oblatum pro Ecclesia, ac ædificiis construendis, ubi recondi debeat corpus Patris prædicti, in jus, & proprietatem Sedis Apostolicæ recipimus, de speciali gratia statuentes, ut prædicta Ecclesia sit omninò libera, & nulli alii, quam Apostolicæ sedi sublit. Ad indicium autem hujus libertatis ab Ecclesia Romana perceptæ, unius libræ ceræ censum persolvat Ecclesia nobis, & successoribus nostris annuatim, Nulli ergo, &c. Datum Reate 11. Kal. Nov. Pontif. nostri anno secundo.

Habet plumbeum signum. Gregorius PP. IX.




Gregorius Episcopus servus servorum Dei.

*Venerabilibus Fratribus Archiepiscopis, & Episcopis,  
& dilectis filiis Abbatibus, Prioribus, Archipresbyteris,  
Archidiaconis, Decanis, & aliis Ecclesiarum Prælati, ad quos literæ istę  
per venerint sal. & Apost. bened.*

**S**icut phialæ aureæ, quas vidit Joannes plenas odoramentorum, quæ sunt orationes Sanctorum in conspectu Altissimi, ad abolendum nostrorum criminum corruptelam, odorem suavitatis emittunt, ita saluti nostræ credimus plurimùm expedire, si eorum in terris celebrem habeamus memoriam, ipsorum merita solemnibus recolendo præconiis, quorum in Cœlis speramus intercessionibus assiduis adjuvari. Sanè cum de conversatione, vita, & meritis B. Francisci Institutoris, & Rectoris Ordinis Fratrum Minorum, qui  
juxta



juxta consilium Salvatoris , contemptis transitoriis , secundum promissionem ejusdem ad cœlestia præmia feliciter , & æterna pervenit ; cujus vita , & fama præclara , peccatorum depulsa caligine , ambulantes in regione umbræ mortis de vitiorum tenebris ad poenitentiae vitam vocat , quorum tam virorum , quàm mulierum ad fidem Ecclesiæ roborandam , & confutandam hæreticam pravitatem , vivit adhuc , & viget non modica multitudo , tam per vos , quàm per multos alios fide dignos , qui miracula , quæ Deus per illius Sancti viri merita operatur , plenius cognoverunt , certiores effecti , auditis etiam ejus virtutibus , & miraculorum insigniis , & quòd inter carnales spiritualiter , & inter homines etiam Angelicam conversationem habuisset ; qui corporaliter dissolutus , cum Christo esse meruit in cœlestibus ; ne ipsius honori debito , & gloriæ detrudere quodammodo videremur , si glorificatum à Domino permetteremus ulterius humana devotione privari : de Fratrum nostrorum consilio , & Prælatorum omnium , qui tunc temporis apud sedem Apostolicam consistebant , Sanctorum cathalogo duximus ascribendum . Cum igitur sicut lucerna , sic arserit hætenus in hoc mundo , quod per Dei gratiam jam non sub modio , sed super candelabrum meruit collocari , universitatem vestram rogamus , monemus , & attentius hortamur , per Apostolica scripta mandantes , quatenus devotionem fidelium ad venerationem ipsius salubriter excitantes , festivitatem ejus quarto nonas Octobris annis singulis solemniter celebretis , & pronuncietis constituto die similiter celebrandam , ut ejus precibus Dominus exoratus suam nobis tribuat gratiam in præsentì , & gloriam in futuro . Datum Perusii nono Kal. Martii , Pont. nostri anno secundo .



Gregorius Episcopus servus servorum Dei.

*Ministro , & Fratribus Ordinis Minorum in generali  
Capitulo constitutis sal. & Apost. bened.*

**M**irificans misericordias suas Dominus , quæ super omnia opera ejus sunt , ut unicæ suæ sponsæ renovet , sicut Aquilæ , juventutem , innovat signa , & immutat mirabilia , fulgura , & pluviam faciendo , dum Ecclesiæ filios legitimè certantes , foeliciter in Cœlo coronat , & quorum animas beata immortalitate glorificavit in patria , horum corpora miraculorum coruscatione in terra clarificans , matrem salutis gaudio reficit , & foecunditatis rore perfundit . Sic enim fides Ecclesiæ roboratur , convalescit Spes , & Charitas recalescit : sic confutatur hæretica pravitas , lapsus delinquentium cohibetur , & inducitur conversio peccatorum . Quare inter pressuras innumeras , & angustias infinitas , quas plus ferre possumus , quàm referre , consolationis , & gaudii materiam resumentes , gratias , & laudes , quas possumus referimus Redemptori , qui Beatum Franciscum Patrem nostrum , & vestrum , fortè autem magis nostrum , quàm omnium vestrum , adhuc in carne viventem insignibus præveniens muneribus gratiarum , tanta nunc eum cum ipso regnantem clarificat gloria , quòd præter alias virtutes magnificas ,  
nuper



nuper in Theutonia ipsius Sancti celebri nomine invocato , mortuum mirifice  
fulcitavit; sicut nobis est solemniter intimatum , ut nos in ejusdem Sancti ma-  
gis , ac magis pio amore succenti totis affectibus in ipsius laudibus delectemur,  
sperantes , ut quos in sæculo extra sæculum vivens tota mente dilexit , & nos  
nunc clarius amplexatur , quò illum , qui est vera charitas , viciniùs intuetur,  
pro nobis intercedere non desistat , & vos , quos idem in Christo regenerans  
in abundantia divitiarum altissimæ paupertatis reliquit hæredes , gerentes in  
intimis visceribus charitatis , ad profectum Ordinis vestri aspiramus ardentè,  
proposita nobis spe , quòd vestrarum orationum suffragiis , nostrarum toleran-  
tiæ passionum nobis provenient in salutem . Verùm ut patrem laudabiliter  
imitantes pervenire mereamini , quò ipse pervenit , universitatem vestram ro-  
gamus , & obsecramus in Domino Jesu Christo , per Apostolica scripta vobis  
mandantes , ut quemadmodum accepistis à Beatissimo Patre vestro , mortifica-  
tionem Jesu circumferentes in cordibus vestris , ut vita Jesu manifestetur in  
vobis , veræ humilitatis gloriam amplexati , armemini circumquaque inexpu-  
gnabili patientiæ armatura , obedientiam , quæ inter alias observantias regu-  
lares præcipua reputatur , nec non regularia statuta Patris prædicti inviolabi-  
liter servaturi . Cum enim spectaculum facti sitis , mundo , Angelis , & homi-  
nibus , necesse habetis taliter conversari , ut benefacientes imprudentum homi-  
num ignorantiam obmutescere faciatis , quin potius & vos bonis perseverantes  
operibus glorificetis Deum , & Beatum Franciscum dignis laudibus præconize-  
tis . Coëterum cum gloriosum Corpus Sancti prædicti ad Ecclesiam ipsius no-  
mini dedicandam cupiatis devotè transferre , nos desiderium vestrum favore  
debito prosequentes , quia dignum est , ut veneremur in terris , quem Domi-  
nus sic honorat in Cœlis , de misericordia Jesu Christi , & Beatorum Petri , &  
Pauli Apostolorum ejus auctoritate confisi , omnibus , qui ad translationis ejus  
solemnia devotè convenerint , vel usque ad Nativitatem Virginis gloriosæ  
proximè venturam ipsius Ecclesiam visitaverint , transfretantibus mare tres an-  
nos , transcuntibus Alpes duos , & coëteris unum , & qui in Anniversario  
translationis illius , usque ad octavam diem reverenter accesserint , annum  
unum similiter de injuncta sibi poenitentia misericorditer relaxamus . Datum  
Lateran. 17. Kal. Junii, Pontificatus nostri anno 4.

Pendet plumbum .

Habentur aliæ literæ Apostolicæ ejusdem Pontificis sub eodem die , & anno,  
sub eisdem verbis , usque ad illa verba , *totis affectibus in ipsius laudibus dele-*  
*ctamur* , indè sequitur . Coëterum cum dilecti filii Minister , & Fratres Mino-  
res , quos idem Sanctus instituit , divinitus inspirati gloriosum Corpus ad Ec-  
clesiam ejus nomini dedicandam transferre desiderent : nos eorum desiderium  
favore debito prosequentes , quia dignum est ; &c. sequitur eisdem verbis us-  
que ad finem .





Gregorius Episcopus servus servorum Dei.

*Universis Christi fidelibus præsentes literas  
inspecturis sal. & Apost. bened.*

**R** Ecolentes qualiter sancta plantatio Fratrum Minorum Ordinis, sub Beato Francisco bonæ Memorix incepit, & mirabiliter profecit, per gratiam Jesu Christi flores sanctæ conversationis longè, latèquæ proferens, & odores; ita quod in deserto hujus Mundi Sacræ Religionis honestas videatur procedere ab Ordine supradicto, dignum providimus, & conveniens, ut pro ipsius Patris reverentia, specialis ædificetur Ecclesia, in qua ejus Corpus debeat conservari. Cum igitur ad opus hujusmodi subventio sit fidelium opportuna, & expedire credimus salutem vestram, si exhibeatis vos in hoc devotionis filios, & manus auxilii porrigatis: universalitatem vestram rogamus, monemus, & exhortamur in Domino, atque in remissionem vobis injungimus peccatorum; quatenus eidem operi de bonis à Deo vobis collatis pias eleemosinas, & grata Charitatis subsidia erogetis, ut per subventionem vestram tam pium opus valeat consumari, & vos per hæc, & alia bona, quæ, Domino suggerente feceritis, ad æternæ possitis felicitatis bravium pervenire. Nos enim de Omnipotentis Dei misericordia, & Beatorum Petri, & Pauli Apostolorum ejus auctoritate confisi omnibus eidem operi benefacientibus quadraginta dies de injuncta sibi poenitentia misericorditer relaxamus. Datum Romæ 3. Kal. Maii, Pont. nostri anno secundo.

Pendet plumbum.

*Bulla Concistorialis ex originali, quæ servatur in  
Sacratio Assisien. in folio trium  
palmorum altitudinis.*

Gregorius Episcopus servus servorum Dei.

*Dilectis filiis Ministro Ordinis Fratrum Minorum,  
ejusquæ Fratribus morantibus apud Ecclesiam B.  
Francisci, in loco, qui dicitur Collis  
Paradisi, tam præsentibus, quàm  
futuris in perpetuum.*

**I** S, qui Ecclesiam suam semper nova prole fecundat, dignatus hæc moderna tempora prioribus conformare, B. Confessoris Francisci spiritum in charitatis amore per inspirantem gratiam excitavit, ut Apostolorum vestigia imitatus, in paupertate, in qua plus Charitas proficit, relictis omnibus,  
solum



solum sequutus fuerit æternæ beatitudinis largitorem , & velut fidelis servus , & prudens laudabiliter operatus in talentis ei creditis , fructum in Ecclesia Dei attulit copiosum . Ab ipso enim Ordinis vestri sancta plantatio , cooperante divina gratia , processum habuit , & progressum : qua palmitēs honestatis longè , latèque producens , flores protulit , & odores effudit ad resecanda nociva , & salubria inferenda . Cum igitur apud Assisium in fundo nobis , & Ecclesiæ Romanæ oblato , in loco , qui dicitur Collis Paradisi , in ejusdem Confessoris honore construatur Ecclesia , in qua recondi debet tam pretiosus thesaurus , sanctum videlicet corpus ipsius , qui in tempore iracundiæ factus est reconciliatio , ut pro peccatis populorum fieret intercessor : nos cum dignum sit , & congruens , ut eadem Ecclesia prærogativa libertatis , & honoris gaudeat propter eum , quem in Cœlis Dominus exaltavit ; pro ejus reverentia Ecclesiam ipsam sub Beati Petri , & nostræ protectione suscipimus , & præsentis scripti privilegio communimus . In primis siquidem statuentes , ut Ecclesia ipsa nulli , nisi Romano Pontifici sit subiecta , & vestri Ordinis , cujus institutor , & Pater extitit Confessor prædictus , *CAPUT* habeatur , & *MATER* , ac in ea per *Fratres ejusdem Ordinis perpetuò serviatur* . Prohibemus insuper ne quis audeat in eandem Ecclesiam excommunicationis , vel interdicti sententiam promulgare , quàm si proferre contigerit , tanquam contra Sedis Apostolicæ indulta prolatam decernimus non tenere . Pro consecratione verò Altarium , sive pro Oleo Sancto , vel quolibet alio Ecclesiastico Sacramento nullus ab eadem Ecclesia sub obtentu consuetudinis , vel alio modo quidquam valeat extorquere , sed hæc omnia gratis vobis Episcopus Diœcesanus impendat ; alioquin liceat vobis , quemcumque malueritis Catholicum adire Antistitem , gratiam , & communionem Apostolicæ Sedis habentem , qui nostra fretus auctoritate vobis quod postulatur impendat . Quod si sedes Diœcesani Episcopi fortè vacaverit , interim omnia Ecclesiastica Sacramenta à vicinis Episcopis accipere liberè , & absque contradictione possitis , sic tamen , ut hoc in posterum proprio Episcopo nullum præjudicium generetur . Quia verò interdum eadem Ecclesia non habet loci Diœcesani copiam , si quem Episcopum Romanæ Sedis , ut diximus , gratiam , & communionem habentem , & de quo plenam notitiam habeatis , per vos transire contigerit , ab eo benedictiones vasorum , & vestium , consecrationes Altarium , ordinationes Fratrum Clericorum auctoritate Apostolicæ Sedis recipere valeatis . Cum autem generale interdictum terræ fuerit , liceat vobis clausis januis , exclusis excommunicatis , & interdictis , non pulsatis campanis , suppressa voce divina officia celebrare . Paci quoque , & tranquillitati vestræ paterna in posterum sollicitudine providere volentes , auctoritate Apostolica prohibemus , ut infra clausuras locorum vestrorum nullus rapinam , seu furtum facere , ignem apponere , sanguinem fundere , hominem temerè capere , vel interficere , seu violentiam audeat exercere . Ad indicium autem hujus libertatis , ab Apostolica Sede perceptæ , unius libræ ceræ censum nobis , & successoribus nostris annis singulis persolvete . Decernimus ergo , ut nulli omnino hominum liceat præfatam Ecclesiam temerè perturbare , aut ejus bona auferre , nec ablata retinere , seu quomodolibet vexationibus fatigare , sed omnia integra conserventur , eorum , pro quorum gubernatione , ac sustentatione concessa sunt , usibus omnimodis profutura : salva Sedis Apostolicæ auctoritate . Si qua igitur in futurum Ecclesiastica , sæcularisvè persona hanc nostræ Constitutionis paginam sciens , contra eam temerè venire tentaverit ,



secundò , tertiove commonita , nisi reatum suum congrua satisfactione correxerit , potestatis , honorisque sui careat dignitate , reamque se divino iudicio existere de perpetua iniquitate cognoscat , & à Sanctissimo Corpore , & Sanguine Dei , & Domini Redemptoris nostri Jesu Christi aliena fiat , atque in extremo examine districtæ subiaceat ultioni . Cunctis autem eidem loco sua jura servantibus sit pax Domini Nostri Jesu Christi , quatenus & hic fructum benedictionis percipiant , & apud districtum judicem præmium æternæ pacis inveniant . Amen .

Ego Gregorius Catholicæ Ecclesiæ Episcopus subscripsi .

Ego Jo: Sabinen. Episcopus .

Ego Jacobus Tusculanus Episcopus .

Ad dexteram similiter cum propriis signis Cardinales Presbyteri subscripti propriis characteribus leguntur , videlicet .

Ego Thomas tit. S. Sabinæ Presbyter Cardinalis .

Ego Jo: tit. S. Praxedis Presbyter Cardinalis .

Ego Bartholomæus S. Pudentianæ Presbyter Card. & Pastor .

Ego Gutfredus tit. S. . . Presbyter Cardinalis .

Ego Sigebaldus tit. S. Laurentii in Lucina Presbyter Cardinalis .

Ego Stephanus S. Mariæ Transyberim Presbyter Cardinalis .

Ad sinistram tandem , quisque inter propria signa , subscripti leguntur Cardinales Diaconi , idest

Ego Octavianus SS. Sergii , & Bacchi Diaconus Cardinalis .

Ego Rainerius S. Mariæ in Cosmedin Diaconus Cardinalis .

Ego Romanus S. Angeli Diaconus Cardinalis .

Ego Petrus S. Georgii ad velum aureum Diaconus Cardinalis .

Ego Rainaldus S. Eustachii Diaconus Cardinalis subscripsi .

Datum Laterani per manum Martini Sanctæ Romanæ Ecclesiæ Vicecancellarii X. Kal. Maii Indiæ . 2. Incarnationis Dominicæ anno M. C C X X X . Pontificatus Domini Gregorii Papæ IX. anno quarto .

Habet pendulum signum plumbeum , serico laqueo obductum , referens ex una parte facies SS. Apostolorum Petri , & Pauli , & ex alia inscriptionem .

Gregorius PP. IX.

Signum Summi Pontificis , *Fac mecum Domine signum in bonum .*





*Bulla Canonizationis B. P. Francisci, peractæ à Gregorio IX. Anno 1228, quæ habetur in Regesto Vaticano, num. 31. Et in Bullario Laertii Cherubini sub eodem Papa. Tomo I. Num. 2. Pag. 98.*

Gregorius Episcopus servus servorum Dei, &c.

**M**ira circa nos divinæ pietatis dignatio, & inæstimabilis dilectio charitatis, qua filium pro servo tradidit redimendo, dona suæ miserationis non deserens, & vineam dextera ejus plantatam continua protectione conservans, in illam, qui salubriter ipsam excolant, evellentes sarculo, ac vomere, quo Samgar sexcentos Philisthæos percussit, spinas, & tribulos ex eadem, operarios etiam in undecima hora transmittit, ut superfluitate palmitum refecata, & vitulaminibus spuriiis radices altas nondantibus, nec non sentibus extirpatis, fructum suavem afferat, & jucundum, qui prælo patientiæ defœcatus, in æternitatis cellarium transferatur. Impietate profectò velut igne succensa, & frigescente charitate multorum, in ejusdem maceriam diruendam, irruentibus Philistæis potione terrenæ cariem dentibus voluptatis.

§. 1. Ecce in hora undecima Dominus, qui cum diluvii aqua terram deleret, justum per lignum, contemptibilem gubernavit, super sortem justorum virgam peccantium non relinquens, excitavit servum suum Beatum Franciscum, virum utique secundum cor suum, apud cogitationes divitum lampadem quidem contemptam, sed paratam ad tempus statutum, illam in vineam suam mittens, ut ex ipsa spinas, & vepres evelleret, prostratis illam impugnantibus Philistæis, illuminando patriam, & reconciliari Deo, exhortatione sedula commonendo.

§. 2. Qui audita interiùs voce invitantis amici, impiger surgens, mundi vincula blandientis, quasi alter Sampson, gratia divina præventus dirupit, & spiritu fervoris concepto, asinique arrepta mandibula, prædicatione siquidem simplici, nullis verborum persuasibulum humanæ sapientiæ coloribus adornata, sed tamen Dei virtute potenti, qui infirma mundi eligit, ut fortia quæcumque confundat, non tantum mille, sed multa Philistinorum, eo, qui tangit montes, & fumigant, favente, prostravit, & in spiritus servitutem redegit, carnis illecebris antea servientes. Quibus vitiis mortuis, & Deo viventibus, jam non ipsis, quorum pars pessima periit, ex mandibula ipsa egressa copiosa est aqua, reficiens, abluens, & fœcundans lapsos, sordidos, & arentes, quæ in vitam æternam saliens absque argento, & commutatione aliqua potest emi, cujus rivuli longè, latèque diffusi, vineam irrigant usque ad mare palmites, & usque ad flumen propagines extendentem.

§. 3. Hic denique Patris nostri Abrahamæ imitatus vestigia, mente de terra, & cognatione sua, necnon domo patris ejus egrediens, iturus in terram quam sibi Dominus, divina inspiratione monstrarat, ut expeditiùs curreret



ad bravium vocationis cœlestis, & per angustam portam posset facilius introire, sarcinam terrenæ substantiæ deposuit, se illi conformans, qui cum dives esset, pro nobis factus est pauper, eamque dispersit, dedit pauperibus, ut sic ejus justitia in sæculum sæculi permaneret. Et in terram visionis accedens, super unum sibi montium demonstratum, videlicet excellentiam fidei, carnem suam, quia filiam unigenitam, quæ ipsum interdum deeeperat, cum Jepte Domino in holocaustum obtulit, igne supposito charitatis, illam fame, siti, frigore, ac nuditate, vigiliis multis, & jejuniis macerando, quæ cum vitiis, & concupiscentiis crucifixæ, dicere poterat cum Apostolo: Vivo ego, jam non ego, vivit autem in me Christus: quoniam jam non sibi vixerat, sed Christo potius, qui pro peccatis nostris mortuus est, & resurrexit propter justificationem nostram, ut nullatenus peccato ulterius serviamus. Vitia quoque supplantans, & contra mundum, carnem, & potestates aereas, luctamen assumens viriliter, uxore, villa, bobus, à coena magna retrahentibus invitatos, penitus abdicatis, cum Jacob Domino jubente surrexit, & gratia spiritus septiformis accepta, octoque sibi assistentibus Beatitudinibus Evangelicis, Bethel domum Dei, quam seipsum præparavit eisdem per quindecim gradus virtutum, qui mysticè in psalterio continentur, ascendit. Et ibidem Altare cordis Domino construens, aromata devotarum orationum obtulit super eo, per manus Angelicas in conspectu Domini deferenda, concivis Angelicus mox futurus.

§. 4. Ne verò sibi soli proficeret in monte, tantummodo Rachel amplexibus inhærendo, contemplationi pulchræ quidem, sed sterili, ad Liæ interdictum descendit cubiculum, minaturus gregem gemellis fœtribus fœcundatum ad interiora deserti, pro vitæ pascuis perquirendis, ut illic ubi manna cœlestis dulcedinis reficit, à sæcularium strepitu segregatos, cum lacrymarum effusione semina sua mittens, cum exultatione manipulos, ad æternitatis horrea reportaret, cum populi sui principibus collocandus, corona justitiæ coronatus. Qui nimirum non quæ sua sunt quærens, sed potius quæ sunt Christi, & eidem velut apīs argumentosa deserviens, nec non quasi stella matutina in medio nebulæ, ac quasi Luna plena in diebus suis, & sicut Sol in Ecclesia Dei fulgens, lampadem, & tubam in manus assumpsit, ut lucentium operum documentis humiles attraheret ad gratiam, & protervos à noxiis retraheret excessibus, dura increpatione terrendo. Ac sic virtute, charitatis afflatus, in castra Madianitarum, Ecclesiæ judicium declinantium, per contemptum, eo juvante, qui dum virginali utero clauderetur, mundum suo circuibat imperio universum, intrepidus irruit, & abstulit arma, in quibus confidebat fortis armatus, atrium suum custodiens, & distribuit spolia, quæ tenebat, ejusque captivitatem captivam, reduxit in obsequium Jesu Christi.

§. 5. Hoste itaque triplici in terra positus superato, Regno Cœlorum, vim intulit, & illud rapuit violenter, & post hujus vitæ quamplura gloriosa certamina, mundum triumphans, fœliciter migravit ad Domivium, multos præveniens scientia præditos scienter nescius, & sapienter indoctus.

§. 6. Sanè licet ejus vita tam sancta, tam strenua, & præclara sibi sufficeret, ad obtinendum consortium Ecclesiæ triumphantis; quia tamen militans, quæ solummodo videt in facie, non præsumit de his, qui de suo foro non sunt, auctoritate propria judicare, ut illos pro vita tantum venerando assumat, præsertim quia nonnunquam Angelus Satanzæ in lucis Angelum se transformat,

omni-




omnipotens, & misericors Deus, de cuius munere venit, quod prædictus famulus Christi, dignè sibi, & laudabiliter deservivit, tantam lucernam, absconditam sub modio, remanere non patiens, sed eam volens super candelabrum collocari, his, qui sunt in domo, luminis solatium præbituram, vitam ejus sibi fuisse acceptam, & ipsius memoriam esse à militanti Ecclesia venerandam, multis, & præclaris miraculis declaravit.

§. 7. Cum igitur gloriøsæ vitæ ipsius insignia ex multa familiaritate, quam nobiscum habuit in minori officio constitutis, plenè cognita nobis essent, & de miraculorum coruscatione multiplici, per testes idoneos nobis facta fuerit plena fides, confidentes per Dei misericordiam, nos, & gregem nobis commissum, ejus suffragiis adjuvari, & quem familiarem habuimus in terris, habere patronum in Cœlis, habito Fratrum nostrorum consilio, & assensu, ipsum adscribi decrevimus Sanctorum Catalogo venerandum.

§. 8. Statuentes, ut IV. Nonas Octobris, die videlicet, quo à carnis ergastulo absolutus, ad ætherea Regna pervenit, ab universali Ecclesia, natalitia ejus devotè, ac solemniter celebrentur.

§. 9. Quocirca universitatem vestram rogamus, monemus, & exhortamur in Domino, per Apostolica vobis scripta mandantes, quatenus die prædicto in commemoratione ipsius, divinis laudibus alacriter insistentes, ejusdem patrocinia humiliter imploretis, ut ipsius intercedentibus meritis, ad ejus mereamini consortium pervenire: illo præstante, qui est benedictus in sæculum sæculorum. Amen.

Datum Perusii XIV. Kal. Augusti, Pont. nostri anno secundo.



*Diploma ejusdem Summi Pontificis, pro Canonizatione  
ab ipso facta Sancti Antonii Ulyssiponensis, seu  
Patarvini, quod servatur in Sacrario Reli-  
quiarum Assisien. Basilicæ.*

Gregorius Episcopus servus servorum Dei.

*Venerabilibus Fratribus Archiepiscopis, & Episcopis,  
& dilectis filiis Abbatibus, Prioribus, & aliis  
Ecclesiarum Prælati præsentem paginam  
inspecturis sal. & Apost. Bened.*

**C**Um dicat Dominus per Prophetam, dabo vos cunctis populis in laudem, & gloriam, & honorem; & per se polliceatur, quod justî, sicut Sol in conspectu Dei fulgebunt; pium, & justum est, ut quos Deus merito sanctitatis coronat, & honorat in Cœlis, nos venerationis officio laudemus, & glorificemus in terris; cum ipse potius laudetur, & glorificetur in illis, qui est laudabilis, & gloriosus in sæcula, & in sanctis. Ut enim  
sua



suæ virtutis potentiam mirabiliter manifestet, & nostræ salutis causam misericorditer operetur, fideles suos, quos semper coronat in Cœlo, frequenter etiam honorat in sæculo, ad eorum memorias signa faciens, & prodigia, per quæ pravitas confundatur hæretica, & fides Catholica confirmetur: fideles, mentis torpore discusso, ad boni operis excitentur instantiam, hæretici, depulsa, in qua jacent, cæcitatæ caligine, ab invia reducantur ad viam, & Judæi, atquæ Pagani, vero lumine cognito, currant ad Christum, lucem, viam, veritatem, & vitam. Unde nos charissimi, & si non quantas debemus, quantas tamen possumus, gratias agimus gratiarum omnium largitori; quòd diebus nostris, ad confirmationem Catholicæ Fidei, & ad confusionem hæreticæ pravitatis, evidenter innovat signa, & mirabilia potenter immutat, faciens illos coruscare miraculis, qui fidem Catholicam tam corde, quàm ore, nec non & opere roborarunt. De quorum numero, Sanctæ Memoræ B. Antonius de Ordine Fratrum Minorum, qui olim degens in sæculo magnis pollebat meritis, nunc vivens in Cœlo, multis coruscat miraculis, ut ejus sanctitas certis inditiis comprobetur. Cùm enim dudum Venerabilis Frater noster Episcopus, & dilecti filii, Potestas, & Commune Paduanorum nobis per nuncios suos, & literas humiliter supplicassent, ut cum Dominus eidem Sancto tantam contulerit gloriam, ut ad dandam scientiam primæ stolæ immortalitatis ipsius, & experimentum evidens de secunda, sepulchrum ejus tot, & tantis daret coruscare miraculis, quod ejus inter alios Sanctos non invocari suffragia est indignum: de ipsius miraculis testes recipi mandarem: nos attendentes, quòd licet ad hoc, ut aliquis Sanctus sit apud Deum in Ecclesia triumphante, sola sufficiat finalis perseverantia, juxta illud, Esto fidelis usque ad mortem, & dabo tibi coronam vitæ; ad hoc tamen, ut Sanctus habeatur apud homines in Ecclesia militante, duo sunt necessaria, virtus morum, & veritas signorum, merita videlicet, & miracula: ut hæc, & illa sibi ad invicem contestentur, cum nec merita sine miraculis, nec miracula sine meritis plenè sufficiant, ad perhibendum inter homines testimonium sanctitati, sed cum merita sana præcedunt, & clara succedunt miracula, certum præbent indicium Sanctitatis; ut nos ad ipsius venerationem inducant, quem Deus ex meritis præcedentibus, & signis subsequenter exhibet venerandum; quæ duo ex verbis Evangelistæ plenius colliguntur: Illi autem profecti prædicaverunt ubique, Domino cooperante, & sermonem confirmante sequentibus signis: eidem Episcopo, & dilectis filiis, Fratri Jordano Sancti Benedicti, & I. Sancti Augustini Prioribus Ordinis Fratrum Prædicatorum Paduan. receptionem testium de miraculis ejusdem Sancti duximus committendam. Nuper autem tam per relationem prædictorum Episcopi, & Priorum, quàm per depositiones testium super hoc receptorum, de ipsius virtutibus, & miraculorum insigniis certiores effecti, & experti aliquando per nos ipsos sanctitatem vitæ, & admirabilem conversationem ipsius, utpotè qui apud nos fuit aliquandiu laudabiliter conversatus: eisdem Episcopo, Potestate, & Commune prædictis, per solemnes nuncios suos, & literas, nobis cum instantia denuò supplicantibus, quòd eundem Fratrem Sanctorum Catalogo adscribere curaremus: ut auctoritate (sicut convenit) Apostolica dignus honor illi exhiberetur in terris, qui, sicut claris signis, & evidentibus argumentis apparet, honoratur in Cœlis: ipsum, qui corporaliter dissolutus cum Christo esse meruit in cœlestibus, ne illius honori, & debito, & gloriæ detrudere quodammodo videremur, si glorificatum à Domino permitteremus ulterius humana devotione privari: de Fratrum nostrorum consilio, & Prælatorum omnium tum apud Sedem Apostolicam existentium cata-



Iogo Sanctorum duximus adscribendum. Cum igitur secundum Evangelicam veritatem, nemo accendat lucernam, & ponat eam sub modio, sed super candelabrum, ut omnes, qui in domo sunt, lumen videant, & prædicti Sancti lucerna sic arserit hætenus in hoc mundo, quod per Dei gratiam, jam non sub modio, sed super candelabrum meruerit collocari: Universitatem vestram rogamus, monemus attentius, & hortamur per Apostolica vobis scripta mandantes, quatenus devotionem fidelium ad venerationem ipsius salubriter excitantes, festivitatem ipsius Id. Junij annis singulis celebretis, & faciatis solemnius celebrari; ut ejusdem precibus Dominus exoratus, gratiam in præsentem, & gloriam nobis tribuat in futuro. Nos autem cupientes sepulchrum tanti Confessoris, qui miraculorum fulgoribus illustrat Ecclesiam generalem, congruis honoribus frequentari; omnibus verè poenitentibus, & confessis, illud in festivitate ipsius usque ad octavum diem annis singulis cum reverentia debita visitantibus, de Omnipotentis Dei misericordia, & Beatorum Petri, & Pauli Apostolorum ejus auctoritate confisi, annum unum de injuncta sibi poenitentia misericorditer relaxamus. Datum Spoleti 9. Kal. Julij, Pontificatus nostri anno sexto.

Pendet serico laqueo transfixum plumbeum signum.

Eidem Diplomati insutum est pergamenum modicum, in quo leguntur Oratio, secreta, & Postcommunio Missæ ejusdem Sancti, & videtur character ejusdem scriptoris. Puto omnia prædicta à Summo Pontifice Gregorio IX. composita, & ad Fratres Assisii degentes recitanda transmissa.

Gregorius Episcopus servus fervorum Dei.

*Perusino, & Spoletano Episcopis,  
sal. & Apost. Bened.*

**S**peravimus hætenus, ut Potestas, Consilium, & Populus Assisien. multiplicem gratiam, qua eos adhuc in minori officio constituti prævenimus, & sumus continuo prosequuti, sicut convenit, agnoscentes, sectarentur cognitam, reverenter nostris beneplacitis omnimodis obsequendo, ut semper in gratiam crescerent ampliorem. Sed, quod non sine amaritudine referimus vehementi, ipsi gratis ingrati, nobis malum pro bono iniqua vicissitudine rependentes, in eo nos acriter provocarunt, in quo debuerant nobis summo studio potissimè complacere. Cum enim Beatum Franciscum glorificatum in Cælis, clarificantes in terris ascripserimus catalogo Confessorum, & in honorem ejus Ecclesiam fundari volentes, de manibus nostris lapide ibi primario posito, ipsamque duxerimus eximendam, ut libertatis titulis decorata semper niteretur celebris, & insignis; ipsi non attendentes innumera bona, quæ Civitati eorum, quæ etiam universis, & singulis exinde poterant provenire, omnia perturbarunt, omnia confuderunt, in animarum suarum periculum, famæ dispendium, & jacturam etiam temporalem. Sciunt siquidem quod nos Sanctissimum Corpus Confessoris prædicti pio amore venerabiliter amplexantes, translationem ejus dilectis filiis Generali Ministro, & quibusdam aliis Fratribus Ordinis



dinis Minorum, viris religiosis, & timoratis, tanquam Vicariis nostris, commisimus confidenter, cum non nisi auctoritate Apostolicæ Sedis esset translatio facienda, ibique illam concessimus Indulgentiam, quæ limina Beatorum Petri, & Pauli visitantibus concedi consuevit: sed ipsi vesano spiritu concitati, non attendentes quòd sacra mysteria, non nisi à Sacris sunt tractanda ministris, prædictum Corpus ausu sacrilego rapientes in superbia, & tumultu translationis mysterium damnabiliter prophanarunt, non passi à Fratribus prædicto Sancto venerationem debitam exhiberi. O quæ insania ipsos taliter fascinauit, ut Sacerdotale sibi officium usurpantes rem divinam, Deo contrectarent invito! Nonne sciunt quòd Oza inclinatæ Arcæ Domini manum apponens, à Domino percussus interiit, qui videbatur utcunque verosimiliter excusandus, quia ne Arca caderet inclinata, manum apposuit adjutricem? Nonne audierunt, quòd Ozias ingressus templum Domini, quia super Altare tymiamatis incensum voluit adolere, percussus est lepra; ut perfectè detur intelligi, quòd contrectatio divinorum est Laicis penitus interdicta? Nonne possunt ex simili culpa similes pœnas formidare? Coeterum ut sciant quàm graviter nos, imò Dominum offenderunt, auctoritatem nobis in Sancto prædicto volentes adimere, nos prædictam Ecclesiam, quam exemimus, Episcopi, & Capituli Assisiatis subicimus ditioni, prohibentes, ut ibi de cœtero nullatenus Generale Capitulum celebretur, nec aliqui de Fratribus commorentur, & locum supponimus Ecclesiastico interdicto, donec nobis de tanta injuria satisfiat. Ne verò contra eos severius procedere compellamur, universitati eorum nostris damus literis firmiter in præceptis, ut infra quindecim dies post susceptionem earum, viros idoneos universitatis nomine ad nostram præsentiam destinare procurent, paratos satisfactionem plenariam exhibere, ac de stando mandatis nostris præstare sufficientes cautiones. Quocirca Fraternitati vestræ per Apostolica scripta mandamus, quatenus si Potestas, Consilium, & populus prædicti præceptum nostrum neglexerint adimplere, vos in Potestatem, & Consilium excommunicationis, & in terram interdicti sententias, appellatione postposita, promulgantes, faciatis eas usque ad satisfactionem condignam inviolabiliter observari. Dat. Lat. 16. Kal. Julii, Pont. nostri anno quarto.

Generalis, de quo loquitur Gregorius erat F. Helias, qui vocatur ab eo Minister, & tamen scriptores aliqui dicunt non fuisse tunc Ministrum, sed Vicarium. At Pontifici standum potius, quàm ipsis.

Ad sunt ejusdem Pontificis literæ Apostolicæ pro veritate Sacrorum Stygmatum, quam temerè impugnabant Episcopus Olomucensis, & Prædicatores quidam in Moravia. Incipiunt.

Gregorius, &c. Ad perpetuam rei memoriam. Venerabili Fratri Episcopo Olomucensi sal. &c. Usque ad terminos Orbis terræ præsumptionis tuæ signa protendens, &c. Quibus Apostolica auctoritate, fervidoque zelo in eundem invehit, &c. Dat. Viterbii 2. Kal. Aprilis, Pont. anno XI.

Aliæ, Universis Christifidelibus, &c. Confessor Domini gloriosus B. Franciscus, &c. Dat. Viterbii, Nonis Aprilis, Pont. anno XI.

Et aliæ Prioribus, & Provincialibus Ordinis Fratrum Prædicatorum. Non minus dolentes accepimus, quàm mirantes, &c. Dat. 2. Kal. Aprilis, Pontific. anno XI.

Has, & alias ad eandem materiam spectantes retuli ad literam lib. 1. tit. 46.




Gregorius Episcopus servus servorum Dei.

*Dilectis filiis Fratri Heliae Ordinis Fratrum Minorum Generali Ministro, & cœteris Provincialibus Ministris ejusdem Ordinis ad Generale Capitulum congregatis, sal. & Ap. ben.*

**P**Er mare magnum, & manibus spatiosum, inter innumera perversitatum reptilia navigantes, tot adversis ventorum flatibus hodie quatimur, tot fluctuum turbulentiae elationibus deterremur, quod Jesum iis excitare compellimur, & pulsare clamoribus, Domine, nisi festinaveris nos salvare, perimus. Confidimus enim, quod is, qui non dormit, sed quasi dormiens prorogata misericordia propter culpas, anxietates, quas patimur, quodammodo non intendit, nequaquam supplicatione indignatur, cum nos monitis, & exemplis instruat, ut rogetur. Vobis ergo, qui spretis campestris terrae delitiis, illum montem per ducatum spiritus ascendistis, qui prophetico semper sarculo foditur, ut nec terror veprium, & spinarum, nec auditionis male sententia timeatur; qui dominicis pedibus primæ contritionis unguento perfusis, & pro beneficiorum susceptione manibus osculatis, ad unctionem capitis per laudis sacrificium pervenistis; & eò ad impetrandum potentiores facti esse credimini, quod familiaris estis Domini potentias introgressi, fiducialiter id clamoris genus injungimus; & tam generale totius Ecclesiæ Sacrosanctæ, quam præsulatus nostri speciale negotium commendamus instantius oraturis; & Dominus Jesus Christus, quem constat non dissentionis Deum esse, sed pacis, & à forinsecis insidiis nos defendat, & custodiat ab internis; citò sub pedibus nostris adversarium conterat, & spiritum Paraclitum non subducat. Ad hæc unicam petitionem universitati vestræ porrigimus, ut bonæ memoriæ A. Magdeburgen. Archiepiscopo, qui nuper objens in literis ad nos missis, supremæ petitionis elogium, velut ultimæ voluntatis indidit testamentum, pro Christianis exequiis, tale devotionis obsequium impendatis, ut pro animæ suæ remedio, in toto Ordine Missam unam sacerdotum singuli celebrent, & quilibet fratres aliorum graduum septem psalmos poenitentiae cum Letania, & fratres laici septies Dominicam orationem decantent. Datum Laterani 2. nonas Julii Pontif. nostri anno 7.

Plumbea Bulla per cordulam pendet.

Scriptores aliqui asserunt hoc anno non fuisse Generalem Heliam, sed Jo: Parentem; usque ad annum 1236. At Pontificis assertum eos erroris, vel mendacii convincit. Jo: enim non sex, sed tribus annis Præfecturam tenuit, cui Helias, qui eum præcesserat in supremo Ministerio, etiam successit.



Sequentes literæ missæ ab Innocentio Pontifice, antequàm coronaretur, sunt in plicaturis obrosæ.



Innocentius Electus Episcopus servus servorum Dei.

*Dilectis filiis Custodi, Guardian. & Fratribus  
Minoribus de Assisio ad rerum nostrarum  
custodiam deputatis. sal. & Ap. ben.*

**D**iscretionis vestrae praesentium tenore mandamus, quatenus res nostras, & Romanae Ecclesiae apud vos depositas dilecto filio Joanni familiari nostro, earundem latori, quem ad ipsas recipiendas à vobis, & nobis deferendas fideliter destinamus, praesentibus assignari curetis . . . . & cujuslibet difficultatis obstaculo expeditas. Nec miremini quod Bulla non habeat . . . . nomen nostrum, . . . . ante benedictionis, & coronationis nostrae solennia transmittuntur, quia f . . . . erunt haec in Romanos Pontifices electi consueverunt, in bullando literas ante suae benedictionis, & coronationis diem . . . . odum hujusmodi observare. Datum Viterbii 7. Id. Februarii, suscepti à nobis . . . . atus officii anno primo.

Pendet Bulla plumbea referens Apostolorum Petri, & Pauli vultus ex una, & ex alia plana sine ulla Inscriptione.

~~~~~

Innocentius Episcopus servus servorum Dei.

*Dilectis filiis Ministro, & Fratribus S. Francisci  
Assisien. Ordinis Fratrum Minorum,  
sal. & Apost. bened.*

**L**icet is, de cujus munere venit, ut sibi à fidelibus suis dignè, ac laudabiliter serviatur, ex abundantia pietatis suae, quae merita supplicum excedit, & vota, bene servientibus multò majora tribuat, quam valeant promereri: nihilominus tamen desiderantes reddere Domino populum acceptabilem, fideles Christo, ad complacendum ei, quasi quibusdam illektivis muneribus, indulgentiis scilicet, & remissionibus invitamus; ut exinde reddantur divinae gratiae aptiores. Cupientes igitur, ut Ecclesia vestra, quae in Beati Francisci, cujus in ea gloriosum corpus requiescit, honorificentia est constructa, congruis honoribus frequentetur, omnibus verè poenitentibus, & confessis, qui Ecclesiam ipsam in ejusdem Sancti festivitate, ac usque ad quindecim dies eandem immediate sequentes annis singulis devotè, ac venerabiliter visitaverint de Omnipotentis Dei misericordia, & Beatorum Petri, & Pauli Apostolorum ejus auctoritate confisi, annum unum, & quadraginta dies de injunctis sibi poenitentiis misericorditer relaxamus. Dat. Perusii, Id. Februarii, Pont. nostri anno nono.


Pendet Plumbea Bulla cum Inscriptione, Innocentius PP. IV.



Innocentius Episcopus servus servorum Dei.

*Universis Christi fidelibus, præsentis literas inspecturis,  
sal. & Apost. bened.*

**S**I populus Israeliticus, qui sub legis umbra vivebat, frequenter accedens oraturus ad locum, quem elegit Dominus, ut ibi poneret nomen suum, vota, & donaria plurima offerebat; tanto fortius populus Christianus, cui apparuit benignitas, & humanitas Salvatoris, tenetur loca, in quibus Christus ad abolendam nostrorum criminum corruptelam immortaliter, & incorruptibiliter vivens quotidie immolatur, devotis obsequiis visitare, ac ibidem offerre munera cum animi puritate, quanto certiora sunt experimenta rerum, quam ænigmata figurarum. Cupientes igitur ut Ecclesia in honorem Beatissimi Confessoris Christi Francisci Assisiæ constructa, in qua pretiosum Corpus ipsius multis coruscans miraculis requiescit, & quam nos ipsi ad honorem Dei, & Confessoris ejusdem duximus dedicandam, congruis honoribus frequentetur: universitatem vestram monemus, & hortamur in Domino, ac in remissionem vobis injungimus peccatorum, quatenus ad Ecclesiam ipsam imploraturi à Domino vestrorum veniam delictorum in devotione, ac humilitate spiritus accedentes, digna ibidem vota, & munera pro delictorum vestrorum remediis offeratis. Nos enim de Omnipotentis Dei Misericordia, & Beatorum Petri, & Pauli Apostolorum ejus auctoritate confisi, omnibus verè poenitentibus, & confessis, qui eandem Ecclesiam in Anniversario Dedicationis ipsius, & in quindecim diebus sequentibus annis singulis venerabiliter visitarint, & ibidem manum porrexerint pietatis, duos annos, & octoginta dies de injunctis sibi poenitentiis misericorditer relaxamus. Datum Assisi 3. Id. Junii, Pont. nostri anno Decimo.



Innocentius Episcopus servus servorum Dei.

*Dilectis filiis, Generali, & Provincialibus Ministris,  
ac aliis Fratribus Ordinis Fratrum Minorum,  
sal. & Apost. bened.*

**C**Um tanquam veri, & fideles Christi ministri elegeritis vobis in domo Domini mansiones; dignum esse credimus, ut habitacula vestra inter alias honorabiles Congregationes fidelium statuamus. Hinc est igitur, quod vestris supplicationibus inclinati præsentium auctoritate decernimus, ut Ecclesiæ vestræ omnes, ubi Conventus existunt, Conventuales, vocentur: concedentes vobis nihilominus, ut in ipsis Ecclesiis ad opus Fratrum, & conversorum vestrorum habere liberè cimiteria valeatis. Nulli ergo omnino hominum liceat hanc paginam nostræ Constitutionis, & concessionis infringere, &c. Si quis autem, &c. Dat. Perusii, 12. Kal. Sept. Pontif. nostri anno 10. Subest Plumbea pendens Bulla. Innocentius PP. IV.



Innocentius Episcopus servus servorum Dei.

*Dilectis filiis Guardiano, & Fratribus Ordinis Fratrum Minorum Sancti Francisci Assisiat.  
sal. & Apost. bened.*

**V**estrae meritis Religionis inducimur, ut vos prosequamur gratia, quæ vestris esse dignoscitur necessitatibus opportuna. Hinc est, quod nos paupertati, quam propter Christum voluntariè sustinetis, paterno compatiens affectu, ut de usuris, rapinis, & aliis malè aquisitis, dummodo ij, quibus ipsorum restitutio fieri debet, nequeant invenire, nec non de quibuslibet legatis indistinctè in pios usus relictis, redemptione votorum, Jerosolymitan, dumtaxat excepto, usque ad quingentas libras recipere valeatis, vobis auctoritate præsentium concedimus facultatem; si pro similium receptione aliàs non sitis à nobis hujusmodi gratiam consequuti. Ita quod voventes ad exequutionem votorum hujusmodi, & alii ad restitutionem aliam faciendam per ea, quæ vobis contulerint, minimè teneantur, sed ad restituendum residuum aquisorum, remaneant nihilominus obligati. Nulli ergo omnino hominum liceat hanc paginam nostræ concessionis infringere, vel &c. Si quis autem &c. Datum Later. 6. Id. Februarii, Pontificatus nostri anno Undecimo.

Bulla Plumbea.

Innocentius PP. IV.




Innocentius Episcopus servus servorum Dei.

*Dilecto filio Fratri Philippo de Campello Ordinis Minorum Magistro, & Præposito operis  
Ecclesiæ Sancti Francisci Assisiat.  
sal. & Apost. bened.*

**D**Ecet, & expedit honorificas illis ædificare Basilicas, qui suis gloriosis meritis præcellsum aulae coelestis habitaculum sunt adepti, ut qui digni habiti sunt honore in regione superna perpetuò sublimari, omnimoda in terris devotione à Christi fidelibus meritò venerentur; fiantque sibi ab illis Ecclesiæ celebres, in quibus convenienter adoretur Omnipotens, & eorum memoria, solemniter percolatur; ut dum sic decor domus Dei diligitur, & tabernaculum studiosè componitur suæ laudis, ejus propitiatio Sanctorum ipsorum intercessionibus facilius, & uberius impetretur. Hinc est, quod cum venerabilis Ecclesia S. Francisci Assisiat. nondum sit decenti, prout convenit, opere consummata, Nos cupientes, ob reverentiam Sancti ejusdem seduli apud Deum pro populo Christiano Patroni, dictam Ecclesiam, & nobili compleri structura, & insignis præ eminentia operis decorari; ut oblationes in pecunia, tu, & alii, qui



qui Præpositi operis ejusdem Ecclesiæ pro tempore fuerint , ad Altaria ipsius Ecclesiæ , ac alias etiam pro eodem opere recipere valeatis , in idem opus totaliter , & fideliter expendendas , prout Ven. Frater noster Ostien. & Velle-tren. Episcopus , vel alius Romanæ Ecclesiæ Cardinalis , qui Ordinis Fratrum Minorum Protector extiterit , ordinandum , vel disponendum duxerit . contra-riis ejusdem Ordinis statutis , & inhibitionibus Generalis , seu Provincialis Ministrorum , aut Custodis , vel Guardiani loci , seu aliorum Fratrum ipsius Ordinis nequaquam obstantibus , auctoritate Apostolica indulgemus . Nulli ergo omnino hominum liceat hanc paginam nostræ concessionis infringere , vel ei ausu temerario contraire . Si quis autem hoc attentare præsumpserit , indi-gnationem Omnipotentis Dei , & Beatorum Petri , & Pauli Apostolorum ejus se noverit incursum . Præsentibus post vigesimum quintum annum minimè valituris . Datum Assisi , 6. Id. Julii , Pontificatus nostri anno Undecimo , Plumbeum signum &c.



Innocentius Episcopus servus servorum Dei.

*Dilectis filiis Fratribus Minoribus Ecclesiæ Beati  
Francisci de Assisio, sal. & Apost. bened.*

**D**ignum existimamus , & congruum , quòd loca sacra , & religione conspi-cua , sicut devotione coluntur fidelium , sic specialibus honorentur gra-tiis , & insigniis decentibus decorentur , ut ex iis salutare Catholicæ plebis affectus ad ipsorum venerationem locorum vehementius inardescant ; & sicut ipsa devotio habita circa illa est ad impendendam eis honorabilem gratiam indu-civa , sic & exhibita ipsis gratia singularis sit allectiva fidelium ad exhibendam illis reverentiam ampliolem . Hinc est , quòd cum Ecclesia vestra B. Franci-sci de Assisio specialis quidem Apostolicæ sedis , & ad eam nullo pertинens mediante , inter cœteras Regulares venerabilis habeatur , & ad eam pro ipsius pretiosi Confessoris honore , cujus corpus requiescit ibidem , Christiani populi undique confluat multitudo ; Nos ob hoc ipsam , quam amore præcipuo pro-sequimur , & favore , volentes præ aliis Ordinis Fratrum Minorum Ecclesiis privilegiis , & gratiis insignire , ut eadem Ecclesia Libros , Calices , Thuri-bula , Cruces , Bacilia sive de auro , sive de argento , Tunicas , Dalmaticas , Planetas , & Cappas , seu pluvialia , & quæque indumenta , & paramenta , tam serica , quàm alia , sive ad Altarium , & Personarum , sive ad alium ip-sius Ecclesiæ ornatum ; Campanas quoque magnas , & parvas , & cœtera ornamenta , & vasa Ecclesiastica liberè , ac specialiter habere valeat , auctori-tate Apostolica indulgemus ; districtius inhibentes , ne Generalis , vel Provin-cialis Minister , seu Custos , aut Guardianus , qui pro tempore fuerint , vel quivis frater , seu Capitulum Generale , vel Provinciale , aut particulare ip-sius Ordinis , seu quælibet alia Persona Ecclesiastica , vel secularis ea , quæ ipsa Ecclesia de prædictis nunc habet , vel habebit in posterum , & quæ pro iis dabuntur , vel offerentur eidem , sibi auferre , vel exinde amovere , aut alibi transferre , seu pignori obligare , vel quoquo modo distrahere , aut quomodo-libet alienare præsumat , absque mandato Sedis Apostolicæ speciali , & decer-nentes ,



nentes, si secus præsumptum fuerit, irritum, & inane. Non obstantibus quibuscunque statutis, vel Constitutionibus contrariis ipsius Ordinis, Confirmatione Apostolica, vel quacunque firmitate alia roboratis. Nulli ergo omnino hominum liceat hanc paginam nostræ concessionis, inhibitionis, & constitutionis infringere, vel, &c. Si quis autem, &c. Datum Assisi, 17. Kal. Augusti, Pontificatus nostri anno Undecimo.

Subest Plumbea Bulla.

Innocentius PP. IV.



Innocentius Episcopus servus servorum Dei:

*Dilectis filiis Ministro, & Fratribus S. Francisci  
Assisien. de Ordine Fratrum Minorum,  
sal. & Apost. bened.*

**C**onsecrationes altarium, in quibus Christus mirabiliter vivens ad nostrorum abolendam criminum corruptelam in ministerio immolatur Altaris, Christianus populus cum puritate animi venerari tenetur, dedicando membra sua Domino, servitura justitiæ in sanctificatione, quæ prius iniquitati, & immunditiæ serviebant, ut sic quæ per Christi ministros in Ecclesiis exhibentur visibiliter, mysticè in templo fidelis animæ peragantur. Cupientes itaque, quòd Ecclesia vestra, quæ per nos ad honorem Dei, & Beati Francisci Confessoris in prima Dominica ante festum Ascensionis Domini extitit dedicata, congruis honoribus à Christi fidelibus frequentetur, & frequentantes pro tali solemnitate, quam peragunt, spirituali munere gratulentur: de Omnipotentis Dei Misericordia, & Beatorum Petri, & Pauli Apostolorum ejus auctoritate confisi, omnibus verè poenitentibus, & confessis, qui ad Ecclesiam ipsam in anniversario die dedicationis ipsius, videlicet à prædicta Dominica, & usque ad subsequentes Octavas Pentecostes illi proximas causa devotionis accesserint, annuatim duos annos, ac octoginta dies de injecta sibi poenitentia misericorditer relaxamus. Datum Anagninæ, 7. Id. Augusti, Pontificatus nostri anno duodecimo.

Pendulum plumbum cum inscrip. Innocentius PP. IV.





Alexander Episcopus servus servorum Dei.

*Charissimæ in Christo filiæ Comitissæ de Ardeth,  
& filiis suis Patavien. Diæc.  
sal. & Apost. bened.*

**A**D illa potissimè debetis prompti esse, ac faciles, ex quibus præconium humanæ laudis vobis acquiritur, & cultui divino vacantium justum desiderium adimpletur. Sanè dilecti filii Custos, & Fratres Sancti Francisci Assisiat. Ordinis Fratrum Minorum nobis exponere curaverunt; quòd cum Charissimus in Christo filius noster Rex Venceslaus Boemiæ illustris quamdam summam marcarum auri, in subsidium operis Ecclesiæ S. Francisci pietatis intuitu transmitteret, nuntii summam deferentes eandem, propter viarum pericula, custodiæ quondam Comitis de Ardeth viri tui, filia Comitissa, ipsam fiducialiter commiserunt. Et licèt idem Comes partem dictarum marcarum restituerit Fratribus memoratis, eo tamen postmodum viam universæ carnis ingressò, vos de residuo, scilicet quinque marcis auri eis pro vestre voluntatis libito denegatis satisfacere; quamquam præfatus Comes de hoc sibi per manus tuas, dicta Comitissa, satisfieri mandavit in ultima voluntate. Quia verò dictarum marcarum detentio esse non potest sine nota infamiæ, animarum periculo, & prædicti operis præiudicio manifesto; Nobilitatem vestram attentè rogandam duximus, & monendam, in remissionem vobis peccaminum injungentes, quatenus de dictis quinque marcis nuntiis ipsorum Custodis, & fratrum sine qualibet difficultate, seu dilatione satisfacere affectu benigno curetis. Ita quòd super hoc non literas adjicere, sed vestram sinceritatem possimus exinde dignis in Domino laudibus commendare. Dat. Neapoli 14. Kal. Aprilis, Pontificatus nostri anno primo.

Pendet plumbum funiculo transfixum, habetque impressas Apost. P. & P. facies ex una, & ex alia parte inscriptionem, Alexander PP. IV.

Alexander Episcopus servus servorum Dei.


*Dilectis filiis, Guardiano Sancti Francisci, vel ejus  
Vicario Assisiat. Ordinis Minorum.  
sal. & Apost. Bened.*

**C**Um felicitis recordationis Innocentius PP. prædecessor noster libros, & quædam alia per dilectum filium Fratrem Laurentium nunc electum Antibarent; in Sacristia Ecclesiæ S. Francisci fecerit commendari; devotiori tuæ per Apostolica scripta mandamus, quatenus libros, & bona ipsa Petro servienti nostro, latori præsentium facias assignari: quæ autem assignaveris



ris ei, nobis tuis literis intimare procures. Datum Anagninæ 8. Kal. Octobris, Pontificatus nostri anno primo.

Subest Bulla plumbea per cordulam tracta. Alexander PP. IV.



Alexander Episcopus servus servorum Dei.

*Universis Christi fidelibus præsentes literas inspecturis,  
sal. & Apost. bened.*

**A**D veneranda Sanctorum merita gloriosa fideles Christi eò libentiùs invitamus, quò id ad eorum salutem novimus specialius pertinere. Cum igitur sicut Venerabilis frater noster Episcopus, & dilecti filii Capitulum Cracovien. nobis significare curarunt, ipsi ad honorem B. Stanislai Martyris in Ecclesia S. Francisci Assisiat. in qua per felicitis recordationis Innocentium PP. prædecessorem nostrum, nobis tunc in minori constitutis officio præsentibus, idem Martyr Sanctorum cathalogo est adscriptus, altare construi fecerint, & illuc transmiserint de ipsius reliquiis, ut ibidem à Christi fidelibus honoretur; omnibus verè poenitentibus, & confessis, qui eandem Ecclesiam in festo ipsius Martyris, & infra Octavas ejusdem annuatim venerabiliter visitaverint, de Omnipotentis Dei Misericordia, & Beatorum Petri, & Pauli Apostolorum ejus auctoritate confisi, centum dies de injunctis sibi poenitentiis misericorditer relaxamus. Datum Laterani, 7. Kal. Februarii, Pontificatus nostri anno secundo.

Subest, transvexo serico flavo, rubeoque funiculo, plumbum.

Alexander PP. IV.



Alexander Episcopus servus servorum Dei.

*Dilecto filio Custodi Fratrum de Ordine Minorum  
Ecclesiæ Sancti Francisci Assisiat.  
sal. & Apost. bened.*

**P**RO reverentia Beati Francisci Confessoris, ad quem devotionis affectum gerimus specialem, tuis votis libenter annuimus, quæ pietati conformia, & animarum profectui esse percipimus opportuna. Hinc est, quòd nos tuis, & dilectorum filiorum Fratrum Ecclesiæ ipsius Sancti de Assisio supplicationibus annuentes, discretionis tuæ præsentium auctoritate concedimus, ut illis, qui causa devotionis ad eandem Ecclesiam accedentes, aliquid in executione votorum emissorum super visitatione ipsius Ecclesiæ omiserint, cum ab eis humiliter fueris requisitus, salutarem poenitentiam super hoc possis injungere, prout secundum Deum videris expedire. Datum Viterbii 2. Non. Maii, Pont. nostri anno quarto.

Subest per cordulam plumbeum signum.



Alexander Episcopus servus servorum Dei.

*Dilecto filio Custodi Fratrum de Ordine Minorum  
Ecclesiæ Sancti Francisci Assisiat.  
sal. & Apost. bened.*

**P**RO reverentia B. Francisci Confessoris, ad quem devotionis affectum gerimus specialem, tuis votis super iis libenter annuimus, quæ pietati conformia, & animarum profectui esse percipimus opportuna. Hinc est, quod nos tuis, & dilectorum filiorum Fratrum Ecclesiæ ipsius Sancti de Assisio supplicationibus annuentes, præsentium tibi auctoritate concedimus, ut eorum omnium, qui de remotis partibus ad Ecclesiam ipsam causa devotionis accesserint, & suorum nequiverint habere copiam Sacerdotum, cum ab ipsis requisitus fueris, tu, & fratres presbyteri tui Ordinis, tam in ipso loco morantes, quam etiam venientes undecunque ad solemnitatem prædictam, quibus id duxeris committendum, eorum omnium confessiones audire valeatis, & sibi pro commissis injungere poenitentiam salutarem; nisi fortè talia commiserint, propter quæ Sedes Apostolica sit merito consulenda. Datum Viterbii, 6. Kal. Octobris Pontificatus nostri anno quarto.

Bulla. Alexander PP. IV.



Alexander Episcopus servus servorum Dei.

*Dilectis filiis Nobilibus viris Potestati, & Capitaneo  
Januen. sal. & Apost. bened.*

**I**N iis, quæ sunt digna fieri, & conformia rationi, sinceritatem vestram promptam invenire credimus, si ad hoc eam nostris literis inducamus. Sanè pro parte dilectorum filiorum Custodis, & Fratrum Sancti Francisci Assisiat. Ordinis Fratrum Minorum fuit propositum coram nobis, quod nonnulli Christi fideles de Marrochio quandam pecuniæ summam in subsidium operis Ecclesiæ ipsius S. Francisci miserunt intuitu pietatis, ac cum Nuntii eandem pecuniam deferentes, illam propter viarum pericula, custodia Nicolai Calvi, & Joannis de Moniardino Civium Januen. fiducialiter commississent, iidem Cives eam sibi in Civitate Januen. restituere promiserunt. Et licèt nos postmodum eis, super hoc petentibus diffugia, & promissionem suam in hac parte non curantibus adimplere, per literas nostras preces direxerimus, & mandatum, ut de prædicta pecunia Nuntiis ipsorum Custodis, & Fratrum satisfacere sine qualibet difficultate, seu dilatione curarent; quia tamen hujusmodi nostris precibus, & mandato penitus obauditis id efficere non curarunt; pro parte dictorum Custodis, & Fra-



trum ad nos denuò habitus est recursus. Ne igitur ipsi per verba inania super hoc diutius deducantur: Venerabili Fratri nostro Archiepiscopo Januen. nostris damus literis districtè in præceptis, ut dictos Cives moneat attentius, & inducat, quòd infra quindecim dies post monitionem suam Nuntiis dictorum Custodis, & Fratrum de pecunia ipsa integrè satisfacere non omittant. Quòd si fortè ipsi monitis ipsius Archiepiscopi acquiescere in hac parte neglexerint; ipse eos ad id per excommunicationis sententiam, appellatione remota, compellat: faciens eandem sententiam singulis diebus Dominicis, vel festivis pulsatis Campanis, & candelis accensis, per omnes Ecclesias prædictæ Civitatis, usque ad satisfactionem condignam, publicari solemniter, ac eosdem Cives ab omnibus arctius evitari. Invocato contra eos, si necesse fuerit, auxilio brachii sæcularis. Quocirca Nobilitatem vestram rogamus, & hortamur attentè, per Apostolica vobis scripta mandantes, quatenus eidem Archiepiscopo, cum ab eo requisiti fueritis, super hoc opportunum favorem, & auxilium impendatis; & si fortè protervia eorum civium exigat, vos eos ad satisfaciendum præfatis Nuntiis de pecunia ipsa, potestate vobis tradita, compellatis. Ità quòd eisdem Nuntiis vos sibi super hoc propositos reperisse gaudentibus, nos vobis exinde speciales gratias referemus. Datum Later. Id. Decemb. Pont. nostri anno sexto.

Signum Plumbeum ex cordula. Alexander PP. IV.



Alexander Episcopus servus servorum Dei.

*Dilectis filiis Perusien. Assisiat. Castellan. Eugubin.  
Tudertin. Amelien. Narnien. Interamnen. Spolet.  
Fulginat. & Nucerin. Civitatum, & Diœc.  
Potestatibus, & Communitatibus,  
sal. & Apost. bened.*

**C**UM dilectos filios Jacobum Samuelis, & Venturam Judicis Cives Assi-  
fiat. in omnibus bonis mobilibus, & immobilibus, ac sese moventi-  
bus Ecclesiæ Romanæ dilectorum filiorum Fratrum Ordinis Minorum de  
Conventibus Civitatum, & Diœc. vestrarum contemplatione collatis, &  
in posterum conferendis, & omnibus bonis, quæ ipsi Ecclesiæ ex institu-  
tione dicti Ordinis provenerunt, & provenient in futurum procuratores,  
negotiorum gestores, Syndicos constituerimus, & actores; Universitatem  
vestram rogamus, & hortamur attentè, per Apostolica vobis scripta man-  
dantes, quatenus prædictos Cives, & substituendos ab eis, ac alios procu-  
ratores, quos aliàs super hoc constituimus, habentes ob reverentiam Apo-  
stolicæ Sedis, & nostram propensius commendatos, ipsis circa exequutio-  
nem commissi sibi officii impendatis consilium, auxilium, & favorem: nec  
permittatis eos, quantum in vobis fuerit, ab aliquibus indebitè molestari.  
Preces autem, & mandatum nostrum taliter adimplere curetis, quod Cives,  
& alii prædicti vestro fulti præsidio in eodem officio valeant prosperari, nos-  
què



que devotionem vestram exinde meritò commendemus. Datum Anagninæ  
13. Kal. Octobris Pontif. nostri anno quinto.

Plumbum subest. Alexander PP. IV.

Extant hujus Summi Pontificis Alexandri IV. plurima diplomata Originalia diversis directâ Provincialibus, & Fratribus Minoribus, quibus committit Sanctæ Inquisitionis munus in variis Italiæ Provinciis; & sæpius Provinciam Umbriæ vocat Ditionem Sancti Francisci. Ex quibus aliqua præcipua sunt directâ Fratri Andree de Assisio, qui fuit Sacræ Theologiæ Doctor insignis.

---

In sacrario asservantur literæ Apostolicæ Originales ejusdem s. m. Alexandri IV. Seraphico viro Bonaventuræ tunc Generali Ministro directæ, quæ idcirco inter alias, quas Seraphicus Pater ab Honorio III. acceperat, ibidem servantur, quia eas Sanctus Doctor secum deferre consueverat, & huic Conventui tanquam Religionis totius Capiti tandem retinendas consignavit. Placet eas referre ad literam.

Alexander Episcopus servus servorum Dei.


*Dilecto filio Fratri Bonaventuræ Generali Ministro  
Ordinis Fratrum Minorum, sal. & Ap. ben.*

**U**T ministerium tibi commissum ad Dei gloriam, & prosperum tui Ordinis statum liberè, & efficaciter valeas exercere, nullusque Fratrum ejusdem Ordinis prætextu alicujus licentiæ possit mandatum obedientiæ regularis, aut ipsius Ordinis subterfugere disciplinam, universis, & singulis Ministris, Custodibus, Guardianis, cæterisque Fratribus præfati Ordinis tenore præsentium, in virtute obedientiæ districtius inhibemus, ne ipsorum aliquis privilegiis, indulgentiis, literis, mandatis, vel licentiis quibuscumque pro ipsis, vel ipsorum aliquo, seu aliquibus, sub quacumque forma verborum ab Apostolica Sede obtentis, uti quoquo modo præsumat absque tuo mandato, & licentia speciali. Nos enim omnem pœnam, quam hujusmodi nostræ inhibitionis transgressoribus ritè duxeris infligendam, ratam habebimus, & observari, auctore Deo, inviolabiliter faciemus. Si verò ipsorum aliqui electiones, seu postulationes, aut provisiones, quas deinceps celebrari de ipsis in Ecclesiis Cathedralibus, aut fieri contigerit, absque tuo arbitrio acceptare, seu illis consentire præsumperint, nos omnem processum, qui de ipsis, & pro ipsis in hac parte habitus fuerit, irritum decernimus, & inanem; nolentes, ut eis quidquam juris per electiones, postulationes, vel provisiones hujusmodi, eorumque acceptationes, & consensus quomodolibet acquiratur. Ad hæc ut eò efficacius commissum tibi officium exequi valeas, quò majori per nos fueris auctoritate munitus, illam tibi potestatem circa absolutionem Fratrum ejusdem Ordinis ab excommunicationum sententiis, & dispensationem super eorum irregularitatibus, præsentium tenore, concedimus, quam nostri Pœnitentarii habere ab Apostolica Sede noscuntur. Cœterum quia pro certo tenemus, quòd data sit tibi cœlitus gratia regendi salubriter populum sanctum Dei, ac ejusdem gubernacula Ordinis prosperè dirigendi, no-



bis de te fiducia magna probetur, quòd dictus Ordo te illi præfidente continuatis concrefcet augmentis, ejusque status, auctore Domino, grata fufcipiet per tuum ministerium incrementa virtutum. Ideòque discretionem tuam monemus, rogamus, & hortamur attentè, ac per Apostolica tibi scripta mandamus, in remissionem tibi peccaminum nihilominus injungentes, quatenus sic te cultorem Religionis exhibeas, & vindicem vitiorum, quòd eodem Ordine tuæ doctrinæ rore completo, tuaque salubri dispositione composito, crescat exinde meritis apud Deum, penes nos gratia, & apud homines clara fama. Nos enim, qui ejusdem profectum, & augmentum Ordinis toto cordis zelamur affectu, tibi in omnibus, quæ tuum contingunt officium, firmiter Apostolico favore adesse proponimus, ac ut idem Ordo sub tuo regimine titulis refulgefcet insignibus, omnem, quam poterimus, intendimus opem, & operam adhibere. Datum Viterbii 12. Kal. Novembr. Pontif. nostri anno tertio.

Pendet Plumbeum signum tam bene servatum, ut nuper videatur impressum. Alexander PP. IV.



Clemens IV. creatus Perusii nonis Februarii 1265. antea Guido Grossus vocatus nobilis Gallus Narbonen. è vico S. Ægidii; Minorum Ordinem, ob Seraphici Patris merita, multis cumulavit privilegiis; singulariter autem hanc Ecclesiam, ut liquet ex ejus Apostolicis literis, quas ad verbum damus. Præponimus autem primum privilegium Fratribus Prædicatorum, & Minorum Ordinum, ad petitionem eorum Generalium concessum, quòd prædicti Fratres possint succedere in hæreditates. Erat autem tunc Generalis Minorum S. Bonaventura, Prædicatorum verò f. m. F. Jo: de Vercellis. Idem Clemens visitavit Ecclesiam S. Francisci, & sepulcrum S. Claræ, quod & dedicavit. Vide Vvadd. ad ann. 1265.

Clemens Episcopus servus servorum Dei.


*Dilectis filiis, Magistro, & Fratribus Ordinis Prædicatorum, necnon Ministro Generali Ordinis Fratrum Minorum, sal. & Ap. bened.*

**O** Brentu Divini Nominis, cujus cultui sub sacræ vestræ Religionis observantia studetis mente devotissima deservire, votis vestris libenter annuimus, & petitiones vestras in his, quæ dignè deposcitis, favorabiliter exaudimus. Ex parte siquidem vestra fuit propositum coram nobis, quòd nonnulli Prælati, Clerici, & Laici in diversis mundi partibus constituti, asserentes vos mundo fore mortuos, nec valentes proprium possidere, vos occasione hujusmodi à quibuslibet successionebus excludere moliuntur. Quare pro parte vestra fuit nobis humiliter supplicatum, ut ne contingat vos, propter hujusmodi præsumptionem talium aliquod incurrere nocumentum, congruum remedium adhibere paterna diligentia curaremus. Nos itaque vestris petitionibus benignius attendentes, auctoritate Apostolica declaramus, quòd vos in temporalibus bonis, in quibus succederetis in sæculo existentes, licitè possitis succedere, & bonorum ipsorum possessiones apprehendere, ac vendere liberè, bona ipsa, eorumque pretium in utilitatem vestram convertere,



tere, prout vobis melius videbitur expedire. Universas autem interdicti, suspensionis, & excommunicationis sententias, quas contra præsentis declarationis tenorem per quemcunque fieri contigerit, decernimus irritas, & inanes. Nulli ergo omnino hominum liceat hanc paginam nostræ declarationis, ac constitutionis infringere, vel ei ausu temerario contraire. Si quis autem, &c. Datum Perusii 2. Id. Februarii. Pontificatus nostri anno primo.

Plumbea per cordulam pendet Bulla, cum Apostolorum vultibus, & inscriptione. Clemens Papa IV.



Clemens Episcopus servus servorum Dei.

*Dilectis filiis Custodi, & Conventui Fratrum Minorum Ecclesiæ Sancti Francisci de Assisio,  
sal. & Apost. bened.*

**C**Lara merita sanctitatis, quibus gloriosus Confessor Beatus Franciscus vestri Ordinis Institutor in Ecclesia Dei fulsit, & conspicua bonorum operum studia, quibus Deo, ex humili devotione continua redditus vos acceptos, merito nos inducunt, ut Ecclesiam vestram, in qua Confessoris ejusdem corpus venerabile requiescit, & in cujus honore Ecclesia ipsa noscitur dedicata, dignis favoribus attollamus. Hinc est, quod nos tranquillitati vestræ, ac pacifico statui prædictæ Ecclesiæ præcavere volentes, vestris supplicationibus inclinati, quod juxta dictam Ecclesiam Sancti Francisci, vel aliquos loci vestri limites ad trecentas Cannas nulli Ecclesiam, vel Oratorium, aut Monasterium quodlibet, sive Hospitale cum Oratorio ædificare liceat, vel sæcularem Ecclesiam, vel Regularem, seu domum aliquam in Hospitale convertere, absque Sedis Apostolicæ licentia speciali, vobis, & eisdem Ecclesiæ, ac loco, auctoritate Apostolica præsentibus indulgemus. Nulli ergo omnino hominum liceat hanc paginam nostræ concessionis, &c. Si quis, &c. Datum Perusii, Nonis Octobris, Pontificatus nostri anno primo.

Serico laqueo ductum plumbum habet insculptas Apostolorum Principum effigies, & Pontificis nomen, Clemens Papa IV.



Clemens Episcopus servus servorum Dei.

*Universis Christi fidelibus præsentis literas inspecturis,  
sal. & Apost. bened.*

**C**Um ad promerenda sempiterna gaudia Sanctorum suffragia sint nobis plurimum opportuna, loca Sanctorum omnium pia sunt devotione Fidelium veneranda, ut dum Dei honoramus amicos, ipsi nos amabiles Deo reddant,



dant, & illorum nobis quodammodo vendicantes patrocinium apud ipsum, quod merita nostra non obtinent, eorum mereamur intercessionibus obtinere. Cupientes igitur, ut Ecclesia S. Francisci de Assisio, in qua Sanctissimum Corpus ejus venerabiliter requiescit, congruis honoribus frequentetur, omnibus verè poenitentibus, & confessis, qui Ecclesiam ipsam in ejusdem Sancti festo, & usque ad octo dies sequentes devotè, ac venerabiliter visitaverint, annuatim, de Omnipotentis Dei misericordia, & Beatorum Petri, & Pauli Apostolorum ejus auctoritate confisi, unum Annum, & quadraginta dies de injuncta eis poenitentia misericorditer relaxamus. Datum Perusii 5. Idus Octobris, Pontificatus nostri anno primo.

Pendet Plumbum, &c. Clemens Papa IV.



Clemens Episcopus fervus fervorum Dei.

*Dilectis filiis, Ministro Provinciali, Custodi, & Conventui Ecclesiae Sancti Francisci Assisiat. ac Fratribus universis administrationis ipsius Ordinis Minorum, sal. & Ap. bened.*

**D**Esideriis vestris affectu benevolo debemus annuere, in iis præcipuè, quæ noscuntur ad cultum divini honoris pertinere. Hinc est, quòd nos vestris supplicationibus inclinati, ut cum generale terræ fuerit interdictum liceat vobis in Ecclesia S. Francisci in festivitibus ipsius Sancti, & Anniversario Dedicationis prædictæ Ecclesiae usque ad octo dies sequentes solemniter, exclusis excommunicatis, & interdictis, divina Officia celebrare; & quibuslibet ob reverentiam ejusdem Sancti tunc ad Ecclesiam prædictam accedentibus (dummodo excommunicati non fuerint) audire divina hujusmodi, devotioni vestræ auctoritate præsentium indulgemus. Nulli ergo omnino hominum liceat hanc paginam nostræ concessionis, &c. Si quis, &c. Datum Perusii 2. Kal. Martii, Pontificatus nostri anno secundo.

Sub Plumbo. Clemens Papa IV.





*Diploma Concistoriale, Originale ejus hîc habetur  
in amplo Pergameno.*

Clemens Episcopus servus servorum Dei.

*Dilectis filiis Ministro Ordinis Fratrum Minorum,  
& cœteris Fratribus morantibus apud Ecclesiam  
Beati Francisci, in loco, qui dicitur Collis  
Paradisi, tam præsentibus, quàm  
futuris in perpetuum.*

**I**S, qui Ecclesiam suam nova semper prole fœcundat, dignatus hæc moderna tempora prioribus conformare, Beati Confessoris Francisci spiritum in charitatis amore per inspirantem gratiam excitavit, ut Apostolorum vestigia imitatus in paupertate, in qua plus charitas proficit, relictis omnibus solum sequutus fuerit æternæ beatitudinis largitorem, & velut fidelis servus, & prudens laudabiliter operatus in talentis ei creditis fructum in Ecclesia Dei attulit copiosum. Ab ipso enim Ordinis vestri sancta plantatio, cooperante divinâ gratiâ, processum habuit, & profectum, quæ palmites honestatis longè, latèque producens, flores protulit, & odores effudit, ad ressecanda nociva, & salubria inferenda. Cum igitur apud Assisium in fundo vobis, & Ecclesiæ Romanæ oblato, in loco, qui dicitur Collis Paradisi in ejusdem Confessoris honore constructa sit Ecclesia, in qua reconditus est tam pretiosus thesaurus, Sanctum videlicet Corpus ipsius, qui in tempore iracundiæ factus est reconciliatio, ut pro peccatis populorum fieret intercessor. Nos cum dignum sit, & conveniens, ut eadem Ecclesia prærogativâ libertatis gaudeat, & honoris, propter eum, quem in Coelis Dominus exaltavit, pro ejus reverentia Ecclesiam ipsam sub Beati Petri, & nostra protectione suscipimus, & præsentis scripti privilegio communimus. In primis siquidem statuantes, ut Ecclesia ipsa nulli, nisi Romano Pontifici sit subjecta, & vestri Ordinis, cujus Institutor, & Pater exitit Confessor prædictus, CAPUT habeatur, & MATER, ac in ea per Fratres ejusdem Ordinis perpetuò servietur. Prohibemus insuper, ne quis audeat in eandem Ecclesiam excommunicationis, vel interdicti sententiam promulgare, quam si proferre contingeret, tanquam contra Sedis Apostolicæ indulta prolatam, decernimus non tenere. Pro consecrationibus verò Altarium, sive pro Oleo Sancto, vel quolibet alio Ecclesiastico Sacramento nullus ab eadem Ecclesia sub obtentu consuetudinis, vel alio modo quidquam audeat extorquere; sed hæc omnia gratis vobis Episcopus Dioecesanus impendat. Alioquin liceat vobis quemcumque malueritis Catholicum adire Antistitem, gratiam, & communionem Sedis Apostolicæ habentem, qui nostrâ fretus auctoritate vobis quod postulatur impendat. Quod si Sedes Dioecesani Episcopi fortè vacaverit, interim omnia Ecclesiastica Sacramenta à vicinis Episcopis accipere liberè, & absque contradictione possitis, sic tamen, ut ex hoc in posterum nullum proprio Episcopo præjudicium generetur. Quia verò interdum eadem Ecclesia non habet loci Dioecesan



fani copiam, si quem Episcopum Romanæ Sedis, ut diximus, gratiam, & communionem habentem, & de quo plenam notitiam habeatis, per vos transire contigerit, ab eo benedictiones vasorum, & vestium, consecrationes Altarium, ordinationes Fratrum Clericorum auctoritate Apostolicæ Sedis recipere valeatis. Cum autem generale interdictum terræ fuerit, liceat vobis clausis januis, exclusis excommunicatis, & interdictis, non pulsatis campanis, & suppressâ voce divina Officia celebrare. Paci quoque, & tranquillitati vestræ paternâ in posterum sollicitudine providere volentes, auctoritate Apostolicâ prohibemus, ut infra clausuras locorum vestrorum nullus rapinam, seu furtum facere, ignem apponere, sanguinem fundere, hominem temerè capere, vel interficere, seu violentiam audeat exercere. Ad indicium autem hujus libertatis, ab Apostolica Sede perceptæ, unius libræ ceræ censum nobis, & Successoribus nostris annis singulis persolvete. Decernimus ergo, ut nulli omninò hominum liceat præfatam Ecclesiam temerè perturbare, aut ejus bona auferre, vel ablata retinere, minuere, seu quibuslibet vexationibus fatigare, sed omnia integrè conserventur, eorum, pro quorum gubernatione, ac sustentatione concessa sunt, usibus omnimodis profutura; salvâ Sedis Apostolicæ auctoritate. Si qua igitur in futurum Ecclesiastica, sæcularisvè persona hanc nostræ Constitutionis paginam sciens contra eam temerè venire tentaverit, secundo, tertiove commonita, nisi reatum suum congruâ satisfactione correxerit, potestatis, honorisque sui careat dignitate, reamque se divino judicio existere de perpetrata iniquitate cognoscat, & à Sacratissimo Corpore, ac Sanguine Dei, & Domini Redemptoris Nostri Jesu-Christi aliena fiat, atque in extremo examine districtæ subiaceat ultioni. Cunctis autem eodem loco sua jura servantibus sit pax Domini Nostri Jesu-Christi, quatenus & hic fructum bonæ actionis percipiant, & apud districtum Judicem præmia æternæ pacis inveniant. Amen. Amen.

*Signum Pontificium.* Oculi mei semper ad Dominum.

Ego Clemens Catholicæ Ecclesiæ Episcopus.

In medio subscribunt propriis manibus Card. Episcopi, cum suis signis.

Ego Stephanus Prænестinus Episcopus subscripsi.

Ego Frater Jo: Port. & S. Rufinæ Episcopus.

Ego Henricus Ostien. & Velletræ Episcopus.

Ad dexteram cum suis signis subscripti cernuntur Cardinales Presbyteri.

Ego Ancherus tit. S. Praxedis Presbyter Cardinalis subscripsi.

Ego Guilelmus tit. S. Marci Presbyter Cardinalis.

Ego Frater Anibaldus Basilicæ SS. Apostolorum Presbyter Card.

Ad lævam Cardinales Diaconi, quisque præmisso proprio signo.

Ego Riccardus S. Angeli Diaconus Card.

Ego Jacobus S. Mariæ in Cosmedin Diaconus Card.

Ego Guttifredus S. Georgii ad Velum aureum Diaconus Card.

Ego Hubertus S. Eustachii Diaconus Card.

Ego Jordanus SS. Cosmæ & Damiani Diaconus Card.

Ego Matthæus S. Mariæ in Porticu Diaconus Card.

Datum Perusii per manum Magistri Michaëlis S. Romanæ Ecclesiæ Vice-Cancellarii 17. Kal. Maii Indictione 9. Incarnationis Dominicæ Anno 1266. Pontificatus verò Domini Clementis Papæ IV. Anno secundo.

Serico flavo, rubeoque transfixa laqueo pendet plumbea Bulla Sanctorum Petri, & Pauli facies ex una referens, & ex alia

Clemens Papa IV.

Cum



Cum in Sacro Conventu essent, & sint Ædes Pontificiæ in signum immediatæ subjectionis ejus Sedi Apostolicæ; Erat quoque ibi Deposita Pontificium, in quæ varæ res servabantur, ut ex multis Literis constat. Erat etiam Armorum locus in inferiori parte earundem Ædium, ut liquet ex infra scriptis.

**Clemens Episcopus servus servorum Dei.**

*Dilectis filiis Custodi, & Fratribus Minoribus de Assisio, sal. & Apost. bened.*

**R** Ecepimus arma, & alia, quæ per Nuntium nostrum, sicut vobis mandavimus, destinastis. Unde cum adhuc indigeamus quibusdam armaturis, quæ sunt in scriniis penes vos de mandato nostro depositis; volumus, & per Apostolica vobis scripta mandamus, quatenus easdem armaturas, per dilectum filium Magistrum Albertum de Parma scriptorem nostrum, latorem præsentium, nobis, visis præsentibus, destinatis, Datum Viterbii 5. Kal. Julii. Pontificatus nostri Anno quarto.

Pendet Plumbum cordulâ transvexum. Clemens Papa IV.

Defuncto Sanctissimo Pontifice Clemente IV. Cardinalibus inter se dissidentibus vacavit Sedes annis duobus, & mensibus ferè novem. Tandem S. Bonaventuræ Generalis monitu electus fuit Tealdus Vice-Comes Placentinus, Arci-Diaconus Leodiensis, non Cardinalis, absens in Syria, qui Gregorius X. nuncupatus est. E Syria regressus, Viterbii, ubi electus fuerat, confirmatus est 6. Kal. Aprilis in Basilica 12. Apostolorum Presbyter, & Episcopus consecratus; Pontificatus suscepit insignia 1272. & anno sequenti in Festo Pentecostes S. Bonaventuram Cardinalem creavit Albanensem Episcopum, &c.

Hic Pontifex animum totum dedit celebrando Concilio Generali pro subsidio Terræ Sanctæ, Græcorum ad Romanam Ecclesiam unione, & morum reformatione; fuitque celebratum Lugduni, anno 1274. ipso præsidente, & inter alios assistentibus Cardinalibus Minoritis Vicedomino, & Bonaventurâ.

Româ Lugdunum petens ad præfatum Concilium, Florentiâ, per quam transibat, misit Assisium Nuntium ad sumenda duo Scrinia, quæ in ædibus Pontificiis asservabantur. Literæ hæ sunt.

**Gregorius Episcopus servus servorum Dei.**


*Dilectis filiis, Custodi, & Fratribus Ordinis Minorum de Assisio, sal. & Apost. bened.*

**V** Olumus, & per Apostolica vobis scripta mandamus, quatenus duo scrinia nostra, cum aliis rebus nostris in domo vestra deposita, quæ dilectus filius Honoratus serviens noster, lator præsentium, sub signo, quod defert, duxerit eligenda; eidem Honorato, quem ad hoc speciali-



ter mittimus , nobis deferenda per eum , sine difficultate aliqua assignetis. Nos enim faciendi nomine nostro receptionem vobis de prædictis duobus scriptis , quæ sibi duxeritis assignanda , plenam sibi concedimus facultatem. Datum Florentiæ , 9. Kal. Julii. Pontificatûs nostri Anno secundo.

In pendenti Plumbo. Gregorius Papa X.



Nicolaus III. antea Joannes Caietanus Urfinus Diaconus Cardinalis Ordinis Minoritarum Protector , cui adhuc infantulo S. Franciscus suam Religionem commendaverat , cujus Pater Matthæus Rubeus de Urfinis , Frater de Pœnitentiâ ab ipso S. Francisco indutus fuerat , eique sui infantuli Pontificatum prædixit.

Hic Pontifex confirmavit Literas Gregorii IX. de veritate Sacrorum Stygmatum B. Francisci ab omnibus Christi Fidelibus credenda , cujus Diploma extat in hoc Archivio.

Ex deposito Pontificio hujus Sacri Conventus quamdam Arcam asportari ad se Romam jussit his Literis.

Nicolaus Episcopus servus servorum Dei.

*Dilectis filiis , Custodi , Guardiano , & Fratribus  
Assisiat. sal. & Apost. bened.*

**A**D vos , & locum vestrum prærogativam specialis affectionis habentes fecimus ab olim , dum eramus in minori officio constituti , nonnulla de rebus nostris per dilectos filios Magistrum Petrum Facistantem tunc Camerarium , & Fratrem Constantinum Ordinis vestri familiares nostros , in loco ipso deponi , à vobis fideliter conservanda ; & tandem nemini , nisi certo , & fideli Nuntio nostro de recipienda , & aperienda liberè Arca , in qua res ipsæ consistunt , speciales nostras deferenti Literas assignanda . Volentes itaque diebus istis ad nos res ipsas deferri , dilectum filium Andream de Nivernis Clericum , & familiarem nostrum latorem præsentium , de cujus fidelitate confidimus , ad vos propter hoc specialiter duximus destinandum ; devotioni vestræ per Apostolica scripta mandantes , quatenus Arcam , & res easdem dicto Andreæ nostro nomine , sic liberaliter sine diminutione qualibet assignetis , ad nos juxta nostrum beneplacitum deferendas ; quòd exinde possitis tamquam devotionis filii meritò commendari . Datum Romæ , apud S. Petrum , Kal. Januarii , Pontificatûs nostri Anno primo .

Sub Plumbo. Nicolaus Papa III.

Habemus alias Literas originales ejusdem Pontificis testantis veritatem Canonizationis , & realis Stygmatisationis S. Francisci , quas cum aliis ad id pertinentibus vide.





Nicolaus Episcopus servus servorum Dei.

*Dilectis filiis, Capitulo Generali Ordinis Frarum  
Minorum, sal. & Apost. Bened.*

**C**onvenientibus vobis in unum, qui Christi pauperis paupertatis semitas voluntariè effecti participes delegistis, jam non est, nisi quæ Dei sunt constanter appetere, vias mandatorum ejus dilatato corde percurrere, primum sequendo pauperem Franciscum, vestri Ordinis plantatorem, qui mundi caduca respuens, mundum mundè pertransiens, mundo vivendo moriens, vixit Deo, qui vivens præmium sibi æternæ vitæ promeruit, & vobis vivendi regulam, velut adoptionis filiis dereliquit, ut vos Christo junctus adjungeret, & hæres ejus effectus vos Christo redderet cohæredes. Hic est Ordo, quem Sponsus in Canticis geminando commemorans bis hortum repetit, binum ejus fructum contemplativum, & activum patenter insinuans; bis conclusum, sæpem divinæ legis, & custodiæ Angelicæ innuens, vel potius vallum prædictæ regulæ, & specialem Custodiam ipsius Ordinis, quam de ipso Romana gerit Ecclesia manifestans. Hic est fons, scientiarum fuenta scaturiens, signatus paupertatis insigniis, & in sui primo Institutore Christi Stygmatibus insignitus. Propterea Ordinem ipsum, quem sic in domo Domini præluere conspiciamus, à nostris quasi primordiis, sensibus nostris infiximus, in ejus affectione concrevimus, & tenerrimè intra præcordia nostra portamus, circa eum sollicitudine vigilantes, ut nullius ibi succrescentis herbæ contagium famæ suæ reprimat odorem, vel ejus decorem obnubilet, sed Deo propitio, protegatur à noxiis, salubria semper incrementa suscipiat, & pacis affluat ubertate. Dignè igitur plenis in Domino gaudiis exultamus, dum vos illius sectatores inspicimus, qui delitias terrestres aspernans, asperitatis onera supportavit, ut inter electos Dei appareret prælucidus in excelsis, cujus vos regulam profitentes, existitis eximii testimoniorum Domini sectatores: nec indignè lætamur, quòd in vobis eadem delectatur Ecclesia, & in fragrantia vestrorum operum odorem suavitatis assumit. Nam super vos Nomen Domini percipimus invocatum, & post vocem revocationis æternæ in regione vivorum vos sibi credimus placituros. O beatæ suavitatis paupertatis, quâ mundi derelictis illecebris ad fælicitatis gloriam pervenitur! O beata terrenarum deliciarum abjectio, quâ spiritus humilitatis reficitur gratiâ salutari, & tandem gratiâ ipsâ refecti coronam gloriæ promerentur! Profectò quæ Ordinem ipsum contingunt nobis ipsis ascribimus; nec circa illa locum vigiliis indulgentes, dum de instanti vestro generali Capitulo celebrando hætenus ageretur, præsentiam dilecti filii nostri Hieronymi Sanctæ Romanæ Ecclesiæ Cardinalis ibi cognovimus esse utilem, & propter hoc ei Literas nostras sub certa forma direximus, ut præsentialibus ejus affatibus tam Sanctæ Congregationis reficeretur amoenitas, & in agendis procedendo consultius, vobis, & eidem Ordini grata solamina provenirent. Sed eodem Cardinale sui corporis infirmitate detento ab aliquibus citra diebus non credimus inceptum reditum eâ prosecutione posse perficere, quòd eidem Capitulo, prout deliberatio nostra conceperat, interesset. Nihilominus, si sic propitiaretur Altissimus, quòd ad dictum Capitulum posset decenti tempore



pervenire, sicut nunc ex aliquorum relatione sentimus, illum ad vos pro consolatione vestrarum mentium disponimus destinare. Quod si fortè aliquo casu id complere nequiverit, confidimus, quod omnipotens Dominus vobis in iis vias suæ miserationis aperiet, vos ad salubria diriget, ac propitiabitur votis vestris, ita quod ex vestris actibus, in divinis beneplacitis radicatis fructus vobis, & eidem Ordini utiles, Deo, ac nobis placitos, dante Domino, resultabunt. Verum Pastoralis officii debitum exequentes, vos ad quæque salubria Paternis monitis, & benignis exhortationibus invitamus, affectantes ex intimis illa vestris insidere præcordiis, in his potissimè, quæ hoc tempore circa directionem ipsius Ordinis, ac conservationem institutionum salutarium, ex quibus laus, & honor acquiritur, agenda percipimus, ut charitatis & unionis vestræ funiculus sic alimento veræ pacis, & inviolabilis concordiae foveatur, quod nullam sui partem cujusvis debilitet adversitatis, seu commotionis impulsus; quin potius illæsus, & stabilis nullius corrumpentis maculam habiturus, perpetuò ad laudem divini Nominis conservetur. Super quo sunt vobis in speculum, & exemplar illius Almi merita Confessoris, qui Ordinem prædictum instituit, coluit, & cultum claritate beatitudinis illustravit. Cæterum ut vobis qui spiritualium operatione proficitis, & ob nomen Domini corporaliter laboratis, propter utrumque charitatis ordinatæ præmium rependatur, universis, & singulis de Ordine vestro, qui ad præfatum Capitulum convenerint, nec non & aliis Christi fidelibus, qui congregatis in ipso Capitulo Fratribus, ipso durante, pietatis suæ manus porrexerint adiutrices; dummodò verè pœnitentes extiterint, & confessi; Fratribus scilicet, qui circa præmissa sollicitè laborârint, & operosâ sedulitate vacârint, unum annum, & aliis, qui congregatis ibidem pias eleëmofinas erogârint, centum dies de injunctis sibi pœnitentiis misericorditer relaxamus. Cum autem imbecillitatem nostram oporteat divinæ manûs sustentari præsidii; devotionem vestram rogamus, & hortamur in Domino, quatenus pias affectiones vestras circa nos excitet debitum charitatis, & inspectis nostræ mentis affectibus, nos in vestris orationibus divinæ clementiæ commendetis, ut per intercessionem vestram in administratione commissa nobis dignetur sua misericordia nostros supportare defectus, & actus nostros in suorum dirigere semitam mandatorum. Datum Romæ, apud S. Petrum Id. Maii, Pontificatûs nostri Anno secundo.

Subest Plumbeum Sigillum.      Nicolaus Papa III.

Nicolao III. successit in Pontificatu Martinus IV. antea Simon Bria Gallus Titulo S. Cæcilie Cardinalis; qui suæ devotionis affectum erga B. Franciscum, & Ecclesiam hanc manifestavit, nam & in morte, quæ Perusii accidit, habitum Minoriticum postulavit, induit, & cum eo sepeliri voluit, corpusque suum ad Assisiatem S. Francisci Basilicam transferri jussit, relicto inter alios Jacobo Cardinale Sabellio, qui ei in suprema successit dignitate, testamenti, & ultimæ suæ voluntatis exequutore,

Honorius IV. volens adimplere Prædecessoris voluntatem, Perusinis obstantibus scripsit, præcipiens, ut Corpus Martini IV. ad Ecclesiam S. Francisci Assisensis transferendum darent. Diplomata Originalia habemus duplicata, tum ad Episcopum, & Clerum, cum etiam ad Procures Civitatis.



Honorius Episcopus servus servorum Dei.

*Venerabili Fratri Episcopo, dilectis filiis Archipresbytero,  
& Capitulo Perusino, sal. & Apost. bened.*

**V**estram non credimus latere notitiam, qualiter f. r. Martinus Papa IV. Prædecessor noster, ob devotionis specialis affectum, quem erga gloriosum, & Venerabilem Confessorem B. Franciscum de Assisio, cujus clarissimis meritis Dei decoratur Ecclesia, Italia rutilat, vestraque Religio quasi quibusdam specialibus titulis insignita refulget; in Ecclesia, quæ in honorem ejusdem Sancti apud Assisium constructa dignoscitur, elegit in sua voluntate ultima Ecclesiasticam sepulturam; nobis tunc in minori officio positus, & quibusdam ex Fratribus nostris hujusmodi suæ voluntatis exequutoribus constitutis. Postmodum autem ad Apostolicæ dignitatis fastigium divinâ dispositione vocati, magnis, & arduis, quæ cura Pastoralis officii secum trahit, occupati negotiis, ad exequendam Prædecessoris ejusdem hujusmodi voluntatem operarias manus exhibere nequivimus, prout & gerebamus in votis, & ipsius negotii qualitas requirebat. Cum itaque magno desiderio cupiamus, ut pia Prædecessoris dispositio prælibati suum in hac parte consequatur effectum, Universitatem vestram rogamus, monemus, & hortamur attentè, per Apostolica vobis scripta mandantes, quatenus tamquam viri providi, & discreti, ac justitiæ zelatores, ad exactæ considerationis reducentes examen quàm explorati juris existit, quàmque mortalibus debitum, ut extremæ voluntates ipsorum liberè impleantur, reverendum præfati Prædecessoris corpus, non solum juxta dispositionem Prædecessoris ejusdem, ad eamdem liberè deferri Ecclesiam permittatis, quinimmo illud illuc deportare volentibus tumultandum, ut id condignâ honorificentiam, dante Domino, agi possit, pro nostra, & Apostolicæ Sedis reverentia, quam in vestris actibus summopere conservare vos condecet, favorabiliter assistatis, tantò nobis propensius placituri, quantò efficacius, & libentius quod à nobis in hoc fiducialiter petimus perducere curabitis ad effectum. Cupimus etenim, ut super hoc sic devotè, sic promptè vos gerere studeatis, ut exindè non immeritò possimus efferre vos laudibus, & aliud in hac parte provisionis adhibere remedium non cogamur. Datum Romæ, apud S. Sabinam Kal. Februarii, Pontificatus nostri Anno primo.

Subest in Plumbo Pontificium signum.

Honorius Papa IV.

Hono-



Honorius Episcopus servus servorum Dei.

*Dilectis filiis Potestati, Capitaneo, Consilio, & Communi  
Perusino, sal. & Apost. bened.*

**S** Incera illa, & antiqua, sed non antiquata devotio, quâ inter cœteras urbes Italiæ erga Romanam Ecclesiam matrem vestram, Civitas Perusina resplenduit, firmam nobis fidem tribuit, spemque indubiam pollicetur, quod vos tamquam benedictionis filii, & obedientiæ, Apostolicæ Sedis votis affectus vestros promptis animis conformantes, preces nostras, præsertim quas justitiæ plenitudo non deserit, submoto difficultatis objectu ad effectum celeriter perducetis. Sanè fel. rec. Martinus Papa IV. Prædecessor noster, ob devotionis specialis affectum, quem erga gloriosum, & venerabilem B. Franciscum de Assisio, &c. ut in superioribus. Sub eisdem die, loco, & signo, &c.

Non acquieverunt hujusmodi Literis Perusini, ne pretioso privarentur pignore, ad Corpus enim illius s. m. Pontificis multi languentes, cæci, furdi, claudi, & muti sanitatem recuperârunt. Interposuerunt itaque varias appellationes, in quibus audiendis & rejiciendis aliquod tempus elapsam est: obiit Honorius, neque fuit amplius qui negotium urgeret. Paucis indè annis, dum templum refarciretur, inventum est corpus integrum, cum habitu Minoritico illæso. Hinc inter Ordinis Pontifices à quibusdam numeratur.

Hæc vitâ functo Honorio IV. Sedes vacavit mensibus decem, diebus decem, & octo; Demùm 8. Kal. Martii 1288. Cardinalium omnium suffragiis electus est Summus Pontifex Frater Hieronymus de Asculo, Cardinalis Episcopus Prænестinus Ordinis Minorum, Sacræ Theologiæ Doctor, & Magister, olim Generalis Minister, Legatus Apostolicus ad Ecclesiam Græcorum, atque ad Galliæ, & Hispaniæ Reges.

In Pontificatu verum se Francisci filium, & totius Ecclesiæ Patrem ostendit. Statim ac fuit electus Seraphico Parenti grates referre volens, ad Ecclesiam Assisiensem Pontificio animo digna munera misit, cum suis Literis datis biduo ab ejus creatione, & in die ejus Coronationis, inter quæ ipsum Pluviale, quo Coronationis suscepit insignia. Originales Literæ hæc sunt, lectu dignæ.



Nicolaus Episcopus servus servorum Dei.

*Dilecto filio Custodi Fratrum Ordinis Minorum,  
Ecclesiæ Sancti Francisci in Assisio,  
sal. & Apost. bened.*

**S** Uscepimus nuper, licèt immeriti, supernæ dispositionis arbitrio, prout jam famæ præambulæ te credimus didicisse relatibus, curam, & regimen Ecclesiæ generalis: gravis oneris sarcinam, quam exequutio Pastoralis officii secum trahit, sub humilitatis spiritu subeuntes. Porro à longis



gis retro temporibus, Ordinis Fratrum Minorum funiculis salubriter alligati, ad venerabilem Ecclesiam B. Francisci de Assisio grandem, & continuum gessimus dilectionis affectum; statum ejus quietum, & prosperum, ad Dei laudem, & gloriam votis ferventibus cupientes. In signum igitur dilectionis hujusmodi, & evidens specialis reverentiæ argumentum, quam ad præfatam Ecclesiam, & eundem Beatissimum Confessorem habuimus, & habemus, ac etiam habere proponimus in futurum, nonnulla diversi coloris paramenta Pontificalia serica, vasa argentea, certam summam pecuniæ, ac quædam alia in cedula, præsentibus interclusa distinctè, planè, ac seriatim expressa, quæ ante nostræ promotionis auspicia facultates nostræ paupertatis habebant, eidem Ecclesiæ donamus, atque concedimus de gratia speciali, eaque ipsi Ecclesiæ per dilectum filium Magistrum Petrum de Sora Clericum, & familiarem nostrum, latorem præsentium mittimus, per eum tibi Ecclesiæ prædictæ nomine fideliter assignanda. Datum Later. 6. Kal. Martii, Pontificatus nostri Anno primo.

Plumbum funiculo tranfixum ex latere dextro pendet.



Nicolaus Episcopus servus servorum Dei.

*Dilectis filiis Ministro Provinciæ, & Custodi Sancti  
Francisci, ac Fratribus Ordinis Fratrum  
Minorum de Assisio, salutem  
& Apost. benediçt.*

**D**Um sollicitæ considerationis indagine perscrutamur, quòd Rex ille munificus, qui dat affluenter, & non impropert, quique personas, & loca fidelium donis prosequitur, gratiis prævenit, attollit honoribus, juxta suæ inscrutabilis beneplacitum voluntatis, Civitatem Assisi multipliciter honoravit, gloriosa Beatorum Francisci Confessoris, & Claræ Virginis corpora in ea benigniùs collocando. Dum etiam sedulò intra pectoris claustra revolvimus, quòd vos mundanis opibus derelictis, quæ cum blandiuntur illudunt, extremæ paupertatis amplectentes insignia, victum vobis piæ mendicitatis studio vendicatis, quòdque nonnullæ aliæ ordinum diversorum personæ, sibi per eleëmōsinam necessaria vitæ quærunt, vestro libenter statui providemus, ut eò commodiùs divinis insistatis obsequiis, quòd status ipse uberiori fuerit tranquillitate suffultus, ac per habitatores Civitatis ejusdem, quorum erga prædictos Fratres noscitur fervere devotio, vestris contingat abundantius necessitatibus subveniri. Inde fit, quòd nos Apostolicâ auctoritate statuimus, & etiam ordinamus, ut nulli omninò mulierum mendicantium, vel non mendicantium, seu aliarum quarumlibet, aut Religiosorum mendicantium Ordini liceat Oratorium, Monasterium, Ecclesiam, vel locum religiosum in Civitate prædicta, vel ejus suburbiis, seu etiam extra ipsa, infra ducentarum Cannarum spatium quocumque modo habere.

Quodque



quòdque nullus penitus de Ordinibus non mendicantibus possit in Civitate, ac suburbiis memoratis, seu extra illa infra prædictum spatium Oratorium, Monasterium, Ecclesiam, vel religiosum locum de novo acquirere, sive construere, vel ædificare, aut ab alio, vel aliis constructum, vel ædificatum habere quomodolibet, vel tenere. Per hoc autem Ordinibus illis non mendicantibus, qui Oratoria, Monasteria, Ecclesias, vel loca Religiosa in Civitate, aut suburbiis supradictis ad præsens obtinere noscuntur, nequaquam intendimus aliquod præjudicium generari, quin ea retinere liberè, & habere, ipsisque, prout consueverunt hætenus, uti possint, ac etiam ædificare in illis, & habere Conventum sui dumtaxat Ordinis in eisdem, transferendi ea in Religiosos alios dictis Ordinibus non mendicantibus licentiâ penitus interdictâ. Nos enim ex nunc irritum, & inane decernimus, ac nullius prorsus esse momenti si quid contra hujusmodi statutum, & ordinationem nostrâ quâcumque auctoritate à quoquam fuerit attentatum: Nulli ergo omnino hominum liceat hanc paginam nostri statuti, ordinationis, & constitutionis infringere, vel, &c. Si quis, &c. Datum Romæ, apud S. Petrum 2. Kalend. Maii, Pontificatus nostri Anno primo.

Subest Plumbum per sericum ductum.

Nicolaus Papa IV.

Subjectum Diploma sub Plumbo duplicatum habemus, quò confirmat Privilegia, Ecclesiamque Caput totius Ordinis appellat.



Nicolaus Episcopus servus servorum Dei.

*Dilectis filiis, Ministro Provinciæ, ac Custodi Sancti  
Francisci, & Fratribus Ordinis Fratrum Mi-  
norum de Assisio, sal. & Apost. ben.*

**P**Ræclara gloriosissimi Confessoris B. Francisci merita, quibus universalis Ecclesia, quasi quodam singulari fulgore præutilat, sedulæ considerationis indagine perscrutantes, & recogitantes attentius, copiosos salutis fructus, qui ex Ordine vestro proveniunt fidelium animabus; dignum, & rationi consonum, quinimmò debitum arbitramur, ut Ecclesiam, quæ in Civitate Assisii in ejusdem Sancti honore fundata, & dedicata dignoscitur, & in qua Corpus ejus sanctissimum requiescit, favoribus foveamus eximiis, condignis prosequamur honoribus, & specialibus gratiis, & privilegiis muniamus. Hinc est, quòd nos, propter ipsius Sancti reverentiam, volentes prædictam Ecclesiam, quæ totius Ordinis vestri CAPUT existit, specialiter honorare: ut nullus omnino Ecclesiam ipsam, quæ nulli, nisi Romano Pontifici est subiecta, & totum locum ipsius, cum pertinentiis suis Ecclesiastico supponere valeat interdicto, absque speciali, & expresso Apostolicæ Sedis mandato, faciente plenam, determinatam, & expressam de indulto hujusmodi,



de Ecclesia, & loco prædictis, ac etiam de nomine dilecti filii nostri Martiri Sanctæ Mariæ in Porticu Diaconi Cardinalis, cui fratrum ejusdem Ordinis gubernatio, protectio, & correctio per Sedem Apostolicam sunt commissæ, aut ejus, cui eas in posterum committi contigerit, mentionem; quòdque cujuscumque interdicti tempore, etiam si per Sedem ipsam, vel Literarum ejus auctoritate fuerit promulgatum, liceat vobis in eadem Ecclesia, & infra locum prædictum, clausis januis, interdictis, & excommunicatis exclusis, celebrare divina, & altâ voce cantare, ac alia Ecclesiastica Sacramenta in eadem Ecclesia, & infra locum recipere prælibatum, vobis auctoritate præsentium indulgemus. Nulli ergo omnino hominum liceat hanc paginam nostræ concessionis infringere, vel ei, &c. Si quis autem, &c. Datum Reate, 2. Idus Maii, Pontificatus nostri Anno primo.

In Plumbo.

Nicolaus Papa. IV.



Nicolaus Episcopus fervus fervorum Dei.

*Dilectis filiis Generali Ordinis Fratrum Minorum,  
& Provinciæ Sancti Francisci Ministris,  
sal. & Apost. bened.*

**R** Educentes ad sedulæ considerationis examen, quòd continua Ecclesiæ Beati Francisci de Assisio conservatio non modicum noscitur sumptuosa, & quòd ad eam, in qua ipsius Sancti corpus gloriosissimum requiescit, ac etiam ad Ecclesiam Sanctæ Mariæ de Portiuncula, ob ipsius Sancti reverentiam innumera Fratrum vestri Ordinis confluit multitudo, quòdque Assisi Civitas brevi concluditur spatio, & propterea minus sufficiens redditur ad subventionem Fratrum ipsorum necessitatibus impendendam, paternæ sollicitudinis studio ducimur, ut super iis provisionis opportuna remedium apponamus. Unde cum nostræ intentionis existat, ut omnia, quæ in quibuscumque pecuniis, seu monetis in Ecclesiis, sive locis eisdem à Christi fidelibus offeruntur, in hujusmodi conservatioem ejusdem Ecclesiæ S. Francisci, ac subventionem Fratrum ad Ecclesias confluentium supradictas, & eorum etiam, qui commorantur inibi convertantur: Tibi Minister Provinciæ, ac etiam dilecto filio Custodi Beati Francisci per alias Literas nostras injungimus, ut aliquam, vel aliquas personas idoneas, & fideles, de qua, vel quibus tu, & ipse videritis expedire, & quæ de tuo, & ejus Ordine non existant, nomine Romanæ Ecclesiæ, ac pro ipsa, prout expedire putabitis, deputare, ac in ipsarum loco aliam, vel alias personas de Ordine non existentes eodem, sicut tibi, & ei videbitur, subrogare curetis, quæ in quibuscumque pecuniis, seu monetis in Ecclesiis, sive locis prædictis à Christi fidelibus, sicut præmittitur, offeruntur, sollicitè colligant, diligenter custodiant, & conservent. Gerentes itaque de circumspèctione vestra fiduciam in Domino specialem, vobis filii Ministri, & utrique vestrum communiter, & divisim, ex nunc præsentium auctoritate committimus, ut de oblationibus, seu eleëmofinis supradictis possitis de di-



*Sacri Conventus Assisiensis*

secretorum Fratrum ejusdem Ecclesiæ S. Francisci consilio facere conservari, reparari, ædificari, emendari, ampliari, aptari, & ornari præfatas Ecclesias, & loca earum, cum, & prout vestra discretio viderit expedire. Ac si quid de oblationibus, & eleëmofinis prælibatis residuum fuerit, in necessitates Fratrum ad Ecclesias, & loca confluentium prælibata, & eorum etiam, qui commorantur ibi cum integritate converti, donec per nos, vel successores nostros Romanos Pontifices per eorum patentes Literas, & Apostolicâ Bullâ munitas, aliud in hac parte contigerit ordinari. Datum Reate, Id. Maii, Pontificatus nostri Anno primo.

Pendet per cordulam Bulla Apostolica cum Inscriptione.

Nicolaus Papa IV.

Alia consimilis tenoris habentur Custodi, & Fratribus de Assisio directæ, quibus apparet subjectio Ecclesiæ S. Mariæ Angelorum Custodi, & Fratribus Assisiatibus.



Nicolaus Episcopus servus servorum Dei.

*Dilectis filiis Guardiano, & Fratribus Ordinis Minorum Ecclesiæ S. Francisci de Assisio,  
sal. & Apost. bened.*

**E**Ximia devotionis affectus, quem ab ineuntis ætatis nostræ primordiis ad B. Franciscum gloriosissimum Confessorem reverenter habuimus, & habemus, nos instanter inducit, ut Ecclesiam vestram in ejusdem S. Francisci honore constructam, in qua devotas Altissimo laudes obtulimus in minori officio constituti, præcipuis prosequamur honoribus, & specialibus gratiis honoremus. Volentes igitur hujusmodi affectum nostrum, & etiam sinceræ dilectionis zelum, quem ad eandem Ecclesiam gerimus, per effectum operis explicare, cupientes quoque, ut prædicta Ecclesia congruis honoribus frequenterur, omnibus Christi fidelibus verè poenitentibus, & confessis, qui ad eandem Ecclesiam in die festivitatis B. Francisci prædicti, & septem diebus immediatè sequentibus causâ devotionis accesserint, annuatim de omnipotentis Dei misericordia, & BB. Petri, & Pauli Apostolorum ejus auctoritate confisi tres annos, & totidem quadragenas de injuncta sibi poenitentia misericorditer relaxamus. Datum Reate, 5. Kal. Octobris, Pontificatus nostri Anno primo.

Subest Apostolica Bulla serico juncta laqueo.

Nicolaus Papa IV.



Nicolaus Episcopus servus servorum Dei.

*Dilectis filiis Custodi, & Fratribus Sancti Francisci  
de Assisio, sal. & Apost. bened.*

**E**xcitamur ab intimis operante sinceræ devotionis affectu, quem ab ineuntis ætatis nostræ primordiis ad Beatum Franciscum gessimus, & gerere non cessamus, ut venerabilem ipsius Ecclesiam, in qua gloriosum requiescere noscitur Corpus ejus, specialibus gratiis, & favoribus prosequamur. Hinc siquidem provenire conspicitur, quod vobis quoddam Aurifrisium nuper de mandato nostro contextum, tam materiâ, quam opere pretiosum, prout ex ejus apertius inspectione colligitur, quod eidem Ecclesiæ ad ornatum Altaris ipsius de Apostolicæ Sedis plena liberalitate donamus, per dilectum filium Magistrum Petrum de Gorra familiarem nostrum latorem presentium duximus destinandum, auctoritate Apostolicâ districtius inhibentes, ne Aurifrisium ipsum vendere, alienare, seu distrahere quomodolibet attentetis. Nos enim ex nunc irritum, & inane decernimus, si secus per quemcumque quavis auctoritate contigerit attentari. Nulli ergo omnino hominum liceat hanc paginam nostræ inhibitionis, & Constitutionis infringere, vel ei, &c. Si quis autem, &c. Datum Reate, 7. Id. Augusti, Pontificat. nostri Anno secundo.

Laqueo serico Plumbum pendet. Nicolaus Papa IV.



Nicolaus Episcopus servus servorum Dei.


*Dilectis filiis Custodi, & Fratribus Ordinis Minorum  
S. Francisci de Assisio, sal. & Apost. bened.*

**P**recelsa gloriosissimi Confessoris Beati Francisci merita, quæ in Ecclesia Dei, quasi candelabra præclara resplendent, sedulæ considerationis indagine perscrutantes, & cogitantes attentius, quod ipse, tanquam vitis botris opulentis exuberans, in vinea Domini palmites produxit egregios, & supernâ cooperante gratiâ producere non desistit: dignum ducimus, & rationi consonum, quinimmò debitum arbitramur, ut Ecclesiam vestram, in qua ipsius Confessoris Corpus sanctissimum requiescit, eximiis prosequamur favoribus, & præcipuis, ac specialibus gratiis, & indulgentiis honoremus. Cupientes igitur, ut Ecclesia ipsa congruis honoribus frequentetur, & ut Fideles ipsi eò libentius eam adeant, quò majorem in ea se senserint gratiam percepturos: Omnibus verè poenitentibus, & confessis, qui ad prædictam Ecclesiam diebus singulis causâ devotionis accesserint, de omnipotentis Dei misericordia, & Beatorum Petri, & Pauli Apostolorum ejus auctoritate con-



fili annum unum , & quadraginta dies de injuncta sibi poenitentia misericorditer relaxamus . Datum Romæ apud Sanctam Mariam Majorem , 4. Nonas Maii , Pontificat. nostri Anno secundo .

Laqueo serico subest Apostolica Bulla. Nicolaus Papa IV.



Nicolaus Episcopus servus servorum Dei.

*Universis Christi fidelibus præsentis Literas inspecturis,  
sal. & Apost. bened.*

**E**Ximie devotionis affectus , quam ab ineuntis ætatis nostræ primordiis ad Beatum Franciscum gloriosissimum Confessorem , reverenter habuimus , & habemus , nos instanter inducit , ut Ecclesiam in ejusdem Beati Francisci honore constructam , in qua ipsius Confessoris corpus sanctissimum requiescit , & devotas in ea Altissimo laudes obtulimus in minori officio constituti , eximiis prosequamur favoribus , & præcipuis , ac specialibus gratiis , & indulgentiis honoremus . Volentes igitur hujusmodi affectum nostrum , & etiam sinceræ dilectionis zelum , quem ad eandem Ecclesiam gerimus per effectum operis explicare : cupientes quoque , ut Ecclesia ipsa congruis honoribus frequentetur , & ut fideles ipsi eo libentius Ecclesiam ipsam adeant , quò majorem in ea se senserint gratiam percepturos ; Omnibus verè poenitentibus , & confessis , qui ad Ecclesiam ipsam in Pentecosten , Nativitatis , Assumptionis , Purificationis , & Annunciationis B. Mariæ Virginis , Translationis B. Francisci , ac S. Antonii festivitatem per octo dies festivitatem ipsas immediate sequentes , necnon in Anniversario die Dedicationis ipsius Ecclesiæ devotè visitaverint annuatim , de omnipotentis Dei misericordia , & Beatorum Petri , & Pauli Apostolorum ejus auctoritate confisi unum annum , & quadraginta dies de injuncta sibi poenitentia misericorditer relaxamus . Dat. apud Urbem-veterem , Kal. Junii , Pontificatus nostri Anno quarto .

Apostolica Bulla serico pendet Laqueo .

Nicolaus Papa IV.

Nicolaus defuncto , postquam vacavit Petri Sedes annis duobus , mensibus tribus , electus fuit Petrus Eremita , dictus de Murrhone ab alpestri monte , in quo austère vivens morabatur , nomine Cælestinus V. Sanctus hic vir post quinque menses Pontificatus cessit , ut ad Eremum rediret . Ei successit Benedictus Caietanus , qui fuit Bonifacius VIII. & Franciscanam Ecclesiam Indulgentiis ditavit ,





Bonifacius Episcopus servus servorum Dei.

*Dilectis filiis Custodi, & Fratribus Ordinis Minorum Ecclesiæ Sancti Francisci de Assisio, sal. & Apost. bened.*

**A**Nte thronum divinæ clementiæ fideles Christi Sanctorum piis adiuti suffragiis ad eorum colenda festiva solemnia, eò debent frequentius excitari, quò talium patronorum fulti præsidio, potiora retributionis æternæ præmia promerentur. Nosquè vigilis more Pastoris oves gregis Dominici curæ nostræ commissas, quas cupimus in loco pascuæ collocari, ad eorumdem Sanctorum trahimus libenter obsequia, ut eorum fulti patrocinii ad æternæ salutis gaudia valeant pervenire. Cupientes igitur, ut Ecclesia vestra, quæ gloriosissimi Confessoris B. Francisci est vocabulo insignita, & in qua ejus Corpus sanctissimum requiescit, frequentiam honoretur fidelium, & circa eam quærentium Dominum tantò ferventiùs devotio ferveat, quantò abundantius spiritales ibi thesauros invenerit in Cœlesti Jerusalem sibi perenniter profuturos, omnibus verè pœnitentibus, & confessis, qui ad eandem Ecclesiam in Festo B. Francisci prædicti, & per septem dies Festivitatem ipsam immediatè sequentes causâ devotionis accesserint, annuatim de Omnipotentis Dei misericordia, & Beatorum Petri, & Pauli Apostolorum ejus auctoritate confisi, unum annum, & quadraginta dies de injunctis sibi pœnitentiis misericorditer relaxamus. Datum Romæ apud Sanctum Petrum 12. Kal. Februarii, Pontificatûs nostri Anno primo.

Per sericum Laqueum pendet Bulla Apostolica.

Bonifacius Papa VIII.

Bonifacius Episcopus servus servorum Dei.

*Dilectis filiis, Custodi, & Fratribus Ordinis Minorum Sancti Francisci de Assisio, sal. & Apost. bened.*

**L**icet is, de cujus munere venit, ut sibi à fidelibus suis dignè, & laudabiliter serviatur, de abundantia pietatis suæ, quæ merita supplicum excedit, & vota, benè servantibus multò majora retribuat, quàm valeant promereri: nihilominus tamen desiderantes reddere Domino populum acceptabilem, fideles Christi ad complacendum ei, quasi quibusdam illectivis muneribus, indulgentiis videlicet, & remissionibus invitamus, ut exinde reddantur divinæ gratiæ aptiores. Volentes igitur, ut Ecclesia vestra, in qua Corpus Sancti Francisci Confessoris, Fundatoris Ordinis vestri, quiescit,

con-



congruis honoribus frequentetur : omnibus verè pœnitentibus, & confessis, qui Ecclesiam ipsam diebus singulis causa devotionis venerabiliter visiterint, de Omnipotentis Dei misericordia, & Beatorum Petri, & Pauli Apostolorum ejus auctoritate confisi, centum dies de injuncta sibi pœnitentia misericorditer relaxamus. Datum Romæ apud S. Petrum 12. Kal. Februarii, Pontificatus nostri Anno primo.

Serico transfixa laqueo pendet Apostolica Bulla.

Bonifacius Papa VIII.



Gregorius Episcopus servus servorum Dei.

*Ad Perpetuam Rei Memoriam.*

**S**edes Apostolica, pia mater, iis, qui personarum Ecclesiasticarum, & piorum locorum commodum, & utilitatem respiciunt, libenter se exhibet favorabilem, & benignam. Nuper siquidem pro parte dilectorum filiorum Custodis, & Fratrum Ordinis Minorum Assisiat. Nobis fuit expositum cum querela, quòd licet contingat interdum, ut nonnulli de Civitate, & Diœcesi Assisiat. condentes de bonis in suis ultimis voluntatibus testamenta, in eisdem testamentis nonnullas pecuniarum summas, & res alias ligent, seu relinquunt dilectis filiis Custodibus Altarium S. Francisci Assisiat. ac S. Mariæ de Angelis Assisiat. Diœcesis Ecclesiarum locorum prædictorum Fratrum, aut Ecclesiis ipsis, per manus eorundem Custodum Altarium, qui Laici existunt, pro ornamentis, & fabrica Ecclesiarum, & locorum, ac sustentatione Fratrum prædictorum expendendas, seu etiam erogandas; tamen quandoquæ hæredes testatorum, seu exequutores testamentorum hujusmodi, in solvendo, & tradendo legata, seu relicta hujusmodi Custodibus præfatis, diversas conantur difficultates ingerere, ut pias voluntates eorundem testatorum valeant defraudare: propter quod oportet Custodes eosdem, vel partem hujusmodi legatorum, seu relictorum hæredibus, seu exequutoribus ipsis dimittere, aut per litigiorum contractus coram sæcularibus, vel aliis Judicibus jus suum pro legatis, & relictis hujusmodi integrè consequendis, cum magnis dispendiis, & laboribus prosequi, in detrimentum ipsarum Ecclesiarum, & dictorum Fratrum præjudicium non modicum, & gravamen. Quare pro parte ipsorum Custodis, & Fratrum nobis fuit humiliter supplicatum, ut providere eis super præmissis de opportuno remedio paterna diligentia curaremus. Nos igitur attendentes, quòd hujusmodi pias defunctorum voluntates decet integrè adimplere, ac cupientes eisdem Ecclesiis, ac Custodibus, & Fratribus super præmissis, quantum cum Deo possumus, de opportuno remedio providere: Auctoritate Apostolica tenore præsentium statuimus, & etiam ordinamus, quòd dilecti filii in spiritualibus, & temporalibus Judices ordinarii, qui in prædicta Civitate sunt, & erunt pro tempore, quilibet eorum videlicet in foro suo, in quibuscumque causis, quæ per eosdem Custodes Altarium, vel eorum Procuratores legitimos super hujusmodi legatis, seu relictis contra quascumque personas dictarum Civitatis & Diœcesis de cætero move-



movebuntur, procedere possint, & debeant simpliciter, & de plano sine strepitu, & figura judicii, & nihilominus eisdem Judicibus præsentium tenore mandamus, quatenus omnes, & singulas hujusmodi causas infra duorum mensium spatium, postquam per publica instrumenta, vel testes legitimos, seu alia legitima documenta eis constiterit, quod legata, seu reliqua hujusmodi præfatis Ecclesiis, vel Custodibus, ut præfertur, legitimè facta fuerint, & debentur, eisdem, prout ad ipsorum spectat officium debito sine decident, facientes quod decreverunt auctoritate nostra per debita juris remedia firmiter observari, non obstantibus statutis, & consuetudinibus dictæ Communitatis, ac Apostolicis, & aliis Constitutionibus contrariis quibuscumque. Nulli ergo omnino, &c. nostræ Constitutionis, ordinationis, & mandati, &c. Si quis autem, &c. Datum Avenion. 4. Id. Januarii, Pontificatus nostri Anno quinto.

Plumbea Bulla serico ducta Laqueo.

G. de Florentia.

Eo anno adhuc Portiuncula erat Fratrum Minorum Conventu. Assisi.



Benedictus Episcopus servus servorum Dei.


*Venerabili Fratri Nicolao Episcopo Assisiat. Nostro  
in Spiritualibus in Urbe Vicario.*

**I**Nter curas multiplices, quas injunctum Nobis desuper officium Apostolicæ servitutis indicit, illa sollicitat potissimum mentem nostram, ut providere quantum nobis ex alto permittitur, procuremus, quod Urbs Romana, in qua nostri Sedem Apostolicam cœlestis dispensatio statuit, & firmavit Ecclesiæ fundamenta, pacis ubertate gaudeat, & ad salutaria dirigatur, fidelesquè degentes ibidem, quorum nobis cura imminere specialiter noscitur, alimentis spiritualibus non fraudentur. Sanè cum, sicut ad nos perlatum extitit his diebus, B.M. Joannes Episcopus Anagninus, noster in eadem Urbe in Spiritualibus Vicarius, pridem fuerit in partibus illis viam universæ carnis ingressus, nos prospicere salubriter super his paternæ sollicitudinis studio cupientes, & ad te, quæ literarum scientia, puritate fidelitatis, maturitate discretionis, morum, & probitatis honestate, aliisque virtutum meritis adjuvari confidimus, nostræ considerationis intuitum convertentes, te in Urbe supradicta, ejusquè suburbis, & districtu, Vicarium nostrum in Spiritualibus, tenore præsentium constituimus, ac deputamus. Visitandi Ecclesias, Monasteria, & loca Ecclesiastica sæcularia, & Regularia quorumcumquè Ordinum non exempta, nec privilegiata, & tam Ecclesiarum, Monasteriorum, & locorum ipsorum, quam alias personas Ecclesiasticas Urbis, suburbiorum, & districtus prædictorum cujuscumque status, Ordinis, vel conditionis existant. Necnon reformandi quæ in eis reformationis ministerio noveris indigere, ac earum, & cujuslibet ipsarum excessus, & crimina corrigendi, & puniendi, aliaquè faciendi,



faciendi , & exercendi , auctoritate nostra , quæ ad hujusmodi Vicariatûs officium pertinere noscuntur . Contradiçtores quoque per Censuram Ecclesiasticam , appellatione postposita , compescendi . Non obstante , si aliquibus communiter , vel divisim , &c. per literas Apostolicas non facientes mentionem , &c. Tibi facultatem plenariam concedentes . Quocirca Fraternitati tuæ per Apostolica scripta mandamus , &c. Datum Avenione 17. Kal. Maii , Pontificatûs nostri Anno septimo .

Refertur à Vuad. t. 3. In Reg. Pont. pag. 260. qui etiam priùs pag. 258. affert Bullam , qua idem F. Nicolaus de Assisio fuit electus Episcopus.



Bonifacius Episcopus servus servorum Dei.

*Universis Christi fidelibus præsentis literas inspecturis,  
sal. & Apost. bened.*

**L**icet is , de cujus munere venit , &c. Cupientes igitur , ut Capella Sanctæ Catharinæ , sita in Ecclesia domûs Fratrum Ordinis Minorum Assisiat. congruis honoribus frequentetur , & etiam conservetur , & ut Christi fideles cò libentiùs causa devotionis confluant ad eandem Capellam , & ad conservationem ipsius manus promptiùs porrigant adiutrices , quò ex hoc ibidem dono cœlestis gratiæ uberiùs conspexerint se refectos ; de Omnipotentis Dei misericordia , & Beatorum Petri , & Pauli Apostolorum ejus auctoritate confisi , omnibus verè pœnitentibus , & confessis , qui in festo Dedicationis ejusdem Capellæ , Capellam ipsam devotè visitaverint annuatim , & ad ejus conservationem , hujusmodi manus porrexerint adiutrices , ut præfertur , quinque annos , & totidem quadragenas de injunctis eis pœnitentiis misericorditer relaxamus . Volumus autem , quòd si aliàs visitantibus dictam Capellam , vel ad ejus conservationem manus porrigentibus adiutrices , seu aliàs inibi pias eleëmofynas erogantibus , aut aliàs aliqua alia Indulgentia in perpetuum , vel ad certum tempus nondum elapsum duratura per nos concessa fuerit , præsentis Literæ nullius existant roboris , vel momenti . Datum Perusii 2. Kalend. Novembris , Pontificatûs nostri Anno tertio .

Sigillum plumbeum.

Pro B. De Fontanellis.

F. J. De Cherubinis.



Bonifacius Episcopus servus servorum Dei.

*Universis Christi fidelibus, &c.*

**E**ccliesiarum, & piorum locorum fabricis manus porrigere adjutrices pium apud Deum, & meritorium reputantes, nonnunquam Christi fideles ad impendendum Ecclesiis, & locis ipsis auxilium nostris exhortationibus invitamus, & ut ad id eò promptius animentur, quò ex hoc majus animarum commodum se speraverint adepturos, pluresque pro iis temporalibus subsidiis spiritualia eis munera, remissiones videlicet, & Indulgentias elargimur. Cum itaque sicut tam ex fide dignorum testimoniis, quàm etiam propria experientia probante ex parte didicimus, Ecclesia domus Fratrum Ordinis Minorum S. Francisci Assisiæ. tam pro conservatione structuræ, quàm etiam pro victu, & aliis necessariis Fratrum dicti Ordinis in ipsa domo degentium, & ad eam confluentium magnis indigeant profluviiis expensarum; & quia ob malam temporis conditionem longè pauciores solito, imò quodammodo illis nullæ eleemosynæ fiunt, ubi temporibus retro actis domus prædicta numerositate Fratrum, Sacræ Religionis observantia, ac divinorum eximia celebratione florere consuevit; nunc Fratres admodum pauci, religiosè tamen viventes, in ea etiam cum penuria magna, ac defectibus ferè valeant sustentari; & nisi super hoc de celeri, & expedienti remedio succurratur, sit verisimiliter dubitandum, quòd ipsa domus in deterius passim prolabatur. Nos cupientes super iis ea subventionem, qua ad præsens possumus, providere, universitatem vestram attentè monemus, requirimus, & hortamur, vobis in remissionem vestrorum peccaminum nihilominus injungentes, quatenus de bonis, vobis à Deo collatis ad conservationem structuræ, & sustentationem Fratrum hujusmodi pias eleemosynas, & grata charitatis subsidia erogetis, ut per subventionem vestram consulatur; & vos per hæc, & alia bona, quæ Domino inspirante feceritis, ad æternæ possitis felicitatis gaudia pervenire: nos enim de Omnipotentis Dei misericordia, & Beatorum Petri, & Pauli Apostolorum ejus auctoritate confisi, omnibus verè poenitentibus, & confessis, qui ad conservationem, & sustentationem hujusmodi manus porrexerint adjutrices, septem annos, & totidem quadragenas, de injunctis eis poenitentiis misericorditer relaxamus. Præsentem autem literas mitti per quæstuarios districtiùs inhibemus, eas, si secus actum fuerit, carere viribus decernentes. Datum Assisi, 5. Kal. Septembris Pont. nostri anno 4.

Locus Plumbei sigilli.

Gratis pro Deo de mandato  
D. Papæ. Franciscus.



Bonifacius Episcopus servus servorum Dei.

*Ad Futuram Rei Memoriam.*

**A**postolicæ Sedis circumspecta solertia ad id libenter intendit, ut Sedis ejusdem privilegia, rationabilibus ex causis concessa, si forsan vetustate, aut negligentia consumantur, cum illud debitè requiritur, innovatione restauret, & autoritate fulciat innovata. Sanè dudum fel. rec. Alexander Papa IV. prædecessor noster Custodi Fratrum Ord. Minorum, in domo Fratrum S. Francisci Assisiat. pro tempore existenti, per suas literas concessit, ut eorum omnium, qui de remotis partibus ad Ecclesiam dictæ domus causa devotionis accederent, & suorum nequirent habere copiam sacerdotum, cum dictus Custos ab ipsis requisitus foret, ipse, & Fratres prædicti Ordinis, tam in ipso loco morantes, quàm etiam venientes undecunque, quibus id duceret committendum, confessiones audire valerent, & eis pro commissis injungere poenitentiam salutarem: nisi fortè talia commisissent, propter quæ Sedes prædicta esset meritò consulenda, prout in eisdem literis plenius continetur. Quare pro parte dilectorum filiorum Custodis, & Fratrum domus ejusdem nobis fuit humiliter supplicatum, ut cum hujusmodi literæ incipiant vetustate consumi, eas innovare de benignitate Apostolica dignaremur; Nos igitur hujusmodi supplicationibus inclinati prædictas literas, quas in nostra Cancellaria diligenter conspici, & quarum tenorem de verbo ad verbum præsentibus inseri fecimus, auctoritate Apostolica tenore præsentium innovamus, & præsentis scripti patrocinio communimus. Per hoc autem nullum cuique de novo jus acquiri volumus, sed antiquum tantum conservari. Tenor verò dictarum literarum talis est. Alexander Episcopus servus servorum Dei. Dilecto filio Custodi Fratrum de Ordine Minorum Ecclesiæ S. Francisci Assisiat. salutem, & Apostolicam benedictionem. Pro reverentia Beati Francisci, &c. ut supra, inter Bullas dicti Alex. IV. Nulli ergo omnino hominum liceat hanc paginam innovationis infringere, vel ei ausu temerario contraire. Si quis autem, &c. Datum Assisi, 5. Kal. Septembris Pontificatus nostri anno quarto.

Plumbeum sigillum.



Bonifacius Episcopus servus servorum Dei.

*Ad Perpetuam Rei Memoriam.*

**D**um ad merita B. Francisci, cujus Ordo Sacer, videlicet Fratrum Minorum in pomario militantis Ecclesiæ plantatus ab ipso primordio uberes, & commendabiles fructus produxit semper, producit, ac producet, dante Domino, in futurum. Dum etiam ad eximiam devotionem, quam



quam fidelis populus Christianus ad Ecclesiam ejusdem Sancti in nostra Civitate Assisiat. consistentem, & insigni structura percelebrem, in qua etiam Corpus dicti Sancti venerabiliter requiescit, habere dignoscitur, intuitum paternæ considerationis dirigimus: inducimur non indignè, ut Ecclesiam ipsam, necnon domum Fratrum dicti Ordinis, propè sitam, specialibus prerogativis, & favoribus decoremus, ut Custos, & Fratres in dicta domo degentes quietius Deo servire, & onera incumbencia melius valeant supportare; Attendentes igitur, quòd, sicut etiam ipsa probante experientia, ex parte didicimus, Ecclesia, ac domus prædictæ, tam pro conservatione hujusmodi structuræ, quàm etiam pro victu, & aliis necessariis in ipsa domo degentium, ac susceptione, ac recreatione ad eam supervenientium Fratrum dicti Ordinis, magnis indigent profluviiis expensarum: & cum ipsi Fratres ob malam temporum conditionem longè sint pauciores solito, & quodammodo nullæ eleemosynæ illis fiant, ubi temporibus retroactis domus prædicta numerositate Fratrum, Sacræ Religionis observantia, ac divinorum eximia celebratione florere consuevit; nunc Fratres admodum pauci (religiosè tamen viventes) in ea sustentari, etiam cum penuria magna, ac defectibus ferè possint: & super dictis Custodi, & Fratribus providere de alicujus subventionis præsidio cupientes, eorum in hac parte supplicationibus inclinati, domum prædictam, cum suis membris, ac juribus, & pertinentiis ab omnibus, & singulis impositionibus, & collectis, per Generalem, & Provincialem Ministros, & alios Prælatos, & Superiores pro tempore existentes, nec non Generalia, & Provincialia Capitula, etiam pro tempore celebranda, ac statuta dicti Ordinis edita, & edenda, quorumcumque tenorum fuerint de cætero imponendis; auctoritate Apostolica, de speciali gratia, præsentium tenore in perpetuum eximimus, & totaliter liberamus. Decernentes ex nunc, quoscunque processus, & sententias contra præsentem exemptionem, & liberationem, quavis auctoritate forsan habendos, & ferendos irritos, & inanes. Nulli ergo omnino, &c. nostræ exemptionis, liberationis, & constitutionis infringere, vel ei, &c. Si quis autem, &c. Datum Assisii 5. Kal. Septembris Pont. nostri anno 4.

Plumbeum signum serico traductum vinculo.

Supplicata.

Gratis pro Deo de mandato D. PP.  
Franciscus.

\*\*\*\*\*

Eugenius Episcopus servus servorum Dei.

*Dilecto filio Generali Ministro Ordinis Fratrum  
Minorum. sal. & Apost. ben.*

**P**rovisionis nostræ debet provenire subsidio, ut jus suum cuilibet conservetur. Hinc est, quòd nos teneam quorundam literarum fel. rec. Martini Papæ V. prædecessoris nostri in regeſto ipsius prædecessoris re-  
pertum, pro eo, quòd, sicut exhibita nobis nuper pro parte sua petitio con-  
tinebat,



tinebat, prædictæ originales literæ casualiter sunt deperditæ, de regeſto ipſo de verbo ad verbum tranſcribi, & ad tuæ petitionis inſtantiam, præſentibus annotari fecimus, qui talis eſt. Martinus Episcopuſ ſervuſ ſervorum Dei. Dilecto filio Generali Miniſtro Ordiniſ Fratrum Minorum, ſalutem & Apoſtolicam benediſtionem. Ad ſtatum Ordiniſ Fratrum Minorum proſperè conſervandum curam noſtræ ſollicitudiniſ dirigentes, ea libenter tibi concedimus, per quæ commoditatibus ipſiuſ Ordiniſ, & Fratrum in eo degentium, ut divini obſequiis intentiùſ vacare poſſint, neceſſitatibus ſuccurratur. Sanè cum poſſeſſiones, & alia quàmplura bona mobilia, & immobilià, tam per fidelium oblationes, donationes, & ultimas decedentium voluntates, quàm aliàs multipliciter diverſiſ Conventibus, & lociſ dicti Ordiniſ pro ipſorum ſuſtentatione, & divini cultuſ obſequiis ſunt hætenuſ relictæ, eorumque uſui deputatæ, & relinqui ſperetur etiam in futurum; Noſ volenteſ Conventuum, locorum, & Fratrum huiuſmodi opportunitatibus providere, donec aliud per Sedem Apoſtolicam fuerit ordinatum, concedimus Procuratoribuſ Conventuum, & locorum dicti Ordiniſ pro tempore exiſtentibuſ, ut poſſeſſiones, & bona quæcumque mobilia, & immobilià, ac annuoſ proventus hætenuſ præfato Ordini, & ejuſ Conventibuſ relictæ; & in poſterum relinquenda, aut aliis nominibuſ acquiſita, vice, & nomine Romanæ Eccleſiæ, ad quam omnium rerum mobilium, & immobilium huiuſmodi juſ, proprietat, & dominium nullo ſpectat medio: recipere, tenere, & poſſidere, ac ipſorum fruſtuſ, reddituſ, & proventus petere, exigere, & percipere, illoſque in commodum, & utilitatem Fratrum, & Conventuum, ac locorum, & aliàs in eoſ uſuſ, quibuſ relictæ, & deputatæ fuerunt dumtaxat, & de ipſorum Fratrum conſilio, requiſitione, & aſſenſu convertere, & exponere poſſint, ac debeant. Conſtitutionibuſ Apoſtolicis, ac ſtatutiſ, declarationibuſ, & ordinationibuſ tam Generalium, quàm Provincialium Capitulorum, conſuetudinibuſ quoque Ordiniſ prædicti, ac aliis in contrarium editiſ, non obſtantibuſ; &c. Datum Romæ apud Sanctoſ Apoſtoloſ 10. Kal. Septembris, Pontificatuſ noſtri anno tertio decimo.

Cœterum, ut earundem literarum tenor prædictuſ ſic inſertuſ omnimodam rei, ſeu facti certitudinem faciat, Apoſtolica auctoritate decernimus, ut illud idem robur, eamque vim, eundemque vigorem dictuſ tenor per omnia habeat, quem haberent originaleſ literæ ſupradictæ, & eadem eidem tenori fideſ adhibeatur, quandocunque, & ubicumque in iudicio, vel alibi, ubi fuerit exhibituſ, vel oſenſuſ, & eidem ſtetur firmiter in omnibuſ, ſicut eiſdem originalibuſ literiſ ſtaretur, ſi forent exhibitæ, vel oſenſæ. Per hoc autem nullum juſ cuiquam de novo acquiri volumuſ, ſed antiquum tantummodo conſervari. Nulli ergo omnino, &c. noſtræ conſtitutioniſ, & voluntatiſ infringere, vel, &c. Si quiſ autem, &c. Datum Florentiæ Anno Incarnationiſ Dominicæ 1440. Quinto Id. Nov. Pont. noſtri anno 10.

Sigillum Plumbeum.

M. de Boſſiſ.

Jo: de Mara.

Bonannuſ.



Nicolaus Episcopus servus servorum Dei.

*Ad Perpetuam Rei Memoriam.*

**Q**Uæ pro personarum Ecclesiasticarum, & piorum locorum commodo, & utilitate laudabili, ac provida prædecessorum nostrorum ordinatione statuta sunt, opportunis decet favoribus prosequi, & efficacem operam adhibere circa observantiam earumdem. Dudum siquidem pro parte dilectorum filiorum Custodis, & Fratrum Ordinis Minorum Assisiat. literæ fel. rec. Gregorii Papæ XI. prædecessoris nostri emanarunt tenoris subsequents.

Gregorius Episcopus servus servorum Dei, ad perpetuam rei memoriam, Sedes Apostolica pia Mater, &c. sequitur totus tenor earum, ut supra, usque ad Datum Avenion. 4. Id. Jun. Pontificatus nostri anno quinto. Et subdit Nicolaus.


Cum autem sicut exhibita nobis nuper pro parte Custodis, & Fratrum prædictorum petitio continebat, Judices, in præinsertis literis designati, Justitiam Custodi, & Fratribus super legatis hujusmodi infra dictum terminum duorum mensium juxta statutum, ordinationem, & mandatum dicti prædecessoris persèpè ministrare differant, & recusent legitimè requisiti. Nos igitur statui, & indemnitatibus, ac quieti, & tranquillitati eorumdem Custodis, & Fratrum super hoc opportunè providere cupientes, literas prædictas cum omnibus statuti, ordinationis, & mandati, ac omnium in eis contentorum clausulis, tenore præsentium innovamus, approbamus, & præsentis scripti patrocinio communimus, volentes, & Apostolica auctoritate statuentes, quòd ille ex dictis Judicibus, qui infra dictos duos menses, juxta dicti prædecessoris literarum formam, & tenorem, eisdem Custodi, & Fratribus, seu eorum Procuratori Justitiam ministrare cessaverit, seu distulerit legitimè requisitus, pœnam viginti quinque florenorum auri de Camera, Camera Apostolicæ applicandorum, pro qualibet vice, qua, ut præfertur, non ministraverit, incurrat. Ità quòd, si Potestas dictæ Civitatis pro tempore existens, quoties Custos, & Fratres prædicti super hoc sibi conquesti fuerint, tot de salario, & stipendiis dicti Potestatis, quòd ad summam perveniat, & pœnam, quàm idem Potestas incurrerit debeat recipere, & retinere. Si verò Judex Ecclesiasticus, videlicet Ordinarius, vel ejus in spiritualibus Vicarius, aut officialis pœnam hujusmodi incurrerit, Gubernator, vel Thesaurarius per Sedem Apostolicam in partibus illis deputatus summam ipsam ab eo exigere, & extorquere ad usus, & proprietatem Camera Apostolicæ convertere, & applicare debeant, ac teneantur, super quibus eisdem Gubernatori, Thesaurario, & Massario præfatos Judices cogendi, compellendi, & nanciscendi plenam concedimus licentiam pariter, & facultatem. Contra dictores per censuram Ecclesiasticam, appellatione postposita, compescendo; non obstantibus omnibus illis, quæ idem prædecessor in præinsertis suis literis voluit non obstare, cœterisque contrariis quibuscumque. Aut si Judicibus Ecclesiasticis, aut sæcularibus præfatis, vel quibuscumque aliis communiter, vel divisiim à Sede Apostolica sit indultum, quòd ad solutionem, vel



præstationem alicujus poenæ pecuniariæ alicui faciendæ cogi, aut compelli valeant per literas Apostolicas non facientes plenam, & expressam, ac de verbo ad verbum de indulto hujusmodi mentionem. Nulli ergo omnino, &c. nostræ innovationis, approbationis, & commonitionis, ac statuti, & voluntatis infringere, vel &c. Si quis autem, &c. Datum Romæ apud S. Petrum Anno Incarnationis Dominicæ 1449. quinto Kal. Februar. Pontific. nostri anno 3.

Pendet serico vinculo confixum Plumbeum signum.

Gratis de mandato D. P.  
Gabriel.



Nicolaus Episcopus servus servorum Dei.

*Venerabili Fratri Episcopo Assisiat.  
sal. & Apost. bened.*

**P**lis supplicum votis libenter annuimus, illaque favoribus prosequimur opportunis. Exhibita siquidem nobis nuper pro parte dilectorum filiorum Custodis, & Conventus Domus S. Francisci Assisiat. Ordinis Fratrum Minorum petitio continebat, quod licet Platea sita ante Ecclesiam domus prædictæ ad dictam domum legitimè pertineat, tamen dilecti filii Cives, seu Commune Civitatis nostræ Assisiat. temporibus, quibus multi Christi fideles Indulgentiarum causa de diversis mundi partibus ad eandem Ecclesiam confluunt, situs apothecarum, quæ in dicta Platea præmissis temporibus eriguntur, locant, vel vendunt, pretiaque, seu pensiones in proprias utilitates convertunt, & inter se distribuunt, & indebitè partiuntur. Cum autem sicut eadem petitio subjungebat, præfata domus plurima reparatione indigeat, & ad reparationem hujusmodi Christi fidelium eleemosynæ, aut facultates aliæ dictæ domus minimè suppetant; pro parte Custodis, & Fratrum prædictorum nobis fuit humiliter supplicatum, ut pretia, & pensiones ex apothecarum sitibus hujusmodi proventura, de cætero in reparationem dictæ domus converti, illaque domui præfatae propterea applicari mandare, de benignitate Apostolica dignaremur. Nos igitur hujusmodi supplicationibus inclinati, fraternitati tuæ per Apostolica scripta mandamus, quatenus, si vocatis Civibus prædictis, & aliis, qui fuerint evocandi, de præmissis vobis legitimè constiterit, pretia, seu pensiones hujusmodi præfatae domui pro illius reparatione in perpetuum applies. Non obstantibus contrariis quibuscumque. Datum Romæ apud S. Petrum Anno Incarn. Dom. 1450. 17. Kal. Febr. Pont. nostri anno quarto.

Funiculo Canap. pendet Bulla.

Gratis de mandato D. P.

H. Gen. Foletus.

P. de Spinosis.

Inno-



## INNOCENTIUS PAPA IV.

*Venerabilibus Fratribus Patriarchis, Archiepiscopis,  
& Episcopis, ac dilectis filiis, Abbatibus, Prio-  
ribus, Archipresbyteris, Decanis, Archidiaconis,  
& aliis Ecclesiarum Prælati, ad quos  
literæ istæ pervenerint, salutem, &  
Apostolicam Benedictionem.*

**O**lim à gentiliū oculis, tenebrarum deterfa caligine, & ab eorum cordibus infidelitatis gelidæ hyeme secedente, vernalis ex eo successit amœnitas redolentium florum, venustate decora, quod Ecclesiæ, prius desertæ, ac sterili, filii devotione præcipui, valloque constantiæ præmuniti, nascuntur, qui, ut flores primævi, & diffusam spirant suavitatem odoris, & uberioris per Dei gratiam fructum sibi proferunt honestatis. Sicque filiorum sibi multitudine proveniente innumera, sui que loco à mari usque ad mare tentorii dilatatio infra ipsius invaluit terminos, vox turturis, gemitus, ac doloris, dum sæva mitescens tyrannorum crudelitas, idolis exterminio traditis, ad lamenta pœnitentiæ suffragante illo, cuius stupenda sunt opera, mirificè se convertit. Gaudeat itaque ob hoc ipsa Ecclesia, quæ probrosæ detrimenta sterilitatis abiciens, salubris incrementa fertilitatis suscepit, ac nuptiali fœdere nunc illi gratiosa coniungitur, à quo priusquam esset assumpta de gentibus, invenerat se desertam. Læteatur igitur, æmulæque suæ de terrestri etiam ejectæ Hierusalem, Synagogæ videlicet, dudum sibi huiusmodi sterilitatis inconnoda impingenti, secura respondeat, quod jam suæ prolis fecunditate, Cœlestis mari Hierusalem cicatrix obducitur, & quæ antiqui habitatores vacua domicilia reliquerunt, ipsa suæ universitatis illustrat præsentia fœlici.

§. I. Porro ne huiusmodi exuberante lætitia, quispiam in valle miseriæ morientium terra, requiem posset sibi polliceri continuam, cuius vita est, adversus inimicorum ingruentia bella exterorum castra, militiæ super terram, ac ne prædicta Ecclesia, quæ Mater est cunctorum fidelium, maternæ conditionis expers existeret, si solitas, præsertim in partu quorundam filiorum suorum, matrum parientium molestias non subiret, interdum instauratur quodammodo sibi adversitas opportuna. Sicut in passione piæ memoriæ B. Stanislai Cracovien. Episcopi, cuius meritis præfata refulget Ecclesia, patuit evidenter, cum enim idem, in sortem Pontificalis ministerii dignè vocatus à Domino, super gregis sibi commissi prudenter custodiam vigilaret, hostium sagaciter exploravit insidias, malignantium anticipavit consilia, æmulique nostri depræhendens laqueos, ipsius cautè retiacula dissolvebat. Hic nempe pro suis ovibus cor suum tradiderat ad vigilandum diluculo, ut si quem gravi fortè depræhenderet tentatione concussum, mox ubere consolationis adhibito, cum crigeret desolatum; & quem in bono proficientem adverteret, cum gratulationis ubere protinus confortaret. Ut non minus per hoc defi-

cienti-



cientibus , quàm proficientibus subditis , se clavis indicibus ostenderet esse matrem . Verùm cum non sine internæ mentis angustia Regem Polonorum nomine Boleslaum , in tantum horrendis voluptatibus subjici , carnisque nefandis illecebris cerneret enervari , ut in passiones ignominie traditus , & inhumanis contumeliis afficiens corpus , mulierum mamillis , avulsis propriis exinde liberis , catulos apponeret miserabiliter educandos , ne execraretur præfatus Pontifex per dissimulationem favere , postquam ipsum à præmissis flagitiis , sedula , & paterna correctione evocare non potuit , in ipsum consultè medicinalem Petri gladium exercuit in spiritu lenitatis . Sperans , ut percussus dolens , ad percutientem se in humilitate rediret , Dominum exercituum suppliciter requirendo .

§. II. Sed ipse indurato corde medicinam exhorrens , & increpationem abominans disciplinæ , imò malleum , velut stipulam reputans , non solum nullæ poenitudine se correxit , verùm etiam ad pejora in suæ dominationis cumulum provocatus , juxta aram , non ordini , non loco , nec tempori deferens , jussit Pontificalibus indutum Antistitem per suos satellites diris corporis cruciatibus deputari .

§. III. Sed ipsi quoties in eum irruere tentant , toties compuncti , toties mansueri sunt prostrati .

§. IV. Et tunc idem Rex , suæ inserviens impetuosiùs tyrannidi , manus in eum convertit sacrilegas , sponsum è gremio sponsæ , pastorem abstrahit ab ovili , patrem inter filie amplexus , & filium in visceribus penè obtruncavit maternis ; faciens irritatus atrocitate ferali , ipsius ( prohi dolor ) corpus inhumaniter in frustra concidi , velut singulis membrorum partibus penæ inflictio deberetur . sed ille , apud quem patientia pauperum non peribit in finem , non solum rutilantibus hujus Sanctissimi Corporis partes splendoribus illustravit , verùm etiam ipsum nullo in eo cicatricis apparente vestigio , integritati restituens , aquilarum suarum præsidio miraculosè à ferarum moribus præservavit . Gustato denique acerrimo , ob zelum justitiæ , calice passionis , cum ab eodem Tyranno totaliter putaretur consumptus , ecce ut lucifer oritur , & quasi meridianus fulgor in firmamento confurgit , propter quod ejus faciem nonnulli in suis necessitatibus devotissimè deprecantur . Ipse quidem defossus securus dormit , requiescit , & non est qui jam ipsum exterreat . Nec mirum , quia Civitatem illam honoris , & gloriæ corona insignitus inhabitat , ubi est mansio secunda , populus sine murmure , ac patria totum id continens , quod delectat .

§. V. Verum ne militans Ecclesia de tali , ac tanto patrono sic atrociter sibi substracto , inconsolabiliter quasi gemitus singultuosos emitteret , si beneficiorum ipsius affluentia eam non contingeret sæpiùs delectabiliter irrigari , ecce gloriosus in Sanctis suis Dominus , volens ejusdem patris plenitudinem gloriosè inditiis exprimere manifestis , & præstolanti Ecclesiæ grata conferre super hoc recreationis remedia , tot , & tantis fecit ipsum famosis miraculis coruscare ( de quibus facta nobis , & fratribus nostris prout debuit per testes idoneos plena fides exitit ) quod ejus inter Sanctos cæteros implorare subsidium , reputavimus meritò non indignum . Nam mortuis vita , lumen cæcis , auditus surdis , verbum mutis , claudis gressus , epilectis spiritibus corporum requies , ad ejus invocationem nominis , Cœlesti dextera subito conferuntur .

§. VI. Propter quod , ne hujus rutilantem lucernam sub modio periculosè abscondi contingeret , quam idem Dominus tot mirificis signis rectè disposuit super Ecclesiæ Candelabrum honorificè collocari , præsertim cum ex hoc igno-




rantium Deum propellantur tenebræ, confundatur perversum hæreticorum dogma, & fidelium beata credulitas augeatur; Nostrorum fratrum, necnon & Prælatorum tunc apud Sedem Apostolicam existentium communicato consilio, prædictum B. Stanislaum Episcopum dignè Sanctorum Catalogo duximus ascribendum.

§. VII. Quocirca Universitati vestræ per Apostolica scripta districtè præci-  
piendo mandamus, quatenus 8. Idus Maii (die videlicet, quo mortis abso-  
lutus vinculo, victurus perenniter, ad fontem supernæ prodiit voluptatis) festum ejusdem, prout miranda ipsius meritorum magnitudo exigit, celebretis, & faciatis solemniter celebrari. Ut id vobis de thesauris cœlestibus ejus pia intercessione proveniat, quod ipse, præstante CHRISTO, percepisse dignoscitur, & possidere perpetuò gloriatur.

§. VIII. Cœterum ut Universitati fidelium invisibilis aulæ consequendi de-  
necias ex concessa nobis potestate desuper propitiantem Domino sit facultas, quinimò & ut nomen exaltetur Altissimi, si sponte suam Venerabilem sepultu-  
ram fidelium procuremus accessibus frequentari, omnibus verè poenitentibus, & confessis, qui ad dictam sepulturam in memorato festo, & usque ad octa-  
vam ipsius, causa devotionis accesserint annuatim, ipsius suffragia petitori, de Omnipotentis Dei, &c. unum annum, & quadraginta dies, accedentibus verò annis singulis ad prædictam sepulturam infra ejusdem festi quindenam, quadraginta dies de injuncta sibi poenitentia misericorditer relaxamus.

Datum Assisi XV. Kalendas Octobris, Pontificatus nostri anno undecimo.



## NICOLAUS PAPA V.

*Dilectis filiis Custodi, & Fratribus Conventus  
Assisi Ordinis Minorum.*

**M**Andavimus dudum vobis per Breve nostrum sub certis gravibus  
pœnis, ut de pecuniis perventuris ad manus Procuratoris vestri  
Conventus, ex oblationibus factis, & fiendis super Altare B. Ma-  
riæ de Angelis Assisiat. Diœc. Fratribus Sanctæ Mariæ prædictæ pro ædifica-  
tione certi eorum dormitorii solveretis florenos auri de Camera trecentos.  
Postmodum intelleximus, quòd hætenus dictis Fratribus florenos centum per-  
solvistis, quòdque si etiam reliqui ducenti solverentur, cederet in magnum  
præjudicium vestri loci, & structurarum ipsius, ad quorum reparationem in-  
tenditis, & pluribus ad id pecuniis egetis. Et propterea fuit pro parte ve-  
stra nobis instantissimè supplicatum, ut vos, ac locum, & Conventum præ-  
fatum ab hujusmodi solutione ducentorum florenorum liberare, & penitus ab-  
solvere dignaremur. Nos hujusmodi supplicationibus inclinati, mandatum  
vobis factum, & Breve ad vos directum, harum serie revocantes, ac nullius  
esse roboris, vel momenti decernentes, vos à dicta solutione ducentorum flo-  
renorum, & à pœnis, ac excommunicationis, & suspensionis sententiis, in-  
quas



quas propter ipsam solutionem non factam forsan incurristis, prorsus liberamus, & absolvimus; per præsentis mandantes, ut prædicti Brevis vigore, nihil de cætero solvaris Fratribus Sanctæ Mariæ præfatis. Sed dictos florenos ducentos, ex hujusmodi oblationibus perventuros, in utilitatem, & reparationem dicti Conventus, prout vobis necessarium fuerit, convertatis. Brevis prædicto, & quocunque alio indulto Apostolico in contrarium edito, cæterisque contrariis non obstantibus quibuscumque. Datum Romæ apud S. Petrum sub annulo Piscatoris die 26. Februarii, 1454. Pontificatus nostri anno 7.

Extra sigillum in cera rubea.

P. Lunensis.



Calistus Episcopus servus servorum Dei.

*Ad Perpetuam Rei Memoriam.*

**D**Ecet, & convenit nostræ provisionis studio prævenire, ut Ecclesia Sancti Francisci Assisiat. Ordinis Fratrum Minorum, in qua gloriosum Corpus ejusdem Sancti requiescit, sumptuoso opere fabricata, unâ cum Conventu, & aliis adjacentibus ædificiis, in structuris, & ædificiis ipsis nullo modo defectum patiatur, sed continua reparationis, manutentionis, & conservationis remedia, ac incrementa suscipiat. Considerantes igitur, quòd ad præmissa dictæ Ecclesiæ, ac dilectorum filiorum Fratrum ejusdem Conventus propriæ desunt facultates, ac attendentes, quòd ad Ecclesiam Sanctæ Mariæ de Portiuncula Ordinis prædicti de Observantia Assisiat. Diœc. devotionis causa magna Christi fidelium utriusque sexus confluit multitudo, ex cujus suffragiis, & piis largitionibus circa alias necessitates ædificiorum, & domorum memorata Ecclesia S. Francisci juvari, ac sustentari potest. Nos opportunè providere volentes, motu proprio, & ex certa scientia volumus, & auctoritate Apostolica tenore præsentium decernimus, statuimus, & ordinamus, quòd omnes, & singulæ pecuniariæ cujuscunque generis monetarum oblationes, quas deinceps in dicta Ecclesia de Portiuncula pro tempore fieri contigerit, cedere, & applicari debeant fabricæ, & reparationi præfatae Ecclesiæ S. Francisci, illæque Procuratori pro tempore existenti, Fratrum, & Conventus eorundem consilio, in fabricam, ac reparationem, manutentionem, & conservationem ipsius Ecclesiæ, & ædificiorum prædictorum tantum fideliter convertendæ, realiter, & cum effectu assignentur. Qui quidem Procurator oblationes ipsas sibi assignatas in idem opus integrè exponere, necnon de receptis, & expositis hujusmodi, sicut de aliis introitibus dictorum Ecclesiæ, & Conventus ad ejus manus pro tempore pervenientibus facere consuevit, rationem, & computum singulis annis reddere debeat, ac etiam teneatur. Quod-  
que



que de pecuniariis oblationibus hujusmodi præsentis Anni 1457. in festo Assumptionis B. Virginis Mariæ proximè præterito incepti, & ut continuo sequitur, finiendi, eidem Procuratori pro dicto opere, ut præfertur, assignandis, detrahi, & retineri debeant quadraginta Ducati, pro hac vice dumtaxat in usus, & utilitatem præfatæ Ecclesiæ de Portiuncula convertendi; quos quidem quadraginta ducatos, ex prædictis oblationibus pecuniariis jam perventis, & apud Bartholomæum Petri Civem Assisiat. depositis, Procuratori dictorum Fratrum, & Conventus de Portiuncula ad omnem ejusdem Guardiani requisitionem volumus, & mandamus per præfatum Depositarium assignari. Cæterum ne pecuniariæ oblationes hujusmodi distrahi, aut dissipari, seu minus debitè conservari, aut negligentia, vel defectus committi quoquo modo in eis possint; dilecto filio Ministro Provinciæ dicti Ordinis, ac præfato Custodi pro tempore existentibus harum serie præcipiendo committimus, & mandamus, quatenus aliquem tertii Ordinis, aut alium Religiosum, vel sæcularem virum comprobatæ integritatis, & vitæ eligere, & deputare auctoritate nostrâ procurent, qui oblationes eadem pecuniarias in foveam quamdam fideliter coadunare, juxta laudabilem hætenus approbatum morem, debeat; quas pecunias sic collectas, Custos pro tempore dictorum Fratrum, & Conventus, quando sibi videbitur, per Procuratorem eorundem inde liberè levare faciat, ad dicta opera, ut præmittitur, convertendas, cui super hoc Guardianus pro tempore existens præfatæ Ecclesiæ de Portiuncula assistere, & favere teneatur. De cera verò, quæ per fideles supradictos in eadem Ecclesia de Portiuncula singulis Indulgentiarum, ac præfatæ Assumptionis, & aliarum festivitatum diebus Anno quolibet pro tempore offertur, quantitas ducentarum sexaginta librarum, videlicet, centum, & sexaginta in Assumptionis prædictæ, & reliquarum, & centum librarum in Annuntiationis ejusdem B. M. V. festivitatis, per Fratres, qui tunc inibi morabuntur, præfato Custodi, in usus, & utilitatem dictæ Ecclesiæ S. Francisci similiter convertenda, debeat realiter, & cum effectu tradi, & etiam assignari: Quæ omnia, & singula sic, ut præmittitur fieri, & adimpleri volumus, ac in virtute S. Obedientiæ ab omnibus inviolabiliter observari mandamus. Non obstantibus Constitutionibus, ac eidem Ecclesiæ de Portiuncula, ejusque domui, Conventui, & Fratribus ab Apostolica Sede, vel ejus Legatis, seu quibusvis aliis, quavis auctoritate concessis privilegiis, indultis, & literis Apostolicis generalibus, vel specialibus, etiam si de illis, eorumque totis tenoribus de verbo ad verbum specialis, & expressa præsentibus esset mentio facienda, cæterisque contrariis quibuscunque; quibus omnibus in hac parte expressè derogamus, eis aliàs in suo robore permansuris. Nulli ergo omnino hominum liceat hanc paginam nostrorum voluntatis, constitutionis, statuti, ordinationis, mandati, & commissionis infringere, vel, &c. Si quis autem, &c. Datum Romæ apud Sanctum Petrum. Anno Incarnationis Dominicæ 1457. Id. Sept. Pontific. nostri anno 3.

Pendet plumbea Bulla.

A. De Venetiis.

Solutio quadraginta ducatorum, à Prædicto Pontifice pro una vice tantum imposita Custodi S. Francisci ab eo Guardiano de Observantia facienda, fuit revocata à Pio. II. ejus successore, sicut limitatio Cere, ut sequitur.



*Dilectis filiis Custodi, & Fratribus Ordinis Sancti  
Francisci de Assisio Ordinis Minorum.*

## PIUS PAPA SECUNDUS.

**D**ilecti filii salutem, & Apostolicam benedictionem. Vidimus literas fel. rec. Nicolai V. Papæ prædecessoris nostri, quibus antiquam consuetudinem, ad id temporis observatam, sequutus, voluit, statuit, & ordinavit de obventionibus, & oblationibus ceræ Capellæ S. Mariæ de Portiuncula, aliàs de Angelis dicti Ordinis Assisiat. Diœc. omnem ceræ quantitatem die prima Augusti à primis Vesperis, usque ad secundas sequentis diei, ac duobus aliis Annunciationis, & Assumptionis gloriosæ Virginis festivitatis, sive tertiam partem ceræ per totum annum, eidem, & aliis domus ipsius Capellis proveniente, pro usu ejusdem Ecclesiæ S. Francisci cedere, & integrè deberi perpetuis temporibus in futurum. Præmissis adjiciendo omnem pecuniarum summam eidem Capellæ proveniente, pro una in reparationem Ecclesiæ, & domus prædictarum, & pro alia mediocritatibus in eorundem Custodis, & Fratrum illic pro tempore degentium usum penitus converti, pro ut in dictis literis, 14. Kal. Januarii 1452. Datis latius continetur. Vidimus etiam literas fel. rec. Calisti Papæ III. etiam prædecessoris nostri Id. Sept. 1457. datas, quibus voluit, & declaravit omnes pecunias Custodi, & Fratribus supradictis Sanctæ Mariæ de Portiuncula per totum annum quomodolibet ex oblationibus obvenientes, cedere, & applicari fabricæ, & reparationi præfatæ Ecclesiæ S. Francisci, præter ducatos quadraginta, qui eo anno tantum, & ea vice darentur Ecclesiæ S. M. de Portiuncula: ceræ autem oblationum totius anni dictæ Ecclesiæ S. M. factarum quantitas ducentarum sexaginta librarum eidem S. Francisci Ecclesiæ perpetuò consignaretur: prout in dictis etiam prædecessoris Calisti literis latius continetur. Nos itaque habita diligenti utriusque Ecclesiæ conditionis, & Fratrum in illis degentium informatione; bono, & laudabili respectu, primas Nicolai prædecessoris primi literas auctoritate Apostolica tenore præsentium confirmantes, & servari præcipientes, atque mandantes; secundas Calisti prædecessoris secundi ante dictas penitus revocamus, & nullius esse volumus valoris, & momenti. Datum Florentiæ apud S. Mariam Novellam sub annulo Piscatoris, primo Maii 1459. Pontificatus nostri anno primo.

Extra sigillum in cera rubra.

Blondus.



Sixtus Episcopus servus servorum Dei.

*Ad Perpetuam Rei Memoriam.*

**A**D insignem, venerandamque Ecclesiam Domus S. Francisci Assisiat. Ordinis Fratrum Minorum, veluti nostræ peregrinationis alumnam, paternæ considerationis aciem extendentes, circa ea, per quæ ipsius structuræ, & ædificia reparari, & conservari valeant, nostræ provisionis opem, & operam impendimus efficaces. Sanè pro parte dilectorum filiorum Custodis, & Fratrum dictæ domus, nobis fuit nuper expositum, quòd domus prædicta, quæ ipsius Ordinis CAPUT est, & quam tunc ad miserabilem tendentem ruinam, à fundamentis nuperrimè reparari, & instaurari fecimus opere sumptuoso, propter ipsius domus, & ipsius Ecclesiæ amplitudinem, ac etiam venustatem, in suis rectis, structuris, & ædificio adhuc instaurazione, & reparatione continua indigere dignoscitur, ad quam subeundam, & ne Sanctorum imagines, Sculpturæ, atque picturæ ornatissimæ, quibus plurimum decora est, caducæ fiant, ipsius Domus non suppetunt facultates, præsertim cum piæ fidelium desint eleemosynæ, olim in Capella domus S. Mariæ de Angelis extra muros Assisiat. provenientes; pro supplendis præmissis, & aliis ad divinum cultum necessariis, ac etiam Sacristiæ dictæ Ecclesiæ paramentis, & ornamentis Ecclesiasticis deputatæ, quæ, temporum causante malicia, decrescunt, & diminuuntur in dies, in ipsius Domus S. Francisci magnum detrimentum. Quare pro parte Custodis, & Fratrum prædictorum ruit nobis humiliter supplicatum, ut more pii Patris, cujus immensa Charitas filiorum incommoda sublevare non cessat, eis, eorumque, & dictæ domus necessitatibus in præmissis opportunè providere de benignitate Apostolica dignaremur. Nos igitur, qui Ordinem, Ecclesiam, & Domum prædictas paterna dilectione complectimur, hujusmodi supplicationibus inclinati, auctoritate Apostolica præsentium tenore statuimus, & ordinamus, quòd ex nunc in antea, perpetuis futuris temporibus, de quibuscumque pecuniarum summis, tam ordinariè, quam extraordinariè solvendis, quæ Prioribus, Potestati, & illorum famulis, ac tubicinis, Magistro Grammaticæ, Cancellario, Advocato, & Sindico, Ambasciatoribus, Nuntiis, & Bajulis communis, Turreriis, temperantibus horologium, curam habentibus fontium, aquæductorum, & murorum, ac quibusvis aliis Officialibus Civitatis nostræ Assisiat. intra dictos muros pro tempore existentibus persolvuntur, unus bonenus, quorum quadraginta florenum constituunt, pro quolibet floreno retineri, & fabricæ dictæ Ecclesiæ, & Domus S. Francisci pro reparandis rectis, structuris, & ædificiis prædictis renovandis paramentis, & aliis rebus ad divinum cultum spectantibus instaurandis applicari, nec non Procuratori, seu Oeconomo dictæ domus sine exceptione aliqua solvi, & assignari debeat per Thesaurarium, sive Collectorem, aut Officiales Camera Apostolicæ, sive alium ad solvendum salaria dictorum officialium deputatum, seu deputatos, omni prorsus exceptione, sive appellatione cessante. Volumus autem, quòd pecuniæ exigendæ prædictæ in reparationem, & conservationem prædictas, & non aliàs debeant omninò converti. Et nihilominus dilectis filiis Sancti Rufi-

fini,



fini, & Sancti Pauli intra, ac Sancti Massei extra muros Assisiat. Prioratuum Prioribus, per Apostolica scripta mandamus, quatenus ipsi, vel duo, aut unus eorum, per se, vel alium, seu alios, Oeconomo, sive Procuratori prædicto in præmissis efficacis defensionis præsidio assistentes faciant de singulis florenis salariorum eorundem singulos bonenos hujusmodi assignari: Contradiutores per censuram Ecclesiasticam appellatione postposita compescendo. Non obstantibus Constitutionibus, & ordinationibus Apostolicis, nec non statutis, & consuetudinibus Civitatis ejusdem, etiam juramento, confirmatione Apostolicâ, vel quavis firmitate alia roboratis, contrariis quibuscumque. Aut si Officialibus, & personis salaria hujusmodi percipientibus prædictis, vel quibusvis aliis communiter, vel divisim à Sede Apostolicâ iudul-tum existat, quòd interdici, suspendi, vel excommunicari non possint, per literas Apostolicas non facientes plenam, & expressam, ac de verbo ad verbum de indulto hujusmodi mentionem, &c. Nulli ergo omnino, &c. nostrorum statuti, ordinationis, voluntatis, & mandati infringere, vel ei, &c. Si quis autem, &c. Datum Romæ, apud Sanctum Petrum, Anno Incarnationis Dominicæ 1475. Sexto Id. Decemb. Pont. nostri anno 5.

Per laqueum sericum pendet plumbeum signum.

Gratis de mandato D. P.

A. de Urbino, H. Jacobi.

G. della fiera.

Idem Sixtus Quartus in signum suæ eximie dilectionis erga Religionem, quam professus fuerat, & erga suam hanc Ecclesiam, ac Domum, cujus fuerat alumnus, confirmavit cessionem illi factam ab Abbate Monasterii Sancti Nicolai in campo longo, Comitatus Assisiat. Cum omnibus pretiis, censibus, proventibus, cæterisque ejus redditibus, unâ cum sex Parochialibus Ecclesiis eidem Monasterio annexis. Ipsumque Monasterium cum omnibus ejus juribus Sacro Conventui perpetuò assignavit; cum onere solvendi Cameræ Apostolicæ quinquaginta Ducatos Auri quolibet Quindennio. Diplomata non refero, ne tædio afficam lectores, nam multa, & proluxa sunt, quibus suam devotionem erga Seraphicum Patrem, & paternum Amorem erga filios ad vivum exprimit.

Alexander quoque sextus, ad petitionem Magistri Ægidii de Ameria Ministri Generalis, & Custodis, ac Fratrum S. Collis Paradisi, eidem Sacro Conventui duplici diplomate assignavit, ac confirmavit in perpetuum Prioratum S. Jo: extra Castrum Turris Alfinæ, Urbevetanæ Diocesis; cum onere solvendi quolibet quindennio decem aureos ducatos Apostolicæ Cameræ. Unde constat, quàm propensi fuerint Summi Pontifices conservationi, & utilitati hujus Sacræ Basilicæ, cuius protectionem ab initio singulari modo susceperunt.





Sixtus Episcopus fervus fervorum Dei.

*Universis Christi fidelibus præsentis literas inspecturis,  
sal. & Apost. bened.*

**Q**UAMVIS Altissimus, de cujus munere venit, ut sibi à suis fidelibus dignè, & laudabiliter servatur, de abundantia suæ pietatis, quæ merita supplicum excedit, & vota, beneficientibus multò majora retribuat, quàm valeant promereri; nihilominus desiderantes Domino populum reddere acceptabilem, & bonorum operum sectatorem, fideles ipsos ad complacendum ei, visitandumque in honorem sanctorum ejus dedicatas Ecclesias, ac illorum festivitates, & solemnia devotius venerandum, quasi quibusdam allektivis muneribus, Indulgentiis videlicet, & peccatorum remissionibus invitamus, ut exinde reddantur divinæ gratiæ aptiores, & quòd eorum meritis nequeunt obtinere, Sanctorum eorundem intercessionibus consequantur, idque libentiùs agimus in Ecclesiis, quæ in honorem Sancti Francisci sunt constructæ, quò Sanctus ipse, quasi stella matutina claræ vitæ micans exemplis, sedentes in tenebris, & umbra mortis irradiatione præfulgidæ direxit in lucem; & tanquam Arcus refulgens inter nebulas, ac signum Domini fœderis, passionis scilicet Domini Nostri Jesu Christi, in ejus carne renovata Sacra Stygmata gestans, pacem, & salutem significavit hominibus; existens, & ipse Angelus veræ pacis destinatus à Deo, ut per viam altissime paupertatis tam verbo, quàm exemplo pœnitentiam prædicaret; nosque, qui sub regularibus institutis Ordinis Fratrum Minorum, qui ab eodem Sancto sumpsit initium, & illius inclito paupertatis voluntariæ vexillo à teneris nutriti; dum in Ordine ipso Generalis Ministri fungeremur officio, ad Cardinalatus honorem, ac demum ad Summi Apostolatus apicem assumpti fuimus, ejusdem Sancti meritis, & intercessione ad æternæ felicitatis gloriam pervenire speramus. Cupientes igitur, ut Ecclesia domus ejusdem Sancti Assi fiat. ejusdem Ordinis, dudum egregiis structuris, & opere admodum sumptuoso constructa, quæ inter alias Ecclesias domorum dicti Ordinis, tum structurarum magnitudine, cum ratione loci, in quo sita est, unde ejusdem Sancti origo fuit, re, & nomine obtinet Principatum, congruis frequentetur honoribus, & ejusdem Domus structuræ, & ædificia, quæ ad manifestam ruinam tendentia, post dictam assumptionem nostram, multipliciter reparari fecimus, & propter eorum magnitudinem non possint sine magna impensa, ad quam faciendam, & alia Custodi, & Fratribus ejusdem Domus pro tempore existentibus incumbencia onera sustinenda, proventus dictæ Domus, & elemosinæ, eis fieri solitæ non sufficiunt, sed sunt alia Christi fidelium suffragia plurimum opportuna, conserventur; ac Christi fideles eò libentiùs devotionis causa confluant ad eandem Ecclesiam, & manutentionem ædificiorum hujusmodi promptius manus porrigant adiutrices, quò exinde ibidem dono cœlestis gratiæ uberius conspexerint se refectos: de Omnipotentis Dei Misericordia, ac Beatorum Petri, & Pauli Apostolorum ejus auctoritate confisi, omnibus Christi fidelibus verè pœnitentibus, & confessis, qui Eccle-

siam



fiam prædictam in festo Translationis corporis ejusdem Sancti de mense Maii, à primis Vesperis, usque ad occasum solis diei ejusdem festi devotè visiterint annuatim, & ad structurarum, & ædificiorum hujusmodi manutentionem manum porrexerint adjutricem, omnium peccatorum, de quibus corde contriti, & ore confessi fuerint, plenam absolutionem, remissionem, & Indulgentiam concedimus, & largimur. Præsentibus perpetuis temporibus duraturis. Et ut confluentes ipsi ad dictam Ecclesiam, pro consequenda Indulgentia memorata, conscientiae pacem, & animarum suarum salutem, & Indulgentiam hujusmodi uberius, & commodius consequi valeant; Custodi dictæ Domus, qui pro tempore fuerit, aliquos probos dicti Ordinis professores, ætate, moribus, & scientia idoneos, in Præbiteratus ordine constitutos, in numero sufficienti, de quo sibi videbitur, qui die dicti festi, & quatuor diebus illud immediatè præcedentibus in præfata Ecclesia, & illi adjacentibus dictæ Domus ædificiis, eorumdem confluentium confessionibus diligenter auditis, pro commissis per eos excessibus, & peccatis, nisi talia forent, propter quæ Sedes Apostolica esset meritò consulenda, de absolutionis beneficio providere, & poenitentiam salutarem injungere liberè, & licitè valeant, deputandi, necnon vota quæcunque, Ultramarinis, & Beatorum Apostolorum Petri, & Pauli, ac in Compustella Jacobi, & Religionis votis dumtaxat exceptis, in alia pietatis opera commutandi facultatem concedimus per præsentem. Non obstantibus quibuscumque Indulgentiarum, & remissionum hujusmodi revocationibus, & suspensionibus, per nos, & prædecessores nostros Romanos Pontifices hætenus forsan factis, & in antea, etiam in favorem Cruciatæ, seu aliàs faciendis, sub quibus Indulgentiam, & literas præsentem nolumus quoquo modo compræhendi, ac Constitutionibus, & Ordinationibus Apostolicis, cæterisque contrariis quibuscumque. Datum Assisi Anno Incarnationis Dominicæ 1476. 8. Kal. Septembris Pontificatus nostri anno sexto.

Pendet Bulla serico laqueo ducta.

D. Galletus.



Sixtus Episcopus servus servorum Dei.

*Dilectis filiis Custodi, & Fratribus Domus Sancti  
Francisci de Assisio Ordinis Minorum.  
sal. & Apost. bened.*

**D**ignum reputamus, & congruum, ut sicut Corpus Sancti Francisci Ordinis vestri fundatoris, in Monasterio Sanctæ Claræ Assisiat. Ordinis ejusdem Sanctæ, durante fabrica Ecclesiæ in ejusdem Sancti honorem sumptuoso admodum opere constructa, quadriennio, vel circa, honorificè conservatum, de illa ad Ecclesiam hujusmodi vestræ Domus translatum extitit prima die festi-



festivitatis Pentecostes, ut eò dignior, & honorificentior Translatio ipsa censeretur, & à Christi fidelibus majore in veneratione haberetur, quò celebriori tempore fieret; ita festum Translationis hujusmodi per Sedem Apostolicam institutum, non vigesima quinta mensis Maii, in qua festum prædictum Pentecostes tunc celebratum, & Translatio Corporis ipsius Sancti facta fuit in ipsa Translatione respectus, Translatio ipsa celebretur; & prout festum Pentecostes variatur, ita & festum ipsum Translationis varietur, præsertim cum visitantes Ecclesiam ipsam Domus vestræ præfatam Assisiat. in qua præfati Sancti Corpus honorificè requiescit, ex nostra concessione plenariam suorum peccatorum Indulgentiam consequantur. Dilecti filii Francisci Sampsonis Generalis Ministri vestri Ordinis, ac vestris in hac parte supplicationibus inclinati, volumus, ac præsentium tenore Apostolica auctoritate statuimus, & ordinamus, quòd de cæterò festum ipsum Translationis secunda die festivitatis prædictæ Pentecostes perpetuis futuris temporibus celebretur, & juxta illius variationem, & occurrentiam tam dictum, quàm Indulgentia prædicta varietur; & quòd visitantes Ecclesiam vestram prædictam, dicta die secunda festivitatis Pentecostes, incipiendo à primis Vesperis ejusdem diei, usque ad solis occasum prædictam Indulgentiam consequantur, juxta, literarum formam, continentiam, & tenorem. Datum Romæ apud S. Petrum, Anno Incarnationis Dominicæ 1478. Nonis Februar. Pontificat. nostri anno octavo.

Pendet ex Cordula innexum plumbeum sigillum.

Sigismundus.



Sixtus Episcopus servus fervorum Dei.

*Dilectis filiis S. Pauli infra, & S. Matthæi extra muros Assisiat. Monasteriorum, per Priores gubernari solitorum Prioribus, ac Vicario Venerabilis Fratris nostri Episcopi Assisiat. in spiritualibus Generali, sal. & Apost. bened.*

**E**T si cunctis Christi fidelibus, ne indebitis molestiis afficiantur, vel eorum jura suppedientur, ex assuetæ pietatis officio assistere teneamur; Fratribus tamen domorum B. Francisci Assisiat. Ordinis Minorum eò magis adesse nos convenit, quò Domus ipsa cæteras ejusdem Ordinis domos vetustate antecellit, & in ea gloriosum Corpus dicti Sancti devotissimè conservatur, ejusque Fratres nullum habent alium, præter Romanum Pontificem defensorem. Exhibita siquidem nobis nuper, pro parte dilectorum filiorum



Custodis , & Fratrum dictæ domus petitio continebatur , quod licet ipsis , & eidem domui quamplurima bona in testamentis , & alias legata , & donata fuerint ; ea tamen ob malitiam Notariorum illarum partium , instrumenta Custodi , & Fratribus prædictis dare , & aliorum bona hujusmodi restituere noverunt , minimè consequi possunt , in ipsorum Custodis , & Conventus præjudicium , & gravamen . Quare pro parte Custodis , & Conventus prædictorum , nobis fuit humiliter supplicatum , ut eis in præmissis opportunè providere , de benignitate Apostolica dignaremur . Nos igitur de necessitatibus dictæ domus plenariam habentes notitiam , hujusmodi supplicationibus inclinati , discretioni vestræ per Apostolica scripta mandamus , quatenus vos , vel duo , aut unus vestrum , per vos , vel alium , seu alios , omnes , & singulos Notarios illarum partium , ac etiam omnes , & singulos , bona eisdem Fratribus , & domui relicta , & quomodolibet spectantia , ex quacumque causa detinentes Apostolica auctoritate , ut bona hujusmodi Fratribus prædictis restituant , ac Notarii instrumenta eis in autentica forma consignent , infra unum mensem à die monitionis hujusmodi computandum , sub excommunicationis poena , & vigintiquinque ducatorum Auri , Camera Apostolicæ applicandorum . Ac omnes , & singulos Notarios per Perusin. Tudertin. & Fuliginat. ac alias Civitates , & Dioeceses totius Ducatus Spoletin. & alias ubilibet constitutos , & domorum , possessionum , pannorum laneorum , & lineorum , pecuniarum , rerum , & localium , ac quorumcumque bonorum aliorum , quæcunque , quotcunque , & qualiacunque sint , quomodolibet Conventui , seu Fratribus , & domui prædictis , hætenus , & in futurum legatorum , vel donatorum instrumenta , infra unius mensis spatium , sub similibus poenis Custodi , & Fratribus præfatis exhibere , & tradere debeant . Alioquin eos , & ipsorum quemlibet per censuram Ecclesiasticam , & alia juris remedia , appellatione remota , compellatis : nec non ipsis Custodi , & Fratribus , ut pro usu dumtaxat sal , ubi voluerint , absque alicujus poenæ incurfu accipere ; ac Sacristiæ , & Infirmarie ejusdem Conventus aliquas Vineas , sine scrupulo conscientie , pro divino sacrificio , & infirmis tenerè liberè , & licitè valeant , dicta auctoritate concedatis . Non obstantibus Constitutionibus , & Ordinationibus Apostolicis , ac dicti Ordinis privilegiis , statutis , & consuetudinibus , juramento , confirmatione Apostolica , vel quavis alia firmitate roboratis , cæterisque contrariis quibuscunque . Aut si Notariis , & detentoribus præfatis , vel quibuscunque aliis , communiter , vel divisim ab Apostolica sit sede indultum , quod interdicti , suspendi , vel excommunicari non possint , per literas Apostolicas non facientes plenam , & expressam , ac de verbo ad verbum de Indulto hujusmodi mentionem . Datum Romæ apud S. Petrum , Anno Incarnationis Dominicæ 1471, Decimo septimo Kal. Februar. Pont. nostri anno 1.

Bulla pendet plumbea per cordulam ,

Gratis de mandato D. Papæ.

A. de Urbino.

G. de la fiera.



Sixtus Episcopus servus servorum Dei.

*Ad Perpetuam Rei Memoriam.*

**A**D Ordinem Fratrum Minorum, quem speciali dilectione prosequimur, nostræ dirigentes considerationis intuitum, & attentè prospicientes uberes fructus, quos Ordinis ejusdem professores in agro militantis Ecclesiæ produxerunt hætenus, & producunt, dignum, quin potius debitum arbitramur, ut domos, & loca dicti Ordinis, præsertim in Civitate nostra Assisi, in qua Ordo ipse sumpsit initium, consistentes speciali prærogativa favoris prosequamur, & iis, quæ à Prædecessoribus nostris eis providè sunt concessa, pro eorum subsistentia firmiori nostri adjiciamus muniminis firmitatem. sanè pro parte dilectorum filiorum Custodis, & Fratrum Domus Sancti Francisci Civitatis prædictæ dicti Ordinis nobis nuper exhibita petitio continebat, quòd Domus ipsa, & illius structuræ, ac ædificia opere admodum sumptuoso dudum constructa vetustate consumpta, & in se ipsis collapsa reparatione indigent non modicum sumptuosa, ad quam faciendam proventus fabricæ, & dictæ Domus non sufficiunt, verisimiliterque dubitant, quòd nisi celeriter occurratur, ad ruinam paulatim deveniet, in non modicum dicti Ordinis detrimentum, quòdque si eidem Domui concederetur, quòd fideicommissa, legata, & quæcumque aliæ dispositiones de bonis, & immobilibus hætenus facta, & quæ pro tempore forent dictæ Domui, Altaribus, Capellis, & picturis ejusdem, ac illius Fratribus, seu alteri eorum in genere, vel in specie, necnon hæreditates, & successiones, quæ aliàs Fratribus in dicta Domo pro tempore commorantibus ab intestato deferrentur, si Fratres ipsi hujusmodi successionum capaces essent per Syndicum Romanæ Ecclesiæ peti, consequi, exigere, recipi, & haberi, & bona in illis comprehensa vendi, & alienari, pretiumque exinde proveniens in conservationem structurarum, & ædificiorum dictæ Domus, ac pro ornamentis Sacristiæ illius dumtaxat converti possent, & deberent, profectò hujusmodi ruinæ ædificiorum prædictorum opportunè consuleretur. Quare pro parte Custodis, & Fratrum prædictorum nobis fuit humiliter supplicatum, ut quòd de cœtero fideicommissa, legata, & hæreditates hujusmodi ut præferuntur peti, exigere, & recipi, & bona in illis comprehensa vendi, & alienari, pretiumque exinde proveniens in præmissam causam converti possint, eis concedere, ac eos à datis, gabellis, seu vectigalibus pro rebus ad ipsorum, ac Domus, & Ecclesiæ prædictarum usum necessariis prorsus eximere, ac liberare, necnon privilegia, & indulta à Summis Pontificibus prædecessoribus nostris dictæ Domui concessa nostræ approbationis munimine solidare, aliasque in suis præmissis opportunè providere de Benignitate Apostolica dignaremur. Nos igitur de præmissis plenariè informati, & hujusmodi eorundem Custodis, & Fratrum supplicationibus inclinati, quòd de cœtero perpetuis futuris temporibus hæreditates, fideicommissa, legata, & quæcumque aliæ dispositiones, de bonis etiam immobilibus hætenus facta, per quoscumque, & quæ pro tempore fierent dictæ Domui, Altaribus, Capellis, & picturis ejusdem, ac illius Fratribus, seu alteri eorum in genere, vel in specie, necnon hæreditates, & successiones,



quæ aliàs Fratribus dictæ Domus pro tempore existentibus deferrentur, etiam in quibus Fratres ipsi, qui capaces essent, & Ordinis præfati professores saltem in communi bona habere possent succederent per Syndicum Romanæ Ecclesiæ ad commodum, & utilitatem ipsorum Fratrum peti, consequi, exigi, recipi, & haberi, & bona in illis comprehensa vendi, & alienari, ac pretium inde proveniens in conservationem structurarum, & ædificiorum prædictæ Domus, ac pro ornamentis Sacristiæ illius dumtaxat converti possint, & debeant in omnibus, & per omnia prorsus, & absque ulla differentia perinde, ac si legata fideicommissa, donationes, dispositiones, & alias voluntates hujusmodi pro, & in favorem ipsius Romanæ Ecclesiæ nominatim, & expresse hætenus emanassent, vel in futurum emanarent, ipsique Patres hujusmodi hæreditatum ab intestato capaces forent, & eorum jura in illis eadem Romanæ Ecclesiæ cessissent, & cederent, & quod contra præmissa de invaliditate, & nullitate testamentorum, donationum, & aliarum dispositionum, ac incapacitate eorundem Fratrum dici, & allegari non possit, quodque Syndicus pro tempore per Custodes, & Fratres dictæ Domus ad præmissa nominandus, ex nunc prout ex tunc per Nos, & Sedem Apostolicam constitutus esse censeatur Syndicus Romanæ Ecclesiæ, cum plenissimo mandato speciali, & specialissimo ad omnia illa in præmissis, & circa ea necessaria, seu quomodolibet opportuna, ad quæ facienda, gerenda, & exercenda cum per Custodem, & Fratres ipsos contigerit nominari, auctoritate Apostolica præsentium tenore statuimus, & ordinamus, ac eosdem Domum, Custodem, & Fratres à quibuscumque datis, gabellis, pedagiis, seu vectigalibus, pro carnibus, vino, farina, oleo, ac aliis rebus ad ipsorum Custodis, & Fratrum, ac Domus, & Ecclesiæ usum necessariis eadem auctoritate perpetuò eximimus, & liberamus, ac datiorum, gabellarum, & vectigalium eorundem, & actoribus, ne eosdem Custodem, & Fratres ad illorum solutionem invites compellant sub censuris, & pœnis in exigentes gabellas, & vectigalia hujusmodi à personis Ecclesiasticis à jure statutis prælibata auctoritate inhibemus, & nihilominus omnia, & singula immunitates, exemptiones, libertates, gratias, & indulta à fel. record. Gregorio IX. & XI. Nicolao, Clemente, Alexandro, & Innocentio IV. & VII. & Nicolao V. ac aliis Summis Pontificibus prædecessoribus nostris Ecclesiæ, & Domui præfatae, ejusque pro tempore Custodi, & Fratribus hætenus concessa, necnon illorum Apostolicas confirmationes, & validationes, ac quoscumque Gregorii, Nicolai, Clementis, Alexandri, Innocentii, Nicolai, & aliorum prædecessorum prædictorum super illis confectas, & emanatas literas, & privilegia, quorum omnium tenores præsentibus haberi volumus pro expressis eadem auctoritate ex certa nostra scientia approbamus, & præsentis scripti patrocinio communimus, illamque plenariam roboris firmitatem, etiam perinde, ac si per nos, de verbo ad verbum prout in literis, & privilegiis prædictis continetur de novo concessa foret cum, & robur perpetuæ firmitatis obtinere decernimus. Non obstantibus Constitutionibus, & Ordinationibus Apostolicis, & præsertim Clementis Papæ V. etiam prædecessoris nostri in Concilio Viennensi editis, ac dicti Ordinis juramento, confirmatione Apostolica, vel quavis alia firmitate roboratis, statutis, & consuetudinibus, ac regularibus constitutionibus, cæterisque contrariis quibuscumque. Nulli ergo omnino hominum liceat hanc paginam nostræ constitutionis, ordinationis, exemptionis, liberationis, approbationis, communionis, & decreti infringere, vel ei ausu temerario contraire. Si quis autem hoc attentare præsumpserit indi-



gnationem Omnipotentis Dei , ac Beatorum Petri , & Pauli Apostolorum  
ejus se noverit incursum . Datum Romæ apud Sanctum Petrum , Anno  
Incarnationis Dominicæ 1471. pridie Idus Novembris, Pontificatus nostri  
anno 1.

Gratis de mandato D.N. Papæ.  
B. de Fuentibus.

G. dela Liera.



Tempore Calixti III. Cardinalis Dominicus Ca-  
pranica Ordinis Protector, Summi Pontificis  
infra scriptum mandatum dedit Fratribus  
Portiunculæ, quod in charta perga-  
mena servatur in Archivio S.  
Conventus Assisii.

*Dominicus Miser. D. S. Crucis in Hier. Sacros. R.  
Eccl. Presbiter Cardinalis, major Pœnitentiarius,  
ac Sacri Ordinis Minorum Protector, licet  
immeritus, Guardiano, Sacristæ, ac  
Fratribus S. Mariæ de Angelis  
de Portiuncula vulgariter  
nuncup. sal. & Ap. ben.*


**C**UM superiori tempore sæpius cum magna querela expositum fuerit  
Sanctissimo Domino Nostro, quod paramenta, planeta, calices, &  
alia ad ornatum, & cultum divinum pertinentia, quæ per fideles in  
loco Conventus prædicti offeruntur, per vos ad alia loca Ordinis vestri pro-  
pria auctoritate deportantur, & Ecclesiæ S. Francisci, ad quam, relictis tan-  
tum in dicto loco necessariis, omnia deferri consueverant, nulla penitus tra-  
duntur. Ac etiam quod paramenta, & ornamenta prædicta interdum, cum  
offeruntur, quasi vobis minùs utilia, vel necessaria recipere recusatis. Et  
quod aliquando vota de similibus ornamentis, aut utilibus imaginibus, & aliis  
pretiosis fundis à fidelibus missis, in alias res, quæ non loco illi, sed aliis  
fortè necessariæ sunt, commutatis. Quod de cera, quæ offertur, portionem  
integram Sacristæ Conventus Sancti Francisci minimè assignatis, juxta formam  
litterarum Apostolicarum superinde confectarum; & quod pecuniæ, quæ ibi  
offeruntur, in quadam fovea ad hoc instituta, ut consuetum erat, cum seq-



pa non mittuntur; quò fit, ut multæ subtrahantur. Cum verò hæc omnia in magnum detrimentum, & dampnum Ecclesiæ prædictæ S. Francisci cedere videantur; ea non sine molestia, & animi displicentia præfatus Sanctissimus Dominus noster intellexit. Ea propter ex mandato Sanctissimi D. N. nobis speciali vivæ vocis oraculo factò, & auctoritate officii nostræ protectionis, vobis disRICTè præcipimus, & mandamus, in meritum Sanctæ Obedientiæ, & sub excommunicationis pœna, quam ipso factò, si contra feceritis, incurritis, ut paramenta, calices, & alia prædicta oblata in dicto loco, nullo modo inde remove, & ad alia loca mittere debeatis. Ac etiam quòd hujusmodi ornamenta, cum offeruntur, nullatenus recusetis. Et quòd vota de similibus fiendis, in alias res nullo modo commutare debeatis; nisi de speciali, & expressa licentia Sanctissimi D. N. aut nostra, de qua per literas constare debeat. Et quæ ex iis vobis aut minùs utilia, aut non sunt necessaria, Sacristæ Conventus Sancti Francisci pro ut aliàs, secundum consuetudinem laudabilem, assignare debeatis. Ut ea, quæ vobis supersunt in beneficium Ecclesiæ S. Francisci prædictæ, aut etiam in illius reparationem converti possint, quæ continuò non est parum necessaria. Portionem etiam ceræ, juxta tenorem dictarum literarum Apostolicarum, videlicet vel totam illam, quæ tribus diebus in illis assignatis offertur, Sacrista Conventus S. Francisci recipiat, vel tertiam partem ejus, quæ obvenit per totum annum, fideliter, integrè, & sine fraude eidem Sacristæ, & sub pœnis prædictis assignari faciatis. Pecunias etiam, quæ offeruntur, ne auferri possint, ordinetis per Sacristam vestrum cum scopa, ut aliàs consuetum fuerat, in fovea deputata recondi. In quorum omnium fidem, ac testimonium præsentem literas fieri, & nostri Pontificalis sigilli fecimus appensione muniri. Datum Romæ in domibus nostris Anno à Nativitate Domini 1457. die 8. Februar. Pontif. D. Domini nostri Calisti Divina Providentia Papæ tertii anno 2.

Locus Sigilli Cerci,

Nicolaus Senen,



*Dilectis filiis Custodi, & Fratribus Domus  
Sancti Francisci de Assisio.  
sal. & Apost. bened.*

LEO PAPA X.

Cum, ut nobis relatum fuit ex parte vestra, plerique Romanæ Ecclesiæ Pontifices prædecessores nostri considerantes magnam molem, & expensas innumerabiles Domus vestræ, quoad conservationem, & maintenancem tam illius Ecclesiæ superioris, quàm inferioris, & aliorum ejusdem ædificiorum, & attendentes Civitatis Assisi inopiam, & impotentiam  
pro



pro conservatione prædictæ molis, voluerint, & statuerint, ut omnes eleemosinæ, quæ in Ecclesia S. Mariæ de Angelis, aliàs de Portiuncula obvenirent, essent pro fabrica utriusque Ecclesiæ, & totius molis applicatæ, neque converti possent in alium usum, utque ita facilius, & tutius fierent, ordina-verunt, quod Minister, & Custos aliquos assistentes pro custodia dictarum eleemosinarum, prout eis melius videretur, deputarent. Quapropter vestris in hac parte supplicationibus inclinati, prædicta privilegia, quæ, ut asseritis, sunt in usu, Apostolica auctoritate confirmamus, & innovamus. Et quia dicta Domus nobis, & Sedi Apostolicæ immediatè subjicitur, volumus, ordinamus, & statuimus, ut nullus deinceps cujuscunque auctoritatis, etsi Cardinalatus honore, & Legati de latere fungeretur officio, ullo modo præfata indulta prædecessorum nostrorum, à nobis, ut præfertur innovata, valeat quoquo modo infringere, vel prædictas eleemosinas in alium usum convertere, aut præfatos assistentes pro eleemosinarum custodia remove-re. Etsi quidquam ab aliquo attentatum fuisset, vel attentaretur in posterum, illud tanquam irritum, & inane ex nunc decernimus. Constitutionibus, & Ordinationibus Apostolicis, & aliis quibuscunque contrariis non obstantibus. Datum Romæ apud S. Petrum sub annulo Piscatoris, die 22. Augusti 1515. Pontificatus nostri anno 3.

Locus sigilli extra.

P. Bembo.



Gregorius Episcopus servus servorum Dei.

*Ad Perpetuam Rei Memoriam.*

**O**Mnium saluti paterna charitate intenti, inter tam multa pietatis officia, quæ nos pro munere nostro convenit exercere, sacra inter-dum loca speciali privilegio insignimus; ut inde fidelium defunctorum saluti amplius consulatur. Quocirca, ut Ecclesia Domus S. Francisci Assien. Ordinis Fratrum Minorum Conventualium, & in ea Capella sub invocatione ejusdem S. Francisci, simili usque adhuc privilegio minimè decorata, ejusdemque Capellæ Altare hoc speciali dono illustretur; Auctoritate nobis à Domino tradita, concedimus, ut quoties Missa ad prædictum Altare celebrabitur pro anima cujuscunque fidelis, quæ Deo in charitate conjuncta ab hac luce migraverit, ipsa de thesauro Ecclesiæ Indulgentiam consequatur, quatenus Domini Nostri Jesu Christi, & Beatissimæ Virginis Mariæ, Beatorum Apostolorum Petri, & Pauli, aliorumque omnium Sanctorum meritis suffragantibus à Purgatorii pœnis liberetur. Datum Romæ, apud S. Petrum Anno Incarnationis Dominicæ 1577. Prædie Id. Oct. Pont. nostri anno 6.



## GREGORIUS PAPA XIII.

*Ad Perpetuam Rei Memoriam.*

**L**icet aliàs per fel. rec. Nicolaum Quartum, Nicolaum Quintum, Calixtum Tertium, Pium Secundum, Leonem Decimum, ac alios Romanos Pontifices Prædecessores nostros statutum, & ordinatum fuerit in perpetuum, quòd omnes pecuniæ à Christi fidelibus in Capella B. Mariæ de Angelis Ordinis Minorum Assisiat. oblatae per deputatos à Ministro Provinciae, & Custode domus Sancti Francisci Assisiat. colligerentur, ac in reparationem, & conservationem Ecclesiæ ejusdem Sancti Francisci, nec non Fratrum ibidem pro tempore degentium, & eò advenientium sustentationem converterentur, nihilominus superioribus mensibus cum dilecti filii Fratres Domus Sanctæ Mariæ de Angelis prædictæ nobis supplicari fecissent, ut eleemosinas prædictas eis concedere dignaremur; Nos præmissorum ignari eis oretenus concessimus, ut unam capsulam pro colligendis eleemosinis in dicta Capella ponere possent, ipsi verò, sicut accepimus, concessionis nostræ modum excedentes, præsertim cum mentis nostræ non fuerit privare dictam Ecclesiam Sancti Francisci solitis eleemosinis, nec tam grave præjudicium illi inferre, majorem partem eleemosinarum, quæ in dicta Capella offerri solebant, apposita ibi capsula, in quam omnes pecuniæ, quæ in dictam Capellam mittebantur, deciderent, monentesque etiam populum, ut eleemosinas, non in Capellam, sed in capsulam prædictam mitterent, ac aliis modis sibi usurpare tentarunt, & exindè inter ipsos, ac Fratres dictæ Domus Sancti Francisci contentiones, & discordiæ cum magno populi scandalo sunt exortæ, majoraque scandala in futurum exoriri possent, nisi eis maturè occurratur. Quapropter nos, qui preces tacita veritate porrectas effectum nullatenus sortiri debere censemus, privilegia, & Jura Ecclesiæ, ac Domus Sancti Francisci hujusmodi illæsa conservare, aliàsque in præmissis opportunè providere volentes; Motu proprio, & ex certa nostra scientia concessionem, & applicationem omnium, & quarumcumque eleemosinarum in dicta Capella pro tempore oblatarum à prædictis, & quibuscumque aliis Romanis Pontificibus prædecessoribus nostris pro reparatione, & conservatione dictarum Ecclesiæ, & Domus Sancti Francisci, ac sustentatione Fratrum ibidem pro tempore commorantium, & eò advenientium factas, nec non statuta, & ordinationes de eleemosinis prædictis, ut præfertur, colligendis, erogandis, seu convertendis, ac literas desuper editas, illorum omnium tenores, & datas, ac si ad verbum inferantur præsentibus pro sufficienter expressis habentes, tenore præsentium confirmamus, approbamus, & innovamus, aliisque perpetuæ, et inviolabilis firmitatis robur adjicimus, concessionemque per Nos dictis Fratribus Domus Beatæ Mariæ de Angelis in præjudicium præmissorum, ut præfertur, factam expressè revocamus, et annullamus. Districtiùs inhibentes subindignationis nostræ pœna universis, et singulis Guardianis, et Fratribus Domus Sanctæ Mariæ de Angelis prædictis, ac quibuscumque aliis, nè posthac ullam capsulam, vel aliud quodcumque vas pro colligendis eleemosinis, vel pecuniis in dicta Capella, nec juxta illam teneant, nec in collectione pecuniarum



rum dictæ Capellæ pro tempore oblatarum, vel in eam impositarum ullo modo se ingerant, vel intromittant, sed ipsæ pecuniæ à Deputatis prædictis, sicut consuetum est, colligantur, sicque collectæ in reparationem, & conservationem dictarum Ecclesiæ, & Domus Sancti Francisci, Fratrumquæ ibi commorantium, & adventantium sustentationem erogentur, sicut à prædictis Romanis Pontificibus Prædecessoribus nostris præscriptum est. Quocirca venerabilibus Fratribus Assisiat. & Fulginat. Episcopis, seu eorum Vicariis in spiritualibus, generalibus, ac dilecto filio Curiaë causarum Camera Apostolicæ generali Auditori per præsentem committimus, & mandamus, quatenus ipsi, vel duo, aut unus eorum per se, vel alium, seu alios præsentem litteras, & in eis contenta quæcumque ubi, & quando opus fuerit, ac quoties fuerint requisiti solemniter publicantes, illisque in præmissis efficacis defensionis præsidiiis assistentes, faciant auctoritate nostra Custodem, & Fratres Sancti Francisci hujusmodi præmissis omnibus, & singulis juxta tenorem præsentium pacificè frui, & gaudere. Nos permittentes eos desuper à quoquam quomodolibet indebitè molestari, contradictores quoslibet, & rebelles, ac præmissis non parentes per censuras, & poenas Ecclesiasticas, aliaque juris, & facti remedia appellatione postposita compescendo. Non obstantibus concessione nostra prædicta, necnon quibusvis Constitutionibus, & Ordinationibus Apostolicis, privilegiis quoquæ, indultis, & literis Apostolicis Ecclesiæ, ac Domui sanctæ Mariæ de Angelis prædictæ, illiusque Guardiano, & Fratribus, ac Ordini Minorum de Observantia nuncupatorum, illiusque Superioribus, & personis in genere, vel in specie, ac aliàs in contrarium quomodolibet concessis, confirmatis, & innovatis. Quibus omnibus etiam si de illis, eorumquæ totis tenoribus specialis, specifica, expressa, & individua mentio, seu quævis alia expressio habenda, aut aliqua alia exquisita forma ad hoc servanda foret, illorum tenores, ac si de verbo ad verbum, &c. præsentibus pro sufficienter expressis, habentes, illis aliàs in suo robore permanfuris, hac vice dumtaxat specialitè, & expressè derogamus, cæterisque contrariis quibuscumque. Datum Romæ apud S. Petrum sub Annulo Piscatoris die 8. Novembris 1583. Pont. nostri anno 12.

**Cæ. Glorierius.**

Die prima Decembris 1640. exhibita in Cancellaria Episcopali, coram Illustrissimo Domino Episcopo Assisiat. Judice Apostolico, pro Sacro Conventu S. Francisci Assisiat. in causa cum Adm. RR. Patribus S. Mariæ Angelorum, &c.

**Crandilius Luciolus Cancellarius.**



## SIXTUS PAPA V.

*Universis Christi fidelibus præsentes literas inspecturis,  
sal. & Apost. bened.*

**C**UM à primæva institutione regulæ Beati Francisci, tam ob illius, & Sanctorum Antonii de Padua, Ludovici Episcopi, & Confessoris, Bonaventuræ, & Bernardini, necnon Divæ Claræ, aliorumque ejusdem Ordinis sequacium Sanctitatem, & miraculorum multitudinem, quàm etiam ob multorum ipsius Religionis Summorum Pontificum prædecessorum nostrorum merita: ingens ubique Christi fidelium multitudo singularem erga quemcunque dictorum Sanctorum gerat devotionis affectum; Nos, ut ipsorum fidelium devotio hujusmodi non modò conservetur, sed in dies magis augeatur, animarumque saluti uberius consulatur, precibus etiam dilecti filii Clementis Bontadosii Ordinis Fratrum Minorum Conventualium Magistri Generalis super hoc nobis humiliter porrectis inclinati, tam omnibus, & singulis dicti Ordinis Minorum Conventualium, Capuccinorum, & de Observantia nuncupatorum Fratribus, & Monialibus, quàm cæteris utriusque sexus Christi fidelibus, qui verè poenitentes, & confessi, ac Sanctissima Communione refectioni, diebus festis Sanctorum Francisci, Antonii de Padua, Bonaventuræ, Ludovici Episcopi, & Confessoris, ac Bernardini, prædictorum eorundem Fratrum Minorum Conventualium, Capuccinorum, & de Observantia; Necnon die festivitatis Sanctæ Claræ Monialium dicti Ordinis, Monasteriorum, ubilibet constitutorum Ecclesias tam erectas, quàm erigendas, vel earum aliqua à primis Vesperis, usque ad occasum Solis, eorundem dierum singulis Annis devotè visitaverint, & ibi pro Christianorum Principum concordia, hæresum extirpatione, & Sanctæ Matris Ecclesiæ exaltatione pias ad Deum preces effuderint, quo die præfatorum id egerint, Plenariam omnium peccatorum suorum Indulgentiam, & remissionum misericorditer in Domino concedimus, & elargimur; præsentibus perpetuis, & futuris temporibus valituris. Non obstantibus Constitutionibus, & Ordinationibus Apostolicis, cæterisque contrariis quibuscunque. Ut autem præsentis literæ ad ipsorum Christi fidelium notitiam facilius, citiusque perveniant, volumus, quòd earum exemplis etiam impressis manu alicujus Notarii subscriptis, & sigillo personæ in dignitate Ecclesiastica constitutæ munitis, eadem prorsus fides adhibeatur, quæ adhiberetur ipsis præsentibus, si essent exhibitæ, vel ostensæ. Datum Romæ apud Sanctum Marcum, sub Annulo Piscatoris die 28. Septembris 1585. Pont. nostri anno 1.

Jo: Baptista Canobius.

Ita est Melchior Vola Rom. Notarius publicus  
In fidem, &c.



Sixtus Episcopus servus servorum Dei.

*Ad Perpetuam Rei Memoriam.*

**E**X supernæ dispositionis arbitrio, gregi Dominico prædentes, inter curas multiplices, quæ ex Pastoralis officii ministerio nobis incumbunt, illam libenter amplectimur, per quam omnium Christi fidelium, præsertim sub suavi Religionis jugo, & vexillo Altissimo famulantium, animarum salus cum divini cultus incremento proveniat; ipsosque Christi fideles, ut eorum vota ad id facilius concurrant, spiritualibus muneribus, Indulgentiis videlicet, & peccatorum remissionibus, in apricum adducendo, justos variis signis, & miraculis coruscantes, invitamus, & confovemus, ac aliàs desuper disponimus, prout ad eorundem Christi fidelium spirituales devotionem conspiciamus in Domino salubriter expedire.

Cum itaque Beatus Franciscus, à quo Ordo dilectorum filiorum Fratrum Minorum institutus fuit, quique inter cœteros in numerum Sanctorum cooptatos, signis, & miraculis maximè claruit, ita vixerit, ut penè omnes ad sui devotionem, & imitationem pertraxerit; multique ex ipsis Christi fidelibus cordam similem ei, qua ipse dum in hoc sæculo versaretur, cinctus erat, hodie deferant; quin etiam plures ejus laudabile institutum amplexi, & sub suavi jugo Religionis ab eo institutæ, diversisque Sanctæ Romanæ Catholicæ Ecclesiæ Prælati, etiam Cardinalatus honore fulgentibus, & postea ad Summi Apostolatus apicem evectis illustratæ militantes, tantumque virum imitati, in numerum eorundem Sanctorum relati fuerint.

Nos, qui etiam à teneris annis singularem devotionis affectum erga ipsum Sanctum Franciscum, cujus Corpus sub Altari majori Ecclesiæ domus Fratrum Ordinis Minorum Conventualium nuncupatorum Afficiat. quæ inibi insignis, maximèque celebris, & diversis privilegiis decorata existit, requiescit, sub habitu dicti Ordinis sui incedentes gessimus, cupientes Domum, & Ecclesiam hujusmodi amplius decorari, pietatisque, & Christianæ Charitatis opera ubique cum divini cultus augmento, ac ad ejusdem Sancti Francisci honorem, & venerationem, animarumque salutem exerceri; fidelesque ipsos ad faciendum ea, per quæ ad æternam beatitudinem valeant facilius pervenire, mediis opportunis excitare, infra scriptum Fratrem Clementem Magistrum Generalem, ac singulares personas Conventus Domus prædictæ à quibusvis excommunicationis, suspensionis, & interdicti, aliis Ecclesiasticis sententiis, censuris, & pœnis, à jure, vel ab homine, quavis occasione, vel causa latis, si quibus quomodolibet innodati existunt, ad effectum præsentium dumtaxat consequendum, harum serie absolventes, & absolutos fore censentes.

Motu proprio, non ad alicujus nobis desuper oblata petitionis instantiam, sed de nostra mera liberalitate, & certa scientia, in Ecclesia domus, & ad Altare hujusmodi, unam Archiconfraternitatem utriusque sexus Christi fidelium, qui Cordam per ejusdem Ordinis Fratres geri solitam ex illorum devotione deferant, ac illa cingantur, sub invocatione ejusdem S. Francisci, Apostolica auctoritate, tenore præsentium perpetuò erigimus, & instituimus.



Ut autem ipsa Archiconfraternitas Confratrum Cordigerorum præfatæ Cordæ numero in dies magis ampliata decoretur, ipsique Confratres ad piorum operum exercitium propensiores reddantur, ac ad Ecclesiam, & Altare huiusmodi devotionis causa confluant, quò per hoc se maiora cœlestis gratiæ dona cognoverint adipisci. De Omnipotentis Dei misericordia, ac Beatorum Apostolorum Petri, & Pauli ejus auctoritate confisi.

Omnibus, & singulis utriusque sexus Christi fidelibus, qui verè poenitentes, & confessi, ac præfatam Cordam, quæ prius à Superioribus dicti Ordinis benedici debeat, ob reverentiam, & memoriam ejusdem S. Francisci gerentes, sacraque Communione refecti, præfatam Archiconfraternitatem ingrediuntur, die prima illorum ingressus, ac in Mortis ipsorum articulo, Nomen Jesu, ore, vel corde invocantibus, si etiam verè poenitentes, & confessi fuerint, plenariam omnium peccatorum suorum Indulgentiam, & remissionem.

Et insuper eidem Archiconfraternitati, illiusque Confratribus, omnes, & singulas Indulgentias, & peccatorum remissiones, & relaxationes Archiconfraternitati Confalonis B. M. Virginis, in Ecclesia S. Lucie de Urbe institutæ, necnon prædicto Ordini, ac illius Fratribus, & personis, quandocunque, & per quoscunque Romanos Pontifices prædecessores nostros, ac etiam per nos concessas, quoad illas tantum, quæ hætenus revocatæ non fuerunt, notu, & auctoritate, ac tenore similibus, etiam perpetuò concedimus, & elargimur, ac communicamus.

Postremo, dilecto filio Fratri Clementi Bontadosio nunc, & pro tempore existenti dicti Ordinis Generali Magistro Ordinis Fratrum Minorum Conventualium nuncupatorum, quascunque Confraternitates utriusque sexus Christi fidei Cordigerorum huiusmodi, in quibuscunque Ecclesiis domorum tam Minorum Conventualium, quàm Capuccinorum, & de Observantia nuncupatorum Fratrum prædictorum in quibuscunque Mundi partibus, & Locis pro tempore erigendis, & instituendis, erigendi, & instituendi illas, quæ postquam erectæ, & institutæ fuerint, præfatæ Archiconfraternitati per præsentem erectæ, & institutæ, cum omnibus, & singulis Indulgentiis, peccatorum remissionibus, & relaxationibus aggregandi, ac ipsas Indulgentias, illis, & earum Confratribus communicandi, pariterque concedendi, plenam, liberam, & omnimodam facultatem, & auctoritatem damus, & concedimus, prout nos eandem omnes Confraternitates, ex nunc prout ex tunc postquam erectæ, & institutæ fuerint, ipsi Archiconfraternitati per præsentem erectæ, & institutæ huiusmodi aggregamus, præfatasque Indulgentias illis, & earum Confratribus communicamus, & concedimus.

Decernentes eandem præsentem literas nullo unquam tempore, de subreptionis, vel obreptionis, aut nullitatis vitio, vel intentionis, seu quopiam alio defectu Notarii impugnari, vel retractari, aut revocari ullatenus posse, neque debere, sed semper, & in perpetuum validas, & efficaces existere, suoque plenarios effectus sortiri debere.

Non obstantibus præmissis, ac Regula nostra, de Indulgentiis ad instar non concedendis, ac aliis Constitutionibus, & Ordinationibus Apostolicis, cœterisque contrariis quibuscunque. Nulli ergo omnino hominum liceat hanc paginam nostræ absolutionis, erectionis, institutionis, concessionum, elargitionis, communicationum, dationis, & decreti infringere, vel ei ausu temerario contraire. Si quis autem hoc attentare præsumpserit indignationem Omnipotentis Dei, ac Beatorum Petri, & Pauli Apostolorum ejus se



se noverit incursum. Datum Romæ apud S. Petrum, Anno Incarnationis  
Dominicæ 1785. 13. Kal. Decembris Pontificatus nostri anno 1.

H. Dat.

Jo: Baptista Canobius.

Jo: Brouhe.

Sixtus Episcopus servus servorum Dei.

*Ad Perpetuam Rei Memoriam.*

**D**ivine charitatis altitudo eminentissima, & summi amoris Seraphici  
inexhausta bonitas, quæ ab æterno, & ante mundi constitutionem  
in charitate perpetua dilexit nos, ac ut nos sibi obstringeret, in fu-  
niculis Adæ, idest naturæ, gratiæ, & gloriæ ad se trahere voluit: videns  
Prothoplasti culpa peccatorum funibus circumplexos, ad se clamantes, pro-  
pitius esto, funiculo hæreditatis suæ, non modò nos vinctos suos non despe-  
xit, sed in fortitudine educendos de mendicitate, in funiculis secundi Adæ,  
inquit, traham vos. Et ut insolubilius nos sibi vinciret, tenaciùsque obstrin-  
geret, filium suum Redemptorem nostrum, cujus, summa disponente gratia,  
meritis licèt imparibus, in Sacrosancta Ecclesia vices gerimus, filium Adæ,  
quasi funiculum Divinitate, Anima, & carne contextum, ac de Cœlis ad  
terras protensum, justitiæ cingulo in omni vita sua ad lumbos præcinctum,  
suamet interiùs charitate vinctum, licèt funibus impiorum pro sua vo-  
luntate ligatum usque ad mortem Crucis tradidit, & traxit; ut sic nobis vi-  
dis, & in peccatorum funibus vinctis fieret Sapientia, Justitia, Sanctificatio,  
& Redemptio. Licèt autem tantæ Charitatis ardor inextinguibilis esse debuif-  
set, refriguit tamen. Unde frigescente Mundo, & in funiculis Evæ, quæ sunt  
concupiscentia carnis, concupiscentia oculorum, & superbia vitæ denuò con-  
strictæ, ad denuò inflammanda corda nostra, Deus misericordiarum, & lumi-  
num famulum suum B. Franciscum misit, in tam larga dulcedinis benedictio-  
ne prævenit, ut non modò virtutum prærogativis, & meritis celebrem fece-  
rit, sed & in carne ipsius Sacra Christi Stigmata renovaverit, & mira Crucis  
mysteria, ligamina, & paupertatem multiformiter in eo ad vivum demon-  
straverit: adeo ut verè Christus Francisco inferre possit, semitam meam, &  
funiculum meum investigasti, & omnes vias meas prævidisti. Unde & factum  
est, ut meritis dicti B. Francisci Sacrosancta Mater Ecclesia foetu novæ prolis  
amplificata, & multorum Sanctorum ejus instituti meritis, virtutibus, do-  
ctrinis, exemplis, & miraculis aucta, necnon quamplurimis Episcopis, Ar-  
chiepiscopis, Patriarchis, Cardinalibus, Regibus, & Summis Pontificibus  
decorata non possit ad ejus devotionis, & imitationis sectanda vestigia non-  
esse propensa. Nos pariter, qui à teneris annis singularem erga eundem B.  
Franciscum (Gloria nostra) semper gessimus devotionis affectum, & in dies  
sem-



semper accrevit, ac mirè accrescat, & cujus cinguli, & amictus instituti, & Ordinis pro Dei gratia, & nostra voluntate pro posse imitatores, alumni, & servi fuimus, ac fuisse gloriamur, considerantes populorum devotionem, & propensionem erga tantum virum, & quo devotionis affectu æmuletur, & passim anhelet plebs omnis vinciri saltem funiculo ejus, & quasi non contenta quod tot, tantique utriusque sexus Christi fideles ad instituta trium Ordinum ipsius ob devotionem ad tantum patrem, relicto mundo, transferint, se totam velit in S. Francisci imitatione, devotione, & amore immergere. Idcirco cum pro aliquali repensione amoris nostri erga tantum Patrem, nuper ad amplio-rem decorem insignis, & celebris Ecclesiæ Domus ejusdem S. Francisci Assisiat. Ord. Fratrum Min. Convent. nuncupatorum, in qua quidem Ecclesia sub illius Altari majori Corpus ejusdem S. Francisci requiescit, ad divini cultus, & pio- rum augmentum, ipsiusque S. Francisci honorem, & venerationem, ac anima- rum Christi fidelium salutem, unam Archiconfraternitatem in ipsa Ecclesia, & ad dictum Altare, motu proprio, erexerimus, & instituerimus: ac ut Confra- tres Cordigeri dictæ Archiconfraternitatis, ad pia opera exercenda propensiores redderentur, ac ad Ecclesiam, & Altare hujusmodi devotionis causa confluerent, eisdem utriusque sexus Christi fidelibus, verè poenitentibus, & confessis, dictam cordam, quæ prius à Superioribus dicti Ordinis benedici debeat, ad reverentiam, & memoriam ejusdem S. Francisci gerentibus, sacraque communione resectis, Archiconfraternitatem ipsam ingredientibus, prima die illorum ingressus, ac in mortis articulo ipsorum, nomen Jesu ore, vel corde invocantibus, ac etiam verè poenitentibus, & confessis, Plenariam omnium peccatorum suorum Indulgentiam, & remissionem, per alias nostras literas concesserimus. Necnon dilecto filio Cle- menti Bontadosio, moderno, ac pro tempore existenti dicti Ordinis Ministro Ge- nerali, ut quascunque Confraternitates utriusque sexus Christi fidelium Cordi- gerorum hujusmodi in quibuscunque Ecclesiis Domorum Ordinum Fratrum Mi- norum, tam Conventualium, quam de Observantia, & Capuccinorum nuncupa- torum ubicunque, & in quibuscunque mundi partibus erigere, & instituere, illasque, postquam erectæ fuerint, prædictæ Archiconfraternitati cum omnibus, & singulis Indulgentiis, & peccatorum remissionibus, ac relaxationibus aggregare; ipsasque Indulgentias hujusmodi Confratribus illarum communicare, & concedere vale- ret, plenam, & omnimodam facultatem, & auctoritatem concesserimus, easdem- que Confraternitates erigendas ex tunc, prout ex ea die, & e contra dictæ Archi- confraternitati aggregaverimus, & Indulgentias hujusmodi Confratribus illarum communicaverimus, ac literas prædictas nullo unquam tempore de surreptionis, vel obreptionis, aut nullitatis vitio, vel intentionis nostræ, seu quopiam alio de- fectu notari, impugnari, retractari, aut revocari nullatenus posse; sed semper va- lidas, & efficaces futuras, suosque effectus plenarios sortiri debere decrevimus, ac alias prout in dictis literis plenius continetur. Ne autem de præmissorum vali- ditate ullo unquam tempore dubitari contingat, nostram denuò in præmissis aucto- ritatem interponere, ipsiusque Archiconfraternitatis auctoritatem extendere, ac pium dictorum Confratrum Cordigerorum propositum amplius promovere, eosque spiritualibus muneribus, Indulgentiis videlicet, & peccatorum remissionibus prosequi cupientes, supplicationibus dicti Clementis hac in parte inclinatis, insti- tutionem hujusmodi Apostolica auctoritate prædicta tenore præsentium perpetuò approbamus, & confirmamus. Supplentes omnes, & singulos tam juris, quam facti defectus, si qui intervenerint in eisdem, ipsamque Archiconfraternitatem in- Caput omnium Confraternitatum Cordigerorum hujusmodi ubilibet institutarum, & instituendarum, etiam perpetuò, & tenore præmissis erigimus, & instituimus;



omnesque, & singulas Indulgentias, & peccatorum remissiones Religioni, & Ordini Fratrum Minorum hujusmodi per quoscunque Romanos Pontifices predecessores, ac nos concessas Archiconfraternitati, & Confratribus Cordigerorum similiter perpetuò concedimus, & communicamus, & ad illas extendimus, seu Indulgentias, & peccatorum remissiones, & relaxationes Religioni, & Ordini Minorum prædictis, ut præfertur, concessas Archiconfraternitati, & Confratribus Cordigerorum hujusmodi sub eisdem modo, & forma, quibus illæ Religioni, & Fratribus prædictis concessæ fuerunt, dummodo, ut præfertur, non fuerint revocatæ, etiam perpetuò concedimus, elargimur, & communicamus. Necnon de Omnipotentis Dei Misericordia, ac Beatorum Petri, & Pauli Apostolorum ejus auctoritate confisi, utriusque sexus Confratribus Cordigerorum hujusmodi, præter Indulgentias Religioni præfatæ concessas in mortis articulo, necnon quoties processionibus Archiconfraternitatis Cordigerorum hujusmodi, singulis mensibus fieri solitis interfuerint, eisdem quidem Confratribus plenariam omnium peccatorum suorum Indulgentiam, & remissionem perpetuò concedimus, aliis verò non Confratribus, qui processionibus hujusmodi interfuerint, centum annos de injunctis eis, vel aliàs quomodolibet debitis poenitentiis misericorditer in Domino relaxamus; Ac prædictis Confratribus, qui aliis dictæ Archiconfraternitatis processionibus, aut dum B. Mariæ, vel quodvis aliud divinum Officium per ipsos Confratres Cordigeros recitabitur, interfuerint, ac quoties Sanctissimum Christi Corpus, dum infirmis defertur, vel defunctum ad sepulturam associaverint, aut alicui miserabili personæ subvenerint, vel pacem inter inimicos composuerint, seu aliquod horum fecerint, toties centum dies de eis injunctis, seu aliàs quomodolibet debitis poenitentiis, etiam misericorditer in Domino relaxamus: eisdemque Confratribus Cordigeris, ut Indulgentias, & peccatorum remissiones prædictas per modum suffragii pro fidelibus, qui in gratia Dei decesserunt, consequi, & impartiri valeant; necnon quascunque Confraternitates utriusque sexus Christi fidelium Cordigerorum hujusmodi in quibuscunque Ecclesiis, tam Minorum Conventualium, quàm de Observantia, & Capuccinorum nuncupatorum Fratrum prædictorum in quibuscunque Mundi partibus, & locis, pro tempore erigendas, & instituendas, postquam erectæ, & institutæ fuerint, Archiconfraternitati illorum aggregandi, illisque omnes, & singulos eorum Indulgentias, & peccatorum remissiones, & relaxationes communicandi, & concedendi, plenam, liberamque facultatem prædicto, ac pro tempore existenti Generali dicti Ordinis Minorum Conventualium auctoritate, & tenore prædictis concedimus. Non obstantibus præmissis, ac nostra de Indulgentiis ad instar non concedendis, & quibuscunque aliis Constitutionibus Apostolicis, cæterisque contrariis quibuscunque præsentibus perpetuis futuris temporibus valituris. Volumus interim, quòd præsentium transumptis, manu alicujus Notarii subscriptis, & sigillo pro tempore Ministri, vel Procuratoris Generalis Ordinis Fratrum Minorum Conventualium hujusmodi, vel cujuscunque personæ in dignitate Ecclesiastica constitutæ, aut Canonici alicujus Cathedralis Ecclesiæ munitis, eadem prorsus fides adhibeatur, ubique locorum, & gentium, in judicio, & extra, quæ ipsis originalibus adhiberetur, si fuissent exhibita, vel ostensa. Nulli ergo omnino, &c. nostræ approbationis, confirmationis, erectionis, concessionis, aggregationis, elargitionis, communicationis, relaxationis, decreti, & voluntatis infringere, vel ei, &c. Si quis autem, &c. Datum Romæ apud S. Petrum, Anno Incarnationis Dominicæ 1586. Nonis Maii Pontificat. nostri anno 2.

Serico vinculo fixum plumbum.

Tho. Thom. Gualterius.  
A. de Alexiis.

luno-



## INNOCENTIUS PAPA XII.

*Ad Perpetuam Rei Memoriam.*

**C**ommissæ Nobis à Domino Jesu Christo dispensationis ratio exigit, ut Cœlestium munerum Thesauros, ad augendam in terris Sanctorum in Coelis regnantium venerationem, fovendamque, & incitandam, erga illos fidelium Devotionem, fideli prudentia, quantum Nobis ex alto conceditur, erogare studeamus. Itaque eximia, omnisque humanæ laudis præconium longè supergressa Sancti Francisci Confessoris, qui terrenis omnibus despectis, cœlestis gratiæ benedictione repletus, innumeris mirabilium virtutum exemplis Sanctam Dei Ecclesiam illustravit, & hominum corda, eo, quo ipse ardentissimè flagrabat, charitatis igne succendit, merita pio, devotoque animi affectu recolentes, necnon spirituali Christi fidelium ad Ecclesiam ipsius S. Francisci Domus Fratrum Ordinis Minorum ejusdem Sancti Francisci Conventualium nuncupat. Civitatis Assisien. in qua Sacrum ejus Corpus requiescit, assiduè, ( ut accepimus ) ex Universis Christiani Orbis parribus devotionis causa confluentium consolationi, atque animarum saluti, quantum cum Domino possumus, benignè consulere cupientes, ac de Omnipotentis Dei Misericordia, & Beatorum Petri, & Pauli Apostolorum ejus auctoritate confisi, omnibus, & singulis utriusque sexus Christi fidelibus, ad Ecclesiam supradictam, sicut præmittitur, confluentibus, qui illam verè pœnitentes, & confessi, ac Sacra Communione refecti, in quocumque anni die devotè visitaverint, & ibi pro Christianorum Principum concordia, hæresum extirpatione, ac S. Matris Ecclesiæ exaltatione pias ad Deum preces effuderint, plenariam omnium peccatorum suorum Indulgentiam, & remissionem misericorditer in Domino concedimus. Præsentibus perpetuis futuris temporibus valituris. Volumus autem, ut earundem præsentium literarum transumptis, seu exemplis etiam impressis manu alicujus Notarii publici subscriptis, & sigillo personæ in Ecclesiastica dignitate constitutæ munitis eadem prorsus fides ubique locorum habeatur, quæ ipsis præsentibus haberetur, si forent exhibitæ, vel ostensæ. Datum Romæ apud Sanctam Mariam Majorem sub Annulo Piscatoris die 18. August. 1695. Pont. nostri anno 5.

Jo: Franc. Card. Albanus.

*Libri Secundi Finis.*



# INNOCENTIUS

## PAPA DUODECIMUS

*AD FUTURAM REI MEMORIAM.*



**E**X incumbenti Nobis Apostolicæ servitutis officio pia Christi fidelium quorumlibet vota, præsertim ad divini cultus incrementum, ipsorumque Christi fidelium animarum salutem tendentia, ad exauditionis gratiam libenter admittimus, illaque favoribus, & gratijs prosequimur opportunis. Cùm itaque sicut dilectus filius Balthassar Milazzo à Naro Procurator Generalis Ordinis Fratrum Minorum S. Francisci Conventualium nuncupatorum Nobis nuper exponi fecit, ipse pro spirituali Christi fidelium ad Ecclesiam Conventus ejusdem S. Francisci Civitatis Assisiensis ex universis mundi partibus devotionis causa assiduè confluentium, nec à Confessarijs dicti Conventus absolvi valentium consolatione, aliquos Pœnitentiariorum ad Sacramentales illorum confessiones audiendas deputari plurimùm desideret: Nos pio ipsius Balthassaris Procuratoris Generalis desiderio, quantum cum Domino possumus annuere, illumque specialibus favoribus, & gratijs prosequi volentes, & à quibuscvis excommunicationis, suspensionis, & interdicti, alijsque Ecclesiasticis sententijs, censuris, & pœnis à jure, vel ab homine quavis occasione, vel causa latis, si quibus quomodolibet innodatus existit, ad effectum præsentium dumtaxat consequendi, harum serie absolventes, & absolutum fore censentes, supplicationibus ejus nomine Nobis super hoc humiliter porrectis inclinati, dilecto pariter filio Felici Rotondi moderno, & pro tempore existenti Ministro Generali dicti Ordinis, ut tres Fratres expressè professos Ordinis prædicti, quos ad id idoneos, vitæque, & moribus conspicuos cognoverit, in dicta Ecclesia Pœnitentiariorum, dummodò tamen ab Ordinario loci prius examinati, & approbati fuerint



fuerint , constituere , & deputare valeat ; itaut ijdem Pœnitentiarij sic constituti , & deputati Sacramentales omnium ; & singulorum Christi fidelium ad eos recurrentium confessiones audire , illisque auditis eos à quibufvis excommunicationis , suspensionis , & interdicti , alijsvè quibufvis Ecclesiasticis sententijs , censuris , & pœnis quavis occasione , vel causa quomodolibet latis , & per eos incurfis , necnon ab omnibus , & singulis eorum peccatis , criminibus , excessibus , ac delictis quantumcumque gravibus , & enormibus , etiam in casibus Sedi Apostolicæ ( non autem loci Ordinario , ) reservatis , vel in posterum reservandis , exceptis tamen contentis in litteris die Cœnæ Domini legi consuetis , in foro conscientiæ tantum absolvere , ac pro commissis pœnitentiam salutarem , aliaque injungenda eis injungere , necnon vota quæcumque ( Ultramarinæ Visitationis , Liminum Beatorum Petri , & Pauli Apostolorum de Urbe , ac Sancti Jacobi in Compostella , necnon Castitatis , & Religionis votis dumtaxat exceptis ) in alia pœnitentiæ , vel pietatis opera commutare liberè , & licitè possint , & valeant , licentiam , & facultatem Apostolica auctoritate tenore præsentium concedimus , & impartimur : Non obstantibus Constitutionibus , & Ordinationibus Apostolicis , ac quibufvis etiam juramento , confirmatione Apostolica , vel quavis firmitate alia roboratis , statutis , & consuetudinibus , privilegijs quoque , indultis , & litteris Apostolicis in contrarium præmissorum quomodolibet concessis , confirmatis , & innovatis . Quibus omnibus , & singulis illorum tenores præsentibus pro plenè , & sufficientè expressis , & ad verbum insertis habentes , illis aliàs in suo robore permanfuris , ad præmissorum effectum hac vice dumtaxat specialitè , & expressè derogamus , cæterisque contrarijs quibuscumque .

Datum Romæ apud S. Mariam Majorem sub Annulo Piscatoris die xj. Martij MDCXCIX. Pontificatus Nostri Anno Octavo .

*J. F. Cardinalis Albanus .*



# ICONA MORIS CHRISTI, & FRANCISCI

*Duobus Epigrammatum Centuriis expressa.*

Auctore P. M. Balthasare Paglia à Calatajerone  
Ord. M. Conv. Eminentiss. ac Reverendiss.

CARDINALIS BARBADICI  
Theologo.

## CENTURIA PRIMA.

SS. D. N. CLEMENTI XI. P. M.

### Nuncupatio. 1.

**C** Pandia conetur Musæ, Phœbique Sacerdos:  
Docta cothurnato rideat aula duci.  
Nitimur in tenui. molles inflare cicutas,  
Non clangore animos Diva ciere jubet.  
Mercurius, cui prisca litat facundia, plumas  
Et virga, & pedibus fert, galeaque leves.  
Meonide crescant Teucrorum sanguine lauri:  
Innumerus volitet viva per ora Maro.  
Vatibus altiloquis det Achilles nomina: priscei  
Castalias animet Caesaris aura tubas.  
Me cautes Alverna tuas, atque antra Subasi  
Patris in obsequium scandere Numen agit.  
Tu sacra Francisco fovcas Epigrammata CLEMENS:  
Sis facias, æquet gloria nulla meam.  
Ergo alius majora canens petat alta. Minores  
Me tollentem astris celsior aula manet.

### Programma. 2.

Hic, ubi secretis Alvernia clauditur umbris,  
Et Vatum unisonas excipit ara preces;  
Casta verecundos accersit Musa puellus,  
Vos procul hinc juvenes, hinc procul ite senes.  
Te moror, haud levis spectes qui fronte Camœnam,  
Quam tamen ungue truci torva senectâ ferit.  
Te peto, vittati placeat cui margo libelli:  
Num traheris munda fœda juventa chely?  
Sola meus tolerat pueri vestigia Pindus,  
Ne subcant geminum fama, pudorque metum.  
Sic etenim quæ pura sacra dant otia cantes,  
Quæque via est tuto traficienda pede;  
Quis canat, ò pueri fugite hinc? ubi fraude repulsa  
Frigidus in nostra non latet anguis humo?

### Poetæ congrua Virginitas. 3.

Castalidum (ni vera jocis Polyhymnia mifces)  
Qualibet est cœlebs, impatiensque viri.  
Haud secus, ut chordis Musas, & cordibus æquet,  
Castalidum cultor non nisi castus erit.

### Idem argumentum. 4.

Nacta velut Cypris cunas in Doride, Pallas  
Sic et Vulcani de c. piro creta Jovis.

Nec minùs unda rogo, Thetidi fax obstat, inermem  
Quàm bella in Venerem cinctâ Minerva gerat.

De S. P. Francisco: in Venerem. 5.

Stet Pater ante fores, procul hinc Venus impia. sacro  
Is metuenda tibi retia fune parat.

In eadem. 6.

Quid, Venus, à te optem toto hoc in codice? tantùm  
Quidquid in 1 octavo scurra Latinus amat.

1. Martialis lib. 8. Epigr. 1.

In Detractorem. 7.

Mome procul: dignum Vestali parcere Musæ.

Virginitas ridet murmura. Mome procul.

Phyllida nocturnis inhiantem carpe Theatris:

Corripe cœnosi lemmata Stesichori.

Sunt quibus Idalio cantetur Lesbia plectro;

Inde Lycambæis versibus ampla seges.

At mihi pullato vestitur syrmate Clio,

Instita candidulos pendet adusque pedes.

Franciscum recolo, cui pura modestia cordi,

Et non fucata norma pudicitia.

Parcius hinc naso nobiscum utare. vel ipse

Mansuescit coram virgine Rhinoceros.

In Eundem. 8.

Longû Epigramma cano? longum quoq; Zoile carpes.

Corripio? an frustra? tu quoque corripies.

Quid faciam? quò vena trahet tibi surdus abibo.

Delia sic raucos ludit inulta canes.

Sit mihi Musa Gigas, eadem sit pusio. quid tum?

Semper idem. semper tu mihi Zoilus es.

In Eundem. 9.

Zoile sic rides, nobis plaudente Theatro?

Sic idem, fato nos agitante, gemis?

Quis tegat invidiam? nosco, vir subdole, nosco

Livoris risum, letitiæ lachrymas.

Librum, Poeticæ Fabulæ, inscriptum

comburit. 10.

Quidquid Apollineo correptum luserat æstre,

Cum biberet molles pectus inane dies;

Ætna voret patrius, lustret Vulcanus opellam,

Pierius crebro ferreat igne calor.

Quæsierat lucem, nacta est incendia Clio.

Prævenit optatos jussa favilla Typos.



*His repetita libris Argiva est fabula: debet  
Gracia, quo periit Troja, perire rogo.*

*Sese ad Minorum laudes convertit. 11.*

*Mastenius ancipitem, casu ducente, per orbem  
Pressit arenosas advena Musa vias.*

*Pegase flecte gradum. quò te, ceu pulvere, jactes,  
Curre Minoritas ocius ad cineres.*

*S. P. Francisco. 12.*

*Facta prius, dein rapta focis hac pagina, vestros  
Conveniat, Genitor, semicremata pedes.*

*Nos tua sic docuit pietas, tibi scilicet ultro  
Delectus operum sistere reliquias.*

*An chorus Aonidum Regis mihi suggerit aulam?  
Atria num Phæbo sunt adeunda meo?*

*Cetera posthabuit, Pindique cacumine distans  
Migrat ad Alverna culmina Musa redux.*

*Hic Superum titulos, ortum, tua volumus acta:  
Hic tumet ad proprium fausta Thalia jubar.*

*Metior hoc stadium; tali se pulvere noster  
Exercet sonipes: hac mihi gressus humo.*

*Talia quis mittat? quis Patri injurius ausit  
Sponte paterna silens extera facta sequi?*

*Tu tamen oblatus temere, Pater, excipe Musas,  
Tu pia sollicita munera proles habe.*

*Munera, quæ calido foreas dum pectore, non me  
Pœniteat cupido diripuisse rogo.*

*Georgio Bucanano in Franciscanos scribenti. 13.  
Mens fuit in focum, funem mala lingua lacescit:*

*Ille aptus capiti, faucibus iste tuis.*

*CruX. 14.*

*An mihi ferta parent Sol, Cypria, Juppiter, Evan?  
An tonsis faciat vitta prophana comis!*

*Stat sacra tumuisse cedro, qua digna loquutum  
Cedrina CruX, diis versibus Alpha, manet.*

*Sunt quibus Idaliæ societur laurea myrto:*

*Hic hedera, hic molli vitis honore viret.*

*Ab Jove principium natæ petiere Camæna:*

*Aptior hinc Vati querna corona foret.*

*Non ita Christiade: det CruX exordia libro.*

*Hæc, mea Calliope, sit tibi planta caput.*

*S. Franciscus à Sybilla Erythræa, ut sidus, à S. Jo:  
prænnunciatur, ut Angelus. ex Jo: Villan.*

*lib. 5. cap. 34. 15.*

*Sidus Erythrææ, Joanni est Angelus Umber.*

*Luciferi ad solium reclusus, utrumque probat.*

*S. Franciscum Effigies in Porta S. Marci Venet.  
prænnunciat. ex F. Salv. Vitali orch. 1.*

*spect. 8. 16.*

*Scripserat ingenuus Domini gesta ardua. Marcus:*

*Dive parem Christo te nova fama canit.*

*Præsensit sapiens utriusque oracula Scriptor:*

*Pingitur ante suas hinc tua vita feres.*

*Scilicet Historiam supplens, in margine jussit*

*Hoc aliud scribi Marcus Evangelium.*

*S. Francisci familiæ insignia, Tres*

*Anseres. 17.*

*Aufere stemma nitet. quò scribam insignia stirpis,*

*An mihi sint pennæ, quas habet ille, satis?*

*Si malè jucundos inter strepit Anser olores,*

*Aufere pro tali quàm bene cantat olor!*

*S. Francisci Nativitas. 18.*

*Angelus est, ò Christe, tuos qui nunciet ortus:*

*Qui, Francisce, tuos concinat, Angelus est.*

*Jamque utriusque pari cantatas alite cunas*

*Obstupet elato Musa supertilio.*

*Mirabar Sanctos te prima ætate sequentes:*

*Est qui nec natus sit tibi, Christe, sequax.*

*Eadem. 19.*

*Adeste gentes. lingua jam sonat cæli.*

*Ortum Parentis Angelus canit. Templi*

*Solem refulgentem hæc decebat aurora.*

*Eadem. 20.*

*Lux nova dum cælo irradiat, dum fulgurat Heros*

*Astrifer, hanc signet lactea genima diem.*

*Scrupæa nectareos Alverna gurgitet imbres:*

*Flava Subasæam Flora coloret humum.*

*Quoque oriens surgit, quoque occidit æquore Titan*

*Semidei ad plausus dissita regna sonent:*

*Damtaxat supero condat se Lucifer orbe:*

*Splendidior nostro Lucifer orbe patet.*

*Eadem. Ad Picam S. Francisci Matrem. 21.*

*Miraris, ceu Virgo fores, aut nescia mater,*

*Quid sibi pennigeri Flaminis orsa velint.*

*Solve metus: rem disce: sni cunabula fratris*

*Ut canat, e supero Spiritus axe venit.*

*S. F. Petro avaro Patre progenitus. 22.*

*Mentis inops genitor, locuples est fœnore: pauper*

*Filius ò quantas mente tuetur opes!*

*Fama negans, Cræso quòd sit locupletior Irus,*

*Cor patris, ac gnati cernat, & erubeat.*

*S. F. in stabulo nascitur. 23.*

*Pica tumens fœtu num diversoria lustrat?*

*Non locus ancipitem, non domus ulla capit.*

*Si tibi Mopse, Mycon dederunt præsepia cunas,*

*Si specus infantem te, a bone Pastor, habet.*

*Hauriat & lucem Verbi sectator in antro,*

*Qui Pater, & Mitis, Pastor, & Agnus erit.*

*Scilicet hoc stabulo venientis idonea vita*

*Stat series, tenebris hisce futura patent.*

*Hinc Puerum quæ fata manent dicturus haruspex*

*Sidera ne pergat cernere, cernat humum.*

*1. Christe. Jo. c. 10.*

*Idem Argumentum. 24.*

*Fratribus ò faustum Palææ cognominis omen!*

*Cur? nostro cunas præbuit illa Patri.*

*S. F. in Umbria nascitur. 25.*

*Jam terræ novus hospes adest. parat Umbria cunas.*

*Umbria vix ulla mox regione minor.*

*Auspicer hinc Vates: infans ubi prodit ab Umbris,*

*Christiadum cælo Solis ad instar erit.*

*S. F. Assisii nascitur. 26.*

*Transfuga vir mundi Superis tua, teque dedisti.*

*Patria nunc superest. dicito: jurè mea est.*

*Quis furor, ò eives, doctam coluisse i Minervam?*

*Semina doctrinæ vester Alumnus habet.*

*Protinus huic præscum sapiens Dea cedat honorem.*

*Cui sordescit honos, altiùs ille sapit.*

*1. Ex F. Salv. Vitali Orch. 1. spect. 6.*



S. F. Jo: primùm vocatur. 27.

*Si duo Joannes, Baptista, & Apostolus astant  
Christe tibi, comes hic, prævius ille fuit.*

*Hic comes assequitur pedibusque, animoque; Magistrum;  
Prævius ille vias, ut cynosura, parat.*

*Tertius interea suppar Franciscus utrique*

*Non præt, aut sequitur, fit tibi, Christe, sequax.*

S. Francilco puerulo quidam pallium sternit. 28.

*Strata viatori dum tegmina sistit haruspex,*

*Excipit Alysias obvia fata Puer.*

*Nil mirum, si jacta premat nunc pallia, qui jam*

*Auratas chlamydem calcat adultus opes.*

S. F. principio mercaturam exercet. 29.

*Mercatore satus quo tradit fœnere merces?*

*Centuplum ut accipiat, dat sua pauperibus.*

S. Franciscum ægritudo ad Christum convertit. 30.

*Sanguinis arcano Puber vix æstuat igne,*

*Vix novus obrepit membra per ima calor;*

*Deliratne furens? quin febrim nactus amoris*

*Ardet, amat crebris calica deliquis.*

*Jam si peat natura. probis fit semita vitæ*

*Ipsa lues, reprobis quæ via mortis erat.*

S. Francisco dormienti Crucis signum  
apparet. 31.

*Quanta ferat somnus bifidi sub imagine ligni*

*Germina, quot fructus, quot bona, Dive, cape.*

*Amplexum toti quatuor dant brachia mundo:*

*CruX totidem mundi partibus una satis.*

*Uspemum impasto, foliorum tegmina nudo,*

*Sic umbram lasso plaata ministra parat.*

*Arkore vincebat, nunc arbore vincitur hostis.*

*Umbrarum pater est, hunc fugat umbra Crucis.*

*Proditor insultat? facilis datur ultio: pendet*

*Multus ab hac Judas, Maachidesque trabe.*

*Presserat atra lues? curam de frondibus hauri.*

*Mergit aquis Nereus? pro rate sume Crucem.*

*Innumeros Pandora frequens e pyxide morbos*

*Fuderat: hoc languor stipite pressus abit.*

*O jubar, ò hominum requies turissima, Christi*

*Tessera, Christigenis nacta salutis iter.*

*Perge Parens: hic vera quies, hic meta laboris.*

*Pergito. CruX omnes auferet una cruces.*

Idem Argumentum. 32.

*CruX nitet, irriguo langues ubi, Dive, sopore.*

*Nempe Dei famulis in Cruce vera quies.*

*Scala vias cœli sopito expressit Jacob:*

*Sancte jaces? altum CruX tibi sternit iter.*

*Providus Eliæ superum dat pabula somnus:*

*Sors eadem: fructu te cibant ille Crucis.*

*Dormit Joannes, Christique e pectoris amne*

*Potat Evangelium: tu bibis Umber idem.*

*Fausta quies! mentemque, pique oracula magistri,*

*Jus, exempla, metrum vitæ utriusque docet.*

*Ergo quiescenti si tot tibi pandit Olympus*

*Dogmata, num poteras discere plura vigil?*

Idem Argumentum. 33.

*Dux Minor umbrifero vix claudit inertia somno*

*Lumina, CruX referat dulce salutis iter.*

*Non lucem parit, umbra diem, ceu somne quietem:*

*CruX vocat apparens, vulnera vera manent.*

*Protinus an dubie credaris mortis imago,*

*Quando aperis vitæ limina certa sopor?*

S. F. pro amore Christi petentibus nihil se  
negaturum promittit. 34.

*Mercatore satus mercator & ipse, roganti*

*Dat sua. mirabar. desino. cogit Amor.*

S. F. post auditum illud Matth. 18. Tollat Crucem

suam, & sequatur me, Christi vestigia

sectatur. 35.

*Eia agè rumpe moras; quæ te paulo ante vocarat*

*Dive soporatum, CruX vocat & vigilem.*

*Iceler, affer onus: totus tibi Golgotha mundus:*

*Gratia te socians & præt, & sequitur.*

*At sectator abit, præstans cui gloria calcar,*

*Et jam verna Crucis fit tibi Christe sequax.*

*Parce Deus famulo: propriam vix ipse tulisti,*

*Ille suam tecum deferet, ille tuam.*

S. F. Christo sub specie pauperis indumenta  
largitur. 36.

*Auctor opum lacero torpet, ceu pauper, amittu.*

*Si te conveniat, quid modo, Puber, agas?*

*Nunc personato, locuples, das tegmina; posthac*

*Personam exuto temet, egene, dabis.*

S. F. sibi dictum intelligit, Vade Franciscè, repara

domum meam, quæ labitur. 37.

*Par Domus Empyreo, cui propugnacula zelus,*

*Dogma, fides, ventis pressa, fragore gemit.*

*Lapsurus jam nutat apex: quis fulciat ædem?*

*Dux Minor ad tantum quin moveatur opus?*

*Ime Tonans alto cælum committe Giganti:*

*Altitonans humiles ad sua templa vocat.*

S. F. Deo mancipandus, Patrem habet  
adversum. 38.

*Vix genitum Christo Genitor te perdere gestit:*

*Sic tibi, ut Herodes, est, Vicechriste, pateri*

S. F. vinculis a Genitore alligatur. 39.

*Icona Soteris manicis, & compede torquens,*

*Sic, Petre, sub cæci fornicis arce tegis?*

*It labor in cassum. Vicechristo, ceu Petrus esset,*

*Ut reserare fores, solvere vincla datur.*

Idem Argumentum. 40.

*Hæcine vir pateris, manibus post terga revinctis?*

*An subit illarum mens operosa vices?*

*Inferior quo fune pater tua corpora terra,*

*Corda ligat jumentis liberiora polo.*

*Hoc potes, ut filo, labyrinthum evadere mundi:*

*Sic quo te vincit, vincitur is laqueo.*

S. F. saxis impetitur. 41.

*Vix Pater antra subis patriæ de finibus exul:*

*Occurrit multa saxea cote phalanx.*

*Grandine sub lapidum constans lapidescere visus;*

*Quin ubi saxa petunt, non satur illa petis.*

*Fallor? opus saxis. Templo minitante ruinam,*

*Quis Lateranensem sit reparare domum.*

S. F. coram Antistite Affiliat se se donudans, sua

Patri resignat. 42.

*Conveniens utrumque Patrem, sic tegmina jactas*

*Dive, ut Pastori vellera reddit ovis.*

*Nunc spoliatus abi: longo post tempore Summus*

*Te meliare Pater veste, hosque teget.*



## Idem Argumentum. 43.

*Primus Adam Genitor nudus, sine labe videtur.  
Vulnera cum rapit quinque, i secundus erit.*

i Christus.

S. F. Christi militiæ nomen daturus, vestes  
deponit. 44.

*Quò redeat victor, quò niles frendibus umbret  
Phœbæisq; comas, Assyriisq; manus;  
Longum hastile rapit, galea sese impiger armat,  
Trux lituo, clypeo tetricus, ense minax.  
Tres peti Umber inops, & inermis, & inopes hostes:*

*Vile putas? ferri spes subit alta vices:*

*Nam triadi hostili metuendus ut ingruat, unum  
Cunibus ille armis cor habet æquivalens.*

S. F. depositis vestibus, amens creditur. 45.

*Nudus, inops, amens non uno scommatis ictu  
Signifer arguitur. qua ratione? loquar.*

*Nudus, inops, vestes, & opes quò cedat egenis;  
Amens, quò mentem donet habere deo.*

S. F. laudes decantat Gallicè, Præco sum  
magni Regis. ex Officio Franc. 46.

*Necte vigil media, Solis prænuncius Umber  
Ter cecinit. quidni? carmine Gallus erat.*

S. F. S. Petro Ecclesiam nuncupat. 47.

*Cornibus arafrequens cui conditur? an Barionæ?*

*Dive, tabernaculum scis placuisse Petro,*

*Felix ò donum! ò merces felicior! unum*

*Das Petro; ille tibi milleque, plusque dabit.*

S. F. duodecim sibi discipulos seligit. 48.

*Ibat Apostolico stipatus ab agmine Christus,  
Stipat Apostolicum plebs duodena virum.*

*Sors comitum dispar. illi fugere relicto*

*Si duce, ne fugiant, hos tria vota ligant.*

Idem argumentum 49.

*Jam Crucis armagerens, fideique Subasius Heros,  
Gistit Apostolico subdere colla jugo.*

*Bissenos legisse duces primus labor: exin*

*Pandere selectis dulce salutis iter.*

*Mosira polo duodena Gygas dat claviger: an non  
Semideos totidem Divus ad astra vehat?*

S. Francisci discipulus B. Pacificus laureatus

poeta, qui Rex versuum dicebatur. 50.

*Rex vatium, augustos redimit cui laurea crines,*

*Transfuga Musarum, sit tibi Dive comes.*

*Ipse lyræ fidicen digitis quoque monstror in Urbe;*

*Te sequor; at Musis vertere terga piget.*

*Annue, parce sato. sic vires ad metra sumens*

*Rex Vatium, lauro tempora cinctus ero.*

S. Francisco infensus F. Jo; Capella unus ex XII. 51.

*Proditor arma vibrat: patere hunc, Vicechriste, libetor.*

*Effigiem Jndæ mors, laqueusque manent.*

Idem Argumentum. 52.

*Mite dabat lecta Franciscus dogma cohorti.*

*Prima Annerita spes erat illa gregis.*

*Copia gessit cæcis. quidni? rubet, cecitat, odit.*

*Ab malus, inque malam dignus abire crucem!*

*Proditor e merito jam pendet stipite. quævis*

*Hos utinam fructus arbor in orbe ferat.*

*Cur sese interimens suspenditur arbore? vivum*

*Tangere mors, & humus respuit exanimem.*

S. Franciscus Regulam brevi conscribit. 53.

*Unicus est Doctor, Doctrina est una: Minores*

*Unica mens vobis: diligite alterutrum.*

S. F. summum adit Pontificem, confirmationem  
Ordinis accepturus. 54.

*Te Petre Divus adit: tibi regula sistitur: omne,*

*Quod docuit Christus, quin V cechrise probes?*

S. F. versibus vacat, quos refert F. Jo: de la Haie  
in vita S. F. 55.

*Aspice Franciscum cytharæ, Musisque vacantem,  
Et frontem numeris solvere disce meis.*

S. F. panem multiplicat. 56.

*Esuriente manu stipatur Origio Minorum.*

*Rara Ceres fuerat, sit tamen ampla prece.*

*Undique mollita recreari fruge videres,*

*Cui quondam Galileæ ad mare, discipulos.*

*Pauperies miseris hac horrea detegit; hanc scit*

*Militiæ annonam pandere Dux inopum.*

S. F. Fratres cælitus pascit. 57.

*Murmur ubique strepit. Frater jejunia passus*

*Oscitat: est vacuus, fortiùs inde tenat.*

*Nulla quidem vobis, nisi spes in Patre, Minores:*

*Hinc licet impasto, servit amica Ceres.*

*En prece Numen agens, en vos miseratus egenos*

*Sedat inexpletas fruge recente gulas.*

*Sportula plena datur: cistis oneratus ephabus*

*Pabula cunctanti portat opima viro.*

*Non accersitis, at sponte fluentibus offas,*

*Suave penum, vobis Advena distribuit.*

*O bona quam lepidò recreat vos mensa sapore;*

*Gratia convivæ quàm speciosa tener!*

*Scilicet exiguo quem fragmine tristis egestas*

*Paverat, apposita prædape cætus oras.*

*Ergo ubi sideream pasci meruistis ad escam,*

*Quàm cuperem vestram tunc habuisse famem!*

S. F. aquam e petra educit. 58.

*Fit prædura silex, sæcunda Subasidis ictu.*

*Sancte jubes? oritur vera perennis aqua.*

*Legifer Isacidum gemino dum verberare rupem*

*Cencitat, en laticem serpuca massa parit.*

*Sunt mea corda lapis, sed nec percussa liquecunt.*

*Illa licet, quavis durius alpe rigent.*

*Percute bisque, iterumq; Parens: ubi fundet ecellus*

*Flumina, prodigium, credito, majus erit.*

S. F. aquam in vinum convertit. 59.

*Qui modò Liber erat, famulo nunc servit jacchus*

*Christe tuo: huic rapim, ceu tibi, paret aqua.*

*Lympha verecundo rubuit prope victa pudore:*

*Obstupuit redolens ardua mensura calix.*

*Fabula vertatur Gratiis, ubi vertitur unda.*

*Hac purit & Bromium, quæ peperit V. nerem.*

S. Francisci secus Cajeta littus miraculum. 60.

*Euhoicam gens lecta coit, quasi fumen, ad oram,*

*Dum Patris eloquio sic, velut imbre, pluit.*

*Fit jonus: orantem plausu quòd cæcis honoret,*

*Vir petit æquoreo subdita regna jovi.*

*Hinc subit incultum nautis, & remige lintrem,*

*Ne queat obrepens corda subire tumor.*

*En aliò ventos ridens fugat Amphitrite:*

*En placidos offert Doris amica sinus.*



**P**rob super! ad Patris normam nil corde tumentis  
Edidici fluctus, detumuitque fretum.

Idem Argumentum. 61.

**T**e, freta dum superas, talem, Pater inclyte, cerno,  
Qualis aquam superans in mare Christus erat.

**T**ant utrique salum: vobisque iubentibus arcet  
Æolidum turmas officiosa Theris.

**S**iccine par Domino pelagi quoque crederis alveo?  
Ant tellure sequi non tibi Dive satis?

Idem Argumentum. 62.

**P**laudit humus, repetunt Nerei vada cerula plausum,  
Non tenues Umbro congeninante sonos.

**Q**uid faciat? pietas animum, populi que moratur  
Cura, sed obsequio plebs malè cauta fugat.

**V**eritur en properè, temnensque pericula fertur  
Incustodita per freta summa rate.

**C**ernite, quo puppis liquidum secet ordine marmor!  
Pareat ut diu jussa carina duci!

**S**ic terræ, quem, Dive, fugis, dabit æquor honorem,  
Et tecum profugo laus peregrina venit.

S. F. agnam habet pedissequam. 63.

**U**mbrigenæ gressum Pastoris ubique sequuta  
Ibat ovis, simplex, blanda, fidelis hero.

**Q**ui procerum cathedras, hominum cōmercia tēpsit,  
Vix aliud, quàm te pascit, amatque bidens.

**A**urea Phryxæi quis velleræ præferat Agni?  
Dive tibi hæc plures lana ministrat opes.

**S**S. Francisci, & Dominici effatum, Stemus simul,  
& nullus adversarius prævalebit. 64.

**N**obile par Fratrum, quod Sanctæ assistere Matri  
Spes una, una Fides, unus adegit Amor!

**S**ignifero Gusmanus, Ibero arctissimus Umber:  
Huic ovis, est ollifida lycisca comes.

**P**ectora quis dirimat? rabies inimica luporum  
Hinc procul: ira procul: jam comes agna cani.

**P**ax, amor hic. pacem mitis docet agnus; amorem  
Fervidus ardenti Syrius igne fovet.

S. Francisci Baculus. 65.

**M**ortuus hic si pes, ductu quem flaminis olim  
Senensi Æsias vir sepelivit humo.

**N**ec mora: frondet apex, vivens crumpere germen  
Capit, & e sicco surgere fuste seges.

**P**ergit adhuc frondisque tenax, & fulminis expers  
Sub Jove non passis usque vivere comis.

**C**um metuant quercus, ornique, abiesque ruinam,  
Sævit ubi Juno, Mulciber, Hyppodates;

**I**ncolumis, caloque levans sua brachia, Dive  
Servanti grates Arbor Etrusca refert.

**S**ecula nil obsunt, avidis nil morsibus ævum:  
Grandinis, & Cauri, ceu levis ækra, furor.

**T**erre at imbre Tonans, jaculoque tricuspile silvam:  
Turbo fremat. ridet libera planta minas.

**S**it Musæ peregrina cohors, plebs æquena testis,  
Quique frequens alio cætus ab orbe venit.

**Q**uo forcat stirpem Franciscus robore, quoque  
Alliciat Zephyros arbor amœna comis!

**Q**uanta simul tactis veniat fiducia ramis,  
Quantus honos lignum, gloria quanta beet!

**T**e Francisci adum gratis gens læta sub umbris,  
Edoceat proprium planta magistra decus.

**I**lius exemplo vinces quoque secla superles,  
Nec poterit vitæ tempus obesse tuæ.

**Q**uin Jovis impietas, & sortis turbo sinistra  
Haud nota pressuræ, pignus honoris erunt.

Idem Argumentum. 66.

**Q**uæ sata Francisco cum pluribus unica ramis  
Durat adhuc, nostri hæc Ordinis Arbor erit.

S. F. lupum mansuefacit. 67.

**L**ucis in abscessu pecorum formido perenni  
Vastabat caulas obsidione lupus.

**N**escio, cur, viso, rauci tacuere molossi;  
Nescio, qua vigilēs luserit arte canes.

**I**rrita Pan surdus ridebat vota bubulci:

Jacturam augebat capra litata Deo.

**E**ugubium interea monstrum petit advena. pejor  
Impunita solet culpa vocare scelus.

**D**icitur & pullos, puerosque sagiter ausum  
Intempestivo surripuisse dolo.

**Q**uid facerent queruli cum civibus upiliones?  
Quidue suburbanis mœnia cum laribus?

**I**tur ad Umbrigenam: lupus hic, Pater adstitit illic:  
Vix Franciscæ jubes, fraudque, famelque cadunt.

**J**ussa feram cicurant. veterum proverbium mutans  
Immoto vitium perdidit illa pilo.

**S**æpe lupos Christus sub tegmine monstrat ovino:  
Nunc sub pelle lupi monstrat & Umber ovem.

Idem Argumentum. 68.

**C**erva, Columna Anteus, Cætauri, Bos, Drago, Rex, fur,  
Styx, Avis, Hydra, Amnis, Sus, Leo, Cacus, Athlas,

**A**mphytrioniadæ sunt meta laboribus unum  
Plus Franciscæ fuit te domuisse lupum.

S. F. unâ cum avibus canit. 69.

Laxæ gentis ab otio

Ad clausum tenebris nemus

Lux se contulit Umbriæ.

Hic, frondens ubi populus

Vernantes aperit comas,

Et serpunt hederae leves,

Et vitis platanum ligat:

Hic, pictos ubi flosculos

Narcissum, violas, thymum

Tellus discolor explicat:

Quo per culmina montium

Primo vere Favonius

Glycens undique sibilat;

Et per mollia garriens

Ludit gramina rivulus;

Nactus ceu viridem chorum

Ore, ac pectore psalmicen

Divinas jedet ad preces.

Solus cæperat. hoc melos

Ut plebs ebibit alitum

Huc, illucque volantium;

(Mirum) cantibus invida

Alterno recinens choro

Responsat modulamini.

Hinc luscinia præsidens

Lingua dat reliquis metrum.

Humanam paribus notis,

Eoas fugiens plagas,



Vocem psittacus exprimit.  
 Audin, quos ineant sonos  
 Turtur, passer, alandaque,  
 Crebra murmura Dauliæ,  
 Dulcis carmen achantidis?  
 Dum certis vicibus canunt  
 Et plaudens avium cohors,  
 Et spes alma Subasidum,  
 En valles, juga montium  
 Respondent acroamati.  
 Ad blandi numeros Patris  
 Lac e rupibus effluit,  
 Æther plaudere visus est,  
 Quercus necesse solvier.  
 Ventus compede necitur,  
 Torrens lapsibus abstinet;  
 Quin & temperat auream  
 Concors harmoniam polus.  
 Hæret mansio Cœlitum,  
 Exultimque canentium  
 Terreni ad Seraphim notas  
 Gestit spirituum phalanx.  
 Votis ilicet annuens  
 Currit pacis ad oscula  
 Spretis fulminibus Tonans.  
 Numen semideus ligat  
 Struētis ore catenulis!  
 Orpheus quod volucrum genus  
 Materna fide traxerit,  
 Ne se protinus efferat.  
 Est qui gutture suavior  
 Non turbas volucrum modò,  
 Sed vel sollicitum novus  
 Ducat carminibus Deum.

SS. Franciscus, & Antoninus avibus, piscibus  
 prædicant. 70.

Lyfiades mandat? jubet Umber? amica, fidelis  
 Doris agit pisces, æthra moratur aves.  
 Hujus in obsequium plebs garrula visa filere,  
 Illius ad laudes muta caterva loqui.  
 Protinus æquorum cœlibere Tridentifer agmen  
 Parcet, & aereo Juno præesse gregi.  
 Sceptra decent alios; nam posthac ætheris, unda  
 Divisum imperium cum Patre Gnatus habet.  
 S. F. cicadam ad Dei laudes invitat. 71.  
 Marginis Ege jam plenum ascenderat axem,  
 Perque viæ medium Phœbus agebat iter.  
 Torrida flammivemis ardebant solibus arva:  
 Syrius ere fremens ignea tala dabat.  
 Forè super viridi modulantem fronde cicadam  
 Meridie psallens audiit Umbrigena.  
 Fert animus parvam numeris æquare sororem,  
 Et trahere ad superos ora pusilla choros.  
 Alternis igitur contendere versibus ambo  
 Cœpere: alternum sidera carmen amant.  
 Blanda cicada files, Franciscus dum canit: inde  
 Dum Franciscæ files, blanda cicada canit.  
 Audio? quàm paribus resonant concentibus antra!  
 Quam repetit dulces Nympha canora sonos!

Pythagoram recreent altæ modulamina sphaera:

Nos humili satius carmine terra beat.

S. F. hirundines filere jussit. 72.

Ad sacra facundus dum rostra Subasius orat,  
 Acrius in patula Daulias ade strepit.  
 Ut bibat auditor jugis pia dogmata vitæ,  
 Jus datur. ad nutum Patris hirundo filet.  
 Cedat avis (fas est) brevis internuncia veris,  
 Veris ubi æterni nuncius ore tonat.

S. F. signo Tau literæ ægrotos sanat. 73.

Innumeram Pandora luem super agmine crebro  
 Fuderat. arcano gens jacet uſta rogo.  
 Auribus, ore, manu, pede, mente, & lumine captis  
 Ferre laceſſitus non pote Cœus opem.  
 Quis manet? Æſſias. miserantem convenit ultro  
 Languida plebs. rogitat? nec mora: parta salus.  
 Pharmaca vis? Tau scribe: vales. stat gramate virtus.  
 Non hac occidit littera, vivificat.

S. F. & surdos audire facit, & mutos loqui. 74.

Sistitur ante tuas hominum par debile plantas:  
 Nempe hic non edit, non bibit ille sonos.  
 Dive jubes? en languor abit: solvuntur utrique  
 Vincula: jamque sonos edit hic, ille bibit.  
 Clarius hinc sano Verbum procedit ab ore:  
 Firmior incolumi nascitur aure Fides.

S. F. cæcum illuminat. 75.

Quid petit? ut videat vir lumine captus, & ipse  
 Lumina cum claudam, fac, Pater, ut videam?  
 S. Francisci habitum Christus induit. 76.

Qui Reges, Procereſque rudi Franciscus amiſſu,  
 Papalesque humeros, Cæsareosque tegit.  
 Tamquam nulla forent humilis fastigia lanæ,  
 Deposuit summo tegmen honore beat.  
 Si proprio Christus Franciscum vulnere donat,  
 Symmata Franciscus mutuatur ecce Deo.

Ergo ubi sic Genitor compensat stigmata, Fratres  
 Discite, quo pretio nostra cuculla valet.

S. F. puerum Jesum amplectitur. 77.

Quale, Pater, Numen tua nodant brachia! duplex  
 Miror uti Immenſum strinxerit ulna Deum.

S. Franciscum SS. Petrus, & Paulus ample-  
 xantur. 78.

Culmen Apostolicum te, Dive, amplectitur: ulnis  
 His quatuor nixus num tuus Ordo cadat?

S. F. creaturas ferè omnes nomine Fratris  
 appellat. 79.

Omnia fraterna dum voce Subasius ornat,  
 Vix aliud rebus nomen incſſe putat.  
 Tu lupe, carbo, canis, lepus, agne, cunicule frater:  
 Tu lea, planta, ſilex, herba, cicada soror.  
 Hoc calum, calique faces, hominesque, feraſque  
 Pignore, res mixtas, atque elementa vocat.  
 Quin meruit cunctos & habere, & dicere fratres,  
 Unum qui cunctis noverat eſſe Patrem?

S. F. leproſos osculo sanat. 80.

Sanet ut infirmi preſſas elephante cohortes,  
 Oscula vulncribus figit amica Parens.  
 Hæc ubi cura manet, nullo unquam tempore dignos,  
 Ut modò, leproſos novimus invidios.



*Perre Machaonios cesset medicina liquores :  
Pharmaca Calicola tutius ore parant .  
S. Francisco Auctoris Votum . 81 .  
Languet . ter clausis mihi fluctuat ignibus humor .  
Audet Apollineam temnere febris opem .  
Etna latens fibris jam perniciofa minatur  
Fulmina ; jamque obitum prævenit ipse rogas .  
Sic Galenus iners : morbo quin cedit habenam .  
Vis fugit , ars sequitur : nil , nisi vota manent .  
Te cordis Franciscæ vocat , te pectoris ardor ;  
Vix precor : en domitam cogis abire luem .  
Cereæ dona fero : censu quò supplice possit  
Accensa extinctam fax memorare facem .*

*Aliud . 82 .*

*Me tumido languere genu gravis humor adegit :  
Ut levis hinc abeat , te pia vota petunt .  
Alme Sator , flexo referam quò poplite grates ,  
Hoc ipsum fateor muneris esse tui .*

*S. Francisco Puellæ Votum . 83 .*

*Hanc Franciscæ comam , discrimina pensilis auri ,  
Suspendit sacris ægra Puella tholis .  
Ut cui flavescentes ætas dat prima capillos ,  
Mox tibi jam canos tarda senectûa ferat .*

*S. Francisco votum . 84 .*

*Qui spes virus erat , dolor est post fata parenti .  
Signiferum alliciunt vota : puelle redis ;  
Vix rogat : orantis nutu vomit urna cadaver .  
Vox mortem fallens , creditur esse Dei .*

*Aurea massa datur . mirum . sine pignore mater  
Flebat inops . posuit munera ? dives abit .*

*S. Francisci miracula . 85 .*

*Cælicolum secunda patent miracula . mortem  
Hic superans , tumulos verbò populatur herili ;  
Cujus ope , inferna repetit vada nota paludis  
Languor , & invictæ præducunt flamina Parca .  
Vidimus & iussos aliò se vertere montes ,  
Siccarique lacus , & retrocedere cursum  
Prætereuntis aquæ ; torrentes compede necti ;  
Pandere iter populo sedatis fluctibus æquor .  
Vidimus innumeris lambentem altaria linguis ,  
Vastantemque larès , mûresque , & plura minantem  
Vulcanum arceri ; quæ jam lapsura , cadentique  
Assimilis visa est , firmo stat corpore moles .  
Frugibus interdum flaventia cernimus arva ,  
Infœcunda licet , multosque inarata per annos .  
Perge specum tentare , & olentis lustra cavernæ :  
Squalidus hæc obici coluit penetràlia serpens :  
Quem neque saxorum pastores turbine freti ,  
Nec frieto mucrone manus , nec missile talum ,  
Nec cincti domuere duces , vox una peremit .  
Non mihi si centum sint guttura , pectora centum .  
Omnia se etari Divum spectacula possem .  
Ille fugat precibus morbosum examina : claudis  
Ille vias aperit . cæcos hic lumine ditat .  
Corde rogans æger , vocis qui perdidit usum ,  
Cælitibus grates , pleno jam murmure reddit .  
Surdus inassueta tenues bibit aure loquelas .  
Fit mentis compos animi deliria passus .  
Alter aquas domuisse , minis Cacodæmonis alter  
Obstasse , & Stygiam jactat sprevisse cohortem .*

*Est , Jovis irati qui tela coercet : est qui  
Bolla , famem , tabes aliò se vertere cogat :  
Est qui Scyllæam sicco pede transmeet undam ;  
Et volucres , piscesque moratur concio : prodit  
Intempestivus nudo de stipite fructus .  
Nititur Indigetum varia ad conamina cætus .  
Ardua Francisci miracula qui petis , unum  
Pro cunctis refero : Christi vir stigmata portat .*

*S. F. martyrii , quod quaesierat , assequutione  
frustratur . 86 .*

*Mortis iter tentare diu per tela , per ignes  
Vana mora est : pietas viscera sæva ligat .  
Quòd maris alta petas , & inhospita tecta pererres ,  
Et quæ Niliacus regna Tyrannus habet ;  
Quòd redeas nulla terebratus cuspide venas ,  
Martyrii an fuerint palma , corona procul ?  
Flectere ad obsequium Reges , sit , Dive , corona :  
Palma sit , Ægypti te subisse plagas .*

*S. F. martyr desiderio . 87 .*

*Martyrium venaris . abest . fles , Dive , dolesque .  
Quòd martyr non sis , hoc tibi martyrium est .*

*S. F. à dæmone verberatur . 88 .*

*Martyrium ardenti nullus rapit exta Tyrannus ,  
Diffita regna licet , cæruleaque alta petas .  
Dant , ubi terra negat , Styx verbera , stigmata cælum .  
An poteras voto nobiliore frui ?*

*S. Francisci , dæmonumque confictus . 89 .*

*Tenarii legio atra ducis , velut agmine facto ,  
Te petit . in Stygium congeris arma gregem .  
Ut Phlegæontæ superes fera monstra paludis ,  
Umbrigena Alcides , Crux bona clara tibi est .*

*Idem Argumentum . 90 .*

*Vis Pater in præceps abeat ( vis irrita ) dæmon .  
Anruere inferiùs possit ? humillimus est .*

*S. F. dæmoni eludendo sibi uxorem effingit . 91 .  
Importuna tibi connubia suggerit Orcus .*

*Conjugis inventæ tu simulachra paras .*

*Felices sponsi , felicia tempora , muta  
Si cunctis uxor , ceu tibi Dive , foret !*

*S. F. asino vectus , honorificè excipitur . 92 .*

*Longum iter Æsistas animo dum tentat inerti ,  
Quadrupedem lasso provida turma parant .  
Jam superest asino pia sarcina , jam gerit Umbrum  
Vile pecus , gentes undique , ubique facies .*

*Plestra sodalitiū tangens , cytharasque præibat .  
Unisona plaudunt voce puella , puer .*

*Curribus advehti subeant Capitolia Reges :  
Plus meruit laudis sessor Aselle tuus .*

*S. Francisci super caput charta è cælo descendit ,  
cum epigraphe , hæc est gratia Dei . 93 .*

*Te , Patriarca Minor , superum quòd gratia firmet ,  
Pagina scripta docet , stigmata sculpta probant .*

*S. F. Portiunculæ Indulgentiam  
impetrat . 94 .*

*Viderat Æsistas , hominum gliscente piaculo ,  
Ad Stygis innumeram trudier antra gregem .  
Consulat ut nostris Christi novus asseclarebus ,  
Corde flagrans , onerat ter , quater asina pecc .  
Tu , qui nos quino servasti vulnere , Soter ,  
Terrigenis veniam dum precor , asser opem .*



*Si rediunt haud poterit, fuso nisi sanguine, mundus,  
Hoc utinam terebret cuspis acuta latus!  
O quam jucundo mihi fibra pateret hiatu!*

*Quam fluere dulcis membra per ista cruor!  
Dixerat, ecce salus caelo demittitur: ecce*

*Muneris aetherei nos Pater imbre rigat.  
Vis Domini plagis proh quanta innititur! Umbri*

*Quantus honor plagis, gratia quanta datur!  
Sanguinis hic pretium. gens eia huc perge. futuro  
Stigmate praesentes signifer emit opes.*

*S. Francisci Transfiguratio. 95.*

*Torqueor, igni homo raptatus ad aethera curru  
Dum veheris Genitor, quid nova monstra petant?*

*Praefecit rheda Titan Phaetonta paterna,  
Creditus hic ne ulli stirps aliena foret.*

*Sic, Pater, ut supra testetur origine cretum,  
Sol Deus aethereo te jubet axe vehi.*

*Idem Argumentum. 96.*

*Ludimur? anne alium Phæbi capit orbita Phæbum,  
Luxque recens jubari certat Apollineo?*

*Franciscus solare micans, flammantibus ostris  
Jam sucti cineris vertere syrma potest.*

*Quem nil terra facit, sic tollunt sidera. majus  
Aethere fit lumen, qui fuit orbe Minor.*

*S. F. ex latrone Religiosum delegit. 97.*

*Quin ex fure malo Fratrem sibi deligat Umber,  
Ex pejore lupo qui modò fecit ovem?*

*S. P. Francisco. 98.*

*Nondum epus absolvi laudum, Sator alme, tuarum.  
Laus est, cum laudes sint sine fine tuae.*

*Eidem. 99.*

*En primam tibi nuncupat Sacerdos,  
Ut fas, Centuriam, faber secunda  
Quam nondum satis expolivit ungue.*

*Tu nostra faveas, precor, Camæna,  
O quem somnia vana, fabulasque*

*Oblitus veterum, levesque nugas,  
Jam puber cecini, sacrum Lavernæ,  
Phæbe posthabito, incolam sequutus.*

*Quod si virginæ sales juventa,  
Et Francisciadum jubar perenne*

*Vultu exceperis, ut soles, orante:  
An dentes critici, putresque nases,*

*An mimi grave murmur oscitantis,  
Et rugas metuam Catonianas?*

*Te solum ingenuos probante lusus  
Omne hinc dixero me tulisse punctum.*

*Quin pergens digito ciere nervos,*

*Totanique Aoniam bibent, opella  
Raptim ferre coronidem studebo.  
Sic unum tibi sistimus libellum,  
Quò possimus & alterum dicare.*

*Peroratio. 100.*

*Codex ò timide, aspera que nondum  
Tactus pumice, nesciusque lima,  
Incudis, trutinæ, ac recentis unguis,  
Exi jam novus ad Theatra, quò te  
Invitum è latebris trahunt poetae.  
Ipræcox tinea cibus voraci.*

*Te mercator inutilis librorum  
Haud ulla expositum videbit arte,  
Nec membrisabilem, nec ore corruptum.  
Chartis Colchica vellera invidebis,  
Auri fibulam, & icones Quiritum,  
Quas de more colens minor sedeto;  
Non ausure superbiens videri.*

*Nostre heu vix bene te Calata noscet  
Reddentem pueri vicem poeta,  
Cujus nomen, opus, genusque norat,  
Quem gratis aluit benigna cunis.  
At heus quò petis, usque finiendus,  
Exitusque ope, non probatus hospes?*

*Quò festine præambulo vagaris?  
Orphæum fugis otiosus Hæmum;  
Jamque alta juga deferens Lavernæ,  
Urbanum ingrederis videre limen,  
Et rugas Cynici severioris,  
Qui suesti per agrosque, suaviūque  
Mecum ludere collium recessus.*

*En dudum cilio minax recurvo  
Ungues exacuit, politque censor.  
En imis cariem fovens medullis  
In te scommata Zoilus volutat.  
Cunctans deficit, advenamque sperat  
Nasorum chorus obsidere librum.*

*Suffert tormina mille pedagogus.  
Non hinc de immemori querare Phæbo,  
Dum ludibria sannionis, aspram  
Lævi dum pateris manum Lycambi.  
Vitat Delius urbium tumultus,  
Nec probris adimi finit volumen.  
Nunc oracula Numinis probentur;  
Nam torvis populo legente ocellis,  
Tu cives fugiens, forumque gratus  
Musarum potes ad sinum redire.*



# P. M. BALTHASARIS PAGLIA I C O N A M O R I S CHRISTI, & FRANCISCI.

C E N T U R I A S E C U N D A .

SS. D. N. CLEMENTI XI. P. M.

Nuncupatio. 1.

**P**rotinus expediam sacræ nemora alta Lavernæ.  
Hac etiam CLEMENS otia dexter amet.  
Lustro choros Vatum. patet una, sed omnibus, ades.  
Fallimur? an cunctis non erit una satis?  
Zoilus insequitur? statim benefida paratur.  
Scurra strepit? mystam Principis aula manet.  
Frondebis Æsias mihi tempora crinias: unquam  
Fix arcet criticos umbra paterna cines.  
Quid Pindum subiisse jurat, quid amœna iuventa  
Otia Thymbraea præterisse fide?  
Plausibus exceptum, Phæbo, Ausoniaque probatum  
Pallade dens rudior sæpe momordit opus.  
Est vel Nasonis laceret qui carmen adempti,  
Cui vel thura Getæ, Sauromatæque litant.  
Diceris Hispano Læli oblatrasse poeta,  
Undique Bilbilocos Urbe probante sales.  
Allicit hunc soccus, pictos amat ille cothurnos:  
Instita vos juvenes, castaque vitta fugat.  
Alterapaars longis, brevibus pars altera gaudet:  
Hic trahitur neutris: alter utrisque favet.  
Delicias alii, & nudos venantur amores:  
Sunt quibus & Persi laurus amara sapit.  
Ne morer in reliquis, quisnam satis omnibus? uni,  
Quem loquor, ò placeam! si probet ille, satis.

Programma. 2.

Te cano, Dux inopum: tua per spectacula Vatem  
Ire jurat. tantum spiritus audet opus.  
Nulla Cupidinea caleat mihi flamine Clio:  
Italiam extinguat Pieris unda facem.  
Arma procul: tenuem exuperat Dea bellica nisum:  
Cedere lenta gravi discat arundo tubæ.  
Mens amat in proprium sese diffundere Numen;  
Mens jubet, hæc animi sint monumenta mei.  
Laurus, myrte procul: conjo mihi crine corona.  
Filius cæst, fatear, gratior una tamen.  
Hujus honore tumens grates utcumque rependam,  
Inque salutari carmine multus ero.  
Jamque subaseos meditabor, & antra Lavernæ,  
Unde notam pacis vulnera fecit Amor.  
Ordier & titulos, auctæque encomia Preliis,  
Qualasura Dei crevit ubique domus.  
Cuncta mihi volvenda. Parens adlabere gnato,  
Deque tuo manans sit, rogo, fonte liquor.  
Hunc ego si potem de stigmatibus amne fluentem,  
Castalians sapiet tunc mihi, Janguis aquarum.

Auctoris votum. 3.

Turba Quirinales veniat sibi querere fasces,  
Ardua non humili dans alimenta spei.  
Aut procerum circos, aut perniciose frequentet  
Ætria, sollicito non adeunda pede.  
Oraculum sint iussa foro. det curia nomen,  
Deque suo facilis pendeat ore cohors.  
Alter inaccessos eremiget advena fines,  
Quin vagus Herculeum trans mare tentet iter.  
Hunc Ephesus capiat Trivia simulacra colentem,  
Alliciatve sago Gallia, Roma togis.  
Huic placeant indusque ferax, atque aureus Hermes,  
- Palmifer Ægyptius, populiferque Tradus.  
Me jurat invisis aliò de manibus actum  
Sub viridi tacitos fallere monte dies.  
Aggredier damas, agnum compellere hibisco,  
Rimari nidos dulcis alauda tuos.  
Sic rigidis latè studiis, cura que soluto  
Mens Verbum, Indigetes, te, pia Virgo, loqui.  
Vos Francisciades cœlis efferre, Parentis  
Stigmata, crescentem dicere progeniem.  
Hic rogor, hic nostram requies manet apta iuventam,  
Integra congestas mens ubi tractat opes.  
Hic Lycio reddenda Deo dant otia cautes,  
Queis utinam possis tarda senectæ frui.  
Tunc mihi post canos obitus dulcesceret annos,  
Arida tunc felix ureret ossa rogos.  
Sic Opifex rerum nutu mea vota secundo  
Claudet. abire pias non sinit ille preces.

Aliud. 4.

Rura color en spirant urbana poemata Musæ.  
Urbe moror? Phœbus rustica metra docet.  
Seria volentem torvi inspexere penates:  
Suscipit agrestes Vernia lata choros.  
Aptius ut moduler, fugientem mania, Cives,  
Tegmine sub fagi vena Maronis aget.  
S. Francisci Virtutes. Tres Theologicae. 5.  
Iridis ut ritu summis ligat ima virejens  
Spes, aurata Fides, & rubicundus Amor,  
Sic triplici hoc dono Franciscus, ut inde, fulgens  
Æternam æterno cum Patre sedus init.

Eadem. 6.

Spesque, Fidesque, & Amor ludunt certamine, quidnè  
Dignius? in promptu est. amula vincit Amor.  
Speque, Fideque pares hic æquat, præstat Amore.  
Non aliter poterat maximus esse Mæser.

S. Francisci Humilitas. 7.

Altra subire Gigas frustra elmi quæsit. albis  
Clava via est. parvus illa, quæ larva, capis.



Sideri Dive petens, imponere Pelion Offæ  
 Ne studeas. humili celsior aula patet.  
 Disco Minor; quem montis apex, dubiumque cacumen  
 Allicit, hunc lapsus, certa ruina manent.  
 Per juga, per cautes, per inhospita tecta viator  
 Filius, alme Sator, vix bene tutus erit.  
 Infima dum vallis peragro, via certa vagantes;  
 Sis precor ad superas dux, via, meta plagas.  
 Eadem, & Amoris Dei meditatio. 8.  
 Nil fueram; creat Omnipotens. sum. pecco, revertor  
 Ad nihil. ut recreet, sit nihil ecce Deus.  
 Eadem, qua à Sacerdotio abstinet. 9.  
 Mystra negans fieri, cum possit, Origo Minorum,  
 Proximiò Christo, quò mage distat, erit.  
 S. Francisci Modestia, qua per Alisium incedens,  
 ut concione utebatur. 10.  
 Turpia cum levibus resonarent compita gerris,  
 Nudaque scurrarum staret in ore Venus;  
 Masculus Orator, Fidei vox, præco Tonantis  
 Non tulit obscæni murmur inane fori.  
 Nec magnus vernisse labor: suffusa pudore  
 Ut prope frons aderat, plebs inhonesta silent.  
 Infrenes cohibet linguas, minimumque procacem,  
 Quæque pharetratus suggerit orsa Puer.  
 Arceat ut Venerem, nescis, quo Tullius iste  
 Vivitur eloquio? concio vultus erat.  
 S. F. Prophetia illustris. 11.  
 Astra, faces, lymphas, tumulos, frontemq., manumq.  
 Mystra videns, fictis nutat haruspici s.  
 Præco futurorum clausis Franciscus ocellis  
 Abdita prospiciens, Flaminis ore canit.  
 Ludimur à falsis legimus qui signa planetis:  
 Signifer eloquitur? credite: vera patent.  
 S. Francisci Patientia, cui B. Bernardus os, &  
 guttur pedibus calcatur. 12.  
 Umbrigena ò humilis Patientia, quem pede calcans  
 Discipulus, strato guttur, & ora premit!  
 Disce Minor virtutis opus: nequit altius ille,  
 Quàm morò, compressis gutture, & ore loqui.  
 S. Francisci Paupertas. 13.  
 Vis numerem flavi pretium Franciscæ metalli?  
 Aurea, præstarem, si mihi vena foret.  
 Saturni auspiciis aëas viget aurea, nomen  
 Secula, non v' res imminuere suas.  
 Illius armipotens, necdum satiabale Numen  
 Jus premit, arbitrium fascinat, arma terit.  
 Hoc duce scælis frag'is sua credere carbasa ventis  
 Aggreditur dubia qui ratæ sulcat aquas.  
 Centimani majora fæ sint gesta Gigantis:  
 Plus dabit auriparæ dextra pusilla Mydæ.  
 Æquat Apollineam pernix Atalanta quadrigam,  
 sed gravat invictos aurea massa pedes.  
 Incomito palmas quis non invidit Amori?  
 Hæc tamen Eoo pondere pressus Amor,  
 Das mihi Thyr'sica, auro dum fulgeat, ultro  
 & erret in amplexus Tencra puella juos.  
 Quo puerum perstraret iter, Stygiaque paludis  
 aëre Æas prope Charontis aquam,  
 Oculis tamen que sonat, panemque Trifiduci:  
 Ergo homines aurum placat, ut ossa canes.

Perditus, ut Danaen suberet, sit Jupiter aurum:  
 Aurea pomæ cadunt? Hæculis iste labor.  
 Omnia vincentem si, Dux hæc, viceris hostem,  
 Si sapiens Indas nil reputabis opes;  
 Si tibi pauperies, & iners penuria cordi,  
 Altior hic reliquis nonne triumphus erit?  
 S. Francisci Obedientia. 14.  
 Reddere opes Domino ceu nil foret, Alpha Minorum;  
 Vis quoque velle tuum restituisse Deo.  
 Si malè pro toto libertas venditur auro,  
 Hoc simul, atque illam vendere quantum opus est!  
 S. Francisci Castitas. 15.  
 Virginea insignis pietate Subasius Heros  
 Cypridis ad pugnam cum raperetur, ait;  
 Otia, segnities, somnus, caro, fœmina, vinum,  
 Prosperitas, ludus, carmina, forma, puer;  
 Arma Cupidinea, & toto Venus agmine, nudum  
 Me petite: en votum. sat mihi pro clypeo.  
 S. F. flammis Cupidinem vincit. 16.  
 Urit Amor Divum: sese hic incendit, & hostem:  
 Semicremis plumis promptius ille volat.  
 S. F. idem præstat & nive. 17.  
 Ardentem cælos ardens Venus obsidet Umbrum,  
 Algida sed nicens protulit arma pudor.  
 Exutum lanis hyemali veste Magister  
 Se tegit. 1 ut lanam dat Deus ecce nivem.  
 Quis clypeus flammis? glacies. sic protinus arcet  
 Æstatem præcox bruma Cupidineam.  
 Pura viget pietas? candentia vellera firmant.  
 Liquitur in lachrymas? nix calefacta docet.  
 Corde flagrat, dum pelle riget noxus Ætna: pudorem  
 Franciscus nivibus servat, ut 2 Ætna fidem.  
 1 Ex Psalmo 137. 2 Ex Claud. Epig. de Ætna.  
 Duo Superiora Argumenta. 18.  
 Et glacie Æsias te, Cypris, & ignibus arcet,  
 Fulgidiorque rogo, candidiorque nive.  
 Scilicet in duro pietatis flamma rigore  
 Æstuat, inque truci stat plus igne rigor.  
 Eadem. 19.  
 Aspra sese operit nive,  
 Flagrantes patitur regos,  
 Ut sensus scabiem domet  
 Dux Fratrum, decus Umbræ.  
 Laturæ obsequium viro  
 Cum flammis coeunt aquæ.  
 Sanctus, quò Cypris exulet,  
 Quot miracula congerit!  
 Si tu partus aquæ Venus,  
 Si conjux tibi Auliber,  
 Cur nunc imperio Patris!  
 Et matrem soboles fugit,  
 Et conjux dominam jugat,  
 Eadem. 20.  
 Pande Venus fucata sinum, Tyricque veneno  
 Mendaces rubeant absque pudore genæ.  
 Ubra pressa dolo srophium tegat. habet odorum  
 Serica Panchais cyclas aromatibus.  
 Cumque madens aurata gerat crinialia vertex,  
 Divos Erythraas claudat amictus opes.



*Sic t: Signiferi faukis inbiantē Mythenais.*  
*Prateriens iactas non rapit aura preces.*  
*En modò se glacie, prunis modò terga volutans*  
*Indicium nutus promere sponsus amat.*  
*Quid nix præstat? ajs. thalamum, ceu candida vestit*  
*Sindon. quid flammæ? rada jugalis erunt.*  
*Te quoque vir maneat certæ fiducia palma,*  
*Cui celerem faciunt albor, & ignis opem.*  
*Cypris, Amor vexant? prosunt nix, flammæ. timebit*  
*Nudus Amor glaciem, Cypris amicta facem.*  
*S. F. idem & spinis alsequitur. 21.*  
*Nititur alma Venus sese oblectare Magistro:*  
*Mollis, ut illaqueet, retia tendit Amor.*  
*Frontis honos pulchræ, collique inoperta venustas*  
*Semideum tacitis obsides illecebris.*  
*Quid faciat? sæcone cadat jam saucius ictu,*  
*Anruat ad pugnam? cautus utrinque timet.*  
*Dum dubitat, nutantem animum vi Flaminiis uri,*  
*Arcanumque sibi sentit inesse rogem.*  
*Sylva fuit, specubusque frequens, atque aspera dumis:*  
*Hanc subit: hic denso stat latuisse rubo.*  
*Nec mora: corda tepent extinctis tutæ favillis.*  
*Spicula sic Pueri spina cruenta domat.*  
*Præda fugit Paphias inter spineta sagittas:*  
*Quin perit orta mari sanguina mersa Venus.*  
*Ergo adeundo repres si certa est palma, juvenis*  
*Disce verecunda castra pudicitia.*

*Idem Argumentum. 22.*

*In te spicula flammea*  
*Dum torquet Veneris puer,*  
*Quàm tutè aufugiens Pater,*  
*Dumoso latitas rubo!*  
*Spinis fulmina conteris,*  
*Clavum clavus ut eruat,*  
*Ut Magæ veteris memor*  
*Spinetum Venus horreat.*  
*Si carnem facis, ut feram,*  
*Aptè repribus abderis.*  
*Hic porro Idalias faces*  
*Cordi ne paveas tuo.*  
*Oreb culmina contuens*  
*Dux causam Isarides docet,*  
*Quò vis ignea ledere*  
*Sacrum non potuit rubum.*

*Tria Superiora Argumenta. 23.*

*Qui Paphio servas immunia corda veneno,*  
*Idaliisque times protinus igne coqui;*  
*Vis pereat malesuada Venus? docet Umbria. tanto*  
*Spina, nix, flammæ sint medicina malo.*  
*S. Francisco spinis involuto, prodeunt rosæ. 24.*  
*Hætenus haud longum florens rosa pignus amorum*  
*Grata Dionææ ver breve protuleram.*  
*Nunc inimica Deæ, dum purius oscula Numen*  
*Tigit, inoccidui nuncia veris ero.*

*Idem Argumentum. 25.*

*Membra rubus calefacta domat. fit floridus. aptè*  
*Quæ pupugit Venerem, dat modò spina rosas.*  
*Certabas Genitor. gladium tibi spina paravit.*  
*Uticis. adhuc eadem florida jerta parat.*

*Idem Argumentum. 26.*

*Edit humus maledicta repres. ubi fixit amoris*  
*Oscula Franciscus, dat benedicta rosas.*  
*S. F. rosas Januario natas legit. 27.*  
*Tempora sic Divo parent! dat frigidus olli*  
*Intempestivas Janus habere rosas.*  
*Rite legit Cyprios hyberno frigore flores*  
*Æstu qui in Cyprio scit subisse nives.*  
*Auctoris Votum. 28.*  
*Laureaserta procul. crines mihi spina cruentet &*  
*Spina tua, Omnipotens; qua rubuere genæ.*  
*Spina, Subasæi pupugit quæ membra Parentis,*  
*Cum quateret mollis pectora nuda Venus.*  
*Nam sacra dicturus, jugi dum concitor æstro,*  
*Suppetias Vates non nisi sente paro.*  
*Scilicet æquoreo transfixus tempora junce,*  
*Vile decus frondis rebor Apollinea.*  
*Spina datur? calamo Christi pia vulnera scribam.*  
*Gutta cadit? scribam sanguine stigma Patris.*  
*S. F. quinque Fratres ad martyrium incendit. 29.*  
*Quinque inopum lectos Heroas ab agmine mittit*  
*Dux Pater, Occiduis bella movere plagis.*  
*Arma Fides invicta parat. jam Ditis ad oras*  
*Itur, ubi Eumenidum vis, ubi mortis iter.*  
*Caca furit Nemesis: licet Rex malus uti*  
*Ense jubet. pejor iussa satellites agit.*  
*At Francisci adum calcar mens passa Parentis*  
*Degeneres clausa non bibit aure metus.*  
*Irruere ad pugnam, Hesperium sprevisse Tyrannum,*  
*Sæva pericla pati, norma paterna docet.*  
*Illicibus ossa sonant: vox altius intonat. atris*  
*Liberiis, vincto corpore, corda vacant.*  
*Barbaries o atrox! tortoribus instat Enyo;*  
*Hac duce dextra riget, quæ modò lasa stetit.*  
*Acapite ad calcem nulli pars integra. tecum*  
*Gratuler, o nostræ gloria militiæ.*  
*Quod superest, sitiens populatur inermia cuspis*  
*Pectora. scissa caro est. vulnera vulnus habent.*  
*Membra cruenta rubent. vestri jam sanguinis amne*  
*Fit speculum. in speculo Patris imago niter.*  
*Hinc ubi plaga omnis plagam coalescit in unam,*  
*Vos ego Francisci vulnera quinque putem.*  
*Eorumdem exemplo S. Antonius Patavinus*  
*martyrium exoptat. 30.*  
*Mille virent madida fraterno sanguine palma.*  
*Te cruor ad pugnam, ritu elephantis, agit.*  
*Laus aliena tibi cum sit quasi calcar, Ibere,*  
*Hanc dignam invidia quis neget invidiam?*  
*S. F. S. Antonio publicè docendi dat facultatem. 31.*  
*Fratribus arbitrium divina arcana docendi*  
*Lyfiadæ hortatu dux facit Æssias.*  
*Quæ mora discipuli? ceptis date nomina. vobis*  
*Hic via certa, insons, tuto adeunda pede.*  
*Sanctior an fuerit doctrina, aut purior, illa,*  
*Quam Franciscæ probas, quam Patavine petis?*  
*Eiusdem Sancti Antonii miracula. Paraphrasis. 32.*  
*Thaumata si queris, Lachesis vomit ægra cadaver.*  
*Error abest, veri luce fugante delos.*  
*Hinc erumna procul: Cæcodamon binc procul. astræ*  
*Ingluvione lepra pharmaca tuta domant.*



Morborum abscedit legio. iactata procellis  
 Equora, jam vento prætereunte, silent.  
 Compeditus gentes abeunt, manicisque soluta.  
 Res, membra amisit vir; puer? inveniet.  
 Cæca pericla cadunt. parcit vis aspera fati.  
 Hoc Padua, hoc latè mundus uterque canit.  
 In eundem Suefsanorum devotio. 33.  
 Quem civem dedit Hesperia natalis, amico  
 Corde suum civem gens Patavina facit.  
 Sic spes, dius amor, pietas, fiducia, cultus  
 Quod natura negat, vindicat arte decus.  
 Ergo agè Lisiada faustos venerare triumphos,  
 Antonique pium tolle Sueffa iugum.  
 Hac satage, ut clarum patriæ secleris honorem,  
 Sitque Sueffanus qui Patavinus erat.  
 Eorumdem SS. ara Narcisso ornata. 34.  
 Quæ vos Gnate, Sator, pictos hic monstrat, olentis  
 Munere Narcissi cinctâ tabella rubet.  
 Languit hic propria deceptus imagine, posthac  
 Languebit vestris captus imaginibus.  
 S. F. F. Eliam a Cortona Generalem delegit. 35.  
 Dux venit Elias. ubi sufficit Umber Etruscum,  
 Incipiet nobis spiritus esse duplex.  
 Eiusdem hortatu septem SS. Minoritæ apud  
 Ceptam martyrii palmam asequuntur. 36.  
 Hæreo: puniceis qua crevit origine torrens,  
 Qui properat muros lambere Cepta tuos?  
 An Fratrum immiti fossis cervicibus ense  
 Deservit multus languida membra cruor?  
 Scilicet innocuus per orantem fluctuat urbem  
 Sanguis, & undanti porticus amne tepet.  
 Quis Nilo stupeat septemplæce, fluminis æstus  
 Nunc ubi septeno profluit e capite?  
 Illius Egypti tellurem gurgis opimat:  
 Hoc haustu satiat nobilitate Fidem.  
 S. Francisci hortatu S. Clara mundo valedicit. 37.  
 Scilicet inventam claustris abcondere gazam  
 Proxima Francisco cura, laborque fuit.  
 Scla domi, sociasque cavens sub fornici parvo  
 Castra pudicitie sanctior Umbra locat.  
 Vepre coronatus cupidos nil flos pavet unguis:  
 Accipitrem n de condita lauit avis.  
 Incomes est cui Vsta frait, quò nomina servet  
 Virginis, & fratrem casâ Dana fugit.  
 Quem comitem admittas hinc fœmina disce. puella!  
 Clausa seris tutum cella sodalitum est.  
 Eisdem cœnantibus, don us ardere visa est. 38.  
 Par castum cœnat. flagrant triclinia. mirum:  
 Ardet ubi paries, vir, mulierque tepent.  
 SS. eorumdem multiplicata Religio. 39.  
 Quot Franciscæ mares, quot sunt tibi Clara puellæ!  
 Te Superum thalami jexus uterque manent.  
 Integra Relligio! replet, æternumque replebit  
 Dimidiumque soli, dimidiumque poli.  
 Eadem Diva Eucharistia Saracenos evertit. 40.  
 Invadunt, cui Clara præst, mille agmina claustrum.  
 Ungue furit vultus. fida Columba gemit.  
 Non aliter cegente metu sub matribus agna  
 balatum exercent, lûsirat ubi antra lupus.

Dum timet imbellis funesta pericula sexus;  
 Una petit Mauras casta Diana feras.  
 Vix te Christer rapit nivea sub nube latentem,  
 Jamque arcet piceos, exoculatque greges.  
 Arma vides? mirare fugam? quin desine. tanti  
 Non potuit Solis noctua ferre iubar:  
 Eiusdem tumulus. 41.  
 Viva bonum, defuncta bonum das Mater odorem.  
 Fœmina sic bene olet, quæ bene semper olet.  
 S. F. JESU Nominis cultor. 42.  
 Vir jussu & lapides, plantasque, hominesque, ferasq.  
 Tartara vi superat, Calicolasque prece.  
 Omnia Signifero parent. cur? nomen JESU,  
 Quo Dux armatur, i Stryx, humus, astra timent.  
 1. Ad Philipp. 2.  
 S. F. ad Cristi Crucem ubertim flet. 43.  
 Parce queri os sacra qui plangis in arbore turtur.  
 Pabula tristitia luctus amara feret.  
 Quòd si flens lignum perfundes Dive, dolorum  
 Hæu tibi quot fructus planta rigata feret!  
 Eiusdem ara violis ornata. 44.  
 Floret adhuc Patris Verbi pro funere planctus:  
 Hinc agras violas ara bicornis olet.  
 Floscule ne timeas: nullo siccaberis æstu:  
 Ut riget, æternas en dat ocellus aquas.  
 S. Francisci præ fletu oculorum infirmitas. 45.  
 Corde gerit nubem, pluviasque Subasius ore  
 Exprimit. hinc gemini lumina Solis he bent.  
 Quid Patris lachrymæ? flammæ testantur amoris.  
 Cæcutit. meritò. lumine captus Amor.  
 S. F. candente ferro non læditur. 46.  
 Languidus ora, fibras, ceu vulnera nactus amoris  
 Lemnia Rex inopum cogitur arma pati.  
 Uritur, ardet, hiat flammanti cuspide corpus,  
 Nec fremit indignans, aut petit æger opem.  
 Cur tetigit, nescis, candens impune metallum?  
 Qui constanter amat ferreus, igneus est.  
 Idem Argumentum. 47.  
 Exprimis irriguas imo de pectore guttas  
 Flens Pater: hinc lucem noctis imago tegit.  
 Stat face, stat Coe morbum popularier ense:  
 Nec face torquentur membra, nec enje dolent.  
 Invictum Eaciden Stygiis dat Juno lavacris:  
 Te validum proprii luminis unda facit.  
 S. F. pro Archangelo Michaelè jejuna. 48.  
 Dive, poli Athletæ Jæcras jejunia. nostri  
 Quo duce, quæis armis hostis inultus abit.  
 S. F. in Alvernia jejuna, stigmatibus  
 decorandus. 49.  
 Sepe sitam Dux pauper adit, ceu Christus, eremum:  
 Hæc vigil assueto parcit, ut ille, cibo.  
 Dum litat æterno famulus, Dominusque Parenti,  
 Vescier æterna gestu uterque dape.  
 At Christum in Satan si vertere Lucifer optas,  
 Angele Semideum nunc facis ex homine.  
 S. Francisci frons, os, humerus Tau litera  
 consignantur. 50.  
 Palma, latus, pes stigma gerant. frontè, os, humerosq.  
 Crux notat. est, Genitor, Crux tua, tuque Crucis.



Ss. Francisco, & Angelo Carmelita invicem prophetantibus, S. Dominicus, Amen, respondit. 51.

Angelus Umbrigenæ dum stigmata nunciat, olli  
Dum canit hic palmam, subdit Iberus, Amen.  
Rem probat eventus: queis vulnera spectet, ocellos  
Jam referet tantis testibus aucta Fides.

S. Francisci Stigmata à Ss. Apost. Jo: & Paulo prædicuntur. 52.

Paulus, Joannes præmonstrant stigmata. quis non  
Vos capiat Superum lingua, Deique tuba?  
Quisquis adhuc nutans minus expergiscitur, illum  
Sepitum haud quaquam dixero: mortuus est.

S. F. sacris Stigmatibus insignitur. 53.

Jam patriæ fines, atque otia lenta perosus  
Antra Subasæus lustrat Etrusca Pater.

Mons erat abruptus, scipulis ingentibus asper,  
Densa cavernosus quæ tegit umbra vias.

Huc venit: appositam studiis hic natus eremum  
(Cura prior) fueris abstinet ora cibis.

Stat ventos, imbresque pati, stat poplite flexo  
Calitibus crebras ingeminare preces.

Liquitur in lachrymas, ægroque resolvitur æstu,  
Mors ubi Soteris pectoris ima quatit.

Non animo exciderant languorum asperrimus ordo,  
Panarum Iliades, triste laboris onus:

Scit spinas, alapas, jejunia, sputa, columnam,  
Fel, cannam, clavos, vincula, flagra, Crucem.

Omne deloris opus manet alta mente repostum.  
Mors animæ dolor est: vita doloris amor.

Arctius orantem ter flammæ occupat ardor:  
Jæta jacent blando viscera deliquio.

Ignis edit fibras, hæret pia cura medullis.

Os Christum, Christum cor, animusque sonant.

Fulchrius interea lævi de cardine cali

Sol micat, & dium fundit ubique jubar.

Ardet Apollineis circumdata Vernia flammis:

Obstupet ignotas proxima turba faces.

Oblitus pecorum videt ardua monstra bubulcus,

Immemor herbarum thaumata spectat oris.

Nec mora: dum celos ulnis meditatatur apertis

Flens Genitor, supera Flamen ab arce venit.

Jamque latus Deus ipse ferit. rubet utraque palma

Vulneribus veris, utraque planta rubet.

Proh stupor! æternus consignat membra character.

Pro stupor! in famulo Regis imago patet.

Pergite Christiadae magnum hic Patris argumentum.

Stigmata viva manent. æqua figura viget.

Secula ne septem stupeant miracula mundi.

Unum pro cunctis fama loquatur opus.

Idem argumentum. 54.

Quinque minus recolens Soteris vulnera, mundus

Torpet iners, dira vix memor historiae.

Pristina quò redeat pietas, in codice vivo

Signifer en quintum monstrat Evangelium.

Idem Argumentum. 55.

Mens tibi dira pati? quis plagæ, aut funeris auctor?

Martyrium ardebas? Dive agè martyr eris.

O amor, o pietas, o aperti incendia cordis,

O super, o animi vis, o amantis opus!

Artubus in Christi quid plagis dignius? illas

Dans homini, poterat num dare plura Deus?

Te, Pater, alterius ne torqueat ira Tyranni,

En tibi zelotypus vulnera figit Amor.

Idem Argumentum. 56.

Temet Alexander cum Divum ab stipite jactes,

Vix plagata rubent membra, pudore rubes.

Nunc agè rex inopi, Magnus concede Minori.

Hunc e prole Deum vulnera quinque probant.

Idem Argumentum. 57.

Quò Soli eripiat radios, adit alta Prometheus,

Ut lumen rapiat Soli, adit alta Pater.

Par via, meta impar: cum sauciet ales utrumque,

Vir plagas odii, Divus amoris habet.

S. Francisci Stigmatum Fides. 58.

Omnia par Domino, stillas quoque sanguine: quidam

Hæsitat: en Thomas nec Vicechryste procul.

Hic tamèn ambiguus palpat, palpansque fatetur;

Dumque aliena videt vulnera, nostra levat.

Quisquis es, o Patris liceat tibi tangere plagas,

Et madidum digito sollicitare latus.

Felix o dubium, nutas dum pectore! certus

Stigmata dum palpas, o pretiosa Fides!

S. Francisci Stigmata Alexander IV. P. M. se vidisse

palam testatus est. 59.

Stigmata quis reprobet? Petrus te Chryste negavit.

Nunc hæres Petri te Vicechryste probat.

S. Francisci Clavi. 60.

Regis imago patet. qui vulnera præstitit Umbræ,

Vulneribus clavos non minus ille dedit.

Sic ducis, & famuli terebrant qui corpora, clavis,

Figitur ille Cruci, figitur iste Deo.

S. F. Icon Amoris. 61.

Te Patriarca videns, quid magnū inspectat ocellus:

Te meditans animus grande volutat opus.

Stigmata quòd speculer, Christi mihi crederis Icon,

Sifsel, Crux tecum, Spina, Columna forent.

At sapidis quæ sponte cibus absinthia mîsces,

Dic, rogo, gustati num vice fellis erant?

Ipse columna tibi es, constans ubi vulnera suffers:

spina procul? præstat spinea ferta rubus.

Quid moror? expansis ubi Regem amplecteris ulnis,

An poteras fungi nobiliore Cruce?

S. F. Icon Amoris. 62.

Icona Francisci, Christi que ut pingat Amoris,

Peniculi ad ritum spicula tractat Amor.

Calicus idæam spirat Pater. exhibet umbras

Vernia. pro tabulis en caro sufficitur.

Jamque opus aggrediens vix pictor sauciat Umbram,

Nec mora: Soteris viva figura patet.

Vulnera picture num congrua? num tua, Chryste,

Non nisi sanguineus dat simulacra color?

S. F. Icon Amoris. 63.

Pinxit Amor Christum Francisci in corpore. miror.

Nunquam aliàs cæcus tam bene vidit Amor.

S. F. cum discipulis ante obitum cœnat. 64.

Teque, tuosque cibis jam jam moriture Magister.

Ultima jam valeat cœna, ubi prima vocat.



S. F. æger cantu Angelico recreatur. 65.  
 Ludit ebur : socio vix Aliger occinit : alto  
 Semianimis languent viscera deliquio.  
 Cantibus extructas quis Thebas dixerit ? Umber  
 Ut bibit aure melos , solvitur urbs anima.  
 Dum gemit arcano vir pondere pressus , orantes  
 Dans fidicen versus , pharmaca tuta parat.  
 O mihi par utinam venis exæstuet ardor !  
 Dummodopar nostro sit medicina malo.

Idem Argumentum. 66.

Musa canit : valet Æsias . ne sperne Pœdesm  
 Ordo Minor . Patri profuit illa tuo.

S. F. moriturus . 67.

Crux ubinam , Christi vivax ut spiret imago ?  
 Sic dispar , similis qui modò vixit , obit ?  
 Anne humilem vita mors tolli non sinit ? an quòd  
 Mors fuerit gravior non habuisse Crucem ?

S. F. moriturus lateris vulnus abscondit. 68.

Siccine , postremo nutant ubi pectora motu ,  
 Flens Pater , indicium vis laterale tegi ?  
 Ubra sic Natis fontem sitientibus abdis ?  
 Limina sic tute claudis aperta via ?

Fallimur ? anne metus , lateris cum vulnere condas ,  
 Ne , velut a Christo , sanguis , & unda fluant ?

S. F. moriturus brachia cancellat. 69.

Aspice , quisquis ades , morituri brachia . signum  
 En Crucis efformant . hoc Minor Ordo cole.  
 Inde Crucis species ulnis composta paternis  
 Ut maneat , nobis stemma perenne datur .

S. F. moriturus Fratribus vel absentibus  
 benedixit. 70.

Dona paternafluunt . omnis capit omnia Frater .

Ast ego sum parvi pars , licet ima , gregis .

Me simul , alme Sator , terra pinguecine ditas .

Me , Genitor , cali vis quoque rore frui .

Sancte , velis , queso , morituro reddere Nato

Virus , quas vivo das moriturus opes .

S. F. moriturus Psalmum 141. recitat. 71.

1 Regis opem quarens , bis questibus athera rapi :

Addidit enixas vox geminata preces .

2 Hinc ante ora Patris stat amica effundere vota :

Stat Patris ante pedes ponere mentis onus .

3 Dum feror extremam fato cessurus ad horam ,

Te mihi jam nota non latuere via .

4 Semita , quam supra assiduus vestigia pressi ,

Implicitos laqueos ad mea damna regit .

5 Dextra ubi porrigitur , tectis specular ab alto ,

Si mea quis nossset corda , nec ullus erat .

6 Quòd miser aufugiam ? nequicquam scetior asyllum .

Spiritus haud unum , qui tueatur , habet .

7 Numen adire iuvat . tu spes , tu portio , dixi ,

Qua facit aternas regia celsa dies .

8 Supplicis obsequio faciles da protinus aures ,

Mole gravor : vitam pondere pressus ago .

9 Selve jugum , da vincla teri ; nam turba nocentum

Me super impositis invalere malis .

10 Vota soluturam retrahas e carcere flamen ,

Me Superis gratum premia digna manent .

Sic ait atherream properans Franciscus ad aulam ,

Et pius hac inter carmina cycnus obit .

S. F. nudus , humique stratus emoritur. 72.

Scilicet infensus sibi met dux classis egenæ

Nudus , humique jacens ultima fata subis .

Stramine operta rudi temnis tua corpora vivens .

Mox , ubi veste carent , temnis & emoriens .

Post funus cessat livor , parcitque sepultis :

Tu vel membra , Parens , exanimata domas .

S. F. mortuus celos super nubem ascendit. 73.

Ne raperet Soli lateralis plaga niterem ,

Sanguineum clausit dextra paterna jubar :

Semper ubique humilis : sic dux ubi migrat ad astra ,

Ne sol credatur , vult modò nube tegi .

Idem Argumentum. 74.

Effigies est visa Dei sub imagine nubis ,

Nunc subit effigiem nubis image Dei .

S. F. post mortem , ut sidus , celos ascendit. 75.

Jam rapitur , ceu stella foret , Franciscus ad astra .

Reprimat hoc utinam turba superficies iter !

Lucifer ò humilis calo tot sidera reddat ,

Quot celo elatus Lucifer eripuit !

S. Francisci Anima a Deo , a Virgine , a SS.

recipi visa est. 76.

Sancte colis vivens Divos , Matremque , Deumque :

Divis , Matre , Deo mortuus exciperis .

S. F. pauper , & humilis celum dives ingreditur. 77.

Vestibus , ere , cibo tua dextera fovit egenos :

Dives erat , foveo paupere , pauper abis .

Si vivens inopum turba tua , teque dedisti ,

Functè Sator dignum Calite tegmen habe .

Murice quam tinxit , quam vellere texuit aureo .

Te memor hac vestit cyclade pauperies .

Nunc iter ad Superos . immenso hinc sænore , Praeses ,

Quas dederas olim , semper habebis opes .

S. Francisci cadaver B. Jacoba Romana sindone

obvolvit. 78.

Manibus hac sanctis cura monumenta suprema ,

Conscia jam fati ducit ab Urbe nurus .

Scilicet auratam percurrrens pectine telam ,

Lectæ simul Phrygia stamina pinxit acu .

Insta sic pietas , auctis in funere pompis ,

Tegmine vult posito membra paterna tegi .

Stemmata ne postbas tumeas Cleopatra sepulchri :

Dignius hac urnam sindone Roma parat .

S. Francisci exequit. 79.

Et palma foliis , & ramo agrestis olive

Patris ad exequias obvia turba venit .

Scilicet alterius non mavult frondis honorem

Templum , ceu Solimam , dum Vicechristus adis .

S. Francisci in Aede S. Mariz Angelorum

exequit. 80.

Virginea , athereus quam personat Ales , ab Aede

Praefica turba procul , nenia maesta procul :

Digna Cenethliaco Sanctorum fata . cadaver

Questibus humanis conditorare nefas .

Angelus , & Mater sunt Christi ad funera . grator ,

Exequias mereas quòd , Sator alme , pares .

S. Francisci Sepulchrum in Colle Inferni. 81.

Urna reis factus , arcubar Collis Avernì :

Christiferum condens , vox Paradysus ero .



S. Francisci Cor. 82.

1 Cor ubi thesaurus. thesaurus corporis urna  
Clauditur: una eadem Cor Patris urna tegit.  
1. Matth. 6.

S. Francisci Sepulchrum P Custodis curæ  
committitur. 83.

Hesperii custodem hortique, aurique draconem  
Amphitrioniadae laus domuisse fuit.

Theauri monumentum omni pretiosius auro  
In Paradisiaci viscere Collis adest.

Hic labor Herculeus frustra. stans limine Custos  
Non hominum ingenio, vique, doloque cadet.

S. Francisci Sepulchrum Summus Pontifex  
visit. 84.

Tres Verbi infantis visunt cunabula Reges:

Francisco infanti defuit illa trias?

Quis cunæ carvere, ornatur honoribus urna:

Supplicat ex functo trina Corona Patri.

S. F. in tumulo stans, non jacens inventus est. 85.

Occidis (heu jactura!) Parens. Ecclesia, quæ nunc

Nixa tibi, heu longum, Religioque gemunt.

An ruat eversa præceptis fundamine Templum?

Non tulit hoc pietas: das miseratus operi.

Contegeris? non inde jaces, stas rectus in urna,

Ne Domus Excelsi, ne tuus Ordo cadat.

S. Francisci Sepulchrum Papa Epitaphio  
exornat. 86.

A'vena gestit ovans, extra dum Patris in urna  
Spectat Apostolica grammata scripta manu.

Quos biberet plausus, intra si forte liceret

Cernere divinis corpora sculpta notis?

S. F. ibidem Romanus dicitur. 87.

Patria cum longo sese efferat Umbria cultu,

Cum civi Asisium templaque, thusque dicet;

Romanum Summus te scribit Mysta. verebar,

Quid causa est? nati fortia, Dive, pati.

S. Francisci Sepulchrum alii ex Summis Pontificibus  
venerantes; Domum immediate Romanæ  
Jurisdictioni subijciunt. 88.

Quæ facit æternos vernans amaranthus honores,

Co pus; humumque colens, advena siste gradum.

Hic Proceres, trino frontem diademate cincti,

Ad tumulum flexo procubuerunt genu.

Clastra vides, seseque æquantem nubibus arcem,  
Et templa, & sacro pegmata juncta thelo?

Hæc dedit Ausonia studiosa potentia gaze,

Quæ jure eximias fovit, & ære plagas.

Hinc & Mysta prior fausto tegit omine claros

Francisci & titulis, exuviasque lares.

Siqua domus paribus jactet se dotibus auctam,

Nulla Domus Dom no nobiliore tumet.

S. Francisci Epitaphium Ænigmaticum. 89.

Siste gradum, flexoque colens hoc poplite marmor,

Da flores tumulo. Patris imago later.

Angelus hunc Matri, quem jam occidere i Sy-  
billæ,

2 Nunciat. 3 ex Umbris 4 editur in stabulo.

5 Crux vocat: ille sequax, passurus ubique, 6 pa-  
rentes

Dum fugit, 7 in Templo dogma salubre docet.

8 Fecundat Cererem, 9 Bacchum deducit ab unda.  
Vos prece 10 mors, 11 languor, 12 Styx,  
13 mare, 14 culpa domat.

Quem 15 malus impellit, 16 firmans bonus An-  
gelus, 17 olli

Pœnarum seriem, signa futura refert.

18 Pontificis nutu, raptis quod vestibibus, 19 amens  
Creditur. 20 hinc saxis, verberare, 21 fune sa-  
tur.

Insuper 22 ut nubes cœlos ascendere visus,

23 Quin Solis faciem, 24 termen habere nivis.

25 Steraitur huic vestis, 26 palmis, oleaque  
triumphat

Ad Solymam. 27 plausu mitis aselle vehis.

28 Ante obitum socios cœna simul excipit: 29 om-  
nes

Inter bisseños 30 proditor unus abit.

31 Terga Crucem gestant. 32 redimit nos sangui-  
ne. 33 punctus

Vepre, 34 super montem vulnera quinque tulit.

35 Latronem indulgens fert secum. 36 potat  
amarè.

37 Voce Daum clamans, 38 in Cruce 39 nudus  
obit.

40 Virgo Parens gremio defunctum amplectitur. 41  
in tum

Sindone cum munda 42 non vetus urna tegit.

43 Custodes lapidem signant. 44. vestram, Inferi,  
ad arcem

Defilic. 45 assurgit, nec jacet in tumulo.

Hinc & præteriens tundit sua pectora cœtus.

46 Filius verè non erat iste Dei.

1. Vide Ep. 15. cent. 1. 2. Vide Epig. 18. cent. 1.

3. Ep. 25. c. 1. 4. Ep. 23. c. 1. 5. Ep. 31. c. 1. 6. Ep.

42. c. 1. 7. Ep. 47. c. 1. 8. Ep. 56. c. 1. 9. Ep. 59.

c. 1. 10. Ep. 84. c. 1. 11. Ep. 73. c. 1. 12. Ep. 82. c. 1.

13. Ep. 60. c. 1. 14. Ep. 94. c. 1. 15. Ep. 88. c. 1. 16.

Ep. 65. c. 2. 17. Ep. 51. c. 2. 18. Ep. 42. c. 1. 19. Ep.

45. c. 1. 20. Ep. 41. c. 1. 21. Ep. 39. c. 1. 22. Ep. 73.

c. 2. 23. Ep. 95. c. 1. 24. Ep. 17. c. 2. 25. Ep. 28. c. 1.

26. Ep. 79. c. 2. 27. Ep. 92. c. 1. 28. Ep. 64. c. 2. 29. Ep.

48. c. 1. 30. Ep. 51. c. 1. 31. Ep. 50. c. 2. 32. Ep. 94.

c. 1. 33. Ep. 21. c. 2. 34. Ep. 53. c. 2. 35. Ep. 97. c. 1.

36. Ep. 61. c. 2. 37. Ep. 71. c. 2. 38. Ep. 69. c. 2. 39. Ep.

72. c. 2. 40. Ep. 80. c. 2. 41. Ep. 78. c. 2. 42. Ep. 81. c. 2.

43. Ep. 83. c. 2. 44. Ep. 81. c. 2. 45. Ep. 85. c. 2. 46. Mat. 26

S. F. S. Bonaventuram puellum san tati restituit. 190.

Incubat Etrusco lethalis inertia, Divo:

Serianimem languor, mors diuturna quatit.

Flet Rutela parens. medicis abeuntibus, unus

Stat dolor. en falcem trux Libitina rotat.

Cujus opem rogitet? quid agit? quem vota laceffentè

Te vocat, Asifias. spes alimenta capit.

Da, Pater, ut vivat. vitam puer accipit; clem

Vir Natis vitam reddat ut ipse tuis.

S. Francisci vitam S. Bonaventura describit. 91.

Plurimus aucta Patris per aperta volumina pangens.

Amulus aucta Patris per sua gesta refert.

Quæ licet hanc unus rescrit mystica codex,

Astior at ille quis est una vna liber.



S. Francisci vitam S. Bonaventura scribente, S. Thomas Aquinas, Sinamus, inquit, Sanctum, quia laborat pro Sancto. 92.

Pro Sancto Sanctus, Sancto testante, laborat. Ter, Sanctus, resonat. qui canit, Angelus est. Ejusdem Seraphici Doctoris laus ab Alexandro de Alef. Videtur Adam in homine isto non peccasse. 93.

Discipulum Angelicæ sectantem dogmata vitæ Pectore dum nimio cernit Alensis, ait:

Quin videatur homo vix Alæ filius? Illi Nomen inest Seraphim. criminis umbra procul.

S. Francisci vitæ scriptores BB. Leo, Rufinus, Angelus. 94.

Plena Subasæ's quicumque volumina gessis Aspicias, hæc Fratrum dat monumenta labor.

Pagina tres jactat scribas: in carne Parentis Stigmatis historiam scripserat ante Deus.

S. F. ense à S. Paulo recepto Fratrum injurias ulciscitur. 95.

Torquet atrox Prasul, Nemesis stimulante, Minores. Torqueris Genitor: cingeris: ultor ades.

Jactabas viciſſe lupum: vulgaris habetur Gloria. Pastorem plus domuisse fuit. Idem Argumentum. 96.

Pro Cruce Francisco Paulus cum cederet arma, Adfuit huic operi Petrus, ubique comes.

Jamque ait: electum Socius tibi mutuet ensem Dite: tuis claves non semel ipse dabo.

S. Francisci precibus S. Franciscus à Paula ortus est. 97.

Vis à alta precum! voto Franciscus Olympum Urber sollicitat, jamque oritur Calaber.

Turba Minor tantos recolit non immemor ortus, Grex Minimus cultu plaudit utrique pari.

Laus Patris, ad lucem natos progignere, sed qui Scit Pater & Patres edere, quantus hic est?

S. Francisci, extincto igne, miraculum. 98.

Hic, nigra congesto squalent ubi rudera saxo, Quæ domibus stratis ampla ruina tumet;

Duam Sicana certabant nubibus arces, Stabantque innumeris Oppida plena fecis.

Quæque sinistra patent humilis divertia campi, Ampla suburbani jugera ruris erant.

Hic, ferrugineos ubi compulsi ignis acervos, Multiplici steterat fruge superba Ceres.

Omnia sed ruptis absorbuit Ætna caminis, Cum pronos reperet fax peregrina lares.

Scilicet agrestis turreſque, bonumque labores Sulphureo Siculas dissipat imbre plagas;

Et virides longum fugat in segetes Vulcanum, Quæ rapere urbanas mox minitatur opes.

Jamque superba levi subiisset mœnia saltu, Miscula ni properam Virgo tulisset opem.

Visus & ætherea Franciscus ab arce tueri Rell quias frugum, semirutosque lares.

Hinc jacuit languens, campoque immota resedit Sic velut in solidam versa favilla picem.

Nunc monumenta vigent. pullū fert campus amictū, Anteque murales possidet umbra vias.

Dumque patent alta lapides caligine septi, Hic nota pressura creditur esse color:

Nam Patriæ gemerent ut noxia fata, decebat Tegmine funereo saxa vel ipsa regi.

Peroratio. 99.

Arma, duces, populosque canens, exordia libro Pectore non habili, frontis & imbre dedi:

Si mihi penè sato placidis Dea risit ocellis, Si stetit ad cunas Bellorophontis equus;

Classica rauca vetans, molles animare cicutas Bellas, & lentos jussit inire sonos.

In vetitum nitor. Musa rennente, prophanas Aggredior pugnas, castra, pericla, neces.

Acce fuit studium, quo Caesar abegerat hostes, At quo voluebam carmina, majus erat.

Cum legerem Latinos, & Punica bella, vicissim Pegasides animo bella tulere meo.

Limine Castalidum pendens ter syrma rogari, Bis cytharam petii, teque cothurnæ quater.

Nil mihi Calliope: reliquis fraterna paravit Serta: fidem tribuit, Pieriamque togam.

Quod premerent alii Parnasia culmina Vates, Alta Medusæi pluma vehebat equi.

Me tamen umbra frequens, aut obvia saxa per alpes E foribus Pindi detinere procul.

Consilium pressura dedit. labor omnia vicit: Capinus in alto plectra movere Deo.

Capinus Alvernæ jacros penetrare recessus: Capinus Umbrigenæ Numen adire Patris.

Sic liquit posita gaudere coronide tandem, Arida vena licet, pigraque Musa foret.

Sic & partus hænos. non hinc tibi gratia, Clío, Gorgoneam peperit si mihi suder aquam.

S. P. Francisco. 100.

Principium, finisque Deus. Pater hujus imago Omega sit numeris, ut fuit Alpha, meis.



SPECIAL 85-B  
14351.



